

**EIGHTH LEGISLATIVE ASSEMBLY OF MIZORAM
(NINTH SESSION)**

LIST OF BUSINESS

FOR NINTH SITTING ON MONDAY, THE 7th MARCH, 2022
(Time 10:30 A.M. to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

**FINANCIAL BUSINESS
DISCUSSION AND VOTING ON DEMANDS**

2. **PU TJ. LALNUNTLUANGA**, Minister to submit to the vote of the House various Demands under his charge.

Demand No.	Department	Budget Amount (in ₹)	<i>Demand for Grants Page No.</i>
4	Law & Judicial	28,03,000.00	16-31
12	Parliamentary Affairs	87,80,000.00	67-69
36	Environment, Forests & Climate Change	2,60,84,16,000.00	341-349
42	State Transport	45,69,33,000.00	396-404
TOTAL		3,35,44,42,000.00	

3. **PU K. LALRINLIANA**, Minister to submit to the vote of the House various Demands under his charge.

Demand No.	Department	Budget Amount (in ₹)	<i>Demand for Grants Page No.</i>
17	Food, Civil Supplies & Consumer Affairs	2,60,99,44,000.00	147-155
19	Local Administration	1,20,64,20,000.00	160-167
35	Fisheries	9,29,03,000.00	336-340
TOTAL		3,90,92,67,000.00	

4. **PU R. LALZIRLIANA**, Minister to submit to the vote of the House various Demands under his charge.

Demand No.	Department	Budget Amount (in ₹)	<i>Demand for Grants Page No.</i>
23	Art & Culture	11,59,75,000.00	204-212
27	District Council & Minority Affairs	4,92,03,14,000.00	262-267
33	Land Resources, Soil & Water Cons.	19,80,57,000.00	321-324
39	Power & Electricity	6,44,88,03,000.00	366-375
TOTAL		11,68,31,49,000.00	

H. LALRINAWMA
Commissioner & Secretary

SPEAKER : “Nang erawh chuan zirtirna dik tak nena inhmeh
thu sawi rawh”

-Tita 2:1

Zawhna leh Chhanna kan la ang a, vawiinah hian Member zahawm tak Pu C. Lalsawivungka kha a lo lakal thei lo chhunzawm a ni.

Starred Question No. 121 zawt turin Member zahawm tak Pu Lawmawma Tochwawng i lo sawm ang.

PU LAWMAWMA TOCHHAWNG: Pu Speaker, ka lawm e. Agriculture Minister zahawm tak chhana tan, ka zawhna chu –

Lunglei khawpui eibel ber - Kau ruam, Zawlpui Zau, Tuipawl Zau, Putlungasih ram leh Tuisen Chhuah, Bolia Veng, ram rai tha, (potential area) hi cheibawla tih hmasawn tumna a awm em?

SPEAKER : Chhang turin Pu C. Lalrinsanga, Minister zahawm tak i lo sawm ang.

PU C. LALRINSANGA, MINISTER: Pu Speaker, Member zahawm tak zawhna chhanna chu –

Lunglei khawpui eibel ber zawlpui Zau, Tuipawl Zau, Putlungasih leh Tuisen Chhuah, Bolia Veng ram rai tha (potential area) hi department chuan a ngai pawimawh hle a, central scheme hrang hrang department-in a kalpui te leh State flagship programme SEDP hnuaiha te hmalak mek niin, hmalak zelna tur pawh ruahmanna siam a ni.

SPEAKER : *Zawhbelhna* zawt turin Member zahawm tak Pu Lawmawma Tochwawng i lo sawm ang.

PU LAWMAWMA TOCHHAWNG: Pu Speaker, ka lawm e. Ka zawhbelhna chu –

Rampum huap ei leh bara intodelhna tur ruahmanna leh hmachhawp lian zual min hrilh thei ang em, Agriculture bikah?

SPEAKER : *Zawhbelhna* zawt turin Member zahawm tak Pu Lalduhoma i lo sawm ang.

PU LALDUHOMA : Pu Speaker, ka lawm e. Ka zawhbelhna chu –

Congress sorkar hmasa hunlaia tang tawh khan fertilizer smuggling hi a awm a, sorkar apiangin tihtawp tum lovin vawiin ni thlengin a la kal reng a, kar kal ta lawkah pawh khan eng emaw zat man a ni a. Kan Minsiter zahawm tak hi a nu leh pa atanga ka hriat chian a ni a, amah hi chu ka ringhlel hauh lova, mahse tihtawp tumna hi a awm lo em ni aw, kan en deuh mai mai em ni aw ka ti a. A pawl em emna chu mipuiin *Urea* lei tur kan neilo hi a ni. Burma lamah an tawlh chho vek zel mai a, kan neih chhun, kan hmuh chhun pawh hi a to em em vek mai a, dan anga kalpui hi a ni lova. He smuggling kum rei tak kalpui tawh hi tihtawp tum a ni em tih ka zawt a ni.

SPEAKER : A theih ang anga chhang turin a changtu Minister zahawm tak Pu C. Lalrinsanga i lo sawm ang.

PU C. LALRINSANGA, MINSITER: Pu Speaker, kan Member zahawm tak Pu Lawmawma Tochwawng zawhna, “rampung huap intodelhna tura ruahmanna a awm em” tiha kha, kan hriat angin SEDP flagship programme kan kalpui mek a, Vaimim leh Bekang chin hi nasa taka kalpui kan tum hi kawng khat ni ta sela. Tin, Zawlpui Zau bikah pawh hian hmalak tumna lian tak kan nei a. Tun Ministry-ah hian tum danga la awm ngailo, Land Development hmalakna kan kalpui a. NABARD hnuaiiah hian cheng vaibelchhe 7 district hrang hrangah Land Development kan kalpui a, Zawlpui Zau-ah pawh hian hectare 5 kan kalpui a. District hrang hranga kan leilet hmun te kan zauh belh a, thar chhuah tipung turin hma kan la a ni tih kha ka chhanna ni sela.

Member zahawm tak Pu Lalduhoma zawhna hi, ni e, fertilizer buaipui tu hi kan awm nual a, kawng lehlamah chuan thil buaithlak tak mai kan sawi belh duh chu, Agriculture Department-ah “Mission Organic Value Chain Development Programme” kan kalpui a, chumi chhungah chuan heng fertilizer kan hman hi, leh lamah chuan central ministry, a bik takin kan Prime Minister hian North East bikah hian kan sum chang thlai hrang hrang hralh chhuahna leh foreign thleng pawha out source-a, man man zawka kalpui theih tura hma min lakpuina a ni a. Chutiang taka hma kan lak tum mek lai chuan fertilizer te pawh hman a ngaihna chin a lo awm a. Fertilizer kan lakluha te hi kan hman tho a, chutih rual chuan MOVCB nen hian a inkalh lawi a. Engpawhnise helaiah hi chuan kan mithiam tena a hman dan tur tawh ruahmanna an neih mila kan kal anih chuan thil pawl sawilo tak pawh a ni tho mai. Engpawhnise, Fertilizer dealer license, a bikin *Urea* kan hralh chhuah dan hi, district tinah fertilizer inspector ten uluk taka endikin, an pekchhuah dan, Point Drop Sale Machine-a a lan dan chuan farmers te hnenah pekchhuah thin a ni a.

Tin, Myanmar lama hralh ru thin chungchangah hian official report dawn a awm lo a ni. Engpawhnise, Pu Lalduhoma zawhna kha a tul angin kan lo endik ang a, ‘action lak a ngai anih pawhin action kan lo la ang e’ tih kha ka chhanna a ni e. Tun tumah

pawh hian B. Sc degree neih ngat kha inspection latu turin ruat a ni a, chung ho chuan district hrang hranga fertilizer stock te pawh inspection an nei a, report a rawn la thleng khawm ang a, chuta tang chuan thil chiang zawk la hriat theih turah ka ngai a ni tih kha ka chhanna a ni e.

SPEAKER : Starred Question No. 122 zawt turin Member zahawm tak Pu Zothantluanga ka sawm e.

PU ZOTHANTLUANGA: Pu Speaker ka lawm e. Ka zawhna, kan Art & Culture Minister zahawm takin min chhana tan –
District khawpui hrang hrangah te hian Art & Culture District Office din tumna a awm em?

SPEAKER : Chhang turin a changtu Minister zahawm tak Pu R. Lalzirliana ka sawm e.

PU R. LALZIRLIANA, MINISTER: Pu Speaker, Member zahawm tak Pu Zothantluanga zawhna chhanna chu, ‘A awm rih lo’ tih a ni.

SPEAKER : *Zawhbelhna* zawt turin a zawhna neitu Pu Zothantluanga ka sawm e.

PU ZOTHANTLUANGA: Pu Speaker, ka lawm e. Ka zawhbelhna chu -

District Museum Lunglei-a sak lai mek hi eng tikah nge zawh a nih ang? A sak nan hian khawia tangin nge sum hmuh a niha, cheng engzat nge hmuh a nih?

SPEAKER : *Zawhbelhna* zawt turin Member zahawm tak Pu KT Rokhaw ka sawm e.

PU K.T. ROKHAW : Pu Speaker, ka lawm e. Kan District Council inngahna department pawimawh tak pakhat chu Art & Culture a ni a. Tun kum kal mek, thlaleh maiah khian kan District Council kum 50 tlinna, *Golden Jubilee* lawm tur kan ni a. Chutih laini Mara Autonomous District Council khian Cultural Hall leh Museum mumal tak kan la nei lova. Kan Minister zahawm tak hian MADC-te tan Cultural Hall-cum-Museum changtlung tak min ruahman sak thei ang em tih ka zawt e. Ka lawm e.

SPEAKER : *Zawhbelhna* zawt turin Member zahawm tak Pu V.L. Zaithanzama i lo sawm ang u.

PU V.L. ZAITHANZAMA : Pu Speaker, ka lawm e. Art & Culture Department changtu Minister zahawm tak chhana tan ka zawhbelhna chu –

“DC office kangah document leh record pawimawh a kan chhiat vek takah chuan kan neih chhun record pawimawh, tunlai thiamna hmanga *scan copy* an siam hi riral leh thei mai a nih avangin, Mizoram State Archive-ah a vawn that tura transfer tumna a awm em” tih a ni e.

SPEAKER : Awle, zawhna te pawh a inkarkik viau a. A theih ang anga chhang turin a changtu Minister zahawm tak Pu R. Lalzirliana ka sawm e.

PU R. LALZIRLIANA, MINISTER: Pu Speaker, ka lawm e. Member zahawm tak Pu Zothantluanga zawhna, Lunglei Museum sak mek chungchang kha, Ministry of Culture, Govt. of India atanga hmuh a ni a. Hei hi cheng 8,27,21,000/- vel niin ka hria, chutiang chu hmuh a ni a. Tunah hian a chanve, nuai 413 leh tlem an rawn release tawh a, chu chuan sak mek a ni. A satute hi Okahito Consultancy Services an niin ka hria. A zawh hun tur hi ka hre chiah ta lova, kumin kum tawp lampangah chuan zawh beiseiawm a nih ka ring.

Tin, Pu Rokhaw khan, “Mara Autonomous District Council kum 50 a tlin lawmna an nei dawn a, April thla velah hian, chumi hriatreng nan Cultural Hall min sak sak thei ang em” a ti a. Hei hi PMJVK kan tih tluan theih chuan, chungang tangte chuan sak tum ni ta se la a thain ka ring a. A awm khawpin ka hria a, hei hi kan lo bawhzui ang e.

Tin, Member zahawm tak Pu Zaithanzama zawhna kha GAD lam chan a ni chungin, ka hriat ang angin ka han sawi ve hrim hrim ang a.

DC office kang hi a uiawm khawp mai a, thil hlui tam tak a awm a. Amaherawhchu, kan DC te an lo fel a, thil hlui uihawm zual kha chu Archive-ah leh hmundanga transfer a lo ni hlauh mai a. Art & Culture Director te remhriatnain department hran hran pawhin an thil hlui vawn that a nih theih nan Art & Culture Archive-ah dah turin Dan dinglai a awm tawh a. Chu Dan dinglai chu department-ten an va sawm/ngen ngai lovin anmahniin thil vawn that tura an tih kha chu an pe tur a ni a. Amaherawhchu, department hran hran hian ngaihsak lutuk hi an awm lo a ni. Anmahni Art & Culture hnathawktute hian department hrang hrangah, “in thil neih that leh nakin zelah thangtharte tana thil chen fakawm, kan history-in a rawn ken turte rawn dah tha rawh u” tiin vawi duailo lehkhain kan ti tawh a, amaherawhchu, chhanna fumfe kan dawng lo a ni. Kan DC lam hi chuan an ti tha viau a, tunah vanduinan an han tawk a, department dangte pawh vanduinan tawk vek thei an ni a. Kan officer fel tak takte

hian nangmahni department chhungah in buai viau naa, he kan hnam thil hlute hi lova dah ve ula tiin, vawiin hi sawmna rem chang takah ka ngai a, kan sawm che u ni se.

SPEAKER : Starred Question No. 123 zawt turin Member zahawm tak Pu Zodintluanga Ralte ka sawm e.

PU ZODINTLUANGA RALTE: Pu Speaker, Starred Question No. 123, Horticulture Department changtu Minister zahawm tak chhana tan –

“Khawchhak lama sapthei chingtute tan sorkar-in engnge a tih” tih a ni e.

SPEAKER : Chhang turin Horticulture Department changtu Chief Minister zahawm tak Pu Zoramthanga ka sawm e.

PU ZORAMTHANGA, CHIEF MINISTER: Pu Speaker, Member zahawm tak Pu Zodintluanga Ralte zawhna chhanna chu -

“Kum 2019 leh 2020 inkarah khan SEDP hnuaiah Ngur leh Mualkawi-ah te sapthei chin kalpui a ni a, chu chu tunah hian a theih angin la tih chhoh zel a ni e” tih a ni e.

SPEAKER : *Zawhbelhna* zawt turin Member zahawm tak Pu Zodintluanga Ralte ka sawm e.

PU ZODINTLUANGA RALTE : Pu Speaker, ka lawm e. Kan hriat theuh angin a department lam chu a ni lo nain, Champhai DC Pi Maria CT Zuali khan project a lo siam a. Sapthei Processing Plant, cheng nuai 750 lai mai, hei hi NEC atanga approve-a tihfel mai theih tur niin kan hria a.

“He processing plant lo kal tur hi department-in a lo buaipui dawn nge DC buaipui tur, nge, khilala growers society hnenah he processing plant hi pek tur zawk” tih kha ka zawhbelhna a ni a. Tin, Unstarred Question No. 291, “Hnahlan grape chingtute tharchhuah sa hi Mizoram sorkarin a market a ngaihtuah pui em” tih hi department lama chhannaah chuan, “A chingtuten ngaihtuah pui tura an tih loh avangin la ngaihtuah loh a ni” tih a ni a. Tunah sapthei kan chin tir leh tan a ni a, an tharchhuahte hi sorkar ngaihtuah nghal tur a ni em tih ka rawn zawhbelh a ni e. Ka lawm e.

SPEAKER : *Zawhbelhna* zawt turin Member zahawm tak Dr. Vanlaltanpuia ka sawm e.

DR. VANLALTANPUIA : Pu Speaker, ka lawm e. Chief Minister zahawm tak, Horticulture Department changtu hnena ka zawhbelhna chu -

“Mualthuam tlang dungah hian dragon fruit an ching nasa viau mai a, heng mite hi roadside market shed buatsaih sak theih an ni em” tih hi ka zawt duh a.

Tin, “sawlai tlang dungah sawn production tam tak kan neih avangin cold storage te min dah sak thei em” tih a ni a. A dawtah chuan ‘centre of excellence for fruits’ hi Saichhoh-ah kan nei bawk a, “hei hi mipuite tan engtin nge a function, thlai chi leh thlai tiakte mipuite tan lak theih a ni em” tih te, a function dan hrim hrim kha ka zawt duh a ni e. Ka lawm e.

SPEAKER : *Zawhbelhna* zawt turin Member zahawm tak Pu C. Ngunlianchung a i lo sawm ang.

PU C. NGUNLIANCHUNGA: Pu Speaker, ka lawm e. Ka zawhna hi a chhuak hman dawn si lova, *Zawhbelhna* hun min pek avangin ka lawm hle mai. He mi ka zawhna chhan hi Lawngtlai Horticulture Division hnuaiyah sawn dragon fruit chingtu tur thlang turin a thawktute meeting-in hma la tura a tih angin, a tihlawhtling thei tur, huan ram leh tui nei thate May thla chhungin “a ban in lo phun vek tur a ni” tiin an lo thlang vek tawh a. An lo thlan vek tawh chu cancel sak leh annih avangin zawhna hi ka han siam a ni.

Ka zawhbelhna chu, “Lawngtlai District Horticulture Division hnuaiyah dragon fruit chingtu tur thlan a ni em” tih a ni a, “thlan ni se, eng angin nge thlan an nih” tih leh, “Horticulture Department hnuaiyah hian MNF Party te tan lo hian dragon fruit hi chin ve theih a ni lo em ni” tih a ni a. Department-in a lo thlan tawh kha an thlak vek si a, kan House Leader zahawm tak leh kan Minister zahawm tak te pawh khan *Oath of Office* lak niah khan ‘*tumah duhsak bik leh thlei bik nei lovin ro ka rel ang*’ tiin kan intiam kha a ni si a. Department-in a tihlawhtling thei ngei tur nia an hriat, ram leh tui nei tha, ban pawh an phun tir mek, (an phun vek tawh a) unit khat tan ban 200-in, chung chu cancel sak vek an ni a. Khangte kha pek leh theih dan a awm ang em tih ka zawhbelh a ni e.

SPEAKER : Aw le, zawhna a inkarkik viau mai hlawm a. A theih ang anga chhang turin Horticulture Department changtu Chief Minister zahawm tak Pu Zoramthanga i lo sawm ang.

PU ZORAMTHANGA, CHIEF MINISTER: Pu Speaker, kan Member zahawm tak Pu Zodintluanga zawhna kha, sapthei chin hi a enchhinna atan Mualkawi leh Ngur-ah te chhungkaw 20 ve ve pilot project angin kan han tih tir chhin a. Hei hi tunhmaa sapthei kan lo chin dan thin aia dang deuh, ‘a leitha khur inlehburch system hian kal ta ila a tlo

deuh ang a' kan ti a. A chhan chu, vawikhat sapthei kan han chin kha kum 3 kum 4 bak a daih lova, a tar ve thuai si a, a danga tih zel kha a buaithlak a. Chutiang chuan keima rawtnain, "pilot project ang deuhin ti teh u" a ka ti a. A khur lai ila, a vawikhatnaah leitha dahin han ching ila, chutianga a kal chhoh lai khan a bulah khur dang lai leh ila, tichuan, fur laia kan thlawhna hnim hlo leh a hnah tla tawih kha a khurah khan hai lut nghal ila, kum hnih chhung chuan a khat vek ang a. Pakhat a tar dawn tihah khan a khur dangah khan kan ching leh nghal ang a, a khur hmasaa chin kha a lo tar takah chuan kan clear leh ang a. Tichuan, khur pahniha a hnah leh leitha kha a inlehburch khan ram hran hran zuan lovin a tih dan a awm ang a kan ti a. Chu mi atana project (enchhinna) kan han kalpui chu a ni a. Tam vak lovin tan ila tiin In 20 ve vein kan han tan a, a that pawh kan ring a.

A tirah tlem tea tan kan nih avangin khawlpui nena han beih kha kan la zuam chiah lova. Chhingchhip lama khawl han sawn phei dawn ila, sawlama miten an lo ui ve bawk si a. Tin, sapthei that duhna chu khi lai Champhai tlang dung khi a ni bawk si a. Chuvangin, Chhingchhip lama a khawl awm kha sawn chhuak chuang lovin, a tul angin kan chin tam theih dan azirin a khawlte pawh kan ngaihtuah zel dawn nia kan ti a, chutiang chuan a bul kan han tanna a ni. Amaherawh chu, sapthei hrim hrim hi Champhai tlang dung velah khian a tha duh em em mai a. A thatlohna ber chu a tar hma a, a tara han lehburchna tur kan siamloh kha chuan a thar bawk a tih a ngai dawn a, a hautak lutuk a, kha mi *solve* kan tumna kha khi ta kan kalpuina chu a ni. Tuna kan tihah phei hi chuan chhungkaw khatah ₹12,200/- chuang deuhhlekin project kan siampui a, a chhan chu, a zamna leh thil dang neuh neuh a ngaih avang khan, kha kha a bul kan han tanna a ni a.

Tin, kan DC-in a khawl an lo ngaihtuahpui kha a lawmawm khawp a, kha khawl kha khita bun kha a that ber ang kan ti a. Entirnan, sorkar tan khawl sumdawn nana hman chi enkawl hi a hautak a, a hlawhtling lo fo thin a. A tha ber chu, a chingtu ten society siamin an enkawl hi a hlawhtling berin kan hria a, grape tan pawh, chung chu kan ngaihtuahnaah a awm a ni.

Tin, grape hi engtia tih hi nge tha ber ang tih kan sub-committee te pawhin an han en a, a alcohol content hi rinaiin a sang a, a ruhi theih ang reng viau bawk si a, a tihhniam dan a awm em tih hi. An en vel mek a, report sorkar-ah an rawn pe ang a. Lehlamah kan prohibition kalpui nen, lehlamah a alcoholic content lo sang duh viau bawk nen, a siamrem dan kha a awm em tih kha tunah chuan kan thlir mek lai a ni e.

Tin, Member zahawm tak Pu Vanlaltanpuia zawhna, "Mualthuam Centre of Excellence" tih kha, kha lamah khan cold storage pawh kan nei bawk a. Tichuan, Saichhoh bulah khan kan ti a, a hlawhtling khawp a. Sawta tang sawn a chi a ni emaw,

thil dang pawh midangin a zar kan zo theihna tur kha kalpui mek a ni a. Israel aiawhte pawhin an rawn en a, a lawmawm khawp a. Tha lehzuala function thei turin kalpui zel pawh kan tum a.

Tin, ‘roadside market shed’ tih pawh kha a theih anga tam tih zel kan tum a, hei hi kan mipuite dinhmunin a mil tawk leh khualzin tam takin kan mil tawk a nihna lai a awm a. Cold storage tihbelh zel kan tum ang a, roadside market shed pawh tihchhoh zel kan tum e.

Tin, Member zahawm tak Pu Ngunlianchunga zawhna kha, dragon fruit hi Lawngtlai District-ah hian kum 2020-2021 khan MIDE Scheme hnuaiah Unit 10 leh SEDP hnuaiah Unit 10 allot a ni a, heng allotment atang hian huan nei tha leh hlawhtling thei ngei tura kan beiseite chu Field Staff ten an huanah an verify a. Tichuan, chuta a hnuhma nei tha leh dragon fruit chin lama tuite, chung scheme-te tihlawhtling thei ngei tura an ngaihte thlan an ni a.

Dragon fruit hi a ching duh zawng zawng chin tir theih a nih lohna chhan chu, a hralhna hmun market-te ngaihtuah lawka, chutia tih deuh chu a ngai a. Chuti lo chuan kan mipuite’n an chin kha duh anga market kan tihthat theihloh te a hlauhawm avangin, a market en chungin a chingtu number pawh hi hetia kalpui zel hi a ni a. Tin, *selected beneficiaries*, dragon fruit atan hian ₹1,20,000/- vel in khatah kan dah a ni. Tin, MNF lo pawh hengah hian thlan theih an ni teh meuh mai, Horticulture field staff ten a hlawhtling ngei tura an ngaihte mi 20 an thlante nena kalpui mek a ni.

PU C. NGUNLIANCHUNGA: Field staff-te khan mi 6 an thlang a, an ram an en a, a hmunah an kal vek a, tui a tha a, kawngpui a hnaih a, chuvang chuan, ‘May thla chhungin ban lo phun rawh u’ an ti a. Anmahni sum sengin ban 150 an phun vek a, June thlaah khan cancel leh vek a ni ta a ni, thuneitu sang lam atangin. Chuvang chuan Horticulture min changtu, kan House Leader zahawmtakin, ‘tihlawhtlin a tum’ a tih kha chu, tum lo a ang khawp mai. Tuna an thlan zawk kha chu party lam thlan a ni a, department te a hmunah kala an thlan thlap, ban an phuntir thlap mi 6 te kha cancel vek an ni. Khangte kha ‘pek leh theih an ni ang em’ tih ka zawh belh a ni.

PU ZORAMTHANGA, CHIEF MINISTER: Dragon fruit-ah hian bak pawh kan la kal zel dawn a. Hetah hian 20 thlan an ni a, amaherawhchu, ‘engatinge khata a ban phuntir tawh 6 te kha an tel ve tak loh’ tih erawh chu a department report te en ila, khang cancel tak 6 te kha tipuitling thei tur awm an nih chuan tih pawh kan ti zel ang chu.

SPEAKER : Starred Question No. 124, zawt turin Member zahawmtak Pu Lalduhoma i lo sawm ang u.

PU LALDUHOMA : Pu Speaker, Home Minister zahawmtak ina a chhana tan ka zawhnate chu –

- a) Tunlai hian ‘Pearlvine’ tih hmingin Serchhip-ah a pung sang tak neia pawisa deposit kalpui mek a ni a. He thil hi mipuite tan rintlak a ni em?
- b) Serchhip mi engzatin nge pawisa deposit tawh?
- c) Hmun dangah hmalakna an nei em?

SPEAKER : Hei hi Finance-ah khan ni awm tak a ni a. Mahse, Home-ah a rawn ziak si a, a chhan tur a nihloh pawhin Home Minister-ah a rawn ziah miao si avangin Home Minister zahawmtak Pu Lalchamliana chhang turin ka sawm e.

PU LALCHAMLIANA, MINISTER: Pu Speaker, ka lawm e. Group Leader zahawmtak Pu Lalduhoma zawhna –

- a) Mipuite tan a rintlak lova hriat a nih avangin chhui mek a ni.
- b) Chhui tawh chinah member 119 an inziak lut tawh a ni.
- c) Chhui mek zel an ni e.

SPEAKER : *Zawhbelhna* zawt turin Member zahawmtak Pu C. Ngunlianbunga ka sawm e.

PU C. NGUNLIANCHUNGA: Pu Speaker, ka lawm e. Kan Home Minister zahawmtak ka zawhbelhna chu, (he sorkar a lo din tirh khan zawhna kan zawt tawh a)

Thingkah, ka bialah sawn 5th IR Bn. hmun tur sak a ni a, ‘November 2019-ah chuan hawn theih kan beisei’ tih a ni a, mahse, wawiin thlengin hawn a la ni lova. Engtikah nge Thingkah 5th IR Bn. hmun tur sak saw hawn theih a nih ang, tun dinhmunah financial achievement engzatnge, physical achievement engzatnge a niha, physical nen a inmil em” tih khawngaihtakin, tunah min chhang nghal theilo a nih pawhin, ziak tal pawhin hemi an hnathawh leh pawisa pek dan hi min hrih thei se ka lawm hle ang.

SPEAKER : *Zawhbelhna* zawt turin Member zahawmtak Dr. Vanlalhlana ka sawm e.

DR. VANLALTHLANA : Pu Speaker, ka lawm e. Home Minister zahawmtak Pu Lalchamliana chhan atan –

A hmasa berah chuan, “Home Department hnuaiia police officer-ten, (a hma pawhin kan sawi tawh thin a) Grade-IV *police personnel* an kawl theih chin bak kawl engzat nge la awm; department hian a hriatpui em, tih leh; police officer pension tawhte’n Grade-IV an la kawl em” tih a ni a.

A pahnhnaah chuan, Batallion-a Group D awm hote election-ah te, operation-ah te, ramri ah te pawh hruai tel an ni thin a, TA/DA te chu pek an ni naa, ration allowance-te, thosilen te, police angin an dawng ve lova, harsatna tam tak an tawk a. Hlawhah pawh a level hniam bera awmte an ni. Ka zawhna chu, “heng ho tan hian allowance an dawn ve theihna turin hma lakna a awm em” tih a ni.

A pathumnaah chuan, kan Home Department lam hian motor an indaihlo hle a, session hmasa lamah te pawh zawhna ka lo zawt tawh thin a. Hei hi sawi hlek ngai chu, harsatna a lo awmin, saptawngin han ti mai ila, rape case-ah a victim leh a accused te, a chang phei chuan phurh dunte a lo ngai a, a victim-te tan harsatna tam tak, rilru lam harsatna te pawh a thlen belh thei a ni. Tin, thihna chungchanga post-mortem ngaite pawh chhungte ina a accused chhungte motor man tum tir te a awm leh thin a, kan police hotute an lu a hai hle a ni. Hemi chungchanga motor indaihlohna, lirthei indaihlohna hi ‘engtia sutkian tum nge a nih’ tih kha ka zawt bawk a ni e.

SPEAKER : Zawhna a inpersan viau hlawm a. A theih ang anga chhang turin Home Minister zahawm tak Pu Lalchamliaana ka sawm e.

PU LALCHAMLIANA, MINISTER: Pu Speaker, ‘Pearlvine’ Serchhip atangin hian a peng thui khawp mai a, engpawhnisela, a theih ang angin han chhan ka tum ang a.

Member zahawmtak Pu Ngunlianchnunga hi sawlai bialtu a ni a, ‘Thingkah 5th IR Bn. hmun sak’ a ti ziah mai a, Thingkah-ah sawn 5th IR Bn. hmun kan sa lova, 4th IR zawk a ni a. A eng a pawh chu ni sela, tunah tak hian building leh a approach road vel chu zawh thawkhat a ni tawh a. Amaherawhchu, tui lak saw la peih loh a ni a, tui lak peih a nih siloh chuan, an thawk dawn mek chauh a, tui tel lo chuan mihring a khawsak theih si lova, ‘chumi hma chuan luah a harsa rih ang’ tih kha ka han sawi duh a ni.

PU C. NGUNLIANCHUNGA: Keimah ngei pawh hmanni session hma ngei khan ka va kal a, approach road kha (Pu Speaker, a hre fuh lo a ni) hmun thuma thena hmun khat bak kha a ni lova. Chu pawh chu a chhe tawh a, a dang phei chu la tihloh hrim hrim a ni, a approach road kha (**Speaker:** A rawn chhang zel a)

PU LALCHAMLIANA, MINISTER: Kan lo enzui ang e. A thawktute zawhfiah a ngai a nih chu. Tin, ka hriatna a rei deuh hlek tawh a, hmun khat laiah mimalin ‘ka ram’ a ti a, churang chuan rei tak hma kan la thei lova. Chutiang vel avang chuan harsatna eng eng emaw in min bawm a ni.

Member zahawmtak Dr. Vanlalhlana khan, “police officer-te an entitle bak Grade-IV kawl an awm em; pension tawh ni si la kawl tlat an awm em” a tih kha chu, tum hnih lai kan sawiho tawh a, kan police hotute nen. Heng hi ‘withdraw vek tur a ni’ kan ti a, lehkha te pawh an han chhuah thin a, lo tiru an awm a nih chuan ka hre lova. ‘Heng hi close vek turin hma kan la tawh a ni’ tih kha ka sawi theih tawk ni se la. Tin, allowance pek chungchang kha a sawi nawn thei em aw?

DR. VANLALTHLANA : Pu Speaker, Group D ho hi force hian eirawngbawl turtein an hruai tel thin a, election-ah pawh, Manipur-ah pawh khan tuna chhiat tawhnaah te pawh khan an kal tel a ni. Ration allowance an dawng ve lova, force lam hi chuan an dawng a, thosilen thlengin an dawng a ni. Hlawh hniam berte a hrana an intum a ngai a, an insenso tam phah viau thin a ni. Hei hi hmalak sak tumna a awm em?

PU LALCHAMLIANA, MINISTER: Pu Speaker, kan lo enzui ang a. Ka hriat dan chuan Group D te hi duty hian an kal ve thin a, entitlement an neilo anih pawhin an ei leh in hi chu force lam hian an tum mai thin niin ka hria a. An chaw chhum manah an tlak te pawh a ni mahna; kan lo enchiang ang e.

Tin, Motor hi Police Department-ah hian kan indaihlo nasa em em mai a, tunhma lam kha chuan ‘Modernization of Police Force’ an tih scheme hnuaiah khan in sak te, motor lei te an phal thin a, khatih hun lai kha chuan kan indaih ve deuh thin a ni. Tunah hi chuan Central lamin an phal tawh lova, thenkhat chu an duty laiin an motor a thi a, a hruaitu Minister/MLA ten emaw battery thar leisak an ngaih chang a awm a, a then nawr nun ngai te an awm thin a ni tih report te kan dawng a ni.

Hei hi kan sawi tawh ang khan a pawl khawp mai a. Rape case chungchangah victim leh accused te motor pakhata chuan dun a ngaih chang te a awm thin a ni. Hei hi theihtawp chhuahin kan buaipui a, kum 2020-a Pu Amit Shah lokal pawh khan kan Chief Minister zahawm tak hnenah hian, “project rawn siam la, crore 500/600 vel, ka lo ngaihtuahpui ang che” a ti a. Kan han siam a, chutah chuan motor leina tur crore 80 vel kan bilh tel a ni. Chu chu a reh vang vang a, a tawpah an rawn ‘regretted’ leh ta ringawt mai a. Theihtawp hi kan chhuah a, tunah pawh hian kan DGP thar hian ‘a kua a awm phawt chuan kan chhu zel dawn nia’ a ti a. Hemi kawngah hian kan ngaihtuah thiam ang ang chuan tan kan la ve a ni tih he House-ah hian ka sawi duh a ni. Pu Speaker, ka lawm e.

SPEAKER : Starred Question No. 125, zawt turin Member zahawm tak Dr. ZR Thiamsanga ka sawm e.

DR. ZR. THIAMSANGA : Pu Speaker, Art & Culture Department Minister zahawm tak chhan atana ka zawhna chu –

“Lai Culture Centre-cum-Auditorium, Lawngtlai-a sak mek hi engtikah nge zawh anih ang; tute sak nge; a project cost engzat nge” tih a ni e.

Pu Speaker, ka zawhna (b) hi chu Member zahawm tak Pu Zothantluanga khan a rawn zawt tawh a, chhan tawh a nih avangin ka zawt nawn lo mai ang e.

SPEAKER : Awle, chhang turin a changtu Minister zahawm tak Pu R. Lalzirliana ka sawm e.

PU R. LALZIRLIANA, MINISTER: Pu Speaker, ka lawm e. Member zahawm tak zawhna chhanna chu –

Lai Culture Centr-cum-Auditorium, Lawngtlai hi 15th March, 2022 hmaa sak zawh tum a ni. A satute hi Lushai Engineers, Ramhlun South, Aizawl te an ni. Project cost hi ₹466.62 lakh a ni a, additional fund ₹14.00 lakh hmuh belh a ni bawk.

SPEAKER : *Zawhbelhna* zawt turin a zawhna neitu Member zahawm tak Dr. ZR Thiamsanga ka sawm e.

DR. ZR. THIAMSANGA : Pu Speaker, ka lawm e. Champhai khi Mizo khua tak mai a ni a, vawiin thleng hian hnam dang sumdawng awm theihlohna khua/district awmchhun a ni hial lo maw ka ti a. Kan pi leh pu te thlang tlakna kawtchhuah pawimawh tak mai a ni a. Tin, Champhai District hi Mizo history a thil pawimawh tak tak *Lianchhiari Lunglentang* te, *Thasiama Seno Neihna* te, *Fiara Tui* te leh thildang tam tak awmna a ni. Chuvang chuan kan ram leh hnam (kan sakhua te pawh a ni ang) kan humhalh zel theihna tur leh thangthar lo piang zel turte tan hian kan culture humhalh hi a pawimawh em em a. Chuvang chuan Champhai District hian District Museum emaw, Cultural Centre emaw te hi kan phu ve em em mai a. Hemi kan neih theih nan hian ‘kan Minister zahawm tak hian hma min lak sak thei ang em; hma min laksak se kan duh khawp mai’ tih kha ka zawhbelhna a ni e. Ka lawm e.

SPEAKER : *Zawhbelhna* zawt turin Member zahawm tak Pu KT Rokhaw ka sawm e.

PU K.T. ROKHAW : Pu Speaker, ka lawm e. ‘Mara Typical Village’ hi Zyhno-ah hian kan nei a, hei hi Mara pi leh pute, min thlahtute khawsak dan leh nunphung pholan nan Zyhno khawhmun hluih hian din a ni a. Kan ram hruaituten Zyhno-ah kher an din chhan hi British hun laia tang tawha hmun pawimawh tak luahtu a ni a, Zyhno Lal hi Lushai Hills leh Chin Hills lal te zinga British sorkar laka tlawm

hnuhnung ber a ni a. Kan hriat angin council chuan sum a nei lova, “State sorkar hian central lam project te siamin Mara Typical Village ti changtlung tur hian khawngaihin ruahmanna min siam sak thei em” tih ka zawt e.

SPEAKER : Awle, a theih ang anga chhang turin a changtu Minister zahawm tak Pu R. Lalzirliana ka sawm e.

PU R. LALZIRLIANA, MINISTER: Pu Speaker, ka lawm e. Member zahawm tak Pu KT Rokhaw zawhna kha Mara rama Zyhno khua a typical village din chungchang a ni a, kha kha enzuia tichangtlung turin beiseina a rawn nei a. Tuna kan budget hi kan en chuan, “khalam han chhawmdawlna tur ang kha a awmlo” tih kha ka chhanna a ni e.

A zawhna neitu Dr. ZR Thiamsanga, member zahawm tak rawn zawhbelhna kha Champhai hi hmunpui a ni a, pi leh pute ... (*interruption*) (**Pu KT. Rokhaw:** Pu Speaker, ‘central lamah project min siamsak thei ang em’ tih a ni a...) Central lamah project siamsakna tur a awm anih chuan leh, khatiang maintain-na tur leh additional quarters emaw han tih velna tur a awm anih chuan ngaihtuah dan chu a awm thei ang chu. (**Speaker:** Pu Rokhaw kan tan lawk ang a. District Council enkawlto a ni a, awm viau a ni tiraw..) Hotupa ber nen hian hetiang hian in invuipui thin a, a buaithlak anih hi.

Champhai lam khi kan Law Minister zahawm tak nen hian kan lo sawidun tawh a, tunah hian District Cultural Centre changtlung tak, a hmun atan Tlangsam nge, (khawi lai tak nge an thlan ka hre lova) chutiang tur chuan DPR thehluh a ni a, engtik hunah emaw chuan alo chhuah ve mai kan beisei.

SPEAKER : Starred Question No. 126 zawt turin Member zahawm tak Pu Lalrindika Ralte ka sawm e.

PU LALRINDIKIA RALTE: Pu Speaker, ka lawm e. Home Minister zahawm tak chhan atan ka zawhna chu –

- a) Aitlang, Buarchep leh Saihapui V atangin Assam Police te hnawhchhuah tumna a awm em?
- b) Ramria duty kan police te thuam chak turin sorkar-in hmalakna a nei em?
- c) Assam Police-te Mizoram chhunga an inkhuarnaah Mizoram chin nia kan ngaih km engzatnge an luah?

SPEAKER : Chhang turin a changtu Minister zahawm tak, Pu Lalchamliaana ka sawm e.

PU LALCHAMLIANA, MINISTER: Pu Speaker, ka lawm e. Member zahawm tak Pu Lalrindika zawhna chhanna chu –

- a) Aw, awm e.
- b) Aw, nei e.
- c) State pahnih ten ramri kan pawm dan a inang lova. Mizoram sorkar-in Mizoram leh Assam ramri nia a pawm notification No.2299P, Dated 20th August, 1875 ‘Inner Line’ on the Southern Frontier of the District of Cachar-in a ramri a tarlan chin hi hmun tamtakah Assam awpna/enkawlna hnuaiah a awm a. Ram hi *chan* kan la ni chiah lova, laklet tuma hmalak mek a ni. *Ram chan* nia lang, Assam enkawl/awp chin zau zawng hi sawi mai theih a nilo.

SPEAKER : *Zawhbelhna* zawt turin Member zahawm tak Pu Lalduhawma ilo sawm ang.

PU LALDUHOMA : Pu Speaker, ramri buai kan tih hian chi 2 a awm a, *Pakhatna* - ramri hrula intihbuaina (incident) thil lo thleng hi a ni a. Hei hi a reh chuan ramri buai nei ta lo ang mai hian a mipui lam pawh kan ngawi a, sorkar pawh hian enzui tumlo hian a ngawih zuipui leh ta mai thin ni hian a lang a. *Pahnihna* - a ramri tak tak buaia hi a ni a, a ramri tak tak a hi chu a buai reng a, englai pawhin. Ramri hrulah incident a awmlah avang khan ‘a fel ta’ tihna a ni lova. Chuvangin, hetiang a thawm a han reh deuh lai hian kan sorkar hian Assam nena kan inkar ramri chingfel tur hian engangin nge a bawhzui zel tih mipui hriatah min han hrih se ka duh a.

Tin, Assam sorkar hian State dangte nena a ramri-ah hma a la viau niin ka hria a, ‘keini nen hian eng chen nge kan kal tawh’ tih ka han zawt a ni e.

SPEAKER : *Zawhbelhna* zawt turin Member zahawm tak, Dr. BD Chakma ka sawm ang a, a dawtah a zawhna neitu ka sawm leh ang.

DR B.D. CHAKMA : Pu Speaker, ka lawm e. Ka zawhbelhna chu, ka bial chhunga khaw pahnih - Rasmondal leh Montola te hi Chawngte atangin a hnai zawk a. Mahse Chawngte-ah nilovin tunthlengin Borapansuri hnuaiah a la awm a. Chuvangin, ‘hemi khaw pahnih te hi Borapansuri Police Station hnuaiah dah lovin, Chawngte Police Station hnuaia dah dan a awm ang em’ tih kha ka zawhbelhna a ni e.

SPEAKER : A Zawhna neitu Member zahawm tak Pu Lalrindika Ralte ka sawm e.

PU LALRINDIKA RALTE: Pu Speaker, ramri chungchanga *kan sorkar dinna* kan sawi a ni a, ‘1875 notification hi kan sorkar dinna a ni’ kan ti thin a, ‘kan ram leh

hnam hmalam huna tan he kan dinna hi a tha berah he sorkar hian a ngai em' tih leh, 'hei hi kan hlawhtlin ngei a ring em, a tum em' tih ka zawhbelh a ni e. Ka lawm e.

SPEAKER : Awle, a theih ang anga chhang turin Home Minister zahawm tak Pu Lalchamliana ka sawm e.

PU LALCHAMLIANA, MINISTER: A awlsam lam atangin han chhang ila.

Member zahawm tak, Dr. BD Chakma rawn zawhna kha, Police Station huam chhunga kuate tana pawha awlsam zawkah Rasmandal leh Montola kha a awm anih chuan ziakin rawn thlen sela, kan lo en ang a, a remchan dan angin tih kan tum dawn nia.

Tin, zawhna neitu member zahawm tak Pu Lalrindika zawhbelhna kha, sorkar chauh a ni lova, "Mizoram leh Cachar inramrina hi 1875, Inner Line Regulation, 1873 behchhana notification siam kha kan ramri diktak a ni e" titu hi Mizo mipuite leh Party hrang hrang, organisation hrang hrang te, NGO te thleng pawhin kan ni a, 'hei hi a hlawhtling ang em/hlawhtling lo ang em' tih tumahin kan sawitheih ka ring lova.

Pu Lalduhawma Group Leader zahawm tak zawhna kha, a lawmawm khawpin ka hria a, kha zawhna kha zawhna awm tak pawh a ni. Kan hriat angin Assam nena kan han intihbuai kum 2020 chhoa kan han inrum khum velah khan, kan hriat angin a hmunah DC level te an inbia a. Tin, Delhi lamah a aia sang deuhin Chief Secretary te an han inbia a. Tichuan tunhnaiah kan Chief Minister-te ve ve pawh an inhma a ni. Amaherawhchu ramri-a harsatna chinfelna tur hian engmah *tangible result* vawiin thleng hian a la awm theilo a ni.

Ka sawi fo tawh a, kan sawi nawn leh ang a. District Council kan nih hunlai te, UT kan nih hunlai te, State kan nih tawh hnua kan hruaitute zawng zawng, ruling party-a lo awm tawhte leh ruling party nilo te pawhin ramri chinfel hi an duh a, mahse Mizoram sorkar-in a duh ang ngawta chinfel theih a ni lova, State pahnih inkar thil anih vangin kan remtih tlan anga kan chinfel a ngai a ni tih kan sawinawn leh duh a.

Tichuan, Mizoram leh Assam ramri chinfel dan tur chungchanga rawtna siam turin kan Chief Minister zahawm tak hmalaknain nikum July, Ni 14 khan political party zawng zawng aiawh leh NGO aiawh te inrawnkhawm a ni. Chu inrawnkhawm chuan, "Hawh u, party zawng zawng kan telna leh NGO zawng zawng kan telna *Boundary Committee* hi i din ang", an ti ta a, chu Boundary Committee chu vawi 3, kan Deputy Chief Minister zahawm tak ho hian an thukhawm tawh a ni. Chutah chuan, 'eng approach nge kan hman ang' tih kha an han ngaihtuah ta a, chuta an ngaihtuahaah

chuan, ‘Joint Action Committee on Inner Line Reserve ho hian central sorkar-ah Boundary Commission din ni rawh se’ tiin an lo thlen tawh a. Chu chu Home Department pawhin recommendation a pe thla a ni.

Amaherawhchu chu Boundary Committee, party zawng zawng, NGO zawng zawng te chuan ngun takin an ngaihtuah a, tunhma hun kal tawhah Naga leh Assam inkarah, Meghalaya leh Assam inkarah court thil a lo awm tawh a. Heng hi a tak takah chuan engmah a ni lo, boundary dispute an solve thei lo, boundary dispute solve tu tur chu India Constitution Article pathumnain a sawi angin, ‘Parliament of India’ chauh a ni. Chuvang chuan, ‘hei hi chu i kalpui tawh lo mai teh ang u, boundary commission lam hi’ tih rawtna a awm a, kha boundary committee-a tel ve, *JAC on Inner Line Reserve* tih chauh lo chuan, ‘a tha ang’, an ti ta a. ‘Chuti ni se, engnge kan approach tur ni ang’ an ti a, ‘Inbiakna neih a ngai a ni’ tih kha a ni ta a ni. Chutah chuan, ‘Inbiaknaah chuan engnge kan point tur ni ang’ tih an buaipui leh ta a. Tunah hian tunhma a document hrang hrang te leh ... (**Speaker:** Ngawi rawh aw. *Zawhna leh Chhanna* hun a tawp a, kan chhan zawh tir law law dawn em? Aw le, chhang zo rawh le.)

Tichuan chumi ang tur chuan paper buatsaih a ni a, kan hre theuh a, Manohar Parrikar Institute of Defence Studies & Analysis, nikum (kum tawp) November khan kan lo kal dawn an ti a, an postpone a, ‘Krismas dawn a ni a, lo kal suh u’ kan ti a, an postpone leh a, vawiin thleng hian an lo la kal ta lo a ni. Chu mite hnena thehluh tur Sub-Committee-in draft a siam Boundary Committee pawhina rema tihpui pawh chu kan peih vek tawh a, mahse, an lo kal theih tak si lohah chuan kan la theh lut lo a ni.

Tichuan a leh lamah group leader zahawm tak Pu Duha sawi ang deuh khan, Assam hian Meghalaya nen khan ‘limited agreement’ ka ti mai a, kei chuan, hmun thenkhat khatah *inremna ti tih* a nei tawh a, mahse chanchinbua lo lang ka hmuhah chuan, an NGO thenkhatte chuan ‘min rawn lo, hei hi pawm mai theih a nilo’ an ti ve thung a, chutiang dinhmunah chuan an ding ve bawh a ni. Tichuan, nikum November thla khan Assam Cabinet Minister pakhat *Border Protection and Development* changtu Atul Bora kha July Ni 26, nikum a inkahna a thlen hnu lawk August Ni 5-a a rawn zin khan rawtna a lo siam ti tih deuh a, video conferencing vawi hnih kan nei leh tawh a. “Hei, Meghalaya nena kan tih dan hian border buai chingfel tur hian Regional Committee kan din a, hei hi a tangkai viau mai a, hei hi din ve tha in ti em” a rawn ti a. Keini chuan, “E, ti e, Amaherawhchu in tih dan phung a *term of reference* te min rawn hrilh ula, keiin thu tawp ka siam thei lova, hon. CM hnenah ka lo put-up ang a, ka lo sawipui ang a. Chung te chu a tha khawp ang chu, Meghalaya nena in inkara a work-out chuan” ka ti a. Mahse vawi hnih vawi thum kan remind hnu pawhin an tih dan phunga kha min la rawn thawn thei lova, vawiin ni thleng hian chu chu kan la nghak a ni. An chhuanlamah chuan, “Meghalaya nena kan problem leh nangni nena kan problem

a inang chiah lova, Regional Committee hi kan inkarah hian a work ve ang em le” an ti a, tunah hian an chhanna (written) kan nghak mek a ni.

Tichuan, Boundary Committee-in kan beisei leh kan duhna chu engtik niah emaw chuan hmaichhanah kan sawiho ang a, 1875 notification-ah kan han ding phawt ang a, tichuan kan inbiak dan leh boruak that dana zirin hma kan la chhonzawm zel ang tih hi tuna kan dinhmun leh kan hmalakna mek a ni tih kha ka sawi duh a ni e. (*interruption*)

SPEAKER : Ngawi rawh aw. Kha kha chu a valid tawh lo, a pel tawh a, a zawhbelh theih tawh loh. A serious tho a, nimahsela *Zawhna leh Chhanna* hun hi a zahawm si a, khawngaihtakin aw.

PU LALCHAMLIANA, MINISTER : Pu Speaker, kan group leader zahawm tak Pu Duhoma sawi angin, negotiation hi ‘give and take’ a ni a, chuti ni lova, ‘imposition, impose’ a nih chuan inremna a awm thei ngai lo. Ka lawm e.

SPEAKER : Nichin khan Pu Mama zawhna zawt tura kan sawm kha, Zawhna 7-na kan thleng tep a, kan phur ve deuh a ni. Vawi 9 kan session tawhah hian Zawhna 6-na hi kan thleng ngai mang lova, vawiinah hian kan thleng a ni. A lawmawm e.

Tunah chuan *Financial Bussiness*-ah kan kal leh tawh ang a. Vawiinah hian Minister zahawm tak tak pathum Pu TJ Lalnuntluanga te, Pu K. Lalrinliana leh Pu R. Lalzirliana-te Demand kan sawi ho ang a, pass kan tum leh dawn a ni. Hun kal ta a kan lo tih tawh angin a pathum hian kan lakhawm leh ang a, demand pathuum a rualin kan la leh dawn a ni.

Tunah Minister zahawm tak Pu TJ Lalnuntluanga kan sawm ang a, a Demand-te –

- Demand No. 4 - Law & Judicial Department;
- Demand No.12 - Parliamentary Affairs Department;
- Demand No. 36 - Environment, Forests & Climate Change Department;
- Demand No. 42 - Transport Department

te submit turin ka sawm e.

PU TJ. LALNUNTLUANGA, MINISTER: Pu Speaker, ka lawm e. Governor of Mizoram recommend na leh I phalna in he House zahawm tak ah hian ka Demand-te –

Demand No.	Department	Amount (in ₹)
4	Law & Judicial	28,03,000.00
12	Parliamentary Affairs	87,80,000.00
36	Environment, Forests & Climate Change	2,60,84,16,000.00
42	State Transport	45,69,33,000.00
TOTAL		3,35,44,42,000.00

te hi, kum 2022-2023-a hman atan ka rawn move e.

SPEAKER : Tunah Minister zahawm tak Pu K. Lalrinliana kan sawm leh ang a, House dawhkanah a Demand te –

Demand No. 17 - Food, Civil Supplies & Consumer Affairs Department;

Demand No. 19 - Local Administration Department;

Demand No. 35 - Fisheries Department

te submit turin ka sawm e.

PU K. LALRINLIANA, MINISTER: Pu Speaker, ka lawm e. On the recommendation of the Governor of Mizoram and with your permission, Sir, I move Demand No. 17, Demand No. 19 and Demand No. 35 for ₹3,90,92,67,000/- only for meeting expenses for during 2022 - 2023 in respect of the following Departments: –

Demand No.	Department	Amount (in ₹)
17	Food, Civil Supplies & Consumer Affairs	2,60,99,44,000.00
19	Local Administration	1,20,64,20,000.00
35	Fisheries	9,29,03,000.00
TOTAL		3,90,92,67,000.00

Thank you, Sir.

SPEAKER : Tunah Minister zahawmtak Pu R. Lalzirliana, a department chante –

Demand No. 23 - Art & Culture;

Demand No. 27 - District Council & Minority Affairs;

Demand No. 33 - Land Resources, Soil & Water Conservation;

Demand No. 39 - Power & Electricity Department

te House dawhkana rawn submit turin ka sawm e.

PU R. LALZIRLIANA, MINISTER: On the recommendation of the Governor of Mizoram and with your permission, Sir, I move the Demand No. 23, 27, 33 and 39 for ₹11,68,31,49,000/- only for meeting expenses during 2022 – 2023 in respect of the following Departments: -

Demand No.	Department	Amount (in ₹)
23	Art & Culture	11,59,75,000.00
27	District Council & Minority Affairs	4,92,03,14,000.00
33	Land Resources, Soil & Water Cons.	19,80,57,000.00
39	Power & Electricity	6,44,88,03,000.00
TOTAL		11,68,31,49,000.00

Ka lawm e.

SPEAKER : Awle, kan Minister zahawm tak tak ten an demand an rawn submit ta a. Sawihona kan nei tan ang a. Member-te minute engzat nge kan inpek leh ang? Minute 10 kan inpe leh dawn nia. (*..interruption..*)

PU C. NGUNLIANCHUNGA: Pu Speaker, Forest Minister-in figure a present dan a kha a dik lo tlat mai a. Helaia an present-ah khan ‘nuai 2803.13,000’ a tiha kha, ‘point’ a ni lo.

SPEAKER : ‘Point 59’ a ti a, ka hre reng a. Mahse...

PU C. NGUNLIANCHUNGA: A dik lo tlat a ni. Kha kha chu a pawisa kha a tlem ta daih dawn tihna a ni. ‘nuai 28,03,13,000’ tih turah khan ‘13,000’ kha point hnu-ah a dah daih mai a, khalai kha present that tir teh, record a tan a tha lo ang.

SPEAKER : Ngawi rawhg aw, Pu Ngun, khalam kha chu i rawn khel te mah mah a nih kha. A vaia hman tura a rawn sawi dik loh chuan ka lo react ang ka ti a, a vaia demand a rawn sawi kha a dik avangin ka lo hrethiam a ni. Ka hria a lawm, ‘point’ a ti zauh kha chu, keipawhin ka hria a lawm. Mahse, i ti tha e.

Khai le, tunge han sawi hmasa ang le? Member zahawm tak Pu Lalrinsanga Ralte ka sawm e.

PU LALRINSANGA RALTE: Pu Speaker, ka lawm e. Hun a uiawm si a, phar lova kan inngah leh thup si kha chuan a dikin ka hre lova, ka ha phar hmasa leh ta ber a ni.

Pu Speaker, Demand No. 36, Forest Department hi, department te hnathawh han en hian a lawmawm hlein ka hria a, lawmthu sawina tur a tam hlein ka hria. Amaherawhchu, kal thui hmanloh ka hlah avangin tawi te tein kan sawi ang a.

Kan bial chhung, a bikin Vairengte Serlui bial khu hmunphiah buaipui nasa em em mai kan ni a. Forest Department hian mahal ang rengin an han kalpui a. Chutah chuan, a chingtute hnenah dan angin royalty ₹7 an ti a. Amaherawhchu, Forest Minister zahawm tak leh a department te hmalaknain mipui ten hlawk zawka an hmunphiah tharte an hralh theihna tura ruahmanna siam sakin royalty ₹7 atangin ₹1 ah min han tihthlak sak a, kan lawm tak zet a ni tih ka sawi duh a.

Tin, a bik takin Kolasib DFO lakah pawh hian lawmthu sawina tur tam tak kan neiin ka hria a. Dan lova mau tawlh tur an man te a hmunah kal chilhin leh ruahmanna tha tak tak neiin Forest Department-in an tih tur, (tunhma lamah pawh an ti tho a) tuna kan DFO te thahnemngai taka theihtawp chhuahinram tana an thawhnaah tunah khuan hma kan sawn chho hle a ni tih kha ka sawi duh bawk a ni.

Tin, Pu Speaker, han sawi leh ka duh chu, kan Minister zahawm takin min lo chhinchhiah saka, a wind-up naah pawh min react turin ka duh a. Serlui tuikhuahah khuan Eco-tourism siam tura hmalak a ngai hlein ka hria a. Island mawi leh nuam tak tak a awm a, khu khu Forest Department pawhin ruahmanna kan siam theiha, kan chei theih chuan sorkar revenue tha tak tur a ni. Tin, CAMPA hnuaiah fund kan hmuhte atangin Serlui tuikhuah venhim nan leh tuihna kang chat mai turte emaw, tuihna tam zawk siam theihna turin catchment area *treatment plant* min siam sak theih chuan a lawmawm hlein ka ring a.

Tin, Bilkhawthlir leh Vairengte-ah te hmun rem tha tak tak mai kan ngah a, hengah te hian Botanical Garden te siam anih theih nan kan Minister hian ruahmanna min saim sak theih chuan a lawmawm hle ang. Tin, ka bial North Hlimen-ah khuan ‘Pualreng Sanctuary’ kan nei a, khu khu a pawimawh khawp mai a. Nakinah Serkhan - Bagha road hi a la lun dawn a, Khu Sanctuary khu tun aia chei hnum that dan min zawn sak se a thain ka ring a.

Tin, kan sawi leh duh chu, kan Forest Minister hian ngaihtuahna min lo sen sak se ka duh chu, Vairengte khu kan sawi fo a, nichinah pawh ramri buai kan sawi kan sawi a. Heng kan ramri buaina chhan Vairengte leh a chheh vela Assam nena kan buaina chhana hi a hmasa ber, a bul tum tu chu Forest Department anni zel a ni. Assam lam atang khuan Forest DFO-in hma rawn hruaiin, chu chuan harsatna an rawn siam a. A hnua police leh police kan inhmachhawn ta thin a. Chuvang chuan, Vairengte-ah khuan RO a awm ve a, Assam lam chuan motor tha tak tak nen zahawm takin DFO

kaihhraina hnuaiah an rawn kal thin a, Vairengte-ah khuan DFO kan dah ve ngei a tulin ka hria a. DFO a dah theihloh pawhin a tlukupi tal kan dah hi ram leh hnam tan a tulin ka hria a, ka han sawilang duh bawk a ni.

Tin, Pu Speaker, Saiphai-ah hian Forest Rest House kan dah ngei ngei tulin ka hre bawk a. Saiphai lamah nakina Serkhan - Bagha Road rawn kal chho turah hian, tunah pawh khuan a lun viau tawh mai a, Forest check-gate te a awm a, mumal deuha khu khu a function theihna turin hnathawktute tan staff quarter leh IB, Forest Rest House kan neih theihna turin hma min lak sak thei se tih kha ka sawi duh a ni.

Tin, Demand No. 42, Transport Department-ah pawh hian han sawi duh leh lawmthu sawina tur a tam hlein ka hria a. Transport Department te hmalaknain Vairengte-ah Commercial Vehicle Terminal min han siam sak a. Hei hi ruahmanna a tirah chuan crore 5 chuang project siamin State dang nena kan inrina hmun pawimawh tak mai bakah Mizoram luhka leh chhuahka a ni a. ‘Khulaiah khuan Truck Terminal tha tak siam ni se’ tih department lamin ruahmanna an han siam a. amaherawhchu, sum duh ang kan hmu thei lova, kan hmuh ang chhun chhuna khutiang a hna min thawh sak khu kan lawm tak zet a. Tin, ramri khua Saiphai, Saipum leh Phaisen- te Auto-rickshaw route-a min puan sak hi kan lawm tak zet a ni. Pu Speaker, midang tan chuan hei hi te viau ang pawhin lang mahse, khumi ramriah khuan Assam lam hian Auto-rickshaw te service-in mumal takin an rawn tlan lut reng a, keini khuan permit kan neih ve loh avangin duh ang pawhin kan service hlei thei lova. Mimalin permit nei lovin Auto-rickshaw an nei a, loh theihlohna avanga inkalpawh tawn nana hman a ni a, ‘hei hi sorkar revenue a tan pawh a tul e’ tiin kan Minister kan ngen a. Heng Saiphai, Saipum leh Phaisen-te hi Auto-rickshaw route min puansak a, kan lawm tak zet a ni tih kha ka sawi duh a.

Tin, Pu Speaker, ka sawi tawh ang khan *Inter-State boundary* kan nih avang khuan Vairengte-ah khuan check-gate a tamin, motor a tam em em mai a. Thil pawimawh tak nia ka hriat chu, ADTO post hi Vairengte-ah dah a tul hlein ka hria a, sorkar revenue kan hmuh that theih nan. Tin, Bilkhawthlir, Saiphai, Phaisen leh Vairengte atang hian emergency case-ah te damlo phurin Kolasib-ah, mirethei leh harsa zawkte, thingtlang mi ten a man a tlawm zawk avangin Auto-rickshaw an hmang thin a, hengte hian Kolasib chhungah harsatna an tawh thin a ni. Heng harsatnate hi an tawh lohna tura ruahmanna siam a tul hlein ka hria a. Department in ruahmanna kan lo nei tawh te a nih pheih chuan kan inhrilh hriata, a kuate kan inzirtir a tul hlein kan hria a ni.

Tin, Demand No. 17, Supply Department-ah hian sawi tur a tam hle mai a, amahreawhchu, ka sawi sei lovang a.

Hei, Covid leng leh ramri buai laia an hnathawh dan Zoram mipuiin kan hmu a. A buaithlak khawp mai a. Kan supply, essential commodities kan tih zawng zawng Vairengte tlangdunga rawn lut thinin buaina avangin hun rei tak an rawn lut thei lova. Chumi karah pawh chuan kan Minister leh a department ten thahnemngai taka ruahmanna siamin Tripura te, Manipur lam atang tein kan mamawhte an chawk lut a. A ropui ka ti khawp mai a, covid leng karah, ramri buai karah, ration buhfai, gas, oil-ah harsatna nei lova min han siam te hi kan deptt. officer-te hnathawh a ropuiin an fak tlak hlein ka hria a. Tin, Serlui bial chung khaw hrang hrangah hian Supply Department hian quarter sak leh kudam sak tur kha ruahmanna a la awmin ka hria a. Heng te hi enge kan thlen tak? Theihtawp chhuaha kan Minister ten hma min lak sak hi a tulin ka hria a ni.

Tin, Demand No.19, LAD hi sawi ka duh a. Pu Speaker, tunah hi chuan VC ten direct-in engkim ruahmanna, sum leh pai pawh an dawng tawh a. Amaherawhchu, helaiiah hian ka sawi duh chu, VC House la nei lo, tam tak an la awm a, kan bialah pawh. Tin, VC House lo awm tawh, chhe tak tak te a awm a, heng hi tihthat leh tumna ruahmanna a awm em tih leh enge kan thlen chin tih kha ka hre duh a.

Tin, Demand No. 35, Fisheries Department-ah hian sawi leh ka duh chu, sangha dil siamtharna leh a nei tawhte tanpuina tur hi sorkarin ruahmanna a kalpuin ka hria a, engnge kan thlen chin tih hi hriat a chakawm a. Tin, Tuirial tuikhuahah khuan *case culture* hi kan neih ngei ngei a tulin ka hria a. Hei hi Saipum leh North Hlimen te tan a hlu dawn khawpin ka hria a, sum an lo thawhchhuah theihna tur atan hei hi kan tihsak theih chuan a lawmawm hlein ka ring.

Tin, Demand No. 33, Soil Department hi tawi tein sawi leh ka duh a. He department hi pawimawh tak a niin, a pawimawhna hi kan hrechhuak zo lo niin ka hria a. Hun hmasa lam atang khan Soil Department hian ngaihthah an hlawh deuh em aw tih te ka rilruah a awm a. Tin, leilung luangral tur venna kawngah te, tuihna kangchat tur venna kawngah te, kut hnathawktu ten an thlaithar hlawk zawka an thar theihna tura leichung hang tha luangral mai tur venna kawngah te he department hi a pawimawh a, an tan hian ruahmanna hi kan siama, kan tihchak lehzuah hi a pawimawhin a tul tak zetin ka hria. Tunah hian hnathawhna turin NABARD hnuaiiah crore 10 kan sorkar hian ruahmanna a siamsak hi a lawmawm hlein ka hria a. Hei chauh hi a tawk zo dawn lova, an hmalak chhohna turah sorkar hian duhsakna kan pek thiam hle a tulin ka ring a ni.

Pu Speaker, Demand No .39, Power & Electricity hi han sawi leh ka duh a. Department te an thawk rimir an fakawm takzet a, an inpekna a sang hle thin a. Staff an indaihlohna kan phurhruk hi a tul viauin ka hria a. Kan bialchhungah 'Linesman'

kan tihte hian khaw 3 khaw 4 te an vil thin a, chuvang chuan sorkar pawh hian Power Department hi kan ngaihsak deuh a tul em aw ka ti a ni.

Tin, thil lawmawm tak chu, kan Power Minister-in chak taka hma lain kan Chief Minister remruatna te nen, ramria harsatna kan neihna hmun Buarchep-ah electric current pawhluh a han ni a, transformer nen ti khuan felfai deuhin pawhluh a ni ta a. (Pu Speaker, ka zo tep e). Vairengte Aitlang, tuna boruak kan neihnaah khuan electric pawtlut turin tunah hian hma an la mek a, a ban an phun tan dawn bawk a. Hengte hi a pawimawh khawp mai a, kan police te duty post tihenna tur ringawt ni lovin, kut hnathawktu, loneitu ten an hmang tangkai ve thei dawn a, lawmawm kan ti tak zet a ni.

A tawp berah chuan Pu Speaker, kan House Leader, MNF sorkar hmasaa kan Chief Minister ni bawk leh tuna kan Chief Minister ni bawkin Serlui Hydrel Project a han ruahman khu a ropui ka ti a. He Serlui Hydrel Project hi cheithat a tul hle tawh mai a, hun rei tak ngaihthah a lo ni a. Tunah khuan staff quarter-te a ram deuh vek tawh a, tin, a hydrel project pawh hi chei that a ngai viau tawh a. Chuvang chuan, Pu Speaker, kan House Leader, kan Finance Minister ni bawk hian Central Special Assistance atang tein ruahmanna min siamsak theih chuan a lawmawm ngawtin ka ring a ni.

Pu Speaker, ka duh tawk ang a. Vawiin a kan Minister zahawm takte demand hi tha ka ti a, ka rawn thlawp a ni e. Ka lawm e.

SPEAKER : Tunge sawi leh ang? Member zahawm tak Pu KT Rokhaw i lo sawm ang. In pelh thui hian zan lam kan meng rei ve thung si a.

PU K.T. ROKHAW : Pu Speaker, a hmasa in Demand No. 27, District Council kha sawi ka duh a. Kan Chief Minister awmlai a nih avangin, a chhuah hmaa han sawilan ka duh a. Tin, kan District Council Minister hi term hmasaah District Council Affairs a lo la tawh a, tunah a ni leh a, District Council hrechiangtu ber a ni a, a lawmawm ka ti a.

Pu Speaker, *Order of Precedence* chungchang hi sawilan ka duh a. Kum 2020, August Ni 11 khan Mizoram sawrkar GAD-in 'Order of Precedence' a tichhuak a, chutah chuan Mizoram State chhungah an lal dan indawt, 'Article of Warrant' chiang taka ziah lan a ni a. He list-ah hian Indian Constitution huamchhunga hmun pawimawh tak luah ve, Autonomous District Council hruaitute chu Article of Warrant-ah hian telh an ni lova, a pawl kan ti khawp a. ADC lam mipui aiawha thlan tlinte dinhmun chu No. 7-ah telh niin, State-in hun pawimawh a hman huna sawm an nih chuan tiin Article of Warrant, No. 12 level ang an nih tur thu tarlan a ni.

Pu Speaker, hei hi Autonomous District Council hruaitute bakah NGO leh political parties ten duh lovin complain an lo siam a. Mipui aiawh thlantlin an nihna te hriatpuia, dinhmun sang zawka dah ve hi an phut a ni. A hnu ah Mizoram sorkar pawhin a order chhuah hi sut anih thu a lo chhuah zui nghal bawk a ni.

Pu Speaker, chutih laiin an thil phut leh ngente tun thlenga ngaihsak a la nilo leh, *Warrant of Precedence* tun thlenga ennawn a la nilo te hi hriatthiam harsa an ti a. Kan hriat angin an lungawi lohna lantirin sorkar Ni pawimawh, a bik takin *Republic Day* leh *Independence Day* te pawh tun thleng hian a hran vekin an la hmang a ni. Hei hi kan sorkar-in a hriat ka ring a.

Tin, Council lam hruaitute vuivaina leh thil phutte hi tih hlawhtlin harsa lo tak a niin ka hria a, “Kan State thenawm ADC nei ve te pawhin an Council hruaitute chu dinhmun sang zawkah an dah ang hian, Mizoram sorkar pawh hian a siam ve thei lawm ni” tih hi ka zawhna a ni a.

Tin, ram bungkhat a cheng, State rorelna hnuiaia awm ve hnam tlem zawk te dinhmun, kan State nu leh pa hruaituten an hriatthiampui tlat lo hi thil lungchhiatthlak tak a niin ka hria a. Hnam tlem zawkte ngaihsak duh lohna leh rahbehna angah pawh hian ngaihtheih hial a ni. Chuvangin, kan hruaitute hian ngaihtuahna fim zawk hmangin hnam tlem zawk ten an chanvo leh dinhmun tur ngaih pawimawh sakin, mipui aiawha *elected* an nihna te zah saka, Order of Precedence-ah pawh hian dinhmun tha zawka dah an phu a, ‘a rang lama hei hi ennawn hram ni se’ tih ka lo ngen a ni e. (**Speaker:** Kha laiah khan ‘*kept in abeyance*’ tih, ‘a ngai angin a kal leh e’ tih order awm kha i hre lo palh nge ni aw?) Pu Speaker, kha kha ka hria a. Mahse zawhna ka siam a, ‘tun thlengin revise a la nilo’ tih a ni a, chuvang chuan a ni a. (**Speaker:** Awle, Demand-ah let rawh le.)

Tin, Pu Speaker, a pahnihnaah chuan, Art & Culture-a han sawilan ka duh chu, ‘Mara Typical Village at Zyhno (Zawngling)’ tih a ni a. Kan ram hruaituten Zawngling hmuna an dah kherna chhan chu British hunlai atang tawh khan hmun pawimawh tak a ni a. Zawngling lal hi Lushai hills leh Chin hills lalte zingah British sawrkar laka tlawm hnunung ber kha a ni a. Chumi avang chuan District Council hian Mara Typical Village an din a, a hmunhma te a tha em em a. Mara Autonomous Council hian sum an neih loh avangin kan State sawrka-a Art & Culture Department hian central lamah project te min siamsaka hma min lak sak turin karawn ngen a ni.

Tin, Pu Speaker, Demand No. 39, Power & Electricity Department. Tuipang Hydel Project hi 3 megawatts pechhuak thei a ni a, leiminin a hnawl hma kha chuan Siaha District leh Lawngtlai District-te hian kan chhawr hle thin a ni. Tunah hian

hnathawh mek a ni a, engnge a dinhmun tih khawngaihin kan Minister hian min hrilhfiah thei sela a lawmawm ngawt ang.

Tin, transmission line Siaha - Chakhei khi a hlui tawh lutuk hi a chhe reng mai a, a tharin min siamsak turin ka han ngen nghal bawk a ni. Lawngtlai leh Siaha District-te hi 33 kV line bak kan hmuhloh avangin power kan hmuh tlem em em a, Greater Water Supply-te pawh khi a function hlei thei lo a ni, power a hniam em avang khian. Tin, Hospital tha tak tunah chuan kan han nei ta a, kan sorkar-in hma a la a. Damlo enkawlna khawl tha tak takte leh changkang tak takte kan han nei a, a lawmawm em em rualin power kan hmuh tlem em avangin kan hmang hlei thei lo a ni. Chuvangin, 132 kV line hi Lawngtlai leh Siaha District atan hian hman theih tura khawngaiha min hmanhmawh sak turin ka lo ngen bawk a ni.

Pu Speaker, Transport Department, Demand No. 42 hi, kan hriat angin kan ram hi a la intodelh tawkloh avangin state dang atangin bungrua kan nitin mamawh, insakna bungrua thlengin kan chah lut reng a. Motor lian truck hmanga phur a ni tlangpui a, bungraw rit phur an nih avangin kalkawngah ni tam tak an thang thin a ni. A bik takin Mizoram chhungah hian bungraw phur motor liante chawlhna hmun tur mumal taka siam hi a awm lova, driver-te an khawngaihthlak hle thin a ni. Chuvangin, a bik takin chhim lam National Highway-54 kalna - Serchhip, Hnahthial, Lunglei, Lawngtlai District huam chhunga hmun remchangahte hian wayside amenities chawlhna tur hi siam ni se a tha khawpin ka hria a, kan minister-in min lo chhinchhiah sak sela. Hmun dangahte chuan fuel station, electric charging facilities, food court, retail shop, ATM Booth, toilet leh truck & trailer parking, trucker dormitory bakah cooking and washing area-te awm theihna hmun hi an ruahman a. Mizoram-ah pawh hian kan ruahman thei a ni tih ka han sawi duh a. Hei hi Minister khan min han chhinchhiah sak sela.

Tin, a pahnihaah chuan, Pu Speaker, Siaha khawpui chhungah bus station khi a hmunhmate a rem teh reng nen tun thleng khian chei thar leh siam that a la ni lova. Tuna in ding office khi Assam type a ni a, kan tet lai pawha ding tawh kha a ni a, tunah khian a tla bal nasa tawh a, a thar min siam sak thei se. Tin, khilai hmunah khian bus leh maxi-cab terminal min siamsak nghal sela a lawmawm khawp ang.

Tin, Siaha khawpui luh dawnah khian bungraw phur motor liante chawlhna tur Truck terminal min siamsak ve turin ka lo ngen duh a. NH-54 atanga Tuipui Ferry PMGSY kawng peng bulah zawlnuam zau deuh mai a awm a, khi khi truck terminal atan a tha viau mai a. Hmanni khan Pu (Speaker, khawngaihin minute hnih khat chauh) kan Transport Minister zahawm takin ka bial a rawn tlawh a, ka zui hman lova, a paw ka ti khawp mai a. Khilaia Lomasu leh Lodawh khuate khi lawngchawlhna hmun tha

tak tur a ni a, khitah khi lawngchawlhna hmun atana ruahmanna min siamsak turin ka ngen duh a.

Tin, Demand No. 17 hi khawngaihin. Siaha district-a Legal metrology a thawktute khi an indaih lo em em mai a, Cashier bakah manual assistant pawh an nei lova. Khawngaihin kan Minister hian a rang lamin hei hi min dahsak thei se tih kha ka lo ngen duh a. DCSO quarter khi vawiin ni thlengin kan la nei lova, DCSO Aizawl leh Champhai emaw te atanga an lo insawn hian inluah turah an buai em em thin a. Khawngaiha DCSO quarter khi min sak sak turin ka lo ngen bawk a ni. Tin, buhfai hi khawngaihin kan Minister zahawm tak hian tunah hian National highway-54 hi laih mek a ni a, fur tlak hmain buhfai tam tawk min stock sak turin ka lo ngen bawk a ni.

A tawpna tak taka tan, Pu Speaker, thingtlang lama distribution centre thenkhat Supply kudam hi a chhe hlawm tawh hle a, a bik takin Siata, Chapi, Tokolo leh Tisi-te hi a chhe zual a, buhfai dahna tlak pawh a ni tawh lova. Hei hi a thara min sak sak turin ka ngen duh bawk a ni e. Ka lawm e.

SPEAKER : Member zahawm tak Pu H. Biakzaua ka sawm e.

PU H. BIAKZAUA : Pu Speaker, ka lawm e. Vairengte lam atangin Tuipang, Lawngtlai lamah, a hla deuh ho kan han hmasa a, hun pawh tlem chuan kan hmang pel deuh zel a. Keipawh Pu Speaker, ka pel deuh hlek pawh a ni maithei a, hriatthiamna ka han dil hmasa a ni.

A hmasa berin Demand No. 4, Law & Judicial chungchangah hian han sawi duh ka neih chu, Lawngtlai District saw border area Myanmar lam leh Bangladesh lamte a ni a, border infiltration hi a tam deuh bik tih turin case a tam duh khawp mai a. Murder case-te, rape case-te, arm case-te leh ruihhlo lam ND & PS case kan han tih leh foreigner case ang chite hi a tam khawp mai a. Mahse Lawngtlai-a kan court neih CJM court sawn rel fel theihloh kan ngah em em thung si a, chuvang chuan harsatna nasa tak kan tawk a. Chutiang chuan Lunglei-ah emaw Siaha-ah emaw kal a ngai thin a, accused leh an chhungte tan a buaithlak khawp mai a, Police-te tan pawh harsatna tam tak a thlen bawk a ni. Chutiang chuan Lawngtlai court saw tih phuisui ve, vawiinah hian kan minister zahawm tak ka ngen duh a. Court set-up hi state sorkar-in a tih theih tur niah ka beisei a, High Court lam thu vek a nih ka ring lova. Chuvangin, public prosecutor-te appoint in Lunglei District-a Fast Track Court judge hian thlakhatah Lawngtlai-ah chawlhkar khat emaw a aia tawi pawh ni se, a remchan dan angin rawn thu ve thin se, tichuan Lawngtlai-a case harsa zual ho saw a settle thei zelin ka ring a. Chutiang tur chuan Lawngtlai-ah Fast Track Court min din sak ve turin ka han ngen hmasa a ni.

Demand No. 36, Environment, Forests & Climate Change-ah hian Pu Speaker, sawi duh ka neih leh chu, Phawngpui National Park leh Ngengpui Sanctuary-te hi state sorkar leh district council-te MoU sign-in state sorkar-in enkawl tura tih a ni a. Chu MoU chu a tawp tawh a, a tawp hnuin kum 10 atan sign leh a ni a, chu pawh chu a tawp leh tawh a. Chuvang chuan, state sorkar leh central lamin enkawl na a neihte nen asset sawlaia state sorkar-in a neih hote nen district council-ah hian hlan theih mai a ni tawh lawm ni, anni in enkawl se tun ai sawn ramngawte, ramsa leh nungcha dangte pawh saw an humhalh hneh tawh zawk dawn lawm ni tih kha ka ngaihtuahnaah a awm a ni. Chuvangin, kan minister zahawm tak hian District Council kutah Phawngpui National Park leh Ngengpui Sanctuary te hi hlanchhawng mai se tih kha, a neitu tak anni bawh a, a fel zawk nan, a that zawk nan, a him zawk nan tiin. Chuvangin, hemi chungchang hi min hriatsak se ka duh a ni.

A dawt lehah chuan, Demand No. 42, Transport Department hi, he department-ah hian Inland Waterways bikah lawmthu ka sawi hmasa duh a. Kan Minister zahawm takin hma min lakpui a, kan Chief Minister zahawm takin Lunglei District leh Lawngtlai District inkalpawhna tur (Dr. K. Pachhunga bial leh ka bial) Maurawp Kai-ah marboat dah tul kan ti a, Chumi tur chuan Kan CM zahawm takin pawisa sanction min tihsak a. Tunah hian marboat an siam mek a, an siam zo tep tawh a, lawmawm ka ti khawp mai a, lawmthu ka sawi a ni. Tin, kan Minister zahawm tak hian Lawngtlai-a DTO Office nikumah khan min hawn sak tawh a, mumal takin DTO Office tha tak kan nei tawh a, staff erawhchu an indaihlo khawp mai a, dah belh a tul hlein ka hria a ni.

Tin, Aizawl - Lawngtlai inkar MST service a tul khawp mai a. hei hi (*Deputy Speaker-in Chair a la*) Aw, an inthlak hun chhung chu ka thianpa a ni bawh a, minute hnih thum a kal leh ta a nih kha. Hun min pek belh thei ang chu maw. Aizawl leh Lawngtlai inkar hi tunhmain MST bus a service thin a, eng emaw chen atang khan tihtawp a ni a. Hei hi sorkar pawhin hlawkna a neih theih bakah, mipui tan thil tangkai tak a nih ka ring a. Hei hi thil tul taka ni a, ka ngai pawimawh em em a, kan Minister hian min hriatsak se ka duh khawp mai.

Tin, District khawpui hrang hrangah hian two-wheeler taxi service tur khan order siam a ni tawhin ka hria a. Two-wheeler taxi hi service tir ve ni tawh sela, Lawngtlai-ah pawh sawn traffice a tawt ang reng khawp mai a, two-wheeler taxi kan mamawh hle a ni. Tin, DTO office kan nei ve tawh naa bus pakhat pawh hman tur awmlo hi a buaithlak khawp mai a, thil pawimawh leh tul, pawl ho leh sorkar thila hman tur bus pakhat tal hi chu awm ve se tih hi ka han ngen duh a ni.

Pu Chairman, Demand No. 17, Food, Civil Supplies & Consumer Affairs-ah hian a hmasain lawmthu ka sawi duh a. Kan Minister zahawm takin ka ngen na te ngai

pawimawhin kan Chief Minister hnenah pawh vawi hnih lai lehkha ka siam a, Lawngtlai District ni si Sangau RD Block huamchhung khaw eng emaw zat saw Lunglei District DCSO leh Siaha District DCSO-in an awp thin a, harsatrna tam tak a awm a, ration card siamthat chungchangah te leh retailer chungchangah te, kawng hrang hrangin mipuiin harsatrna tam tak an nei a. Chu chu Lawngtlai District DCSO hnuaiyah awm tawh se, tiin ka thlen thin a, hmanni lawk khan a takin order rawn tihchhuah a ni a, hemi chungchangah hian kan Chief Minister zahawm tak leh kan Minister zahawm tak hnenah vawiinah hian lawmthu ka sawi duh a. DCSO Lawngtlaiin tunah chuan Sangau RD Block zawng zawng kha Supply Department-ah thuneihna a nei tawh a. A lawmawm hlein ka hria a, lawmthu ka sawi hmasa duh a ni.

Tin, Legal Methodology lamah hian nikumah khan kan Minister zahawm takin Lawngtlai-ah Office min hawn sak ve tawh a. Lawmthu ka sawi duh bawk a. Tin, buhfai leh gas leh oil lampangah harsatrna nei lovin covid chung pawhin sorkarin Zoram hmun hrang hrangte a enkawl a, a vil thei hi lawmawm ka ti takzet a ni.

Tin, PDC Godown Lawngtlai-ah hawn a ni tawh a, Lungtian-ah SDC godown sak mek a ni bawk a, lawmthu ka sawi a ni. Godown chhe em em mai, Lungpher leh Vawmbukah kan nei mek a, heng hi min sak sak leh turin vawiinniah hian ka ngen duh bawk a ni.

Demand No. 27-ah pawh hian tawi te ka han sawi leh duh chu, he sorkar hian ADC te a ngai pawimawh a, kan budget-ah khan District Council kan neih pathumte budget kha 9.08%-a tihpun a ni hi a lawmawm takzetin ka hria. LADC-ah 10.49%, MADC-ah 8.65% leh CADC-ah 7.68%-in BE hmasa ai khan kumin BE turah hian a pung ta a. Hemi chungchangah hian lawmawm ka ti a, DC & MA Minister zahawm tak hnenah lawmthu ka sawi a ni. (*Dr. F. Lalnumawia, Chariman-in Chair a la*)

A tawpna berah chuan Pu Chairman, Demand No. 39, P&E-ah hian lawmthu han sawi leh ka duh chu 33 kV station Chawnhu chu 132 kV-ah hlan kai tum mek a ni a, pawisa tihfel tawh niin hma lak mek a ni a. Tin, tunah hian 1.32 kV Lawngtlai 33 station-ah ugrade turin sum leh pai tihfel vek a ni tawh a, Power Minister hnenah hian lawmthu ka sawi a ni. Chumi ruala ka han ngen duh chu Lungtian kV line hi khaw chung zawn tak maiah a kal a, Biak-In te an sa thei lova, mimal-In te pawh harsatrna a awm mek a, a hlauhawm em em mai bawk a. Hei hi khaw pawn lamah min sawn sak turin ka ngen duh bawk a. Chutiang chiah chuan Vawmbuk pawh a ni a, kawng lovah line pui a kal a, kum 20 chuang a ni tawh a, line-fall a tam lutuk a, thing leh mauin a vaw reng mai bawk a, chuvang chuan hei hi min ngaihtuah sak se, tiin ka han ngen leh duh a ni e. Ka lawm e.

CHAIRMAN : Awle, tunge han sawi leh ang? Member zahawm tak Pu Lawmawma Tochwawng ilo sawm ang.

PU LAWMAWMA TOCHHAWNG: Pu Chairman, ka lawm e. Kan Minister zahawm tak tak Demand sawinaah hian mawhphurhna an lak atanga an sum hman danah te, an hnathawhah te lawmthu sawina leh rawtna han sawi hi a phurawm khawpin ka hria.

Pu Chairman, kan Demand No. 42, Transport Department chungchangah hian lawmthu sawi tur tam hlein ka hria a. Ram hmasawnnain a ken tel pawimawh em em mai Transport-ah hmasawna tam tak kan hmu a ni. Governor speech-ah khan Transport Department hian tun kum kal mekah hian cheng nuai sang 2,352.95 sorkarah a chhung lut tih kan hmu a, *hloh aia hlep* zawnga ke pen hi a chhuanawm ka ti. Pian phunga rual banlo te tana vohbik chanvo han siam te hi a nachang hriat thlak viauin ka hria a ni. Ministry of Shipping-in tui kawngpui IWD (Inland Water Transport) Khawthlang Tuipui atana hmalakna tur leh a tihchangtlunna tura tan project heng nuaih sang 2,292.94 a approve hi a nghahhleawm takzet a, keini chhim lam tan phei chuan dingdihlipa kan lo thir a ni. Hnahthial Darzokai atanga Lawngmasu thleng rawk tura Chhimituipui kawng project ruahman lawk tura tih te hi a ropuia a tangkai zia tur chu nasa tak a ni dawn. He department hian sum ba an nei lo hi entawntlak tak an niin ka hria.

Demand No. 36, Forest Department-ah hian sawi tur tam tak a awm a ni. Ram nuam leh hrisel nei tur chuan ramngaw thing leh mau, lui lam leh khawvela cheng thil siam nunna nei ve te tan, chumi te nena kan nunho theihna ngaihtuah ngai a ni a, boruak tha leh thianghlim an siam avangin. Hemi kawnga hmalakna hi uar sauh suaha tul khawpin ka hria a, sorkar hmalakna kal mekah hian (khawngaih takin, kan Minister pawhin min lo hriatsak ta sela) Lunglei khawpuiah hian Botanical Garden min siam sak ve thei ang em? hmalakna kal mekah hian kan mamawhna a sang khawp mai. Khawpui chhung boruak siamthat nan leh tihthianghlim nan bakah khawpui ngaw siamna 'Nagarvan Project' te hi kan mamawh a ni a, Lunglei lamah min han kalpui ve thei se tiin kan ngen nghal bawk a ni.

Duhthawh thilah han sawi zawm ila, kumtina cheng tam tak senga thing kan phun ziah chung ramngaw zau zawk kan nei belh hlei thei silo lai erawh hi chu a ngaimawh awmin a veiwmin ka hria. Kawngpui dung leh khawpui dai vel km chanve tala chhah hian thing leh mau, sava leh ramsate tlan chi hi han neih belh theih a chakawm khawpin ka hria. Hemi kawnga kan tan lak dan hi 'ko thlak a tul tawh em le' tih hi department leh Minister te pawh hian ngaihtuahnaah min lo hman sak sela, rahchhuah tha zawka ruahmanna neih a tul tawh lo maw ka ti a.

Demand No. 4, Law & Judicial-ah hian, “Dan leh Hrai-in awmzia a neiha kawngro a sutna ram apiangah hmasawna a kai rual a, dikna hlenchhuaha chenna tlak sorkar ram a awm thin” tih a ni a. Legislative, Executive leh Judiciary te tha tak, rual taka a kal tlannaah sorkar tha, rorelna fel a awm thei chauh a ni. Kan ram ro inrelna hi a la naupang deuh hlek a, chuvang pawh chu a ni ang e, Dan hremite, dan lama lehkhabu leh zirna school atanga college thlenga neih hi ngaihtuahna lianpuiah awm sela, he department pawh thuam chak pawh a ngai viauin ka hria. Ram changkang roreltute hi en ila, Law Degree nei an ni deuh vek a ni, chungte pawh chu ngaihtuahnaah awm tel sela. Pu Chairman, Lunglei Court Building hmana ta tawh a sawi rik awm reng mai saw bul tan theihloh, sak theihloh a ni reng mai a, kan Minister hian khawngaihin min lo hriatsakin min lo ngaihpawimawh sak sela kan duh a ni.

Demand No. 17, Food, Civil Supplies & Consumer Affairs-ah hian lawmthu sawina tur kan va ngah em! Covid hripui leng kara he department-in ram mipuite ngheilo leh chhamloa min siam hi sawinawn fo a ninawm loh a ni. Department a thawktute leh a changtu Minister thawhrimna leh remhriatna a ni lo thei lova, chunglam malsawmna a tel loh chuan heng thilte hi a thleng theilo ang tih a rinawm. Fur leh thal inang rengin retailer-ah buhfai a awm a, mamawh zualte tan tlawm zawk leh a free-a lei tur a awm reng mai te hi a lawmawm thlawt a, hei hi MNF sorkar hmalam nena thil inthlakthleng lian tak kan hmuhte zinga mi a ni. Hmun hrang hranga supply godown sak thar a ni te leh minister leh a department ten hma an la hi a lawmawm ka ti a. Eirawngbawlna gas-ah mawlh hian a ni mipui lawm, an au hla hriat tur tam ni. Hmanah kha chuan, “a black-in bur khat cheng 2000, cheng 2500-in a leina tur ka hria” tih kha a ni thin a, tunah erawh chuan, “niminah gas kan la full a, a bur ruak kan nei tawh lo, kan chanai lo la mai rawh u” tih ri a ri ta nawk mai te hi hriat a va hrehawm loh em! Chutiang chuan he department hmalaknaah hian lawmthu sawi tur dang tam tak kan nei a ni. Gas Bottling Plant lian leh changtlung zawk ruahman mek a ni te hi a thlamuanthlak khawp mai a, diesel leh petrol special permit sawi rik awm ta manglo te hi mipui leh officer-te, officer lote pawh kan intluklan dial dialna langsar a ni rih awm e. Oil Depot lian zawk kalpui mek a ni tih kan hre bawh a, a puitlin hlan pawh a nghahhlehawm khawp mai.

Demand No. 19, Local Administration Department-ah hian khaw hrang hranga VC House thar ding mekte leh repair hmuh tur awmte hi a lawmawm ngawt mai. Computer set eng emaw zat thahnem takin an han dawng ta a. Tin, LAD hnuai, district park hrang hrang out-source mek a ni hi a fin thlakin ka hria a, sorkar-ah sum eng emaw zat a luh belh a rinawm a, thil tha tak a nih a beiseiawm a ni. Tin, kan park-ah te pawh hian thalaite hip turin heng, outdoor gym te leh futsal ground te hi mumal taka enkawlin awm thluah thei sela, sum tak tak eng emaw zat chu sorkar-ah chhunluh a nih theih a rinawm. Private-in an siamah hian zan dar 12 thleng thleng hauha, sum chawia kalpui

a nasa a, mimalin sum an lalut tam em em a ni. Hengte hi rawtnaah minlo hriatsak sela ka duh hle a ni.

Pu Chairman, Demand No. 35, Fisheries Department-ah hian sawi tur tam tak a awm awm a. Sangha kan ei tam hle mai a, kan ei tam ber erawh chu vai ram leh khawchhak atanga lo kal niin a lang a. Intodelh tura department hmalakna a lawmawm rualin, tan lak lehzuai a ngai hle a ni. Sanghapui tha pangai hian tum khatah sing 5 (sing 2 atang a sing 8, nuai 1 te pawh a ni awm e) a tui thei si a, a dam khawchhuaka hi sing 5, sing 6 pawh lo ni ta sela, sangha pakhat chauh atangin a ni a, ‘engtinge tun thleng hian vai ram atangin Sangha note te hi kan la lakluh cheu mai le’ tih te pawh hi ngaihtuahnaah a awm tel a ni. Hmalakna, hmasawna tam tak awm karah hengte hi ngaihtuah tel ila, a lawmawm khawpin ka ring. Sangha chaw leh a note na na na chu kan Minister zahawm leh a department zarah hian intodelh lam min panpui niin a lang a, a lawmawm tak zet bawk a ni.

Demand No. 39, Power & Electricity Department-ah hian Pu Chairman, lawmthu sawina tur tam tak a awm a, department lian khawtin hawlh a ni a, chuvangin an tan a hautak hle ang tih pawh a rinawm a, Lunglei lamah hian lawmthu sawina tur kan nei nual mai. 132 kV alternate line kha hman theih a lo ni ta a, kan tangkaipui tak zet a, tun hma chuan mVA, 12.5 power transformer hmang hian kan khawsa thin a, min chawmzo lo hle thin a ni. Tunah a leta lian 23 mVA transformer chu 2021 krismas hma lawk khan commission a ni a, he transformer lian kan hman tak atang hi chuan Kristmas leh kumthar thlaksik vanglai pa wh khan, load-shedding awm lovin Lunglei khawpui a kal thei a, eng emaw chang erawh chuan, heater te kan hman tam deuh vang a ni ang e, ‘transformer-in a zo dawn lo e’ an tih avanga han tih zeuh changte chu a awm a ni. Chutih lai chuan Power & Electricity thawktu te mawlh hi an fakawm thin a, ruahsur karah pawh complain a awm chuan an rawn thawkchhuak zak mai thin a, a changtu minister zahawm tak inpekna leh taimakna hi an entawn anih a rinawm a.

Tin, chutih lai karah chuan Pu Chairman, hmasawna eng emaw zat a awm lai hian mamawh han sawil an ngai a awm tho mai a. Lunglei khawpui chhunga transformer eng emaw zat saw a hlui tawhin, thlak emaw, repair emaw a mamawh ve ta a, a tet deuh hlek avang sawn a lian zawk mamawhna pawh a sang khawp mai. ‘Lunglei Power hmunpui’ kan ti mai a, Khawivah Mini Hydrel Station panna kawng saw tun hma atang tawhin a chhe reng mai a, eng emaw sanction pawh kha a awm tawhin ka hria a, tlem a zawng kha chu khawih a ni a, khawngaih takin kan Minister-in min lo hriatsak sela, Khawivah panna kawng saw min siam sak se kan duh hle a ni.

A tawpna atan Pu Chairman, Land Resources, Soil & Water Conservation hi tawi te han sawi leh hram ka duh a. Kan ngaihtlak tak ang, khan he department

pawimawhna hi a nasa tual tual a, ‘kan ngaihthah hret em ni aw’ tih tur niin a lang. Kum tina tui fur tlain kan leitha a len ral hi humhalh a ngai ta takzet a, tui khawlnate pawh kan neih that a ngaiin ka hria a, kan Mizopa *chang kham* te kha uar leh zual ta ila, chungte chu lawmman siam saka, ruahmanna siamsak thain ka ring a. Chubakah chuan ka biala structure leh contour trench te pawh hi uar lehzual hi kan mamawh a, chuti lo chuan kan ram lei tha hi tuiin min len bo zawh sak ang a, thlaler emaw ah kan chan mai ang tih hlauhawm thei dinhmunah kan awm a ni.

Art & Culture hi, tawi te han sawi leh ka duh chu, kan hnam zia tihlan zelna tur atana he department hmalakna hi hmaih thelh chi a ni lova. Kut chi hrang hrang, incheina leh thidanga an hmalakna bakah hian, drama te, film siam te leh lehkhabu ziak lam hmang tea hnamzia tilang leh chawisang zawnga inelna te hi siam ni ta sela. A chhan chu, hei ‘Chhota Bheem’ tih vel film te hian kan naupangte rilru a la nasa tawh mai a, ‘vai zia’ kan tih mai, an culture-in nasa takin min luahlan mek a, hetiang zawng hian drama te, film te leh lehkhabu tea hmalak nisela a va duhawm dawn em ka ti a.

Pu Speaker, kan Minister pathumte demand, ‘ram tana hlawk leh tangkai taka hman zel turin i pawm tlang ang u hmiang’ tiin kan insawmin kan inngen a ni e. Pu Chairman, ka lawm e.

CHAIRMAN : Awle, kan member zahawm tak Dr. B.D. Chakma i lo sawm ang.

PU B.D. CHAKMA : Pu Chairman ka lawm e. Kan District Council lam atanga MLA zahawm tak lo kal hote tan chuan ‘Chairman’ tih hi popular ropui si a, chuvangin Pu Chairman, i chungah lawmthu ka sawi e.

Demand No. 42, Transport Department-ah ka han lut ang a. Commercial vehicle permit chungchang tlem han sawi duh chu, tun tum permit issue-ah hian an strict lutukin ka hria a. A bikin Chawngte area-ah auto-rickshaw permit nei lovin tam tak an tlan a, Lawngtlai DTO Office atangin surprise visit neih apiangin pawisa tam tak fine anni thin a ni. Tin, Aizawl-a permit ngaihtuaha an lo kalin, ‘a chhuak har lutuk’ tiin an beidawng a, auto-rickshaw neitute. Chuvangin, khawngaih takin auto-rickshaw permit neilote tan hian permit thar pek chhuah a theih em tih kha kan Transport Minister zahawm takin min lo hriatsak thei sela. Mi tam tak chhungkaw chawmna atana hmangte tan a buaithlak lutuk a ni. Vawikhat ah cheng 5,000/- te, 6,000/- te, singkhat te lai an chawi thin a ni, permit neiloh avangin. Chuvangin auto-rickshaw permit hi Chawngte area-a eizawna atan hian ngaihtuah sak ni se ka ti a. Permit neihloh avangin Covid-19 chhung khan an nitin mamawh pawh an nei hlei thei lova. Chuvangin Pu Chairman, auto-rickshaw leh taxi permit-te, driving licence an neih chuan awlsam taka permit pek theih dan a awm

em aw tih kha ka zawt duh a. Auto-rickshaw lei hnuah pawh permit an neihloh tlat chuan a ngaihna a awm chuang lova, fine tam tak tak an chawi a ngai thin a ni.

Tin, tun hnaiah Lawngtlai DTO office atangin notification pakhat a chhuak a, chu notification-ah chuan, “District dang atangin Lawngtlai District chhunga commercial motor tlan thin chu Lawngtlai DTO office-ah in register vek tur” tih a ni a, hei hi engnge a awmzia? District dangah hetiang hi a awm ve em tih kha min lo hriat sak sela kan Minister chak tak hian. District danga registration nei tam tak an awm a, kei pawh Aizawl registration pick-up vehicle ka nei ve a, Lawngtlai-ah ka register a ngaih leh tihna a ni a, insurance leh thindang tih leh a ngai dawn a, a buaithlak khawp mai. Registration no. a inanloh chuan Insurance Company lamin zawhna an nei thin si a, registration no. nei tawh registered tawh kha chu khawngaihlin exemption min pe thei se kan duh khawp mai, Pu Chairman.

Tin, Demand No. 17, Food, Civil Supplies & Consumer Affairs Demand-ah hian, ration card chungchangah sawi duh ka neih chu, category shifting hi tam tak a awm thin a, a chhan awm lovin list atangin an paih tawp a, kha kha engnge a awmzia tih kha ka zawhna a ni a. Chu bakah category shifting hi case tam tak awm thei a, APL atangin BPL-ah, BPL atangin APL-ah, AAY atangin BPL-ah, engmah a chhan awm miah lovin shifting hi an ti tawp a, kha kha kha engnge a awmzia? BPL ni reng si APL-ah engtinge a kal theih, AAY pawh mi rethei tak tak an nih laiin engtin nge APL-ah te, BPL-ah te an awm daih theih tih kha min lo hriat sak sela.

Tin, finger print chungchang hi, buhfai sem lain ration card holder finger print ngei lo chuan buhfai lak a thei lova, thingtlang mite chu loah feh te a ngai a, family member zinga pakhat finger print hmanga lak theih mai nisela tih kha Pu Chairman ka ngen duh a. ‘Card holder finger print compulsory’ tih kher kha chu a buaithlak khawp mai a, chuvangin, relaxation, a bikin keini ang hilly area mite tan awm thei se, finger print hi a pawimawh viau em ni, compulsory a ni em tih kha ka zawhna a ni bawk a.

Tin, Demand No. 27, District Council & Minority Affairs Department-ah hian, hei, CADC chungchang hi kan sawi fo tawh angin ‘uncontrolable appointment’, a bik takin Chakma Autonomous District Council-ah hian a tam khawp mai a, buaithlak khawp mai. Mahse Minister leh official chak takte zarah tunah hian ‘One-man Enquiry Commission’ chu kan lo nei ta a, Lawngtlai DC ruat a ni kha a lawmawm ka ti a, ama enkawlina zarah thil dik tak a chhuichhuah theihin ka ring a ni. A chhan chu, sum hman dan diklohna avangin tun thlengin ADC pathumte chuan kan tuar nasa hle a, CADC chauh nilo, LADC leh MADC-ah pawh khatiang tul lova hna lak a tam lutuk tho a ni. Development atan sum hi pakhatmah a awm lova, 3% or 4% vel chauh development work atan a awm thin a ni. Chuvangin ADC pathumte tan chuan a pawl khawp mai.

Tin, Golden Jubilee hi 29th April, 2022 hian ADC pathumte chuan kan lawm dawn a, golden jubilee lawmna tur a hranin State finance atangin dah a ni tawh em tih kha kan Minister hian a windup-naah min lo react sela. A chhan chu ADC-te ‘50 Years’ kan lo ni dawn ta a, ropui taka Golden Jubilee lawm dawn chuan sum a awm a ngai a, sum awm loha District Council atang ringawt chuan tihngaihna a awm lo a ni.

Tin, Demand No. 30, Power & Electricity Department hnuaiah kan Minister chak tak zarah a hma aiin electric supply hi kan nei tha ta a, a lawmawm ka ti a, a bikin Chawngte lam Borapansury leh Longpuighat lamah pawh kan nei tha a, a lawmawm ka ti. Engpawhnise, chutih rualin western belt lam, Indo-Bangladesh border khaw tam tak kV line extension hi duh angin hna a chak lova, hei hi eng vang nge? Minister chak tak hian khawngaih takin min lo hriatsak se. Tin, Chhotapansuri piah lama khaw tam takah electric current an la nei lova, tin, Kamalanagar LT line hi a hlui tawh em em a, thal laiin electric consumption hi a tam em em mai a. Kan Power & Electricity Minister chak tak hian line tharin min thlaksak thei se kan duh khawp mai. A bik takin western belt, Indo-Bangladesh border anih vangin power supply lam hi khawngaih takin min ngaih pawimawh sak se.

Fisheries chungchang tlem han sawi ve leh ka duh a. CADC lamah hian fish farm hi private pawhin tam takin an nei a, fish seed production chu an hmu tha a. Chumi rualin innovations lamah hian tlem sawi ka duh a. Prawn culture lamah hian Mizoram hian hma kan la lova. Ka Minister lai khan prawn culture hi Tripura-ah vawi tam tak ka tlawh a. Mizoram-ah pawh hian hma la ve thei ila tih kha ka sawi duh a. Chumi rualin CADC lam hi low-lying area a nih vangin fisheries lamah hmasawna kawng tam tak a awm thei a. Chuvangin, CADC lam hi min lo ngaih pawimawh sak thei se tih hi ka sawi tel duh a ni. Tuna Project thar ‘Chakai Farm’ pawh hi Kolasib lam chauh ni lovin, Chawngte lamah pawh pakhat emaw tal chu min hawnsak ve thei se tih ka sawi tel duh bawka a ni.

Pu Chairman, kha kha ka sawi theih tawka ni se. Ka lawm e.

CHAIRMAN : A lawmawm e. Tunge han sawi leh ang? Member zahawm tak Pu L. Thangmawia sawm i la.

PU L. THANGMAWIA : Pu Chairman, ka lawm e. A hmasa berah chuan Law & Judicial lam hi a lo pawimawh em em a. A pawimawh zia hrechiantute kan ni theuhin ka ring a. School Education Department lamin Mizo Language Development Board an tih tur pawh hi uluk takin vawi hnih lai an lo en dik a ni. Chuvangin, rorelna dik a awn theihna tur a Law & Judicial Department kaltlanga thawktute zawng zawng chungah lawmthu ka sawi a ni.

Kum 1995 khan Law & Judicial Department hnuai awm thin, Parliamentary Affairs kha department hrana dah a lo ni a. Parliamentary Affairs lam hi mipui ngheng vak lo a nih rualin sorkar leh keini Legislators te kara ‘leihlawn’ a lo ni reng mai a. Bial mipuite duhsakna leh Pathian malsawmna avangin MLA te kan han tlin ve hnu hian kan han hre chho ve a, a hma chuan eng department nge a nih pawh hi ka lo hre vak ngai lem lova. Parliamentary Affairs Demand sawi ni a nih angin ka han sawi duh chu, thu belhchian dawl lo leh thu dik chanve hmanga thil tih hi a awm ve thin em maw ni aw ka ti a. Member tam zawk leh ka member pui zahawm tak tak ten an tih thin dan ang hian, ‘thu belhchian dawl chauh hmang ila’ tih leh, ‘he House zahawm tak hi politics khelh nan hmanloh hi a tha’ tih hi ka sawi duh a. Chu chu thahnemngaih thilah ka han sawi duh a ni.

Demand No. 36, Environment, Foreste & Climate Change Deptt. hi a pawimawh khawp mai a. Ka bial lamah phei chuan lawmthu sawina tur tam tak a awm a. Hman kum lawkah khan Hliappui-ah Rest House tha tak mai min sak zawhsak a, ka han riak tawh nghe nghe a. Tunah hian NE Khawdungsei leh Ngopa-ah te hnuhma an rawn nei thar dawn a, Lawmthu ka han sawi lawk duh bawk a. (*Deputy speaker-in Chair a la*)

Pu Deputy Speaker, Chhawrtui-ah pawh Forest Rest House neih a tul zia he House zahawm tak kaltlang hian ka lo sawi tawh a. a hmunhma te pawh min en fel sak tawh a. Covid hripuiin min nuai vangin hma a lak theihloh chungin theihtawp min chhuahsak a. Remchang hmasaah heng te pawh hi min bawhzui sak dawn niin ka hria a, chuvangin lawmthu ka han sawi duh bawk a.

Ka han sawi leh duh chu, Forest Department hnuai hian a bik takin thawktu indaihlohna hi a nasa em em a. Ka bial Ngopa-ah te chuan staff pakhat chauh a awm a, RO hi kan neihloh avangin Kawlkulh lam atangin min rawn hmui a. Kan Minister zahawm tak hian a level a san loh deuh vangin heng te pawh hi a hriatpui vek lo maithei a, kan bial lamah chuan issue pui tak a ni ve tho a ni a. Heng te pawh hi thil tihtheih chi a nih chuan inthlahrung tak chungin min lo en sak se tih kha ka han ngen duh a ni.

Demand No. 42, Transport lamah hian, tun sorkar chhung hian thil thar kan hmuin ka hria a. Ka lo vei em em thin Inland Waterways lamah hma lak a ni a. Hmanni lawkah central lama a changtu minister pawh a lo kal a, kan Transport Minister zahawm tak te pawhin lo hmuakin a tul ang ang an lo tihpui a ni tih ka hria a, he House zahawm tak kal tlang hian lawmthu ka han sawi duh a ni.

Mizoram-ah hian chhim leh hmar zawngin lui hi a luang a, hengte hi tangkaia kan hman theih chuan tun aia inkalpawhna tha zawk leh bungraw thiarna tha zawk ni bawk si a ni a. A kamah hian LAD Demand kan han sawi tur lam - park te, ‘picnic spot’

kan tih ang chi te kha thalaite tan pawh a awm thei dawn bawk a ni. Chuvangin, he lama hma lakna chang hria, Central Minister te pawh vawi eng emaw zat lo hmu tawh minister kan nei hi a chhuanawm ka ti a. A hmalakna pawh a hlawhtlin chhoh ka beisei a. A hlawhtlin phei chuan Mizoram-in hmel thar a hmu dawn a ni.

Ka bial, Burma ram ri dep - Mimbung, Hrianghmun, Teikhang, Kawlbem te tan phei chuan MST bus service te hi kan *lifeline* a ni ringawt mai a. An haw lamin kan thil thar an phur theih ang zat zat te an han phur thla a, service a awmluh hi chuan kan buai der a ni. Tunah phei chuan Covid avangin an han chawlsan rihin ka han hria a. Heng pawh hi Covid a ziaawm deuh chuan an rawn service tir leh vat ka beisei. A bik takin kan Minister thawhpui officer-te pawh lawmthu ka hrilh duh a. Krismas dawnah phei chuan kan leng lo thin a, bus min pek belh tur te pawhin kan han ngen thin a, hei hi Covid awm tak hnu hian a ziaawm ta deuh a. Kan tlin tirha kan buaina ber kha a ni. Kan tlin tirh kha December kha a ni si a, kan tling tih kan hriat khan hawna nei lo kha an lo tam nghal em em mai a, khangah khan minister han biak nana ho angreng deuh si anih vangin Transport Deptt-a thawktu kan officer fel tak takte kan han be thin a. ‘Mipuite mamawh leh mipuite harsatna a ni’ tih hriain a theih chin chu min han tihfel sak thin a, an chungah pawh lawmthu ka han sawi duh bawk a ni.

Pu Deputy Speaker, kan Minister zahawm tak Pu K. Lalrinlana chanah hian ka han kal ang a. A hmasa berah chuan Demand No.17, Food, Civil Supplies & Consumer Affairs Deptt. hi a ropui ka ti khawp mai a, ‘engtiang takin nge kan Minister leh a team-te hian an thawh nasat ang aw’ ka ti a.

Pu Dy. Speaker, Covid a rawn len tirh kan awm dan kha chhui let hian, ‘kan va lo hrechiang thiam lo em’ tih tur kha a awm nual a ni. Entirna pakhat han sawi ta ila, MLA-te ngei zingah pawh supply buhfai kha tam mahse, a phurtu driver an rawn luh ngam siloh chuan, ‘kan bialah chhuanchham an awm mai ang’ tiin buhfai lei tur te kan zawng a, kei pawh hian trip 4 vel chu ka stock hman a ni. Mahse buhfai kha kan tichhe hman a ni. A chhan chu, supply tha takin a lokal a, kan buhfai lei khawl a kha hman ngai lovin Pathian hruaina leh supply lam thawhrimna a zarah kan awm chho thei zel a ni. Hengte hi a ropui ka ti a, a tir kha chuan stock-na kha Pu Deputy Speaker, i siam ve nghe nghe lo maw? Kan mamawh chi hrang hrangte pawh harsatna awm lovin tun kan thleng thei hi department te thawhrimna a ni e. Mizo mipuiten nitin ei leh bar mamawh - gas te, khawnvartui te, petrol te, diesel te kan neih theih nana an thawhnaah khan lawmthu ka sawi duh a ni.

Chutih rual chuan khawnvartui kan semna erawh hi chu rampum ang hian ‘ennawn a hun tawh em aw’ ka ti a, tunah chuan highway te pawh a awm chho tawh a, ka bialah pawh khawnvartui lakna kha Kawlkuh a ni a, Ngopa lam retailer leh outlet

ten a an lak dawn kha chuan, Kawlhkullh-a an va lakna man tura kha khawnvartui manah belh tel tir a ngai a ni. Hengte hi ka bialah chauh anih ka ring lova, kawng tha kan han nei chhova. A hmaa an chhuanlam nia ka hriata chu, tanker lian kha a kal a remchang lova an hriat vang niin ka hria. Hemi chungchang thua hian department leh kan Minister thleng pawh ka lo hmu tawh a, hengte pawh hi ‘ennawn theih dan awm se, mipui tan a ni’ tih kha ka han sawi duh a ni.

Tin, Ration Card kan tihdan te pawh hi mipute tana awlsam zawk dan a awm em aw ka ti a, Supply Office hman tangkai theih dan te. Kan harsatna em ema chu, district-a DCSO chauhvinn tihtheih anih kha chuan, a veivahna kha a buaithlak em em a ni. Aizawl-ah chuan hmun leh hmunah kan ti mai a, thingtlang atang chuan mipuite tan a harsa em em a ni.

Tin, Local Administration ah hian, hmanah chuan housing loan te an ti thin a, in leh lo nei phah pawh tam tak an awm tawh a ni. Tunah chuan Municipal kan nei ta a, hemi pawn lamah chuan heng ang chi thingtlang miten in an neih ve thei nana loan ang chi tam lutuk lem lo, a chung emaw, a bang emaw man tur tal an lo neih theihna tur hi tih ve theih chi a ni em tih hi ka rilru ah a awm a. Thingtlangah pawh in tha tak tak nei kan awm laiin, in chung far, a chung khuh nana silpoulin fura kan pek thin hi in engemawzat an la awm bawka ni tih he House zahawm takah hian kan report duh a ni. Chutih rual chuan, Local Administration-ah lawmthu sawina tur tam tak a awm a. VC house te hi a neilo khua awm mang lovin min tih chhoh sak thei a, a lawmawm hlein ka hria a, fakna tur tam tak a awm a ni.

Tin, Fisheries hi rin aiin sangha khawi duh hi an lo tam a, mahse hralh sum tur angah hian loneih ai hian harsatna hi a awm deuhin ka hria a. A market te ena, tun aia tih theih dan hi a awm em aw tih kan sawi duh a.

Tin, Art & Culture-ah hian ka lo vei ve em ema chu, mizo history a thil awm hrang hrang Mizoram pumah a awmin ka hria a, ka biala ka hriatchian kan sawi ang a. ‘Chhawrtui’ kan han tihna chhan te, ‘Samdala’ kan han tih te, heng ang chia hi kan va humhalh vek theilo a nih pawhin, chianguang deuh takin documentary nena tih theih dan a awm em tih kha kan Minister zahawm tak hian min chhinchhiah sak thei sela. A hmunah kala thla te pawh la a, kan hmuh ve theih tur video te pawh a ni ang a, internet-ah te hian ka han zawng thin a, heng hi hlawm mumal taka awmna a awm lovin ka hria a, chung chu ka han rawt duhna ni sela.

Tin, Demand No. 27, District Council hi kan chiang maiin ka ring a, ‘Minority Affairs’ lai tak a hi ka rilru a tibuai thin a. Hetah hian kan Minister hian wind-up naa min sawifiah sak se ka duh a chu, ‘Minority hi kan ni vek lawm ni, Mizoram pum hi’

tih zawhna a awm thei a. Anih leh khawi area nge minority, Mizoram sorkar bik hian minority area hnan kan nei em, tin, central-in 'minority' a tih hi khawi chin nge tih hi, a nihloh chuan minorities anga hamthatna tur tam tak central-ah department hrang hrang a awm a, khangah khan keimahni bial theuhvin kan dil ve theihna tur hriatna atan khan, 'engchin hi nge, khawi area nge minorities' tih leh, 'kristian zawng zawng hi minorities kan ni mai em' tih kha zawhna ka han nei deuh hlek a ni. Helaia hi min chhan theih chuan a lawm khawp ang.

Tin, Demand No. 39-ah hian, kan Minister leh a team te ka fak ve duh a. Tunah hian thil thar a awm a, kan sorkar hnu hian, Whatapps group hi an siam a, hei hi kan Minister leh department-a kan hotute tih tir nge ni, hmun hnihah ka awm a. Pakhat chu - Mission vengthlang kaihnawih Power & Electricity a thawkte group-ah min lo telh ve a, pakhat chu ka bial kaihnawih a ni a. Zan dar 10 hnu ah te, 'chumi line chu chhui ang u' tiin a chhiat chhan te an rawn sawi zat zat a, Mizoram Department zingah hian eng kan neih that theih nan hian 'a thawk hah ber pawl an ni mai ang em' ka ti a, eng tha deuh kan neih theih nan a thawktute thawh rim zia hi a hmuh hmaih theih miah lo a ni. Chuvangin, he House kaltlang hian lawmthu ka sawi mawlh mawlh a ni. Ka bial Vankal-ah hian 20 mW pechhuak thei tur an ti mup mup mai a, henga tana Vankal ten ram an lo pe hi an fakawm ka ti a, he House kal tlang hian lawmthu ka sawi a ni. Tin, department pawhin thawktu lak chungchangah pawh Vankal mi leh sa 6 lai min laksakin ka hria a, lawmthu ka sawi duh a ni. Tin, line lianin Kawlkulh a kaltlang lo kha tunah chuan Vankal zarah power an neih that deuh ka ring a ni.

A tawp berah chuan, Hydel Project 4 mW pechhuak thei tur hawn mai theih tur a awm a, a remchan theih chuan kan House Leader zahawm tak leh kan Minister zahawm tak ten min lo chhinchhiah sak thei sela. Multi-purpose electric generate baw, a kama thlai chin theihna baw, inland waterways ti thei baw hi a awm ve em, chutiang chu awmse chuanin, tuna project tam tak kan hriat ve ho hi chu, a kam lo neih theihloh, a khaw neitu tan phei chuan uihawm tur tak a ni.

Chuvangin, kan Demand sawi hoa hi Pu Deputy Speaker, pass a chakawm em em a ni. Ka lawm e.

DEPUTY SPEAKER : Awle, kan hun a tawp a, kan chawl a, dar 2:00 PM-ah kan lut leh dawn nia.

2:00 PM

DEPUTY SPEAKER : Tunge kan han sawm leh ang le? Member zahawm tak Pu Ramthanmawia i lo sawm ang u.

PU RAMTHANMAWIA : Pu Deputy Speaker, ka lawm e. Vawina kan Demand pawimawh tak tak pathum, kan minister zahawm tak takte demand kan sawiho dawn a, a hmasain heng hi pass turin ka rawn support nghal a ni tih ka han sawi duh a.

Kan Minister zahawm tak Pu R. Lalzirliana Demand No. 39-ah hian han lut ila. Ka bial hi ruah sur hlekin power supply hi a tawp zel mai a, tunah te pheh chuan kan nei tha chho tawh khawp mai a, a ram pum ang pawhin, kan minister hmalaknaah lawmawm ka ti a. Amaherawhchu, fur a han nih hian harsatna kan tawk thin a, a chhan nia sawi chu power supply pekna line-ah hian disc chhuak hlui, ‘old model’ an tih ang chi kha hman a ni hlawm a, hei hi a value-te a lo hniam bawk a, ‘ruah a lo sur hian disc a huh a, current a thim nghal zel mai a ni’ an ti a ni. Hei hi Pu Deputy Speaker, kan Minister zahawm tak hian *polymer disc* ngeia min thlak sak theih chuan a ziaawm kan beisei a, chu chu min lo chhinchhiah sak se. Leithum feeder, Khuangleng - Leithum leh Khawbung feeder, Khawbung - Khuangthing line-te hi disc thlak tul zualna hmun te a ni a, ruahsur changa thim zel maina feeder te an ni a, chu chu ka han ngen duh a. Chubakah chuan electric ban te hi electric ban pangngai la hman a ni hlawm a, heng electric ban te hi tower-a thlak theih ni se, kan bial power-a buaina tam tak pawh hi a siam that theih kan beisei a.

Tin, kan bial chung khaw hrang hrang AC line te hi extension tih ngai te pawh a awm a, electric ban tuiek, a hrui ina chelh din mai mai ban thlak ngai 50 lai a awm a ni. Hengte hi kan Minister-in min hriat sak chuan a lawmawm khawp ang. Khuangthing-ah hian extension tih ngai a awm a, hei hi house connection han pek dawn pawhin a line kha a hlat avangin line short leh chhia a tam a, hei pawh hi thil harsa vak lo, electric ban pathum, pali vel han phuna siam theih mai niin ka hria a, line awmsa 3 phase-a siam ngai pawh khi a awm a, ka rawn ngen tel a.

Tin, a thawktu indaihlohna hi chu kan hriat sa mah nisela, Khuangthing kV line hian line duty kan nei lova. Khuangthing-ah hian line duty hi MLA fund-in lawmman pein kan ruai mek a, chutiang chuan harsatna kan tawk a ni tih kha ka han sawi tel duh bawk a. Thil pawimawh em em pakhat chu, kan bial chhunga sub-station 3 (Khuangleng, Khawbung leh Farkawn chamwtu) hi a chung a phui lova, a far thei vek mai a, ‘eng pekna ber panel board-ah ruahtui a far thin a, a hlauhawm hle mai’ tih sawi a ni a, hetiangte pawh hi harsa vak lo a ruahtui far thei tih phui theih mai niin sawi a ni a, hengte pawh hi kan Minister zahawm takin min lo hriat sak se a l awmawm khawp ang.

Kan bialin kan nghahhlelh em em, ‘Tlawva Mini Hydrel Project’ hi vawiin thleng hian hawn theihlohin a la awm a, harsatna hrang hrang an tawk tih pawh kan hria a, han

tihdanglam deuh emaw, hmasawna tur dang a awm thei ang em tih kha kan Minister zahawm tak hi ka rawn zawt baw a, kan nghahhleth thu ka han sawi ni se la.

Minister zahawm tak Pu K. Lalrinliana Demand No. 17-ah hian lut ila. Hri leng karah ei leh in, buhfai, gas leh oil harsa miah lovin vawiin hi min thlen thei a, kan Minister zahawm tak chungah lawmthu ka sawi a, fak pawh a phu hlein ka hria a. Kan bial phei chu Myanmar rambuai avangin ral tlan a sang telin kan kaw a, chuti chung chuan buhfaia harsatna kan tawh theih lakah kan Minister zahawm takin min enpui a, a tul ang zela kan mamawhte min pek avang pawhin a chungah lawmthu ka sawi a ni. Tun sorkar-ah hian Khuangleng leh Khawbung-ah kudam leh staff quarters tha deuh mai min sak sak avangin lawmthu ka sawi a. Tin, Dungtlang leh Farkawn kudam hi sak that kan ngai khawp mai a, kan Minister-in min sak that sak theih chuan a lawmawm khawp ang. Tin, Khawbung South staff quarters inchung luh chhohna hi a mumal lo khawp mai a, helaiah hian mitin mitang an chho a, gate siam sak an ngai hle mai tih kha ka sawi duh baw a. Store Keeper pawh kan indaih lo hle a, 'kudam 6 hi mi 4-in an vil mek a ni' tih kha kan sawi baw a ni.

LAD Demand No. 19 hi, Pu Deputy Speaker, VC House sakna tur leh VC hmun pekna tur kha kan nghakhlel khawp mai a, ruahmanna kha a awm mek niin ka hria a, engtikah nge a chhuah theih ang tih kan Minister hian min hrilh theih chuan kan lawm khawp ang a. Bial cheng kerh tak kan nih avangin VC House neilo hi kan thahnem hle mai a. Chumai bakah Thlanmual In hi keini bial angah chuan a pawimawh em em mai a, thlanmual in neilo hi kan la thahnem a, pawimawh leh hmanhmawh zual deuhah phei chuan kan MLA fund-te pawh hian kan han sa nawk nawk a, MLA fund-in a daih zia zang a ni si lova, chuvang chuan Thlanmual In kan han ngen thin te kha a engtikah nge kan hmuh theih ang tih kha kan Minister zahawm tak kan ngen baw a ni.

Fisheries Department No. 35-ah hian, PMMSY scheme hnuai atanga 2020-2021 chhunga tanpuina dawng tur sangha dil (new pond), nursery rearing, farm leh paddy cum fish farming-ah te khan ka bial chhung atangin mi eng emaw zat an han thlang a, khangte kha engnge a chanchin ni ta zel, kan nghakhlel khawp mai a ni tih kha vawiinah hian kan sawilang duh baw a. Pu Deputy Speaker, PMMSY scheme hnuai vek, kum 2021-2022 chhunga kan bial khaw pathum - Samthang, Khuangleng leh Bungzung-ah *cluster based approach* hmalakna tur action plan siam ni khan kan hria a, hmalak chhunzawm zel a ni em tihte kan zawt duh a, min react theih chuan a lawmawm khawp ang. **(Dy. Speaker:** Minute 1 i la nei e) Engpawh ni se, vawiinah hian sawi tur tam tak kan bial tan a awm a, amaherawhchu, lawmthu sawina deuh hlir hi a ni a, kan hotute, kan Minister zahawm tak tak te hmalakna a lawmawm a.

A tawp berah chuan kan Minister zahawm tak Pu TJ Lalnuntluanga Demand No. 42, Transport chungchang hi keini bial angh chuan transport hi kan inngahna a ni a. Farkawn, Khawbung leh Khuangthing-ah te hian service tha takin min pe thin a. Hri avangin tunah hian an chawl rih a, remchang hmasa berah min tlan sak leh se la, sumo fare te hi a lo to a, rethei zawkte tana MST bus kan tangkaipui zia te pawh hi he House-ah pawh hian ka han sawi duh a, **(Dy. Speaker:** I hun a tawp a) a thawktu zawng zawngte chungah pawh lawmthu ka sawi duh bawka ni.

Tin, Demand No. 36, a tawp ber atan Khawbung Forest Rest House, ‘Forest IB’ kan tih mai thin kha a chhe tawh viau mai a, sak that emaw, repair emaw a ngai khawp mai tih hi kan Minister hnenah hian ka thlen ni se la. Tin, Khawbung Range-ah hian staff pathum an awm a, RO pakhat, Forester pakhat leh Grade-IV staff pakhat an awm a. Grade-IV staff hi kumin July ah a pension dawn a, Forester hi nakumah a pension dawn bawka, RO pakhat chauh hi nakumah chuan Office kal tur kan nei dawn a ni tih te pawh hi min lo hriat sak se la a lawmawm khawp ang.

Tin, kan bial hi min hriatpui angin Eco-tourism-ah hian potential tha ber pawl a ni a, he lamah hianin hma min lakpui thei se kan duh hle mai a. Hripui avangin kum hnih chhung engmah hmalakna a kal thei lo tih kan hria a. Pathian zarah kumin chho hi chu boruak tha tak hnuaiyah hmasawna lampang pawh min kalpui chho thei ang tih kan ring a. Chutiang tur chuan kan Minister kan han ngen takte kha vawiinah hian ka han sawilang a ni e.

Tichuan, Demand pathum kan han sawi tak, Minister zahawm tak tak pathumte Demand kha he House hian lungrual taka pass pui turin kei pawhin ka rawn thlawp a ni. Ka lawm e.

DEPUTY SPEAKER : Member zahawm tak Pu Nihar Kanti Chakma i lo sawm ang.

PU NIHAR KANTI CHAKMA: Pu Dy. Speaker, ka lawm e. Vawiinah Minister zahawm tak tak te Demand pathum lai kan sawiho mek a. Hun a tlem si a, Demand a tam si a, kan sawi zo hman lo vang tih a hlauhawm viau mai.

Pu Dy. Speaker, a hmasa berin Transport Department chungchanga sawi ka duh chu, a lawmawm ka ti khawp mai a, Governor’s Address-ah pawh a lang a. “The Ministry of Shipping has approved ₹2,292.94 lakh for development of IWT project in River Khawthlang Tuipui...’ tih kan hmu a. A lawmawm ka ti khawp mai a. Mizoram-ah a bik takin ka bialah Inland Water Transport hi kan hmang tangkai nasa a, hemi project a hlawhtlin hnu-ah chuan ka bial pumpui entirnan, Tlabung atangin Parva thleng a kal theih dawn a, Tlabung atangin Tuipuibari, Silisuri thleng pawh a kal thei a. A

lawmawm ka ti khawp mai a, A changtu minister hnenah lawmthu ka rawn sawi hmasa a ni.

Pu Dy. Speaker, Art & Culture Department ah tawi te ka rawn sawi duh chu, kan hriat theuh angin Mizoram-ah Tlabung hi khaw upa ber a ni a, Nikumah khan kum 150 a tlin lawmna pawh ka telpui ve a. Tlabung-ah hian chhinchhiah tlak thil hlui tam tak a awm a, Mizoram-a Post Office hmasa ber, Mizorama Police Station hmasa ber leh 'Missionary Kai' sapho ina Mizoram chhunga ke an nghahna hmasa ber a ni a, a pawimawh em em a ni. Art & Culture Department tan hian thil hluite preserve theih dan a awm em ka ti a, entirnan, 'Missionary Kai' hi thangthar zir chho zelte hriat atan enkawl that ni se. Tin, Mizoram-ah Inspection Bungalow awm hmasakna ber a ni bawk a, Tlabung hi, British hun laia Mau In an sak chu tun thleng hian a la ding a. Chung chu Art & Culture Department atang hian preserve emaw tha taka enkawl dan emaw a awm ang em ka ti a. Tunah hian enkawltu nei lova a awm mai mai hi a paw ka ti hle a ni. Pu Dy. Speaker, wawiinah hian Art & Culture Minister zahawm tak hian hei hi min lo chhinchhiah sak thei se ka duh hle mai.

Demand No. 33, Land Resources, Soil & Water Conservation Deptt. hi a pawimawh khawp mai a. Soil & Water Conservation hi a awmluh chuan mihring hi kan awm thei lo a ni. Ka bial context atangin sawi ta ila Pu Dy. Speaker. Ka bial pumpui hi lui kamah kan awm a, fur lai chuan tui a lianin a khauh hle thin a, chutiang chu a nih avang chuan kum tin hian soil erosion a nasa em em thin a ni. Tun atanga hmalak a nihloh chuan kum 50 hnuah ka bial chhung khaw tam zawk hi a bo mai ang tih a hlauhawm a ni. Chuvangin, soil hi preserve a ngai a. Entirnan, water conservation chungchangah pawh tunah hian a tui a kam chak em em a. Tunhma kan naupan lai kha chuan a lui a lian em em a, englai pawh khan sangha man theih a ni a. Tunah erawh hi chuan chutiang chu a ni tawh miah lova, ke pawhin a dai kai theih tawh a ni. Kan hotute hian hei hi ngun takin an ngaihtuah a ngai a ni. Chuvangin, Land Resources, Soil & Water Conservation Department hian nasa takin tan a lak a ngai a ni.

Pu Dy. Speaker, Demand No. 39, a Power & Electricity ah hian Mizoram Power & Electricity a kan intodelh lohna chu kan hre vek a. Ka bial ang zawngin sawi ta ila, power supply hi a hma ai chuan kan zia khawp mai a. Nichina ka hmaa Member zahawm takin a sawi ang khan Tlabung hi khaw lian a ni a, Electric Department enkawltu hi JE ringawt a ni a, hei hi Sub-Division a hlankai dan a awm em tih kha a changtu Minister zahawm takin min chhinchhiah sak se. Tlabung hi khaw lum a nih avangin Aizawl aiin power supply hi kan mamawh zawk a ni. Mihring kan pung chho zel a, veng tin extension a ngai ve zel a. Ka bial chhungah thirbante a tuiek nasa a, a tam zawk chu a tlu tep a ni. Hengte pawh hi min thlak sak theih chuan ka lawm khawp ang.

Pu Dy. Speaker, Demand No. 17, Food, Civil Supplies & Consumer Affairs Deptt-ah hian kan hriat angin tunah hian National Highway-302 Lunglei - Tlabung kawng laih mek a ni a, fur a rawn nih chuan eng ang motor pawh tlan ngaihna a awm dawn lo va. Chuvangin, Monsoon stock te pawh a ngai dawn a, hei hi a changtu Minister zahawm takin min lo hriat sak se. Keimahni lamah pawh reilote ruahsur chhungin motor eng emaw zat an accident a ni.

Pu Dy. Speaker, Demand No. 35 Fisheries chungchangah hian, ka bial hi fishery potential area a ni a, chute lain fisheries lama kan intodelh loh nasat zia kan hre theuh a. Tlabung-ah meuh pawh Silchar lam sangha kan lalut ve tawh a, hmalakna tha tak a awm chuan Tlabung leh a khaw chhehvel pawh sangha-ah kan intodelh thei a ni. Chuvangin, Minister zahawmtak hian ka bialah hian thawh tur a ngah hle mai a, potential area a ni bawk a. Sorkar thar a pian hnuah ka bialah hmalakna engnge awm han inzawt ta ila min hrilh thei an awm ang em ka ti a.

Entirnan, nichina member zahawmtakte sawi *prawn-culture* kha, keini pawh phaia kan zin chuan prawn hi kan ei duh ber a ni thin a, a to em em a. Khalam hawi khan Mizoram-ah hian hmalak ve dan a awm lo em ni aw ka ti a.

Aw le, Pu Deputy Speaker, Local Administration Department chungchanga tawite ka sawi duh chu, ka bial chhungah Village Council 17 an awm, a tam zawk hi VC House neilo an ni a, (**Dy. Speaker:** Minute 1 i la nei e.) a awm chhunte pawh a chhe nual a, kha kha Minister zahawmtak hian lo chhinchhiah se ka duh khawp mai a. Tunlaih chuan kan VC-te pawh hian thiamna tlem an neih a ngai a, thawh tur hi an ngah em em a. Ka biala VC thenkhat te pawh an changkang tawh a, computer-te pawh a tam zawkin an hmang thei a. Chuvangin, computer-te pawh ka bialah min ngaihtuhsak thei se ka duh khawp mai.

Pu Deputy Speaker, hun a tawp tawh bawk a, chu zawng chu ka sawi theih ni se. Ka lawm e.

DEPUTY SPEAKER : A lawmawm e. Tunah chuan Member zahawmtak Er. H. Lalzirliana i lo sawm ang u.

ER. H. LALZIRLIANA : Pu Deputy Speaker, ka lawm e. Wawiinah kan Minister zahawmtak takte pathumte - Pu TJ Lalnuntluanga, Pu K. Lalrinliana leh Pu R. Lalzirliana te demand sawi theia ka awm avangin ka lawm hle a ni.

Ka ngaih pawimawh zual han sawi ta ila. Kan Minister zahawmtak Pu TJ Lalnuntluanga Demand thenkhat, Forest leh Transport hi han sawi ka duh a. A hmasa

berah Demand No. 36, Environment, Forests & Climate Change Deptt. hi han sawi ka duh a.

Mizoram-ah hian sanctuary-te pawh kan nei a, ‘khawiah nge Mizoram-a sakei awmna’ ti ta ila, kan hre dik thei ang emaw. Teirei, khulaia *Dampa sanctuary* khu a ni a, ka bial a ni. Khulai sakei khu kan ven hneh loha, kan lo chhuah leh palh hlah chuan Mizoram chu kan *nil* leh dawn tihna a ni mai a. Chuvangin, khulai Dampa sanctuary khu hun eng emaw chen, sakei census an han neih khan an hmu zo lova, tun hnuah vanneithlak takin kan han hmu leh a. An hmuh loh chhung khan khulai Dampa sanctuary guard, MR kan tih ang chi, eng emaw zah kha an hna atanga han chawlhrit te pawh an awm a. Tunah hian sakei te kan hmu leh tawh bawk a, central lam te pawhin minrawn ngai pawimawh thar leh turah ngai ila, hengte pawh hi a aia nasa zawka kan sanctuary, kan ‘Tiger Reserve Forest’ hi venhim a, humhalh theih ni sela. Tin, a thawkte an tam a, an indaihloh chuan encroachment a tam em em a, forest chhunga luh a, chakai, sangha leh ransa, sava thlenga lo veh tawkte an awm thin a ni. Chuvangin, he kan ram rohlu hi nasa leh zuala kan ven theihna turin hma lak zel ni sela tih ka han sawi duh a.

Tin, teak plantation hi tunhmain khawthlang lamah khuan a tam thin a, Mamit leh a chhehvel - Kawrthah, Zawlnuam, Zamuang tih velah te. Hun eng emaw chhung kha, a bik takin Kawrthah Division hnuaih khuan ‘work plan’ an ti a, *teak cut theihna leh hralh theihna* an nei a. Tun hnuah hian kha work plan kha a lo tawp tak avangin tam tak khuan an teak pulting tawhte, hralh hun tawh tak takte khawih thei lovin, hralh thei lovin an awm a, hei hi kan Minister zahawmtak hian ngaihtuahna senga work plan te siamin, hmun dangah hian *work plan* ang zawnga kal hi a awm ka hre chiah lova, khulai bikah khuan engatinge ni work plan base-a kan kal bik tlat khu ka hrethiam chiah lova. Hmun dangah hi chuan an duh hun hunah department lama tihfel tur tul tulte an han tih hian an hralh thei mai thin a ni a. Khulai bik khu ‘special category’ nge ni a, khalai kha min lo enfel sak se tih kha ka han ngen duh a.

Transport chungchang hi han sawi ka duh a. Kan Minister zahawmtak hmalaknaah hian hmalakna tharte han hmuh tur a awm hi ropui ka ti khawp a. Inland-water transport chungchangah te beiseina sang tak tunah kan nei a. Sorkar pawhin hma han laka tih hlawhtlin mai tur ang te a han ni hi a lawmawm ka ti a, department-te leh Minister chungah lawmthu ka han sawi a.

Ka bial chhungah hian MST bus service-na hmun pakhat hi a awm ve a, khulam Tuipuibari ruamah khuan, kan sawi fo thin a, covid hri avang te, kawng thatloh avang tein min han tihtawp sak a. Amaherawhchu, kawngte kan lo improve ve tawh a, min han tlan tir a, kan lawm hle a. Chutih mek lai chuan, covid hrite a han hluar leh a, min han tihtawpsak lailawk leh a, tun thleng hian an la tlan leh lova, kawng kha chu a tha

tawh a, a tlan theih a, kan Minister hian a rang thei anga min chhonzawmsak leh turin ka han ngen duh a ni. Tin, Two-wheeler permit-te an ti a, tam takin eizawna te an lo neih phah a, Mamit District-ah hian engtikah nge two-wheeler permit hi kan neih ve theih dawn tih te ka han zawt pah a ni.

Pu K. Lalrinliana, kan Minister zahawmtak chan tlem ka han sawi leh ang a. Food & Civil Supplies chungchangah hian tunah chuan supply availability chu kan kal pel thawkhat niin a lang a, service improvement lam kan hawi thei ta hi a lawmawm ka ti hle a. Kan hria a, sorkar hmasaah khan vairam atangtein kan lo ral hriat te pawh a ni ve a, gas te, buhfai te harsatna kan tawh namenloh zia kha kan lo hriatpui ve a, kan chhungte mangang pawh vairam atangte pawhin engtin tin emaw kan rawn arrange sak hial te kha a awm ve a. Hei tunah chuan supply lam chu a available viau a, service improvement lamah hma an han la a, gas pawh home delivery te an ti a, a changkan thlakin hma kan sawn niin ka hria a. A thawktu leh a changtu minister pawh fak an phuin ka hria a, an chungah lawmthu ka sawi a. Tin, bottling plant expansion turte kan han hria a, a lawmawm hle a. Vawiin thlengin kawng chhia, fur lai pawh ni se, covid hnuaiah pawh mipuite tan harsatna awm lovin hna an thawk a, a lawmawm hle a ni tih kha ka han sawi duh a.

Tin, a bik takin Mamitah DCSO Office hi 2019 May - April thla chho vel kha ni in ka hria a, office kha a tlukin a tlu tawp mai a, Minister pawh hian min ngaihpaawimawh pui hle a. Amaherawhchu, kan beiseina fund source te a lo flop leh thin a, tunah hian chu chu min han tihsak dawn a ni tih te ka han hria a, kan sorkar chhung ngei hian he DCSO Office tlu hi a thara min sak sak zawh hman thei sela kan duh a, tunah hmalak tur a ni hi kan lawm hle a, lawmthu kan sawi a.

Tin, kan ngaihpaawimawh em em Legal Metrology office hi sak zawhna a rei tawh a, Ministry hmasaah khan an sa zo tawh a, vawiin thlengin luahlum lohin a la awm a. Hei hi khawngaihtakin kan Minister hian min lo hriatsak se, a function ve thei tawh lo em ni tih kha kan han ngenna a ni a.

Tuipuibari lam khu monsoon stock neihna thin a ni a, a lam a hla a, kawngte alo tha lo thin bawk nen. Godown a len loh avangin an Community Hall-ah an dah thin a, an Community Hall khu hman theih lohin buhfaiin a khat thin a ni. Minister hnenah pawh kan sawi tawh a, tuna Godown extend tur 4.5 lakh kan dawng a, VC ho kha, 'hlawk em em tum lovin thawk mai teh u' kan ti a. A kum lehah 4.5 lakh kan dawng leh a, 9 lakh kan nei ta a. Amaherawhchu 9 lakhs chuan Community Hall, mi zawng zawng lenna tur khawp sak chu a huphurhawm fuin kan ring a. Godown tam tak tun Ministry-ah hian an sa a, kan bial tan hian a thar sak ve theih ani ang em? Hei hi a

pawimawh em mai a, kan Minister hian min lo hriatsak sela tih kha ka sawi duh a ni.

Tin, kan Minister zahawm tak Pu R. Lalzirliana Demand hi sawi leh ila. Power & Electricity, Mamit Division hnuaia thawktu zawng zawngte an thawhrimna avangin lawmthu ka hrih a, chhun leh zan pawh sawi lovin, a sur a sa hnuaiah theih ang ang mipuite tana an rawngbawlna fak tlak a ni a, an chungah lawmthu ka sawi e.

132 kV Bairabi - West Phaileng via Mamit khu kan beisei hunah kan commission thei dawnlo niin a lang a, hei hi department ten chak zawka hmalak dan tur ngaihtuah sela, harsatna neuh neuh, a ban phunna tur chungchangah te kan nei a, hengte pawh hi a tul ang angin hma la tlang ila tih kha kan ngen leh duh a.

Tin, Linesmen (MR) hi neihlohna kan ngah hle mai a, ka hnenah pawh an rawn sawi thin a, tihngaihna vak hi a awm silova. Chilui, Rajiv Nagar, Dapchhuah, Lengte, Rawpuichhip ... (**Dy. Speaker:** I hun a tawp e.) Pu Deputy Speaker, min lo hrethiam lawk teh. Damkawr ka ni a, ka sawi chak thei lova. MR pawh hi kan la thei lawi si lova, an harsatna tawh hi an hriatthiam pui awm khawp a. Hengte hi kan Minister hian min hriat pui theih chuan kan lawm hle ang.

Ka bial chhungah khuan Saithah, Saitlaw ruamah khuan mini-hydel project siamna remchang em em mai a awm a, khulai khu returnee ho ten bamboo project an tihna hmun, ram tha tak mai a ni a. Kan ministry chhung hian mini-hydel project pakhat hi chu soal tlu ve hrim hrim teh ang u. Ka bial chhunga mi a hmun ka rawn thawh a nih chu. Kan Minister pawh hian a hrechiangin ka ring a, a wind-up hunah pawh rawn sawi tel sela a lawmawm hle ang. He ministry hian mini-hydel project pakhat hi chu soal tlu ve hrim hrim teh ang u tih kha ka han rawt deuh a ni e. Sawi tur tam hle mahse khami chin kha ka duhtawh ang e. Pu Deputy Speaker, ka lawm e.

DEPUTY SPEAKER : Pu VL Zaithanzama, Member zahawm tak i lo sawm ang.

PU VL. ZAITHAZAMA: Pu Deputy Speaker, ka lawm e. Vawiinah hian kan Minister zahawm tak tak pathumte Demand kan sawi a ni a, a tam hle mai a, kan sawi hman chin chin sawi dawn ila. A hmasak dan indawt a sawi lovin a hnunglam atang hian sawi ila.

Demand No. 39 - Power & Electricity Department-ah hian lawmthu te an rawn sawi hlawm a. Ram pum anga ngaihtuahin eng hi kan hmu tha a, a lawmawm hlein ka hria a. Kan veng pawhin kan hmu tha a ni. Chuti chung chuan kan budgetah hian kum

hmasa lam aiin 8.49%-in a tlahniam a, heti chung hian hmuhthat reng kan inbeisei a ni ang chu maw.

Thil pakhat ka bial chhung Lawipu BSUP-ah sawn electric bill sang thutah khan chhungkaw 15 harsa ve tak tak-in bill an pe thei lova, heng ho hi disconnect sak an ni a, khawngaihni anni ho hi thlunzawm sak leh dan hi a awm em?

Awle, eng kan neih that viau lai hian tun thal lai hian kan nei tha em em tho nain Mizoram-a kan tharchhuah hi a tlem lutuk a ni. Mizoram sorkarin kan enkawl mini-hydel project 8-ah hian tharchhuah kan nei meuhlo a ni. Tukin zinga record ka en phei chuan, Tlungvel solar 1.58 chiah hi kan tharchhuah awmchhun a ni. Chuvang chuan, ka hmaa Mamit bialtu MLA zahawm tak khan mini-hydel project kha a rawn sawi a, hei hi chu a beitham ka ti a, 'mini' lo deuh 25 mW chin tal anih loh chuan ka ti deuh a ni. Tuna Mizoram sorkarin a enkawl lian ber chu Serlui a ni a, hei pawh hi tukin khan a *nil* tlat a ni. Tuirial NEEPCO ho enkawl-ah khuan 60 mW pechhuak thei 42 mW chuang an la pechhuak thei reng mai. Tui tlem kan chhuanlam a, Mizoram chhung tho a ni a, engatinge Serlui khuan power a generate tlem, kan enkawl tha lo em ni, tan lak ava ngai ve tih kha uar takin kan sawi a ni.

PHE lam ka han sawi kai daih ang a. Tui kan pump chhuah loh chuan in tur kan nei tawh lova, Mizoram District Capital hrang hrangah PHE-in kan tui mamawh an pump chhuak a. Chumi atan chuan 15 mW dawn an mamawh a ni. A thal tulh tulh a, kan tui mamawh a sang tulh tulh a, kan Power enkawl atanga kan pekchhuah a tlem telh telh a. Tunah chuan ram pawn leh Mizoram chhungah pawh Tuirial, NEEPCO ho enkawl atang hian Power hi hmu ta lo ila chuan tuihal hian kan thi mai dawn ni hian a lang a ni. Chuvang chuan, Pu Dy. Speaker, Mini Hydel Project ringawt buaipui lo hian kan tui mamawh pump theihna tur khawp power generate tur hi i ngaihtuah ang u tih kha ka rawt a ni e.

Tunah hian engnge hmachhawp kan neih ka hre lova, Solar Park, Vankal kha an rawn sawi a, March, 2021-a zawh tura tih kha zawh ala ni lova, engtik nge zawh anih dawn tih kha minister-in a wind-up hunah rawn sawi sela tih kha ka ngen a. Awmze neia hmalakna thar kan nei em, Tuirini hydel project kha ui tak chungin kan chhunzawm ta baw si lova tih kha kha ka han zawt baw a ni e.

A pahnihaah chuan Demand No. 36, Forest-ah hian ka han lut ang a. Khati tak maia kan power generate tlemna chhan kha ngaw kan neih tlem vang te a ni mai ang em? Forest-ah hian *total forest area* hi 2009 atang khan a tlahniam char char a, *open forest* hi 2013 atang khan a tlahniam baw a, *very-dense forest* te hi chu hma kan sawn ang lawi a. Engpawhnise tuna kan dinhmun en hian forest-ah hian tuna kan ngaihtuahna

keini ho hian nasa lehzuala kan sen a ngai ni hian ka hria a. Kan ram ngawte kan tihchhiat zel chuan kan tu leh faten harsatna nasa tak tui in turah an la tawng dawn a ni. Hmasawna hian forest hi a tichhe zel dawn a. Kawng kan lai ang a, tunah pawh national highway avang te leh defence road 600 kms kan laih tur avang te pawh hian forest hi nasa takin a tichhe dawn a ni. Hmasawna hi kan mamawh a, kan thang zel dawn a. Chutih rual chuan keini hian kan rama thing leh maute humhalhna kawngah hian nasa lehzuala tan kan lak a ngai dawn niin ka hria a, chu chu kan sawi duh a. Thingphun uar a pawimawh rualin a awmsa humhalh hi nasa taka kan tih a ngai a ni tih kha kan sawi tel hram a ni. Kan ngaw te hi kan thiah zawh hunah kan ram hi tui in turah kan buai dawn a, tunah pawh kan buai tan mek a ni. Tlawng lui pawh khuti khawp khuan a te tawh a, churang chuan, ‘theihtawpin tan i la ang u,’ tiin kan infuih a ni e.

Transport Demand No. 42-ah hian tawi te ka han sawi ri ve leh hram ang a. Transport-ah hian lawmna deuh mai ka nei a, kan Minister zahawm tak hian tan a la a, Tripura, Zampui lam te, Manipur, Churachanpur leh Lamka lam te Bus service tir turin hma a la a, tunah hian an service tan mai dawn ni hian ka hria a. Hmanah pawh lawmthu ka sawi tawh a, ani hi ZORO-a kan thalai vice president hlui kha a ni a, a tih awm tak te pawh a ni e. Ka lawm a, lawmthu ka han sawi a ni.

Chutih lai chuan thil pakhat lek han tihrik duh ka nei a, pakhatnaah chuan Learners Licence lak harsa lutuk hi. Kan thalai ten hun tamtak an seng a Learners Licence la tur hian hun an hman a ni. Form la tura kal a ngai a, document an ken kimloh chuan an hawng a, a hranpaa an han submit leh a ngai a, a hnu karkhat velah *briefing* ti turin kal leh a ngai a, an tih zawh hnuah thlalak leh fee pe tura an kal leh a ngai a, ‘briefing an tih ni hian thlalak leh pawisa pek hi a tih theih mai lawm ni’ tih kha kan zawt duh a. Learners Licence la tura vawi 4 vel, ni 4 ni 5 danah kal a ngai a, thlakhat dawn buaipui a ngai thin a ni. Churang chuan, kan thalai ten hun tamtak hetiang an seng hi hun tlem zawk senga siamrem dan a awm lawm ni tih kha kan zawt a ni.

Tin, two-wheeler taxi stand awm mumal lo hi an khawngaihthlak takzet a. Kum 2021 February khan Aizawl-ah two-wheeler taxi 2400 a awm tawh a, stand mumal an nei lova, an khawngaihthlak khawp mai. Churang chuan, “two-wheeler te hi permit kan pe leh zel dawn anih pawhin uluk takin ngaihtuahna i seng ang u” tih kha ka han sawi a ni. (**Deputy Speaker:** I hun a tawp a.)

Pu Deputy Speaker, tawi tein, Demand No. 17-ah ka han lut ang a. 29th January, 2022 khan Aizawl dawr 69 zet te iron rod, a size chhal ang tlinglo kg 5 lakhs zet man a ni a. Hemi chungchang hi ka ngaihtuah a, iron rod hi tunhmain kan buk thin a, min bum a, tunah a piece-in kan lei a, min bum leh a, ava buaithlak em. Tunah hian, nichina kan ngaihthlak tak ang khan Legal Metrology Inspector hi mi 14 chauh kan nei a, ram pum

enkawl tur chuan gas buk tlinglo check ngai, petrol check ngai bawk, anni tan hian tihngaihna a awmlo a ni. Amaherawhchu kan lak belh theilo anih pawhin an check ang chhun chhuna tidik lo-te hremna hi tun ai hian na ta sela an hnathawh hian awmzia a nei ang tih kha.

A tawp ber atan chuan Pu Deputy Speaker, pakhat chiah ka han sawi ve leh ang e. Art & Culture Demand No. 23, Art & Culture-ah hian, Archive Wing hi a pawimawh tehlu nen kan ngaihthah hle mai a. Tun dinhmunah hian Mizoram State Archive document te hi National Archive of India Delhi atang te, Assam State Archive Gwuahati atang te, West Bengal State Archive Kolkata leh DC record Aizawl District atang tein lak a ni deuh ber a. DC record hi Aizawl atanga document pawimawh vawnthat lak pawh hi kum 30 hma lama mi a ni tlangpui a ni.

Nichina kan ngaihthlak tak ang khan, department hrang hrang ten kan document te kan pe khawm lo hle mai a. Tunah hian School Education atang te, Art & Culture Department atang te KVI Mizoram leh MBSE atang te hian document tlema zawng an dawn tih mai loh chu department hian kan document-te hi kan pe khawm lo a ni. Thangtharte tan document tha hnutchhiah tur neilo hian kan awm mai ang tih a hlauhawm a, tun aia nasa hian hemi kawngah hian inzirtir a ngai hlein ka hria a. Hmanni DC office kang te khan kha inzir nan hmang ila. Department dang pawhin harsatna kan tawk thei a, chuvangin kan document te hi a theih ang ang archive-ah hian dah a thain ka hria a.

Tin, a tawp bera tan, “The Mizoram Public Record Act, 2011” leh “The Mizoram Public Record Rule, 2014” kan neih tawhte hi tihhlawhtlin ala ni lova. Dan kan siam a, kan ngaihsak zui leh lova, dan tha neihloh hi a pawl a, nei reng sia ngaihsak zui leh loh hi a pawl lehzualin ka hria a. Chuvangin, Dan tha tak kan siam a, he rorelna inpui atang ngei hian kan ngaihsak leh silo hi keimahni hi inenfiah kan ngai hlein ka hria a, thildangah pawh hetiang hi a awm nual a ni. Pu Deputy Speaker, ka duhtawk mai ang e. Ka lawm e.

DEPUTY SPEAKER : Awle, tunah chuan Member zahawm tak Dr. ZR Thiamsanga ilo sawm ang u.

DR. ZR. THIAM SANGA : Pu Deputy Speaker, ka lawm e. Hei, vawiinah hian kan Minister zahawm tak takte demand pathum Pu TJ Lalnuntluanga, Pu K. Lalrinliana leh Pu R. Lalzirliana te demand kan han sawiho thei hi a lawmawm hlein ka hria a. A hmasain an demand hi kan lo en thuk thuk tawh a, he House zahawm tak hian pass ngei turin ka duh thu ka rawn sawi nghal a ni e.

Demand No. 4 atang hian han tan ila. Hetah hian Champhai District hming ang te pawhin lawmthu ka sawi duh a, Aizawl Judicial District atanga Champhai District a lo piang ve ta te hi a lawmawm khawp mai a, Champhai district tan chuan kan Minister leh a thawhpuite chungah lawmthu ka sawi takzet a. Amaherawhchu staff kan la nei mumal lova, chak taka hma min lak sak turin kan ngen duh bawk a ni.

Environment, Forest & Climate Change Deptt., Demand No. 36 hi kan hriat angin tam tak lawmthu sawi tur a awm a. Kan Minister remhriatnain *afforestation drive* kalpuiin project ‘Rehabilitation of Degraded Forest in the Water-shed of Champhai Agriculture land in Mizoram’, NEC hnuaiah 2.41 crore a bul tan nan kan han hmu dawnin ka hria a, a lawmawm khawpin ka hria a. Tin, thil lawmawm em em mai chu, kan Minister hmalakna bawk hianin Champhai Zotlang YMA park hi ‘Botanical Garden’ atana kalpui tum a ni a, a lawmawm khawp mai a. Champhai mai nilo, Mizoram hmun hrang hranga khawpui, hmun pawimawh tak takah hian Botanical Garden ruahmanna dangte pawh awm chho zel se a duhawm khawpin a rinawm a ni.

Champhai bikah hian Conservation of Forest, Eastern Circle awm tura ruahman a ni te hi keini tan chuan a lawmawm khawp mai a, tunah hian hmalak chhoh mek zel a ni a. Kan hriat angin Champhai khi ‘potential area’ kan ti mai a, khualzin te leh eng emaw tan te pawh, forest-ah hian nauban te, tlaizawng te, kan ngaihhlut em em ‘far’ te pawh a ni ang chu, khualzin mite tana park han siam theihna tur, Mizoram pum tan pawh khing Rih Dil te han tlawh paha Champhai-ah park ropui tak han en theihna tur leh tourist attract nan te. Tin, kan economy tan pawha pawimawh tak tak mai kan han nei nual a, khing Ngur Tlang, North Khawbungah te, chutiang chuan hmun hrang hrangah hian kan nei chho a ni. Ka bial Diltlang te pawh khi khaw nuam deuh mai a ni a, a khaw hming a putna chhan pawh dil tha deuh mai a awm a. Khing Diltlang te pawh khi Forest hnuaia ‘Nature Conservation’ hian humhalha, tourism nena tang kawpa eco-forestry, eco-tourism han tih nan a tha em em a, tui tha si, dil tha si a ni a. Khing ho te pawh khi hma min lak sak turin kan ngen nghal a.

Tin, mahni bial chhungte chu kan sawi lo thei lova. Tualcheng-ah Forest quarter kan mamawh em em mai a. Murlen Sanctuary awmna kan nih avangin hei hi kan venhim nan pawh a pawimawh khawp mai a, Khualzin te tan Tualcheng-ah khian Forest Rest House te ka han sawi nghal ni se. Tin, Forest chungchanga ka sawi leh duh chu, nichinah khan kan ngaithla a. Forest Survey of India, 2021 a hnuhnung berah khan Mizoram pumpui hi kan hriat ang khan 84.53% ‘tree cover area’ an tih ang kha a ni a. Amaherawhchu, ‘very dense’ tih te, ‘dense’ tih te, ‘moderate’ tih te, ‘open’ tih te nilo *very dense* kha chu .74% a ni a, *moderate* 27.1% leh *open forest* 56.68% te a ni. A tha thawkhat viau a, India ram pumpuia ram a zau teh lul nen, han chhut pawh khan *forest cover area* kha 2.201% niin, India ram puma forest kha Mizoram hian kan cover a ni.

Chuvang chuan, a lawmawm ka ti a, kan Forest Minister te leh a department te indaih lo chung chung hna an thawhna hi an fakawm hle a ni. Amaherawhchu, kan sawi tak ang khan staff an indaih lova, Forester leh Forest Guard te kan tlem bakah Wildlife Guard thleng te pawh hian kan indaih lo hle mai a. Heng te hi kan ram, kan forest-te kan humhalh zelna tur chuan tan lak hi kan la ngai khawpin ka hria a.

Tichuan, ni e, hetiang chung chung pawhin ram kang chungchangah pawh hian kan ziaawm sawt khawp mai a. Awareness te pawh hi kan nei tha a, tun ai hian han neih that leh zual te pawh hi a duhawm a. Sum te pawh hi heng awareness campaign nan te pawh hian dah theih ni se a duhawm khawpin ka hria.

Inland Water Transport hnuaiyah hmalak mekna bakah khan Kaladan Multi Modal Transport Project, Mizoram hmasawmna tur lian tham kan han nei te hi a lawmawm khawp mai a, hengte hi chhinchhiah tlak a ni. He sorkar Pu Zoramthanga sorkar, Forest Minister leh a department te hi an fakawm hlein ka hria a. Hetianga hmasawmna ruhrel lian tak mai kan han nei chho te hi Mizoram tan a pawimawh hle a, kan economy pawh hei hian nasa takin a la hril dawn a ni tih a chiang a ni. Tichuan, thil te tham ni mahse two-wheeler taxi hmanga mi tam tak tan eizawmna an han awm chho te hi a lawmawm khawp mai. Hei, kan Minister hian Inter-State Service Manipur leh Tripura lam mai nilo, Indo-Myanmar te pawh an han ti a. Amaherawhchu ram alo buai tak avang leh Covid avang hian duh angin a takin hma a lak chak theihloh zawk a, nilo se chu helaiah pawh hian Zofate kan inpumkhatna tura pawimawh tak anih avangin a lawmawm khawpin ka hria a, ka han sawi ve hrim hrim a ni. Tin, mahni bialah DDO office kan CM leh kan Minister hmalaknain kan han nei tur te hi a lawmawm hle a ni.

Tichuan Demand No. 17, Food, Civil Supplies & Consumer Affairs-ah hian, Covid 19 bakah ramri leh thil dang dangin min tihbuaina karah pawh kan sorkar hnu reilo teah, sorkar-in theih tawp a chhuah a, gas supply te nitina trip 15 kan nei thina kha tunah chuan trip 24 vel kan hmu a, chuvang chuan eirawngbawl nan gas (**Deputy Speaker:** Minute khat i la nei e.) harsa lovin hripui leng karah pawh hetiang kan han awm thei te hi a ropui a, he sorkar hi fak tlak a ni. Dik tak chuan tun hma kan harsa em emna gas supply-ah te, dinhmun harsa tak karah pawh hetiang an tithei hi a lawmawm hlein ka hria a. Tin buhfai chungchangah harsatna kan tawk lova, kan ramin harsatna nasa tak kan tawk chung pawh hian theihtawpa hma an lakna zarah kan in todelh thei a. Tin, kudam pawh 10 lai mai kan sa zo tawh a, 21 sak mek niin 19 sak tum a ni bawk a. Hetah hian ka bial Rabung leh Tualcheng te pawh hi tel ve turah kan ngai a, kan Minister hian min lo hriat sak se ka duh a. Pu Deputy Speaker, hun hi a tlem si a, tawi te min han pek belh hram la.

Hei, thingtlang lama ‘VC House’ kan tih te 136 sak a ni dawn te, 95 repair tura ruahmanna awm te hi a lawmawm khawpin ka hria a. Tin, Fisheries chungchanghian, Champhai te pawh hi potential area tha kan ni a, tunah hian Mizoram pumpui angah pawh hma kan sawn chho mek zel a, tunah hian kan bialah hmasawna tam tak min rawn siam sak te hi kan lawm a ni.

Tin, a tawp berah chuan Power & Electricity chungchanghian lawmthu ka sawi duh a. Hahipa a kuma kum kan lo sawi tawh 132 kV line East Lungdar – Khawzawl - Champhai kan beisei phakloh tunah a taka min tih hlawhtlin sak hi a changtu Minister leh kan sorkar chungah Champhai ai awhin lawmthu ka sawi a ni. Tichuan, kan powerline 132 kV line-ah hian section 15 a awm a, Zuangtui, Saitual, Khawzawl te hian OPGW (Optical Fibre Ground Wire’ an tih hi an laid duh a, amaherawhchu Khawzawl - Champhai khi OPGW la tihloh a ni tlat mai a, khitah khian min lay sak ve ngei turin kan Minister zahawm tak hi kan ngen bawk a.

Vawiina *Zawhna leh Chhanna* hunah khan ka sawi tawh a, Champhai District hi potential area anih angin ‘Museum’ kan tih ang chi, Art & Culture Centre tha tak mai min han siamsak te pawh kha kan beisei a ni. Tichuan, Land Resources, Soil & Water Conservation Department-ah tun hma ‘undivided Champhai’ a nih lai khan Khawzawl hnuaiah kan awm ta a, District Office hi Khawzawl-ah a awm a. Tunah Khawzawl a lo indan takah hian Champhai-ah hian Soil Conservation Deptt. hi Range Officer mai nilo District-in min awp ve tawh se kan ti khawp mai a, kha kha kan Minister hian chak takin hma min laksak se tih kha ka rawn sawi duh a ni. Kha kha ka sawi theih tawk ni mai se. Pu Deputy Speaker, ka lawm e.

DEPUTY SPEAKER : Tunah chuan member zahawm tak Pu K. Laldawngliana ilo sawm ang u.

PU K. LALDAWNGLIANA: Pu Deputy Speaker, ka lawm e. Kan Minister zahawm tak tak pathumte Demand kan sawi thei hi ka lawm hle mai a, Pu Manuna Demand No. 36 - Environment, Forest & Climate Change chungchang hi ka sawi hmasa ber duh a.

Kan hriat angin kan ram chhungah Forest hnuai enkawlina Tuirial Hydrel Project te, Serlui leh a dang te pawh tuihna humhalhna atan nasa taka tanlak leh zual a ngai hlein ka hria a. Thing kan phunna kawngah te hma lak anih theih chuan nakin windup-naah min hriattir thei se a lawmawm ngawt ang.

Tichuan hei, ‘Aizawl Zoo’ kan tih kan sahan te hi theih ang tawkin enkawl mek a ni a, hei pawh hi hmasawna turin ‘State of Art’-ah siam tumna a awm a ni tih ka hria

a, a lawmawm ka ti hle a ni. Pu Deputy Speaker, wawiina ka bial chhung thil ka han sawi duh chu, Bukpui tlangdungah sawn RO a awm a, tichuan tha taka enkawl a ni a, chutih rual erawh chuan Lungdai tak khu Tuirial bial chhung ni siin Kolasib District chhunga awm a ni a, Aizawl area-ah a awm tlat mai hi harsatna kan tawk nasa hle mai a, plantation chungchangah te. A theih hram chuan Kolasib District-ah hian min dah sak thei theih chuan kan lawm ngawt ang. Kawnpui Zotlang ngaw, eco-tourism project siam mek hi engchin nge a thlen tawh tih hi kan zawt tel duh bawk a. Tin, Thingdawl leh Lungdai-ah hmun tha tak kan nei bawk a ni tih kha kan sawi tel duh bawk a, min rawn hre ve reng dawn nia.

Demand No. 42, Transport Department-ah hian a ram puma kan kalpui thar tha em em mai chu, 'online payment system' kan tih hi a ni a, Covid avanga harsatna kan tawh lai pawha tah taka kalpui a ni chho hi lawmawm ka ti hle mai a. Dstrict hrang hrangah kalpui chhoh tum mek a ni bawk a, chak zawka hmalak theih anih chuan a lawmawm ngawt ang.

Kan hriat angin kum 2020 atangin hripuiiin min nuai a, lirthei document chungchangah harsatna tam tak kan tawk a. Central sorkar kaihruaina zul zuin Transport Department-in 1st February 2020 atanga 31st October 2021 chhung *late fee* tel lova chhiah min han awl ringawt te pawh kha a lawmawm hlein ka hria a. Chubakah Zofate kan inpumkhatna tana Aizawl - Zampui tlangdung MST bus service tura agreement ziah tawh te, hengte pawh hi a lawmawm ka ti hle a ni. Ka bial chhung Hortoki-ah hian mipui ten an mamawh em avangin kan dil ve mek a, auto-rickshaw service hi min lo hriatsak turin ka sawi lang tel leh duh bawk a ni.

Kan Minister zahawm tak Pu Rintea Demand No.17 - Food,Civil Supplies & Consumer Affairs Deptt-ah hian sawi tur tam tak a awm a. kan hriat angin hripui leng karah 2020 kum atang khan kan minister zahawm tak leh Supply Department te thawhhona te nen, kei Mizofed Chairman kan nih lai te a ni bawk a, kan Chief Minister kaihruaina hnuaiyah supply department-a kan harsatna awm thin zawng zawng wawiin ni thlenga ram mipuiten kan hriat, sawi lo pawh ni ila kan hriat chian em em, LPG leh petrol te nitin mamawh lakluhnaa kan hmalakna chungchang engkim mai tha takin wawiin thlenga ram mipui ten kan hmu hi a ropui ka ti a. Minister, kan Chief Minister zahawm tak leh department chungah lawmthu ka sawi a ni. Tin, mi harsa zawk AYY chhungkuate hnenah hian January 2019 atang khan chini, local-ah cheng 50/- man chuang vek ni kha AYY tan hian cheng 24/- lekin pek a ni te hi a lawmawm hle a ni.

Tin, LPG *home delivery* te inzirtirna neiin bul an tan a, hmalak chhoh mek a ni te pawh hi a lawmawm hle a ni. Consumer Welfare, corpus fund atanga Govt. of India remtihna in crore 2 dah kha, crore 20-a tihpun a han ni te pawh hi a lawmawm hlein ka

hria a ni. Tin, kan mamawh em em Mualkhang Botting Plant tihchangtlunna tur leh hmasawwna tur ram leina engkim tihfel a ni tawh te leh IOC hnenah engkim hlanfel a ni tawh te hi a ropui ka ti hle a. Mizoram tan hian LPG harsatna chhawmdawl kawngah tha tak a nih ngei pawh ka beisei a ni.

Tichuan, kan Minister zahawm takin min lo hriatpui se ka duh chu, Mualkhang-a hmalakna leh nakinah hna te pawh lak ala ni leh ang a, Mizoram leilung fate, zofate, kan thalaite Mualkhang leh Khamrang khua-a mi te hi a tam thei ang ber la thei turin hma min lo lakpui se tih kha ka han sawilang tel duh bawh a ni.

Tin, kan hriat angin Myanmar ram sorkar-ah harsatna an tawh a, raltlan tam tak an lo lut a, kan hria a. Hengte hi Supply Department kaltlangin buhfai quintal 947 lai ex-godown rate-a pek a ni tawh te hi a ropui ka ti em em a ni.

Tin, ka bialchhung thil pakhat han sawi ve lawk ka duh chu, Lungdai leh hmundangah pawh a ni tho a, kudam kan nei tha lova. A bikin staff quarter hi sak dan a awm thei a nih chuan min lo hriatsak se tih kha ka sawilang tel duh bawh a ni.

Demand No.19, LAD-ah pawh hian a rampumin hmasawwna sawi tur a awm a. Amaherawhchu, tun hnaiah ka ram chhung Kawnpui leh Hmarchaltlang-ah VC House sakna tur te kan han nei ve thei tur hi kan lawm hle a ni tih kha ka sawilang tel duh bawh a ni.

Kan Minister zahawm tak Pu Zira Demand, Art & Culture hi ka sawilang ve duh hrim hrim a. Zofate, Zoram chhung leh pawn inpumkhatna leh Mizo zia engkim lanna leh Kut hlimawm tak kan han buatsaih thin te hi a ropui a. Nimin piah mai khan changkang takin a rampum, hripui karah programme kan han hmang te kha 'Zonun zemawi *Rinawmna*' tih thupui hmanga hun kan han hmang te kha a ropui ka ti a. Hemi kawngah hian thalaite Central YMA kaltlanga kan tih Mizoram Cultural Organisation te, NGO hrang hrangte nen thawhhona tha tak mai Art & Culture kaltlanga hetiang Kut ropui kan hmang thei te hi a ropui ka ti hle a ni tih kha ka sawi duh bawh a ni. Keini bialchhung Kawnpui, Hortoki leh Hmarchaltlang-ah te club tha tak tak kan nei a, hengte pawh hi kan minister ten min lo hriatsak ve turin ka han sawilang tel duh bawh a ni.

Pu Dy. Speaker, a tawp berah chuan Demand No. 39, Power & Electricity Department chungchang hi, kan hriat theuh angin ka bial chhunga Sentlang sub-Station hi kum 1980 vela sak tawh quarter kha kan la hmang a. Kan hriat tlang vek ni tho mahse han sawi ve hrim hrim ila, a tha tawh lo hle mai a, tin, Kawnpui SDO thuthmun te pawh ruah a sur chuan a far tawh a, 'hei hi ngaih pawimawh theih ni se a tha awm e' tih kha ka han sawi duh bawh a. Tin, staff indaihlohna a nasa viau mai a, keini pawhin MLA

fund atang Linesmen te mamawh anih avangin kan ruai mai zel a. Khatiang kha a nih avangin hengte hi kan Minister zahawm takin min lo hriatsak bawk se a tha awm e.

A tawp bera ka sawi duh chu, kan hma lak mekna Sentlang - Bukpui 33 kV line tihlenna leh North Chaltlang 63 kV transformer install mek a ni te hi kan lawm hle a, bial aiawhin lawmthu ka han sawi duh bawk a ni.

Tichuan, Pu Dy. Speaker, kan Minister zahawm tak pathumte Demand hi pawmpui ngei theih turin ka rawn support a ni e. Ka lawm e.

DEPUTY SPEAKER : A lawmawm e. Tunah chuan Member zahawm tak Pu C. Lalmuanpuia i lo sawm ang u.

PU C. LALMUANPUIA : Pu Dy. Speaker, ka lawm e. Vawiinah kan Minister zahawm tak pathumte demand kan han sawi thei hi a lawmawm ka ti khawp mai a. Kan demand pawimawh takte hi ka luhchilh vek seng dawn lova, Demand pathum lai a ni a, a tlangpui ka han sawi thwak thwak hman dawn chauh a ni.

A hmasa berah chuan Pu Dy. Speaker, Demand No.4, Law & Judicial Deptt. hi ka sawilang ve hrim hrim duh a. Law & Judicial te hi department liana ngaih ni silo, pawimawh tak a ni a. Mizoram-a department zawng zawng ten Dan kan siam a ni emaw, eng emaw ruahmanna kan han siam chungchangah te pawh a pawimawh em em a. An hah fal thei khawp mai a, engkim law-ah *vet* a ngai a. Chutiang chuan dan dik tak zawm chungah kan constitution te thlir chungin rules emaw siam chungchangah pawh ruahmanna fel tak min lo siamsak thin a, a Minister leh department chungah lawmthu ka sawi a ni.

Tin, Demand No. 12, Parliamentary Affairs hi a pawimawh khawp mai a. Tuna Assembly kan neih mek Budget Session-ah te pawh hian a tangkaizia chu kan hria a. Engkim ruahmanna felfai tak hmangin information min rawn pe a, kan mamawh leh tulte min supply a. An hah fal em em a, zan rei tak thleng an meng a, an tul em em a, an hnathawhah lawmthu ka sawi duh a.

Demand No. 42, Transport Department hi department pawimawh tak a ni a. A Minister leh an department hotute an tang em em a, an hnathawh pawh a lang khawp mai a. An revenue collection pawh cheng nuai 2,000 chuang (nuai 3000 dawn) a ni te hi a lawmawm ka ti a.

He department kaltlang hian ka bialchhung thi ka sawi duh a. Ka bialchhung, Govt. Mizo High School-ah sawn 'multi-level parking and multipurpose hall' tunah hian min siamsak mek a, an sa tlut tlut mai a, kumin chhunga zawh tum a ni a. Parking kan mamawh khawp mai a, sawlaih sawn. Tin, hall tha tak mai badminton hall te pawh

a chungah sawn a awm dawn a ni a. He department changtu minister leh a department hotute chungah lawmthu ka sawi a, min rawn ngaihsak khawp mai a. A foundation te kan han laihna lamah a chhak building te a che a, chutah chuan kan House Leader zahawm tak, kan Finance Minister ni bawkin ruahmanna min han siamsak a. Sum pek belh ngai min han pe belh a SEDP hnuaiah, lawmawm ka ti takzet a. Kan House Leader, kan CM zahawm tak chungah pawh lawmthu ka sawi duh a ni.

Transport Department hian hmalakna chi hrang hrang a nei a. Ministry of Shipping hnuaiah Inland Waterways rawn lang ta te hi thil la tihngailoh leh tunhma pawha kan la hriat zen zen loh (thil thar hlak chu a ni lo naa) hetiang tak maia hmalakna project an rawn approve ta te hi an chhuanawm hlein ka hria a, an hmalaknaah lawmthu ka sawi duh a. A nghahhlelawm hlein ka hria a ni.

Tin, District Transport Office building hmun hrang hrang, district hrang hrangah sak a han ni te hi hmasawna rahbi pawimawh tak mai a ni a, a lawmawm ka ti khawp mai. Tin, Aizawl khawpui bialtu ka nih angin ka han sawilan duh chu, ‘two-wheeler taxi’ hi a ni a. Kan khawpui a tawt tawh em em a, mipui tan hmanhmawh emergency-ah han vei zung zung a ngaih chang te pawh hian two-wheeler taxi hi a tangkai khawp mai a, two-wheeler taxi permit kan han pe leh te pawh hi a lawmawm ka ti a. Mipui tan awlsamna tam tak min rawn thlen a, a lawmawm tak zet a ni. Tin, Tripura lama bus service an han tlan tir tur te hi Zofate in unauna kawngah hmalakna pawimawh tak a ni a, tuna ruahmanna an han siam fel te hi a lawmawm ka ti tak zet a ni.

Demand No. 36, Environment, Forests & Climate Change Deptt. hnuaia Forest Department hmalakna hi a chhuanawm ka ti a, fire prevention chungchangah pawh hian an fakawm hlein ka hria. Nikum lamah pawh chhim lam, khati khawp khan kangmei kan tuar nasa a, an theihtawp an chhuah a, an hmalaknate kha kan hmu a, kan Minister-hoin. Kan Minister pawh tlan pheiin department-te an buai em em a, helicopter hman tea thelh ngai hial a ni a, khanga theihtawp kan han chhuah te kha a lawmawm ka ti a, kan CM zahawm takin ruahmanna min han siampuite kha lawmthu ka sawi duh bawk a ni. Ka vei ve em em thin, ram ngaw ti chereu lo zawnga kan lui humhalh te a ngai tawh a, huan lo ram neitute pawh hian vat chereu lova, a ram ngaw zawnga huan han neih te hi a tul hlea hriatna ka nei bawk a.

Pu Dy. Speaker, Pu Malsawma Colney (fam), Biate khawpa khan a ramah khian ngaw tha deuh mai a siam a, nungcha humhalh thleng hian a thain ka hria a. Nungchate zalen taka an awm theihna tur ngawte pawh hi nungcha humhalh kawngah pawh hian a pawimawhin ka hria. Aizawl veng Chanmari West leh Chanmari inrina laiah sawn kan awm a, thehleite hi kan in bulah sawn an lo kal a, kan in chhunga balhla te pawh hi an rawn ei thin a, “helai hnai te, khawpuiah pawh eng emaw, ngaw chhe te tal, kan In

compound sa chip vek lova, ram ngaw leh thingte ngaw deuh kan lo siam sak lo che u chu a pawl hle mai” ka ti thin a. Chuvang chuan, nungchate humhalh hi a lo pawimawh khawp mai a. Helam kawngah hian kan Forest Department-in tan a lakna a ropui ka ti a, tan la sauh sauh zel tur pawhin ka ngen duh a ni.

Tin, sangha tui tak tak ‘chhim luang leh hmar luang’ kan tihachte kan nei a, ‘nghatun leh nghavang’ kan tih ang chite. Tunah pheih chuan lui dungte kan humhalh chho zel a, YMA ang zawng leh a khua ang zawngtein. Hengte hi tan lakna pawimawh tak a ni a, ‘kan department-ten theihtawp chhuahin an vil thin’ tih te pawh kan hria a, an chungah lawmthu ka sawi duh bawk a ni.

Sawi tur a tam khawp mai a. Forest Department hotuten *mau tawlh ruk*, kan ramngaw tichereutute huaisen taka an han man ngam te kha an fakawm ka ti a. Helam kawngah hian tim hauh lova hma la zel turin kan Minister leh a department-te ka ngen duh bawk a ni.

Demand No. 17 - Food, Civil Supplies & Consumer Affairs Deptt. hi ka sawi leh duh a. Pu Dy. Speaker, kan Supply Department, kan Minister hoin an tang em em a, kan hria a. Covid-19 hripuiin namen lovin min nuai a, a theihna zawng zawngin min hrek a ni ber a. Chuti chung pawh chuan a fur, a thalin kan ei leh bar buh leh bal zawna kawngah harsatna tawh miah lova eitur kan nei te, gas hnianghnar tak kan han hmu thei te hi an fakawm a, an tang hle a. Assam nena kan ramri intihbuai chungchangah pawh an tang em em a, Manipur lamah te, Tripura lamah te an theihna zawng zawng an seng a. Khati khawpa tan an la ka han hmuh te khan a lawmawm ka ti a, minister leh a department chungah lawmthu ka sawi duh a.

Tin, ruahmanna lian tak tak oil depot nei tura ruahmanna an han siam te hi a lawmawm ka ti a. Ni hnih khat kan han buai deuh a, diesel, petrol oil-te la tura intlar a han ngai chuk chuk thin te, hi heng dinhmun ka han ngaihtuah hi chuan oil depot lian kan mamawh hle mai a. Heti lama hma kan han la te hi a lawmawm ka ti a, an chhuanawm tak zet zet a. Natural gas tilian tura kan mamawhna khulai Mualkhang-a hma an lakna te hi a lawmawm ka ti a, kan nitin mamawh a ni a. Natural gas hi kan ramah pawh oil drilling an nei a, Meidum-ah te pawh. Hemi kan thenawm state mai Gomati District, ‘Palatana’ a niin ka hria, khutah pawh khuan an siam teuh mai a, power plant ang chi zawng pawhin, helamah pawh hian tan lak a tul hlein ka hria a. Chungte pawh chu a inkaihhnawih deuh a ni tih ka han sawi lang duh a.

A tawp berah chuan, Power & Electricity department hmalakna a lawmawm ka ti a. Nichina ka sawi tak ang khan, power indaihlohna a nasa ve thin a, amaherawhchu tun hnaiah erawh chuan power tlachham miah lovin kan indaihlohna chi hrang hrang

phukruk a ni te hi a lawmawm ka ti a. Ka bial chhungah transformer mamawhna kan nei sang em em mai a, Electric Veng-ah pawh kan Minister zahawm tak hian, ‘transformer ka rawn dah sak ang che u’ a ti a, ruahmanna kan han siam a, a ho hian hma kan han la a. Mahse, a dahna tur hmunah eng emaw harsatna kan neih avangin tunah hian kan la dah thei lova. A transformer kha laklawh thilah hmun dangah an lo hmang lawk a, kha kha kan Minister hian min lo chhinchhiah sak sela. A hmunhna kan han peih veleh kan rawn dil leh dawn a, min dah sak ngei tur pawhin ka request duh bawka ni.

Tin, Pu Dy. Speaker, (minute chanve chiah aw..) a tawp berah chuan, Chanmari ‘W’, kan veng chhungah sawn transformer department hmalaknain a thar tunkar lawk khan min han bun fel sak te hi a lawmawm ka ti takzet a, an chungah lawmthu ka sawi duh a ni e.

Heng kan power chungchangah te pawh power kan hman san lai ber, nimin tlai dar 6:15 khan megawatt 103.50 niin, kan hman tlem lai ber zing dar 3:45 khan megawatt 41.73 a ni a. NEEPCO atangin eng emaw zat kan hmu a, Kau Tlabung, Serlui ‘B’, Teirei, Tlungvel Solar-te, hmuhna chu kan nei nual mai, sawi tur ka ngah khawp mai Pu Dy. Speaker. Amaherawhchu, tan lakna eng emaw zat kan la nei a. Kan Minister zahawm tak hian a department hi a enkawl zo khawp mai a, a department chungah lawmthu ka sawi a.

Heng kan Minister pathumte Demand pawimawh tak takte hi Pu Dy. Speaker, pass a chakawm hle mai a, pass turin ka rawn thlawp a ni e. Ka lawm e.

DEPUTY SPEAKER : Awle, tunah chuan Member zahawm tak Pu Lalrintluanga Sailo i lo sawm ang u.

PU LALRINTLUANGA SAILO: Pu Speaker, ka lawm e. Vawiinah kan Minister pathumte Demand kan sawiho a. Chuta ka sawi hmasak ber duh chu Demand No. 39 - Power & Electricity hi a ni a.

He Department hi Pu Dy. Speaker, kan bial tan chuan, ‘hmelma department anih hi maw le’ kan lo tih thin kha a ni a. Kan bialah khuan eng a tha lova, ka hmaa East Tuipui bialtu zahawm takin a sawi ang deuh khan, thli a thawtin power kan nei lova, ruah a surin chuti bawka chu a ni thin a ni. Amaherawhchu, chuti chung chung chuan a changtu minister zahawm takin hma a laknate vawiinah a takin kan nei chho dawn ta niin kan hria a.

Tin, ka bial chhungah hian, a ram pum ka luh hmaiin Pu Dy. Speaker, ka sawi duh chu, khawvelah hian sub-Station atanga powerline thui ber a nih ka ring a, West Phaileng, Marpara, Sachan boundary fencing, BSF post zawng zawng leh Hnahva, Silsuri-a a luhnaah khuan hmanni khan kan EE te nen kan en ho a, km 142 a thui a ni. Chuti khawpa thui chu a ni a, line-fault a zing em em mai a, hei hi kan minister zahawm takin min hriatsak sela ka duh a. Chutih rual chuan, a chhak tlangdungah hian Rawpuichhip - Kanghmun a awm a, Aizawl atang hian Reiek leh Ailawng kan chawm thla a, a tawp mai a. Rawpuichhip - Kanghmun kalna hi a bik takin Chungklang leh West Lungdar lai hi ngawte a that avangin line-fault a awm duh em em mai a. Aizawl – Reiek-a tawp mai lo khuan, kaltlangin West Lungdar-ah, Kanghmunah pe sela awlsam takin, line-fault pawh a khat deuhin ka ring a. Kan officer-te nen pawh kan en ho tawh a, heihi kan minister hian min lo hriatsak se ka duh khawp mai.

Kan sorkar hian Marpara lampangah hian tan nasa takin a la mek a. No. 12.5, MBA 132.33 hi sub-Station leh 132 kV line West Phaileng - Marpara te hi thlunzawm hna chak takin a thawk zel a ni. Chuta thawktu chu Power Grid ho an ni a. Hetah hian thawk zo pawh lo ni sela, anni hianin 132 by 33 kV station chauh hi anih avangin sub-Station tangkai, mipui hman theih tura dinchhuak tur chuan, ‘helaiiah hian State sorkar-in tan lakna tur te a la nei a ni’ tih kan hria a. Chutah chuan kan minister leh thawktute zarah vawiinniah hianin kan bial harsatna te hriain 33 by 11 kV Sub-Station project te an siam a, vawiina sanction a lo ni ta a. Hei hi vawiina ka thusawi, ka bial mipui ngaihthlatute zawng zawngin lawmthu kan sawi hi, ‘ka bial mipui ten kan pawmtlan a thain ka hria a ni’ tih hi ka tarlang duh a. He line hi a buaithlak khawp mai a, thawktu kan indaih lova, June thla phei kha chuan ka mangang a, kan House Leader hnenah hian telephone-in ka han dil ngawt a. Chutah chuan MR kan pe thei chiahlo a nih pawhin voluntary-a thawk thei te an awm em tih te kan han sawi hova, a niin min han phal sak a, kha kha engnge a chanchin ni ta? Vawiinah hian a thawktu leh MR-te kan indaihlo em em a, local mipuite leh tlawmngai pawl te an duty a, tikhan tan an la thin a, *line clearance*-ah te nasa takin kan tlawmngai pawl ten an thawk thin a, chu chu kan minister zahawm tak hianin min hriatsak se ka duh a.

A dawt lehah chuan Serlui-B, MNF Ministry Pu Zoramthanga kaihhruai hmasa khan 12 mW pechhuak thei turin nasa takin hna a thawk a, a thawh ropui zia kan hriat rualin, a takin kan chhawr a ni. Sorkar hmasa khan hei hi, ‘a takin a hlamchhiah a ni’ tih a hretu mipui kan ni a. Vawiinah member zahawm tak Aizawl West-III bialtu minister khan a hresual em aw ka ti a, a hresual lo a nih chuan ngaihdam ka dil a. Serlui-B nge Serlui-A tih kha a sawi fiah lova, Serlui-A hi Pu Deputy Speaker, PC Ministry hun laia an sawi hmasak ber kha a ni a, signboard ah pawh a la intar a, Mega -watt khat siamchhuak pha nih te kha chu fur tui len lai taka siamchhuah kha a ni a. Chuvang

chuan, ‘khulai 12 mW khu chu kan *nil* awm lo deuh mang e aw’ tih te ka ngaihtuah a ni. Awle, kha kha Power & Electricity-ah chuan ka sawi ni ta sela.

Pu Speaker, min ngaidam la, kan sorkar hmasa ka han sawi tum laia chu, Hydel Project ropui tak Serlui-B-ah a siam a, vawiinah hian, ‘tlemin hma kan la thelh deuh em’ tih khawthlang lam bialtu member zahawm takin a sawi ang khan, hemi khawthlang lam bial atana pawimawh em em chu MNF Ministry hmasa khan Bamboo link road khulai Saipal-ah thui tak tha taka laih a ni a. Saipal Lui khu khuap ila, Project siam reng reng hianin pawisa hman tamna ber chu a kawng buatsaih hi a ni a, khu khu kawng laih pawh ngai lova, km chanve chauh laih ngai a ni a, sorkar hmasain a lo lai chhuak vek tawh a. Khulalah khuanin tui khuahna tur awlsam tak kan neiin ka hria a. Mega watt 3 pechhuak thei pawh nise, hei hi mithiam ten a man an chhut chhuahna atang chuan a to lo hlein ka hria a, ‘vaibelchhe 50 emaw 60 emaw chuan a commission thei ang’ tih a ni. Kan House Leader pawhin min hriat sak thei se ka duh khawp mai a, hei hi tun Ministry chhung pawhin kan zo thei pawhin ka ring a, NABARD atang pawhin awlsam takin kan zo thei a ni tih kan hriat ka duh a ni.

A dawt leh ah chuan Demand No. 17 - Food, Civil Supplies & Consumer Affairs Department hi a ni a, a changtu minister hi faktlak a niin ka hria a. Pu Deputy Speaker, Mizoram mai nilo, khawvel pumin pandemic nasa tak kan hmachhawn lai leh, keini State phei chuan hmun nga laiah ramri buai kan nei a, kan highway te min pin sak a, motor inkalpawh theih lo mai nilovin chutianga harsatna kan nei chung leh, khaw chhak lamah lir nasatak nghingin leh, tun hnuah kan quota-a tel miah lo mi sing chuang fe mai kan quota min eipui leh harsatna awm miah lova vawiin min thlenpui hi lawmawm ka ti a, sorkar hmasate kan ngaihtuah a.

Hei, Mamit District lam atanga lokal te kan ni a, maxi-cab service tein, an motor hnungah kawng chhiat thu te an tar a, sumo permit te an cancelled a, an license te an hren sak hial a ni, kawng chhe lutuk avang khan. Khatianga quota lakna tura kawng chhia leh harsa lutuk mai an tawh avanga harsatna te lo thleng kha a ni a. Chutiang harsatna awm hauh lova kan nitin mamawh kan minister chak takina *major issue* lian tak tak harsatna kan tawh chung pawha ram mipuite tana chhenfakawm taka hna a thawk hi ropui ka ti takzet a ni tih ka tarlang duh a ni.

A pathumnaah chuan, Demand No. 42 - Transport chungchang hi a ni a, kan member zahawm tak takte pawhin an sawi tawh a. Khawvela la hriat ngailoh Mizoram khawvelah chuan tun ministry-a enkawltu minister kal tlangin Inland-water transport lo lang hi lawmawm hlein ka hria a. Nichinah member thenkhat ten an sawi tawh ang khan, ka bialah a enchhinna atan Khawthlang Tuipui an han thlang a, a survey pawh an zo

tawhin ka hria a. Kan minister zahawm tak pawh a hmunah te lo kalin lawngah te a chuang kual a, ‘*chenna ngai loh ram* a rawn fang a kan lawm hle a ni’ tih ka tarlang duh a. Hei hi a lawmawm danglam hlein ka hria.

Chutihlai erawh chuan khawvel lo thang zelin lirtheite a lo pung zel a, District Transport Office hi hmun hnih tal, East leh West emaw, North leh South emaw, bill petute tan leh registration titute tana kan awlsam zawk nan kan then hran hi thain ka hria a. Kan lo then hrang deuh tawh a, Chaltlang-a kan lo awmkhawm leh deuh hi a fuh lo deuhin ka hria a, hmun khatah mai nilo, mipuite sam khaina zawn a tha khawpin ka hria a ni tih kha ka han tarlang duh a.

Tin, ka bial bik tan, MST bus tel lovin ka bial kan khawsa thei hauh lova, kawng duh anga la tha thei chiah lo pawh nisela, bus tel lova khawsa thei lo kan ni a, thala min tlan sak theih avangin lawmthu kan sawi a. Harsa tak karah mintlan sak thin, mipui demand avangin vawiinah hian, ‘a lawmawm hle a ni’ tih ka han tarlang duh a ni.

A dawt leha chuan Demand No. 19 - Local Administration Department hi, keini thingtlang bialtute tan *min enkawltu department* a nihna ang ngei a, local administration-a min enkawl na hi a lawmawm hlein ka hria a. VC pachhe tak takte min enkawl a, chutihruah chuan kan mamawhte hriain vawiinah VC rorelna tur ‘VC House’ min sak sak a, min repair saknaah te lawmthu ka sawi a. Tin, kan VC te record vawn thatna tur computer set min han pe te hi a lawmawm hlein ka hria a. Chutih rual chuan ka bial bikah harsatna tlem kan nei a, khawngaihin a changtu minister khan min lo chhinchhiah sak sela. Hei Pu Dy. Speaker, i hriat angin kan House Leader te, kan Dy. CM leh kei, India khua leh tui kan la nih ve hma atanga village council lo nei tawh Hnahva te, Hruiduk te, Pukzing Vengthar te vawiin thlenga village council boundary la neilote hi a buaithlak khawp mai a. Kut hnathawkte an ni a, an kut hnathawh chhuahsa te ‘*kan Sailo lal rama awm inni*’ tih ang vel mai maia, Tlangsam lamah pawh donation sang tak tak farmers te hnenah khawn kan awm a. Chuvangin, vawiinah hian, ‘VC boundary hi kan mamawh takzet a ni’ tih kha ka han sawi duh a, chuvang chuan hma min laksak turin ka han ngen nghal a ni tih ka tarlang nghal a ni.

Sawi tur a tam hle mai a, a dawt leha kan sawi duh chu Pu Dy. Speaker, Demand No. 33 - Land Resources, Soil & Water Conservation Deptt. hi a ni a.

Ram hmasawna hnuk tak tak niin ka hria a, a minister pawh a tui hlein ka hria a. Ka bialah a bikin rubber chinna hmun thumah kan nei a he sorkar atang hian, Kanghmun-ah chhungkaw eng emaw zatah tan lak a ni a, amaherawhchu approach kawng khu kan la nei mumal lo hle a, Chungtlang lamah a lo ni bawka a. Tin, West Phaileng-ah a lo ni a, hei kan Minister zahawm tak nen hian West Phaileng atangin kan

enchho tawh a. Khulai khu farmers kawng anih rualin State inkalpawhna kawng pawimawh tak, hnuk hnai si a ni a. West Phaileng atanga Tut-a chhohin, Chungtlang atanga Tut, motor kalna sorkar hmasain an lo tihtlang tawh te nen inmanin hnuk hnai takin a kal theih a, ‘heng kawng hi a pawimawh hle a ni’ tih vawiinah hian ka sawi duh a ni.

A dawt lelah chuan, tukinah khan Youtube te ka enkual mai mai a, Art and Culture hi sawi ka tumloh a ni a, mahse Youtube a kan opposition group Leader Pu Lalduhoma thusawi ka ngaithla a, a hlimawm hlein ka hria a. Art & Culture hi kan culture humhimna atan te, keimahni mizo bikna atan te leh kawng hrang hrangin tha hlea ka hriat rualin, kan opposition group leader khan min convince ang reng a, ramri chinfelna thuruk atan pawh a lo tha hle a ni tih kha a langin ka hria a. “Kan thalaite nen music leh lamin zuk ti ila, kan chingfel em em ang” tia a sawi khan min convince riau mai a, chuvang chuan, ramri buai chungchang chinfel nan te hian ‘kan opposition te hian thil hi an lo hre thui mang e aw’ tihte min ngaihtuah chhuahtir a. Chuvang chuan, he Art & Culture hmang hian ramri te pawh hma kan sawn ang, a sawifelnaah a tih te ngaihtuahna lian tak min neih tir rualin, ‘tihchangtlun a ngai mang e’ tiin ka thu sawi ka han ti tawp ang e. Pu Deputy Speaker, ka lawm e.

DEPUTY SPEAKER : Tunah chuan member zahawm tak Pu Lalchhuanthanga i lo sawm ang u.

PU LALCHHUANTHANGA: Pu Deputy Speaker, ka lawm e. Demand No. 42 - Transport-ah hian sawi tan ila.

Transport Department-ah hianin MST Wing hi ka sawi chak deuh a. Administrative Reform Committee 2018-2019 report-a ka hmuh dan chuan, “MST Wing-ah hian a inenkawl nan leh a hlawhfa manah cheng nuai 1681 hman a ni a, hemi kum veka an hlawhchhuah chu cheng nuai 166 a ni” tih a ni. Chumi awmzia chu, a senso hmun 10 thena hmun khat a hmu chhuak zo lo a ni. Transport Department chu *profit-earning department* a ni tih kan hria a. Amaherawhchu, heti em ema an hlawhchhuak tlem leh, an senso a tam hi mak ka ti a, a senso te hi inphu tawk ve deuh chu awm mahse, a awm ka ti a, an senso hmun 10 thena hmun khat pawh an hmuchhuak lo a ni. State dangah chuan Transport Corporation te an nei a, an corporation ten State Government-ah pawisa tam takte an chhunglut thin a ni. Keini hian Transport Corporation te pawh hi siam ve ta ila, corporation kan lo neih tawh thinte atang hian a hlawhtlin hi a beiseiawmlo em em mai a ni. Chungte avang tak chuan, kan thalaite tan hian heng transport operation te pawh hi privatize ila, kan kutah te hian dah a tih chi lawm ni ka ti a. Heti em ema sorkar sum/mipui sum kan luan ral tir hi a uihawm ka ti a, hei hi ngaihtuah chian a pawimawh khawp mai.

Tin, Demand No. 39 - Power & Electricity Department hi ka han sawi duh a. Kan lo hriat angin tun hnai lawkah Tuirini, megawatt 24 pechhuak thei project hluihlawn niin kan lo hria a, investigation leh thil tul tam tak tiin pawisa tam tak sen a ni tawh a ni. Sorkar-in a hnawlna chhan nia an sawi kan hriatte chu, ‘zangnadawmna man’ tih te, ‘khawl bunna man sang lutuk’ tihte a ni a, hengte hi a project kan investigate-naah khan kan hre vek lo em ni? Heng chhuanlam fahrah te te hian kan project, kan beisei em ema kha kan tihlawhchham leh dawn tihna a ni a, sum tam tak hetah hian kan seng tawh a ni a, a uihawm thin khawp mai.

Tun hnaiah kan kal chho zel a, kan mini-hydel project te kan hluihlawn chho mek zel a, tunah hian mini-hydel project pariat lai hluihlawn a ni tawh a, chungte chu - Kau Tlabung, Teirei, Maicham-II, Khawiva, Tuipui Micro, Tuirivang, Serlui (Serlui hi chu a rei deuh tawh a, Serlui-A a ni a) leh Bairabi Thermal te. Heng project-te hi engvanga hluihlawn nge kan nih, heng kan hluihlawn vang hian em ni electric bill (tariff) kan tihsan? Heng project-te siam nan hian sum tam tak sen a ni a, amaherawhchu ho te teah, a enkawl thatloh, kan maintenance thatloh vang mai mai hian tihian hluihlawnin a awm a, a uihawm ngawt mai.

Demand No. 35 - Fisheries Department-ah hianin Chakai Farm chungchang hi han sawi ka chak deuh a. Tuna Dum Lui-a cheng nuai 57 lai senna tur ‘Dum Lui Chakai Farm’ hi pilot project a ni a, tunah nuai 32 hman mek a ni a. He project hi kan minister zahawm tak khan, “mualpho huamin kan kalpui dawn” a ti a, mualpho huama han kalpui ngam anih kha chuan a fakawm ka ti viau bawk a. “Fishery Department hian sangha-ah kan intodelh tawh a, khawng nge chakai firm te pawh hi i han kalpui ve ang hmiang” tih niawm tak tura ka ngaih, sangha-ah pawh kan intodelh chuang si lova Chakai Farm han tih kual leh vel kha engnge a tulna ka ti a ni. ‘Mipui rilru hruaikawi tumna mai mai’ niin a lang a, tuna an kalphung phung kan lo hriat ve danah chuan, ‘tuikhuah kan siam’ an ti a, chakai-te hi tuikhuah a khawi chi an ni vak lo, lui luanga khawi chi an ni, lui luanga che tla an ni. Khutiang dil anga siama khawi chi an ni lo. Tunah pawh hian an ti thi teuh tawh leh nghal an ti a. Hengte hi awmze neilo a ni, a kal ngaihna hriatloh thlak lutuk. Kan hotupa, kan House Leader khan mau chi tha kha a hre thei a, a chi siam dan te pawh kha a hria niawm tak a ni, khatieng ang deuh khan kan chakaite pawh, a lian chi siam dan te leh a hmuhchhuah dan te pawh in hre lo maw? Chakai pakhat chhungtlai te kan hmuchhuak te anih chuanin a hlawk viau mai thei a, chutieng te a nihloh phei chuan *awmze neilo* a ni.

Tin Environment, Forest & Climate Change Deptt. hi sawi ka duh a. Forest Dept. hna pakhat mau kha Horticulture in an chhuhsak ta daih mai a, Horticulture hian field staff-te a nei ve mang si lova, tunah hian kan maute chu kan thenawm State ten namen lovin min rawk a, a pawiin uihawm tak a ni. Forest Deptt. khan enkawl ni se chuan,

field staff, Forester te Forest Guard te an nei a, enkawl thei tur dinhmunah an ding a ni. Amaherawhchu Horticulture hian khatiang staff kha a nei ve si lova, tunah kan mau min rawk sak mek a ni a, a pawl khawp mai. Tin, Forest Deptt. ah hian Forest Officer post ACF, Range Officer leh Forester te hi recruit a ni ngai lova, chuvangin tunah hian staff an indaihlo em em a ni. Range Officer charge te Junior Forester ten an han la a, khatianga staff indaih lo reng renga an awm hi engtinngan an kal zel dawn tih hi ka zawt duh a. Division pahnih te pakhatan an siamrem mai dawn em ni, Range te pawh hi an khaikhawm mai dawn em ni hetiang chuan hnathawk theilo anih si chuan tih te ka han sawi duh a. Tin, heng Forest Department te, P&E Department te hi a hnungtawlh zawng a kal an ni a, ‘dying department’ an ni. Kan sorkar hian hengte enkawl na pawisa, staff indaihlo ngawih ngawih lakna tur hian pawisa pawh hi an nei lo em ni?

Chutihlai chuan SEDP atangin cheng nuai 3 ni lovin, cheng 50,000/- sem kan han tum talh te pawh hi a ropui vak lo a ni. Pu Speaker, khang kha ka sawi duhtawh chu a ni mai a, sawi tur chu a tam naa ka inbuatsaih duh vak lova, han sawi han sawi pawh hi awmzia a awm vak lo a ni. Ka duhtawh mai ang e. Ka lawm e.

DEPUTY SPEAKER : Awle, Pu Zothantluanga i lo sawm ang u.

PU ZOTHANTLUANGA : Pu Dy. Speaker, ka lawm e. Demand 11 kan nei a, minute 10 chung chuan sawi tam a har dawn khawp mai. Sawi mawlh mawlh mai ang.

Vawiina kan Minister zahawm tak tak pathumte Demand kan sawi thei hi a lawmawm ka ti a. Demand No. 36 - Environment, Forests & Climate Change Department atang hian han tan ta ila.

Department pawimawh tak a ni a, kan ram sik leh sa control-na atan pawh a department pawimawh tak a ni a. Tin, hei ka bial Sakawrtuichhun ah zoo a awm a, ka zuk kal zauh zauh thin a, tunhma lakah chuan hmasawanna nasa tak a awm a, a lawmawm a. Ramsa te kan han humhalh a, thalai ten ramsa an hmuh ngailoh te kan han dah chho zel te hi a ropui a. A bik takin Mizote’n kan ramsa ngaihsan em em Sakei te dah tharin an awm a, amaherawhchu, eng emaw harsatna avangin a nu chauh kan nei a, a pa hi inthlah pung thei tura la ngaihtuah leh ni se chu a lawmawm hlein ka ring a.

Tichuan Demand No. 42 - Transport Department hi han sawi leh ta ila. Pu Dy. Speaker, sorkar hmasaah khan, ‘motor miin a leiin kum 15 atan road tax (chhiah) pek a ngai a ni’ tih kha kan la hre vek awm e. Tuna kan Minister hi he sorkar a lo intan atangin in mahni remchanna anga chhiah pek theiha buatsaih a ni te hi motor neitute tan thil hlu tak a niin ka hria a, a lawmawm ka ti a. Tin, kan thalai ten eizawn nan two-wheeler taxi kan hmang a, tin, auto-rickshaw permit te kan han pe a, eizawn nan thalai tam takin an

hman a ni tih kan hria a. A bik takin keini bial khu khawpui chhung nimahsela a penhle a, tun two-wheeler taxi permit pekchhuah hnunung ber hma phei kha chuan khawi laiah mah khuanin two-wheeler taxi stand kan nei lova, tuna pek thar alo nih hian eng emaw zat a lo awm chho ta a kan lawm khawp mai a. Tin, Aizawl khawpui chhung, hemi a *main spine*-a tih remchang lo, traffic-ah pawh harsatna thlen thei anih rualin keini bialah chuan auto-rickshaw pawh hi a tangkai khawp mai a, kal theihna chin a neih avangin helamah traffic tibuai lovin a lokal thei a ni tih kha kan hria a. Chuvang chuan kan Minister zahawm tak Pu TJ Lalnunluanga khan min lo chhinchhiah sak sela, khawpui dang tibuai si lo hian kan thalai te eizawn nan auto-rickshaw permit hi la pek leh ni se, kan la duh em em a ni tih kha kan sawi duh baw k a.

Demand No. 17 - Food, Civil Supplies & Consumer Affairs Department hi sawi tur tam tak a awmin ka hria a. Kan hre vek a, Covid avangin kum hnih lai mai Mizoram harsatna kan taw k a. Tin, ramri buaina avangin harsatna kan taw k a kan thenawm state ten road block te min siamsak a, ei leh bar lo lut theilo chungchunga harsatna min siam lai pawhin kan Supply Minister leh kan sorkarin ei leh barah nasa takin hma a la a, buhfai harsatna kan nei lova. Tin, gas, petrol leh diesel supply-ah te pawh Mizoram-in harsatna kan taw k lo hle ani tih kan hria a. Minister hi fak uchuak min ti pawh a ni maithei a, amaherawhchu, department officer leh staff-te pawhin an chawimawi a ni. Chuvang chuan hetiang hun harsa kan tawh lai pawha Mizoram tam lovin min siam a, Mizote chaw nghei lovin min siam a. “Minister taima leh remhre tak main min kaihhruaina hnuaiah hian Mizoram mipuite kan hlim em em a ni” tih hriat hian, lawmthu sawi, ka veilam a mite tan chuan a har pawh a ni maithei a. Nimahsela, miin thil tha an tih hi chuan lawmthu inhrilh thin ila a tha hlein ka hria a. Tunah pawh hian hei Mizoram chu fur nasa tak tuar thin kan nih avangin monsoon stock-te an buaipui leh mek a ni tih han hriat hian a lawmawm a. Tin, kudam te a lo chhia a, tam tak sak thar a ni a, a chhiate repair a ni chho zel a, fur laiin kan kudam te a him thatloh avangin buhfai chhia chungchangah harsatna tam tak kan taw k thin anih kha kan hrereng ang a. Chuvang chuan hemi kawnga kan minister leh kan sorkar hmalaknaah te hian lawmthu kan sawi tur niin ka hria.

Tin, Demand No. 19 - Local Administration Department hi kan hre vek a, tunah hian UD&PA a awm avangin khawpui a mite chuan kan theihnghilh lek lek tawh a. Amaherawhchu, thingtlang tan chuan department pawimawh tak, hmasawna hnathawktu anih bakah, administration leh development engkima hma latu, kan khawtlang roreltute hlawh petu an ni tih te kan hria a ni. Amaherawhchu, tunah hian MINECO-ah sawn directorate building thar sak mek a ni a, a hria tena min hrilh danin, chhawng hnih vel vertical extension nei thei ila chuan department a thawktu zawng zawng hi kan leng ang a, Ramhlun North-a kan building saw sorkarin tangkai zawkin leh thildang pawimawhah a hman thei ang tih te kan hriat chuan, khangte kha han tih

theih hram a thain a hlu hle dawn a ni tih te kha kan sawi ka duh a. Amaherawhchu district 11 kan awm a, tunah hian hnathawktu an indaih lo viau a ni. JE paruk an nei a, hun rei lovah pakhat a pension dawn an ti leh nghal a. Chuvangin, thawktu an indaihnaah hma lak a pawimawh hlein ka hria.

Demand No. 35 - Fisheries-ah hian han sawi leh ka duh a. Eng emaw lai atang khan State dang atanga vur sangha lo kal hi ei duh lo kan tam tawh a. Chutih lai chuan Mizo ten kan thar chhuah tuikhuah sangha ei erawh chu an intihhmuh nasa ta a. Chuvangin, tuikhuah neituten sangha tam zawk leh tha zawk an thar chhuah theihna tur leh, la neilote pawhin tui khuahna tur remchang an neihna hmunah an khuah belh zel a, sangha kan khawi belh zelna turin hma a chhawp a.

Land Resources, Soil & Water Conservation Deptt. chungchang hi tlem ka han sawi leh lawk ang a. Mizote hian thil tharchhuah kan nei thin a. Mahse serthlum te a tam a, tunah hian kuhva hi khaw thlang lamah leh hmar lamah kan han ti chho a, chhungkaw tam takin sum leh pai te kan la lut chho a, hei hi tihbelh zel a thain ka hria a. He department hian nasa zawka kan tharchhuah theihna turin hma a la a ni tih ka hriatin a lawmawm ka ti a. Rubber pawh hi hmun hrang hrangah kan chhing chho a, tunah hian rubber man te a sang zel a, rubber chinga hlawngtlingte an lo tam a. Rubber chin chungchangah pawh hian kan sorkarin a ching thei turte tanpuia hma lak a pawimawhin ka hria a. Tuna kan Minister chak takin rubber khawl subsidy-a farmers te hnena a pe kha a hluin a tangkai khawp mai. Chuvangin, tunah hian kan thar tam chho viau tawh a ni tih kha ha han sawi duh bawk a ni.

A tawp berah chuan Demand No. 39 - Power & Electricity Deptt. hi tlem te han sawi i la. Power tel lovin kan awm theilo tih kan hria a. Nimahsela veng tin leh khaw tinah hian mihring kan pung zel a, kan transformer ten a tlinloh chin a awm a, tin, thlasik laiin power kan hmang nasa a. Chuvangin, tranformer leh electric line chungchangah te harsatna kan nei thin a. Tunah erawh chuan power lamah harsatna kan nei lo chho zel a mipui pawh kan hlimin ka hria a, lawmthu ka sawi duh a. A bik takin, kan bial Luangmual sub-Station khu a tihchangtlunna turin kan sorkar-in cheng nuai 1,404 lai sanction-in min upgrade sak dawn a ni tih kan hria a, ka lawm a. Sihhmui sub-Station-ah pawh khuan cheng nuai 468 laiin min tihchangtlun sak bawk a, lawmthu ka sawi bawk a ni. Chuvangin, Pu Deputy Speaker, sawi tur tam tak karah heng kan Minister zahawm tak pathumte Demand hi pass a nih theihna turin ka support a ni tih kha ka rawn sawi ve duh a ni e. Ka lawm e.

DEPUTY SPEAKER : Member zahawm tak Pu Lalrindika Ralte i lo sawm ang u.

PU LALRINDIKA RALTE : Pu Deputy Speaker, ka lawm e. Demand No. 12 - Parliamentary Affairs Deptt. atang hian tan ka duh a. Chumi kaihnawih tu pakhat ka han sawi duh chu, helai hmunah hian kan ram leh hnam tan rawngbawl turin kan thu khawm thin a, thu sawi laia han inauh vel hi vai tih dan kan copy nge ka hre lova. Mi thu sawi lai hi chuan lo intihbuai loh hi a tha mang e. (**Dy. Speaker:** Kan hun hi a tawp a. Kan tih dan phung pangngai ang khan kan kal zel ang a, dar 5-ah kan chawl mai dawn em ni? A nih leh i kal zel mai ang aw. Awle, Chhonzawm leh rawh le). Khami chungchang khan ka han sawi lawk duh a ni. Mi thu sawi lai hi chu inzah sak i la a thain ka hria, inchhan ngai bik te a awm anih chuan thu hran ni se. Chutiang tih lohah chuan innghaihthlaksak hram hram hi a tha in ka hria a ni.

Demand No. 36 - Environment, Forest & Climate Change Deptt.-ah hian ngaih pawimawh ka han sawi ve duh chu, kan ramah hian lui a tam khawp mai a, lui dunga awm kan ni a. Hengah hian kan Dan hi en nawn thain ka hria a. Kan bialah te leh Aizawl hnai vaiah te pawh In-hmun kan han nei dawn pawhin Tlawng lui dung velah te a awm a. 1964 vela kan Dan hman, Riverine Forest Reserve Act hi vawiin thleng hian kan harsatna a la ni reng mai a. Keimahni hian harsatna hi kan insiam a, hei hi kan ennawn a thain ka hria a. Kan siamthat a thain ka hria, a rang lama kan siam that a pawimawhin ka hria a ni.

Forest Department hi a tangkai khawp mai a. Khawvelin lum lam a lo pan zel a, ramngaw humhalh te a lo ngaiin kan lo mamawh a. Chung chu hria in sorkar laipui atangin a department pawhin sum leh pai te an dawng bawk a, Green India Mission atang tein an dawng bawk niin kan hria a, a lawmawm ka ti a. National Afforestation hi kan ngaih pawimawh hi a thain ka hria a, eng ang takin nge sorkar department hian hma a lak ka hre lova. Ramngaw hi kan humhalh piah lamah kan siam belh hi a pawimawhin ka hria a, thing phun te pawh kan uar deuh deuh a thain ka hria. Kan lui dungte pawh hi kan humhalh thar loha kan luite hi an kang chat a nih chuan, ei leh bar kan zawna chungchangah pawh harsatna tam tak kan tawk thei a ni tih hriain, Forest Department hian afforestation chungchangah hian hma a lak a ngai a, a ram pum ang pawha kan ramngawte humhalh hi ngaih pawimawh a tul hlein ka hria. Chung atana sum lo kal te pawh a nihna tur ang taka hmang ila, vawiinah chuan harsatna kan tawk lo pawh a ni mahna, chhuan lo la awm tur hi kan ngaihtuah tur a nih avangin, kan tu leh fate hma lam hun tur hi kan ngaih pawimawh sak a tul a ni. Chutiangin, ramngaw humhalh chungchangah pawh chhuan lo la awm tur te tana vawiina mi te kan inpek a pawimawh a ni. Chu chu tawi tein ka han sawi ve duh a ni.

Demand No. 35 - Fisheries-ah hian ka han lut leh ang a. Ka sawi duh chu, sangha hi kan intodelh ve theiin a rinawm a, a department pawh hian hma a la niin ka hria a. Sangha hi tun hma khan Andhra Pradesh atangin a lo kal thin a, a lo kalna hi kei pawhin

ka zuk tlawh ve tawh a, a hla khawp mai a, Mizoram atang chuan hla tak a ni a. Khata tanga lo kal Mizoram-ah kan lo ei a nih chuan, heta sangha kan tihpun vea, keimahni ei tur kan intodelh ve hi chu engvangin nge a theih loh ang ka ti a. Khati chen an lo phurh pawh market-ah hian kan hneh lo em ni ang tih te ka ngaihtuah a. Chuvang chuan Fisheries-ah pawh hian mumal deuhhleka kan kal chuan kan intodelh thei a, keimahni ei tur tal hi chu kan thar theiin ka ring a, chutiang tur chuan hma lak a thain ka hria a.

Tin, ‘chakai farm hi kan risk a ni’ tih te, ‘mualpho pawh huamin kan ti a ni’ tih tein kan Minister khan a sawi a, a dik ang tih ka ring a. Amaherawchu, business reng reng hi Chiang Tak Chu AWM lo mahse, kan tih tur erawh hi chu kan chian hi a thain ka hria a ni. Thiamna te a sang a, *blind* taka thil ti duh hi kan awm tawh lo a ni; a hlawh 70% tal hi chu kan va hre lawk tur a ni, thil kan risk dawn anih pawh hian. Chuvang chuan, *blind* taka hmalak hi awm lo se tha ka ti a. Mahni sum leh paia kan tih duh lohte hi sorkar sum leh pai hian kan duh mai em tih te hi rilruah a awm a. Chuvangin, risk chuan kalloh a thain ka hria. Sorkar hnathawk fing tak tak awm laia kan la risk anih chuan a fel loin ka hria. Thil hi kan risk dawn anih pawhin, a rahchhuah tur hi a hmuh lawk theih tawh a ni, tunlaih chuan. Thil hian rahchhuah a nei dawn lo anih phei chuan kalsan mai te pawh hi a pawl lovin ka hria.

Tin, Demand No. 23 - Art & Culture-ah hian, a hmasa lam pawh khan ka sawi tawh a. *Pu Buanga Dictionary* hi ka hlut riau vang nge pawh ka hre lova, vawiin niah hian sawi duh ka nei a. Kum 1940 vela published a ni a, a rei tawh viau a, vawi 4 chhutthat tawh a niin ka hria a. Ka rawt duh a chu, he dictionary hi mizo tawng zirnan hian a tha em em a, kan tu leh fate tan a tha em em mai a, puitling tan pawh hian a thain ka hria a ni. A bu hi a tunlai vak lo deuh a, hei hi tunlai hmanraw tha zawka chhut thar leh hi a thain ka hria a ni. Department hian heti zawng hian hma la sela, market-ah pawh hralh tla tak tur niin ka hria a ni. Kan Minister hian hei hi min ngaihtuah sak sela a thain ka hria a ni.

Demand No. 17 - Supply Department hi a kaihhnawih a tam em em mai a, ngaihpawimawh pawh a tam a ni. Tunah hian ration card neia hi kan hriat tawh ang khan 2,79,531 kan awm a ni. Buhfai hi a nawlpuia kan hriat angin ‘a buk hi a tling tawk lo’ an ti a ni. Mahse, a chhannaah kha chuan, “department chuan retailer-te hnenah a buk tling a pe a, a buk tling a hralh tura beisei a ni” tih kha a ni a, amaherawchu, a tlin leh tlinloh chu mipui ten kan hria ang a. Ka rilruah chuan ‘bungrua awmsa pawh buk tling thei lo hi kan ni em’ tih hi ka ngaihtuah a ni. Buk tling lova serious em em chu, sumin chan tir ila, mi 2,79,531 kha kg khat theuh pawhin tling lo ta se, buhfai hi ZIDCO kal tlangin cheng 2,750/-a lei a ni. Tichuan, kg 1 theuh tling lo ta se, 7,68,712 lakhs hi a luang ral a ni, ration pakhat kg 1-in tling lo ta se. Ration kan lak hian kg engzatin nge a tlinloh tih hi lo chhut ve chhin ula, sorkar-in a leina hi quintal khatah 2,750/- a ni

a, kg 1 cheng 27.50/-in a lei tihna anih chu. Hei hi a serious a, kan department leh mipuite pawh hianin kan ngaihthutak a thain ka hria. Tin, a kal man chungchangah hian Finance Deptt. pawhin an hre chiang ang a, sum leh pai kan sen hnem ziaa hi, a phurh kualnaah hian –

Route	Distance (in km)	Phurhman (in ₹)
Guwahati - Aizawl	580	280/-
Zuanguitui - Kanghmun	60	320/-
Sangau - Lungtian	40	330/-
Lunglei - Borapansuri	134	420/-
Thenzawl - Thenhlum	83	539/-
Serchhip - Thingsai	95	350/-
Kawlchaw - Tongkolong	62	420/-

Chuvang chuan, hei hi kan ennawn thain ka hria. Sum leh pai tam tak km tlem te Guwahati – Aizawl phurh man ai pawha to tein kan lo phurh kual tir nasa a, sorkar pawisa hmang bawh sia kan lo kala hi kan ennawn vat thain ka hria. Hei hi a minister pawhin ennawna kan siamthat vat a thain ka hria. Sum inrenchem kan sawi bawh a, hemi ringawt pawh kan siamthat chuan sorkar sum tam tak kan safe dawn a ni. Ka lawm e.

DEPUTY SPEAKER : Tunah chuan Member zahawm tak Dr. K. Pachhunga ilo sawm ang.

DR. K. PACHHUNGA : Pu Dy. Speaker, ka lawm e. Vawinah Minister zahawm tak takte Pu TJ Lalnunluanga, Pu K. Lalrinliana leh Pu R. Lalzirliana te Demand kan sawi dawn a. Hun a chep a, Demand No. 35, Fisheries Deptt. hian tan ta ila.

Hei, sangha lamah mizote kan tang a, sangha dil lamah te kan intodelh ve tan a, intodelh tak chu kan ni lo nain. Innovative project, la tih ngailoh tihte kan tum a, chakai farm siam te hi a interesting em em a. Khawiah pawh kal ila chakai hi a to em em a ni. Tin, chakai farm sorkar-in siam a tum hi ngaihtuahna neilo leh mawl tak a tih tum a ni lova, ICAR scientist, a zirten an design leh an tih anga tih a ni a. Tin, ‘risk’ tih hi politics ah inbeih nan kan hmang nasa a, hei hi a dik lova. Reasearch kan ti a, (laboratory-ah) chutah chuan kan risk vek a ni. Theoretical possibilities kan try phawt a, a diksa a awm chuan risk a ngai lova, diksa chu *findings*, hmuhchhuah a ngai lova, research tih pawh a ngai lova. Cancer damdawi hi miin risk-a engkim a tih thin avanga hmuhchhuah (invented) a ni. Khawvela development zawng zawng, motor pawh, thlawhna pawh, rocket pawh *risk* atanga veka siam chhuah a ni. La hmuh ngailoh risk a lakna zel hi thil

kan zirchhuah a ni. *Risk* lovin khawvel a develop thei lova, Sapin, ‘*No risk, No gain*’ an ti a ni. Ram vak tur pawhin sakhi an kapsa lova, beiseina nen risk-in ramngaw zau takah a ram vak a, a kap thin a ni. Chu lai taka chu kan twist a, politics-ah inbeih nan kan hmang a, hei hi a thalo hle a ni.

Tin, kan Member zahawm tak, Pu BD Chakma rawn sawi kha tha ka ti a, ‘prawn farm’ (kaikuang farm) te pawh hi innovative, kan tihngailoh, a man a to a, kan duh bawk a, a tha tak zet a. Tin, Fisheries Department-in ‘local species’ kan sangha neih nghahrah te pawh multiplication (tihpun) leh khawi tumna tunah project kalpui mek hi a tha hle mai. Innovative project tha lutuk, kan ram thilte humhalhna a ni bawk a, a tha tak zet a. Tin, sangha dil tanpuina te pawh kalpui zel ni se, a compact (a zau) ang tein, a mal te te hmun tina neite pawhin kalsan chuang lo ila.

Tin, LAD Demand No. 19 - VC House sak chungchang te kan nghakhlel tawh a, sum te pawh kan nghak a, a lawmawm a, kan sak that pawh ka ring a.

Tin, Food & Civil Supplies-ah harsatna chi tinrengin ramri-ah te, Covid lockdown te leh mikhual refugees te, kan hre vek a, kan sorkar leh Mizoram mualpho hauh lovin (**Deputy Speaker:** Chairman nen thutna kan han inthlak lawk ang e aw) ... minute hnih khat chu min pek belh ka beisei.

Pu Chairman, i inhmeh viau mai a, churang chuan minute 1 chu min pek a ngai a ni. Kan ramin harsatna namenlo a tawh laia mipuiten kan enjoy chu, gas leh buhfai supply kan nei a, Pathian malsawmna kan dawng a, mitha pangngai tan chuan sawisel tur a awm vak lo a ni. Department pawh an thawkrim a, an chungah pawh a lawmawm a, kan Minister a fakawm tak zet a ni.

Tin, Demand No. 4 leh No. 12, Law & Judicial Deptt. leh Parliamentary Affairs-te an tangkai zia kan hria a, tv leh news lamah langin an lar ve lo nain, sorkar rorelna te an telloin a kal theih lova, a lawmawm tak zet a.

Demand No. 36 - Environment, Forests & Climate Change Deptt. hi kan hria a. Environment hi subject lian leh zau, *global issues* a ni a, problem a tam a, challenges pawh a tam a. Kan hriat angin global warming avangin lui tui (water resources) a lo tlem a, development a kal dawn chuan, *deforestation* a awm lo thei lova. Kawngpui kan sial dawn chuan tih chhiat a nei a, mahse ‘mihringin *man-made disaster* ka siam a’ tih thil te tam tak sawi tur a awm a. Boruak lo lum zel te, ‘global warming’ kan tih te leh ‘ozone depletion’ kan tih te, kha lam kha chu eng pawh ni se, mi pakhat chauha *aware* a theih lova, Forest Department hian *environmental awareness* hi kalpui zel se. Tin, NGO/YMA-in nasa takin hma a la thin a, kohhran ang te pawhin ram humhalh te,

nungcha humhalh te uar zel ila. Lui-sangha humhalhna kawngah YMA hian a uar sauh sauh a, a tha takzet a ni. Lui kan humhalh chuan chakai te, kaikuang te leh sangha te an pung chak a, hei hi sorkarin a chhunzawm zel a tha takzet a ni. Ka bialah pawh ‘eco-tourism’ kan tih ang chi, botanical garden pawh Sairep-ah kan nei a. Endemic species (awmna bik nei) *Lalruanga Dawibur* te pawh a awm a, orchid variety te pawh an awm a, international leh national researcher-te pawh an rawn lut a, develop a thain ka hria.

Tin, Indian Space Research Organisation-in an predict dan chuan, “Mizoram hi environment lamah kan thang harha kan aware thatloh chuan, thlalera chang thei ramah te pawh kan awm ve a ni” tih pawh hi ngaihtuah a tha a. Mahse, a thim zawngin kan sawi turah ka ngai lova. Theihtawpin kan tang a mitin te, Pathianin ram tha tak min pe a, chuvang chuan kan lui tui te, kan nungcha te, kan boruak te hi an hluin, a man a to tak zet a ni. Kan hriat angin, Delhi-ah chuan. inbual fai vek pawh tlaiiah chuan kan bal a, kan kawr nghawng pawh a bal vek a, Mizoram te chu kan boruak hi a thain, ‘a man a to a ni’ tihte pawh kan hriat a tha a. Kan ram hi kan vanneiin, a hausa tak zet a ni.

Demand No. 42 - Transport Deptt. hi kan hria a, thil thar kan hmu a. Shipping Ministry lamah te kan Minister-in project te neiin, Bangladesh atangin Tlabung-a lo lut turin tuiptui sawisak a ngai a. A chhan chu, tui a tam lutukin, (kan forest kan tih chhiat nasat) avangin ruahtui a lo tam a, tui hawk nasa lutukin siltation luiiah a chang a, chuvang chuan lui a pawn lutuk a, lawng a kal thei lova, Tlabung-ah lawnglian a lo kal theih nan project tha a nei te hi thil thar a ni a, an chungah pawh a lawmawm a, ram leh hnam tan thil hlu tak a ni. Tin, Zorinpui, ‘Gateway of South East Asia’, Singapore thlenga kan sumdawn theihna tur te, Kolkata atanga Inland Waterways hmanga kan ei leh in, engkim mai man tlawm zawka kan hmuh theihna tur project ropui tak kalpui a ni te hi a lawmawm a, sorkar a ti tha tak zetin ka hria a ni.

Kan ramah lirthei a lo pung a, *automobile exhaust* a meikhu chhuah hi pollution lam pawhin an control a tha a .. (**Chairman:** Minute 1 ila nei e) uluk deuh ila. Mipui tana thalo leh phurrit ‘kum 15 motor chhiah lak’ te leh ‘zu man chhiah lak’ te ti ve lovin mipui tan zangkhaina siamtu he sorkar hi, ‘sorkar tha’ Pu Chairman, a tih loh theihloh a ni.

Demand No. 23 - Art & Culture hi a contribution a ropui a, an thawhrimna avangin *Mizo Dress* tha tak tak te kan nei a, internationally-a min chawilartu an ni a, an hnathawhte a tha tak zet a ni.

Tin, Land Resources, Soil & Water Conservation-ah SEDP atangin rubber kalpui a ni a, eizawna tha kan nei dawn a, central scheme te poh kalpui (implement) zelin mipui tan a thawk tha a. Soil erosion kan hria a, a tam lo thei lova, a chhan chu *global*

warming avangin leh *climate change* avangin ‘ruah baw hawk’... (**Chairman:** I hun a zo tawh a) a sur vak vak a, leiminte a lo tam a, leilungte a lo luang ral nasa a, hei vang hian hydel project pawh a feasible lo thin a ni. ‘Engvangin nge hydel project miin kan hluihlawna kan kal san thin’ kan tih chuan, ruah a lo sur a, nasa takin tuihawk a lo luang a, siltation deposit a san lutuk chuan product leh expenditure a inmil lova, chuvang chuan tupawh sorkar se, kalsan loh theihloh hydel project a awm thin a, indem em em theih pawh a ni lo a ni. Tin, ‘engvangin nge hydel project te kan hluihlawn’ te kan ti a, thenkhat chu Water Commission of India-in nasa takin scientist-te hmangin a zir a, a siltation, tuihawk luang a nut lutuk chuan an duhlo thin a. 75 mW pechhuak thei Mat hydel project hi Water Commission of India-in rei tak an lo zir tawh a, hei hi Mizoram-ah chuan ‘ideal hydel project siam nan a tha’ an ti a, siam ni thei se la. Saiphah mini-hydel project khu thil harsa a nihloh chuan a tha tho a.

Pu Chairman, kan wind up dawn a. Engpawh ni se, ‘risk’ tih te, sorkar hmalaknate hi mawlmang tak, thawh thuta hmalak a ni lova, department mithiam te nen, scientist-te nen uluk taka hydel project kal san turin emaw, hnuchhawn turin emaw, chakai farm emaw, thil kan tih tur reng reng, mau chin emaw zirsa thlap mithiamte nena tih a ni a. Tin, kan hmalakna entirnan, mau phun kan han tih te, rubber tih te, kuhva tih te, environmental friendly, khawvel mamawh, khawvel boruak chhia siam tha tura hmalakna a ni a, a tha hle a. Heng kan Minister pathumte demand hi ‘pawm ngei ni se’ tih kha ka han sawi a ni e. Ka lawm e.

CHAIRMAN : Tunge han sawi leh ang? Dr. Vanlalhlana i lo sawm ang.

DR. VANLALTHLANA : Pu Chairman, ka lawm e. Kan Minister zahawm tak Pu TJ. Lalnuntluanga Demand atang hian han tan ta ila.

Law & Judicial budget ‘voted’ ah hian 4% velin a sang a. Tin, Parliamentary Affairs hi a tlahniam hret a. Environment, Forests & Climate Change Deptt. hi 19% velin a pung leh a, Transport Deptt. hi 1/4 dawn, 23.37%-in a tlahniam a. A vaia a tlakhniamna kha 0.49 a ni.

Demand No. 4 - Law & Judicial-ah hian sawi tam lutuk chu ka tum lova. Private Member’s Bill te ka pulut ve a, Legislator kan ni a, Dan siam tur kan ni a. Hetiang khawpa ka Bill, tlinglo chung chung a kan han chai ho kha a lawmawm ka ti a. Dan buaipuitu tur kan ni a, kan ngaihvenin kan en tlang niin ka hria a. Kan inzirna zel tur pawh a ni a, kei pawh inzirna tam tak ka nei a. ‘Legal Services Aid’ an tih hi a taka tawng ka hre nual tawh a, sorkar hian mi harsa zawkte a thlawn ten hma a lakpui a, a lawmawm ka ti hle a ni.

Demand No. 36, ‘Environment’ ti ila kan chiang nghal vek mai a. Tui hi kan sawi nasa thin a, a tel lo chuan kan awm hlei thei lova. Mihring phe chu tui lovin ni 4 pawh awm hlei theilo, thih ngei ngeina an ti a. Mithiamte phe chuan, “kum 2030 chhovah hian tui harsatna avangin ram tam tak kan buai dawn, induna te pawh a thleng mai thei a ni” tih hial ang khawp tein thu an sawi thin a ni a, amaherawh chu keini ramah chuan tunah kan buai chho a ni a. Tun hnai thalah ruah a han sur zeuh zeuh te kha a vanneihthlak khawp mai a, ni lo se chu kan buai dan tur chu kan hre theuh awm e. Tun hnai lawkah Tlawng hnar intanna ‘Saireptlang’ an tihah te hmalak a ni a, a pawt takzet a, mimalin ram leh picnic spot te an lo nei a. ‘Development’ kan tih hian development thuantling ni tur chuan *sustainable development* ang zawnga kan kalpui a ngai a. Tunah pawh kawng kan siam a, kawng kan siam avanga leivungin nungcha a tihchereu hi eng zat tak ni ang maw. Chutiang zawng chuan ngaihtuahna seng chung development kan kalpui a tul tak zetin ka hria a.

Tin, Pu Chairman, Allocation of Business Rules, 2019 kha notification-in tlem tlem chu an siam tha tawh a, notification zawng zawng kha kan lo en lem lova. Environment, Forests & Climate Change Department ah hian aromatic plants leh medicinal plants te kha a la awm a, chu chu Horticulture-ah hian a awm leh tho baw si a. Hei hi kan tifel tawh a nih chuan thu dang ni se la, kan la tifel lo anih chuan, Horticulture ah No. 1 - Aromatic plant; No. 3 - Spices & condiments; No. 5 - Medicinal plants development tihte a awm a. Kha kha inkawkalh thei anih avangin ka rawn tarlang tel duh a.

Tin, ‘Pollution Control Board’ kan hria a. Aizawl-ah phe chuan pollution a nasa a, Allocation of Business-a tel, “Safe-Chite Lui Coordination Committee” tihah te hian a tir atanga lo buaipuitu kan ni a, kan han enchian tir a, kan lui tuite tihbawrhban a ni nasa khawp mai a, hmuh-hrehawm tak thlalakte kan hmu thin a ni. Chuvang chuan, Pollution Control Board hi kan tihchangtlun a ngai leh zualin ka hria a. A changtu hian Transport a chang tho baw a, Transport Department nen tang kawpa vehicle emission pawh hi kan buaipui a tulin ka hria. Motor atanga khu chhuak hi a nasa a. Helaia thu ho hi chu motor ah kan thu a, a khuk deuh leh motor tukverh kan tichho a, inhup chawn chawn lovin kan awm thei a ni. Chaltlang chho khi ka haw kawng a ni a, kan han tlan a, school naupang leh tarte truck leh bus khu lutuk avanga inhup chawn chawn ka hmu fo. Hriselna kan ngai pawimawh dawn a nih chuan helam hi kan ngaihtuah a ngai khawp mai tih hi ka sawi duh a.

State of Forests Reports-ah khan 2005 atangin ka thiam ang angin report ho zawng zawng kha ka han en a. 2009-ah kan ram rawn that belhin forest kan neih belh a, 2011 atangin khan kan tlahniam ta char char a, 1331 Sq.km hi kan forest neih chereu a ni a, chu chu 6.31% a ni. Amaherawh chu, thil lawmawm ve leh thung chu 2017 Report-

ah khan ‘Very-densed Forest’ kha 31 atangin 2021 (nikum) Report-ah khan 157-ah a rawn kai chho a ni a, ‘Open Forest’ lamah erawh hmalak te pawh a ngai a. He tah hian, “open forest te chu hmasawna avangin a chereu alawm” kan ti thei a, amaherawh chu, GSDP nen khaihkhin erawh chuan ngaihtuah tel ngai a awmin ka hria a, ka rawn tarlang tel duh a ni.

Pu Chairman, Demand No. 42 - Transport ah hian kum 2018 inthlan hmaah khan kan Chief Minister zahawm takin interview a neihnaah, ‘taxi te kum 15 hnuah replacement phal an ni ang’ tih kha a sawi a, tun hnaiah phei chuan a rawn tilar chho leh a, ‘hei hi department hian kalpui a tum tak tak em’ tih kha ka zawt duh a. Tin, two-wheeler taxi chungchang sawi an tam tawh a, ka lut tawh lo mai ang e.

Minister zahawm tak Pu R. Lalzirliana Demand No. 23, 27 leh 39-te hi, a then a tam belh a, a then a tlem belh a. District Council-ah 9%-in a pung a, Art & Culture ah 10% in a tlahniam a, tin, Power & Electricity-ah 8.5%-in a tlahniam bawk a. A vaiin 3.21%-in a budget hi a tlahniam a ni.

Demand No. 23 - Art & Culture-ah hian sawi ka duh chu, Covid-19 avangin mi kan inkhung a, lockdown te kan nei a. Youtube-ah thil tam tak kan en a, chutah chuan Mizovin thil kan intihhmuh tha deuh mai chu, ‘Pasaltha Chanchin’ kha a ni a, hmanlaia Mizote kan awmdan, kan kalphung rawn tarlan chhoh a ni. Khatiang zawng ang khan sorkar pawh hian hma la chho se la a tha ang em aw tih te rilru-ah a awm a. Tin, tunah kan bial chhungah *moral reformation* atan comics te kan han buatsaih chho ve a. Heta tarlan ka han duh chu, lo neih dan kalphung, a inkhaidiat-te, Mizo in-a archhiar, rap leh thil chi hrang hrang, phone han *on* chiaha poster ang deuha rawn lang thei mai tur ang te buatsaih kan han tum ve a, sorkar phei chuan a aia ropui, tha lehzualin a buatsaih thei ngei ang a. Kan tu leh fa te hian thil an hre lo hnem tawh em em mai a, ‘hetiang lamah hian kan kal a va ngai em’ tih kha ka rawn tarlang duh a.

Pu Chairman, Demand No. 39-a sawi duh ka neih chu, kan sorkar hi a rawn sorkar tirhin 8.5% in power tihsan a tum a, chu chu 2019-2020-ah a ni a, 6.68%-a tihsan a ni ta thung a. 2020-2021 hripuiin namen lova mipuite min sawp kumah khan 89.52%-a tihsan an tum a, chu chu JERC-ah ngaihtuah a ni a, dodalna te a awm a, tichuan 26.59%-a tihsan a ni. Tin, 2021-2022, tun kum kan hman meka Power Tariff Petition an thehluhah khan 41.92%-a tihsan tum leh a ni a, khatah pawh khan dodalna nasa tak a awm a, 20.70%-in tihsan a ni ta thung a. Kum 2022-2023 atan hian 21.05% a tihsan tum niin ngaihtuah mek a ni a, engnge ni kan an dawn. Power kan leina (purchase of grid power) hi chhut chian a ngai a. Kan Minister leh official-te pawhin an hriat ka ring a. Ka zawt nasa a, tun Session-ah pawh ka zawt a, ‘engtingge hmalak a nih’ ka rawn ti tawh thin a, department hotu thenkhatte phei chu ka ti tipui hial a ni.

Chutah chuan Pu Chairman, Pu Andrew, (fam min chansan ta a) ani ina zawhna a zawh atanga ka chhut dan chuan, 2019-2020 kha, khatih hun laia kan leina *actual* (kan leina tak tak) hmuh theih awm chhun a nih avangin, khami atang khan ka chhui a, zawhna pawh ka zawt ve a. Chumiah chuan, state chhunga power kan leina hi ₹18.26 a ni. A hma pawhin ka sawi tawh thin, ‘a to lutuk, a sang lutuk, hei hi kan tihhniam a ngai’ ka ti thin. Eng vangin nge 18/- hi a nih theih ka hrethiam lova. Phai lama electric company-a thawkte ka zawt a, anni chuan, ‘diesel kan leina man a ni’ an ti a. Hei hi ka hmuhchhuah dan chu, (Minister pawhin nakinah min lo zawt mai sela, ka sawi thei vek ang) an accounts hi an tifel lo palh a nih chuan thudang a ni ang a, zawhna kha an chhang dik lo a ni bawk ang a. Department accounts leh zawhna chhanna atanga ka hmuhchhuah a ni a, chiang takin a lang a. State pawn atanga kan lei hi 4.79/- a ni a, kan leina zawng zawng atanga kan siamchhuah, kan lei kha ka han paih a, ‘deduction’ kan ti ang, deduct theih ang khan ka han ti ve a, a sang lutuk a, diesel leina ang rate a ni. Hei hi chu kan enchian a ngai, kan ngaihtuah chian a ngai tih kha ka sawi duh a. Minister pawh hi mimal pawhin tum thum chu kan session neihnaah pawh ka sawipui tawh a (**Chairman:** I hun a tawp tawh e.) Pu Chairman, ka zo tep e.

Hydel project 24 kan siam tawh a, 7 kan hluihlawn tawh a, tunah hian DPR siam leh thehluh mek 6 a awm a ni. Amazon Engineering-te nen kan han thawk ho a, hemi kan leina rate pawh hi ka duh ai chuan a la sang hret a. Amaherawhchu, mithiamte zawkin a tha turah an ngai a, an inenkawlina a puhru zo ang chu maw, tih a nih chuan thudang ni sela. Hetiang lam, kan power leina hi kan budget-ah hian a sang lutuk a ni, kan hmuhlet pawh eng emaw zah awm mah sela. Kum 2019-2020 power purchase thla 1-a kan loss ringawt kha, (kum 1 ni lovin) thlatin cheng 11 vbc chuang a tling a ni. Cheng vaibelchhe 11 chuang khan hna kan thawh tur ngaihtuah ila, a tam lutuk a ni. Pu Chairman, ka zo tep.

Pu K. Lalrinliana, Minister zahawmtak Demand No. 17, 19 leh 35 te hi 2.78%-in a tam belh a. LAD-ah hian a hma pawhin ka tarlang tawh thin a, kan budget-ah khan a lang lo ka tih kha, rural local bodies-ah 15th Finance Commission atangin cheng vaibelchhe 93 kan dawng a, hei hi kan CM pawh khan min lo hriatsak sela ka ti a, *general discussion*-ah khan ka tarlang hman ta chiah lova. Hei hi engnge a chhan, budget-ah a lang si lovin economic survey-ah a lang a, RTI-a ka zawhnaah pawh khulam atangin ‘kan pe a ni’ an rawn ti thlap si a, engtin nge budget-ah hian a lan loh theih tih kha kan Minister hnena ka zawhna a ni a.

Demand No. 17 - Food, Civil Supplies & Consumer Affairs Deptt-ah hian pakhat chiah ka sawi dawn a. LPG ka sawi lo thei lova, ka dinpui ziah dawn ka tih kha. Home delivery hi mipuite *Right* a ni a, mipuite chanvo a ni a, tun thlenga kan la nei thei lo hi, kan sorkar kal tawh leh kan neih mekte hi chuan kan vei a ngai. Mipuite harsatna namen

lo hi, Mizoram Consumer Union Group-ah hian ka awm a, an rawn sawi nasa thin lutuk. Hei hi chu kan sutkiansaka, mipuite nat ruala kan na dawn anih chuan he thil hi chu a tihdan kan ngaihtuah a ngai. Tunah hian hmun khatah kan han ti a, a tawk lo a ni tih kha ka han sawi duh a ni.

A tawp ber nan Fisheries hi tawi tein ka sawi ang a, hei hi chu a lawmawm lam a ni. Pu Chairman, kan Minister-in sangha chi supply-ah Mizote ta ngei mai, Mizo hatchery atanga hetiang lei theih turin an han buatsaih a, hmalak a ni a, an lei ngei pawh hi a lawmawm ka ti a, chunzawm zel ni ta se la. Tin, chakai farm kha, *mud crab* leh *fresh-water crab* a awm a, chakai farm-a an dah thin hi chu fresh-water crab a ni a, keini in mud crab lampang kan hman si a, hei tak hi chu ngaihtuah chian a ngaiin ka hria a, ka han sawi tel duh a ni e. Ka lawm e.

CHAIRMAN : Tunge sawi leh ang? Dr. K. Pachhunga, (nilo, min lo ngaidam ula) Dr. Vanlaltanpuia.

DR. VANLALTANPUIA : Pu Chairman, ka hmaah khan Dr. Pachhunga chuan tha deuhin a sawi tawh a. (**Chairman:** Ka lo sawi soal a ni e.) Vawiinah hian kan Minister zahawm tak tak pathumte an demand kan han sawiho leh thei a, lawmawm hlein ka hria a.

A hmasa berin, Demand No. 39 - Power & Electricity-ah hian han tan ila. He Department-ina thil tha tam tak a tih hi han sawi ka duh a.

Chhim lam ina power supply tha an hmuh theihna turin, 132 kV sub-Station Kawmzawl-ah min commission sak tawh a, kan lawm hle a ni. Kan Minister-ina a hmalaknate avangin chhim lamin power supply an hmu tha thei dawn ta a. He House-ah pawh ka sawi fo tawh, Thiltlang, ka bialte an chenna inchung lawkah hian power-grid line hi a kal ruak mai a, chung avang chu vanduaina te pawh tawkin, harsatnate an tawk tawh a, chung chu 're-alignment min tihsak rawh u' ka ti a, he House-ah pawh khan ka ngen a, kan Minister zahawmtak hian chu chu min tihfel sak vek tawh a, kan bial Thiltlang khuate aiawhin lawmthu ka han sawi duh bawk a. Tin, transformer tharte pawh min pe nual tawh bawk a, kan lawm em em a ni tih ka han sawi duh a.

Khawiva mini-hydel project kawng hi rei tak khawih loha awm tawh a ni a, kum 2019-2020 financial year-ah khan 400 lakhs AA min dahsak a. Mahse, Covid-19 hrileng harsatna avangin a zavaiin kan tithei ta lova, AA atangin sanction hi 100 lakh vel kan hmu a, chu chuan culvert te, retaining wall te siamin tunah hian a kawng luanna tur hna kan buaipui leh mek a. Kan Chief Minister zahawmtak hnenah pawh hian 'special assistance for capital expenditure' atan ka dil tawh a, heng hi min pek ngei pawh ka ring

bawk a. kan Power Department-in hma a lakna zawng zawngte hi ropui ka ti em em a ni. Tichuan, Power Department changtu Minister-in min lo chhinchhiah sak se ka duh em em chu – Chhipphir tlangdung line hi re-alignment ka duh em em a. Hei hi Vanva Lui kaltlang anih avangin line hi a chhe duh em em a, lui ruam tan tlang anih avangin a harsa a, hei hi kawngdung zulzui zawngin a line hi min siamsak se ka duh em em a ni. Chhipphir tlangdung *re-alignment* hi min tihthat sak se ka duh takzet a ni.

Tin, ka hmaa miten an sawi tawh ang khan, hydel project hi kan ngaihtuah hmasak tur niin ka hria a, Engineer pakhat, IIT Kharagpur-a zirchhuak ka thianpain a sawi chu, “Mizoram lui hi *rain-fed river* a ni a, duh aiin a source hi a tha tawh lova, churang chuan, hydel project siam nan a tha tawh lo a ni” tih te a sawi a. Amaherawh chu, lui thenkhat tha em em ho hi a awm a. Nichina kan sawi tak Mat Sekawi Hydel Project pawh hi survey zawh vek tawh a ni a, hengte hi Power Department hian a buaipui theih chuan a lawmawm hle ang tih ka rawn sawi duh a ni.

A dawtah chuan Demand 17 - Food, Civil Supplies & Consumer Affairs Deptt. hi ka rawn sawi duh a. Department in hma an lakna avangin Zoram mipuite thla a muang hle mai a. Covid-19 avangin hun khirh tak kan tawh a, mahse, chaw eitur nghei lovin min siam a, kan lawm em em a. A thawktu zawng zawngte chungah pawh lawmthu kan sawi duh a, minister hi a fel em em mai bawk a.

Tin, ka bialah godown Chhipphir-ah min sak sak a, kan lawm hle a ni. ‘Hmanniah khan ama hovin kan hawng a kan lawm hle a ni’ tih ka rawn sawi duh a. Hemi rual hian ka rawn ngen nghal duh chu, Haulawng-a kan Godown hi a chhe em em mai a, tui thianghlim in tur a awm lova, inthiarna mumal a awm lova, khawngaih takin hei hi min hriatsak se ka duh hle mai. Pangzawl Godown nen khian chutiang dinhmun (dilapidated condition) chhe takah tunah hian kan awm mek a ni tih hi min hriatsak se ka duh a ni.

Tin, Demand No. 4 - Law & Judicial-ah hian sawi chi a ni em ka hre lo va. Mahse, Ram rorelna khawl-ah hianin *far-sighted politician* anga thil thui ngaihtuah tur leh thil lo thleng thei tur kan lo ngaihtuah lawk hi a tha a ni. *Crypto-currency* hi kan House-ah hian a sawichhuaktu hmasaah han tang ve ila.

Tunlai hian crypto-currency hi a lar em em mai a, kan hriat angin kum 2008-ah US-a Lehmann Brothers-te tlakchhiat laiin hei hi a rawn lar chhova, ram thenkhat El Salvador leh Cuba lamah chuan hei hi *legalized* a ni a, ‘legalised’ tih khan online transaction leh decentralized banking atan te hman tawh a ni a, legalized tak chu ram hnih/khatah niin ka hria a. Engpawhnise, hengte hi Law & Judicial Department hian zir chianga, kan ram tan investment tha tak anih dawn avangin hei hi ngaihtuah a thain ka

hria a. Mizoram tan hian keini politician ho hian kan buaipui tur pakhat chu *investment* hi niin ka hria a, kan ram a retheih avang hian ‘engah nge kan invest ve theih ang’ tih hi ngaihtuah ila. Kei pawhin ka vei ve em em thin a, hmanni ah pawh ‘disinvestment’ chungchang pawh ka sawi chiam tawh a, ‘kan sorkar thil hlu ho kan invest theilo anih pawhin, *disinvest* tal ila’ tih te pawh ka sawi a ni. Chuvang chuan tunlaia trending tak mai *crypto-currency* te hi Law & Judicial lam mi leh sate hian zirchiang ta se, kan ram tana thil tha rawn lut thei tur anih chuan he ‘blockchain technology’ te hi zirchian ni se a tha ngawt ang tih hi ka sawi duh a ni. Tin, District & Session Judge, Lunglei Court te hi tihfel a ni ta em tih te hi min react theih chuan ka lawm ngawt ang.

Tin, Demand No. 36 - Forest, Environment & Climate Change Deptt. hi sawi ve leh ka duh a. Kumin kan budget-ah hian he department tana pawisa dah hi a tam em em mai a, Civil Supplies nen hian an chan hi a inang deuh reng mai a, vaibelchhe 260.8 a ni a, FCS & CA hi 260.09 crore a ni a. Hei hi ka han enchiang a, minor works-a sum dah hi a tam viau mai a, hei hi engtin nge kan hman thin le? Tunah hian an hmalak thinna te hi ka hriat chiahloh avangin tangkai deuh zawkin entirnan: national park te, wildlife sanctuary te, bird sanctuary te kan nei a, ka bialah pawh ‘Khawnglung Wildlife Sanctuary’ te kan nei a, hengho tihchangtlunna tur hi minor works atang hian a awm em, tun aia langsar zawk leh tangkai zawka hman dan hi a awm em tih hi khawngaihmin react theih chuan ka lawm ngawt ang.

He department budget hi a lo thahnem em em mai a, CSS atang te hian a tam a, State atang pawh hian cheng nuai 1,000 chu a tling a, CSS atang phei chuan nuai 10,455.91 lai dah a ni a. Hengte hi engtin nge kan hman tangkai thin, tun aia tangkai zawka hman dan te a awm em tih hi ka zawt duh a.

Tin, tunlaia kan thalaite vei em em pakhat chu *river pollution* hi a ni a. Khawpui thalaite pawh intihlim turin lui lamah te an kal nasa thin a, (*Dy. Speaker-in Chair a la a*) Kan luite hi a hnawk em em a, polythene chi tinreng mai nena awm a ni. Hman nia kan member pakhatin a sawi, ‘mahni thli ei zawng hian kan khawsa a’ a tih ang kha a ni tak tak a. Hengte hi thenfai dan leh mumal deuh hleka tihdan ngaihtuahna hi awm thei se ka duh hle mai tih he House zahawm takah hian ka sawi duh a ni.

Tin, tunlaiah mi hian silai hi an nei tha khawp mai a, sava leh nungcha dang dang hi an kapthla tam thei em em mai a, hei hi a veiawm ka ti a, kan rama nungcha an kiam nasa lutuk hi hrehawm ka ti a ni. Pachhunga University College-ah hian ka thawh hlim khan ka rawt ve a awm a, khutah khuan forest kan nei tha em em a, Aizawl khawpui venghimtu kan ni a, duh angin nungcha hi a tamlo ka ti a ni. ‘Sava rah-tlan thingte hi i phun uar ang u’ ka ti ve thin a, tunah chuan savate pawh a lo pung ta a. Kan rama sava/nungcha tlem lutuk te hi ngaihtuah dan a awm em tih kha ka sawi duh a.

Tin, Wet Land Conservation atan hian ka sawi fo thin chu, ka bial hian dil tha tak mai kan nei a, kan Ministerte pawh hian ‘Bualsen Dil’ ka sawi fo thin te hi min lo hriatsak se tih hi ka sawi leh duh a ni.

Tin, Transport Department hi han sawi leh lawk ka duh a, eizawna tha tak tak te an rawn siam a, two-wheeler taxi te an rawn introduce nasa a, mi tam takin eizawnnan an hmang a. Ka sawi duh chu, highway thenkhat, ‘khawpui ni chiah lovah te hian a dah ve chi lo maw’ tih hi ka sawi duh a ni. Tin, mi thenkhat ten an vei em em chu, taxi rate mumal lo lutuk hi a ni. Taxi rate uniform lo tak mai hi hman a ni a, complain pawh a tam a ni. Hei hi regulate theih a ni em, ‘meter kan dah lo anih pawhin rate mumal tak kalpui anih theih nan taxi rate hi en tha se’ tih hi ka duh khawp mai.

A tawp berah chuan (**Deputy Speaker:** I hun a tawp e) Local Administration - Demand No. 19 hi ka sawi leh duh a. VC House sakna te min buaipui sak mek a, kan Minister zahawm takin ‘Mizoram hmun hrang hrangah VC House sak a ni dawn’ tih te min hrilh a, a lawmawm hle a. Heng sum leh paite hi engtikah nge kan hmuh theih ang tih hi min react theih chuan ka lawm hle ang.

Wawiina kan Minister zahawm tak tak pathumte demand rawn putluh hi ka thlawp a, ‘i pass pui ngei ang u’ tiin ka rawn sawi a ni e. Ka lawm e.

DEPUTY SPEAKER : A lawmawm e. Tunah chuan Member zahawm tak Pu Vanlalhlana i lo sawm ang u.

PU VANLALHLANA : Pu Deputy Speaker, ka lawm e. Ka han sawi ve zung zung ang e.

A hmasa bera ka sawi duh chu, Law & Judicial Department a ni a, tunah hian High Court-ah Judge pathum Mizo vek kan lo nei ve ta a, a lawmawm ka ti hle a. A building leh quarters-ah te, thildang dangah pawh hma kan sawn zel turah ngai ila. Hemi kawngah hian hmarchhak state-ah kan hnufual deuh hlek a, chutih laiin kan phak tawkin zawi zawiin ke kan pen ve zel niin ka hria a, a lawmawm ka ti em em a ni.

Demand No. 12 - PAD chungchanga ka sawi duh chu, nikumah khan ni 15 chhung budget session kan nei a. Chumi hnuah September thla khan ni 3 chhung session assembly kan nei leh a. Tichuan, nikum khan ni 18 chhung Assembly Session kan nei tihna a ni, kumkhat chhungin. Tun tumah hian ni 14 vel budget session hian a awh a, thla 6 a tlin hmain session kan nei leh ang a, ni engzat nge kan neih dawn ka hre lova, kan nei tlemin ka hria a. Presiding Officers Conference-ah hian, ‘State te deuh chuan kumkhatah ni 35 emaw, 40 emaw tal Assembly Session nei tur hian beisei ila’ tih a ni

a. State lianah chuan ni 60 te, chu pawh chu kan phak lo hle mai a, MLA kan nih anga kan mawhphurhna kan hlenchhuak lo deuh em tih hi rilruah a awm a. Ni 15 budget session-ah ni 3, chu pawh chu a karah thla 6 a tlak chuan Constitution-in min thiat dawn emaw a ni a. Constitutional obligation a awm a, khalaiah khan ‘meeting leh meeting inkarah hian *thla 6* hi a tla tur a nilo’ tih a ni a. Chuvangin, Parliament-a tih ang khuan budget session te neiha, Monsoon Session te, Winter Session te kan neih kha a thain ka hria a, chu chu ka han tarlang duh a ni.

Demand No. 42 - Transport department-ah hian ka han sawi duh chu, State danga kan kal chuan ‘ISBT’ an sawi an sawi mai a, a lar a, a tangkai bawk a, Inter-State Bus Terminal kan nei ve em tih ka hre chiah lova, kan neih ve a, kan Minister hian sorkar din tantirh lamah khan Inter-State Bus state hrang hrang, hei, kan state thenawm Assam te, Manipur te, chu chang nilovin Burma te nena kan inkalpawh theihna turin bus service tirh te kha a rawt a, Burma chu tunah chuan thil harsa a ni tawh ang a. khang te kha engnge tunah hian a dinhmun, State inkalpawhna leh khatiang transport communication kha kan nei em aw tih kha kan hre chak deuh a.

Tin, Demand No. 36 - Forest-ah hian, Mizoram Economic Survey kan en chuan forest hi chi hrang hrang, chi 5 a sawite chu -

1. Riverine Forest: a cover area 1,832 sq. kms;
2. Inner Line Reserve: 570 sq. kms;
3. Roadside Reserve Forest: 97 sq. kms;
4. Other Reserve Forest: 1963 sq. kms
5. Wild Life Protected Area: 1858 sq. kms tih a ni a.

Ka han hriat duh taka chu, hemi ‘Riverine Forest Reserve’ a tih leh highway kawngpui tlangdunga reserve-a hi Aizawl leh Lunglei inkar leh Champhai tlangdung (kawng chhak leh thlang) zawng zawng hi chu mimal ram deuh vek hi a ni si a, tin, kan luite pawh hi ‘riverine’ te pawh kan han ti tak naa, mimal ram hi a tam lutuk a, eng ang chiah hi nge ni sorkar ta, hemi a cover area sq. km a rawn sawi ang zawng zawng hi thil ni thei a ni em, a nihna dik tak kha kan Minister hian min han hrilhfhah sela ka duh deuh a ni.

Tichuan, Pu Lalrinliana, Minister zahawm tak demand lamah hian ka han kai ang a, Demand No. 17 – Food, Civil Supplies & Consumer Affairs chungchangah hian.

He department hi department pawimawh tak a ni a, buhfai min petu a ni. National Food Security Act, 2013 tihlawhtlingtute an ni a, he danpui NFSA hian India khua leh tui tumah hi an riltam a phal lova, chaw a nghei a phal lo a ni. Economic dinhmunah pawh kan inang lova, kan inanlohna chhan pawh a inang lova ni. ‘Antyodaya Yojana’

te a awm a, *priority household* te, *above poverty line* te chutiang chuan buhfai kan leina rate a inang lova. Engpawhnise buhfai min pe a, a chhumna tur gas min ngaihtuah sak a, tin, petrol te min ngaihtuah sak bawk a, department pawimawh tak a niin ka hria a. Mizoram-a kan tharchhuah buhfai kan lei theih hun hi a ngahhlehawm ka ti a, FCI atang leh local purchase-in buhfai kan lei a, kan rama kan tharchhuah atang hian kan la lei lo a ni.

2019-ah khan *Zawhna & Chhanna* a lo kal a, “Mizoram-a kan tharchhuah hi buhfai lei a ni em” tih kha, 25 quintals kan lei a ni. Chu chiah chu Supply Department ina Mizoram-a kan tharchhuah buhfai kan lei a la ni. Agriculture department kan tan a ngai hle in ka hria a. Mizoram pawis nasa takin pawn lamah a kal a, chuvangin kan tharchhuah ngei mai, department-ina leia mipuia khul leh tura siam hun hi a ngahhlehawm hlein ka hria.

Legal metrology hi nichinah khan ka sawi duh point an rawn sawi tawh a, tawi tein ka han sawi ve leh ang a. Rod hi a bukin kan lei thin a, min bum nasa em em a, a zuartuten kan pawisa tamtak min eisak thin a ni. Tichuan Engineer ten, ‘a buk tur a ni lova, a tlawna lei tur a ni; ft 20, a buk chuti zat chu a nihin a tlawnin lei ula, an bum lovang che u’ min ti a. A tlawnin kan lei thin a ni. Amaherawhchu a tlawna kan lei khan a size hi a rawn te ta tlat a, sut 5 ni thin kha sut 4 alo ni ta a, a rod-ah te chuanin a inziak kalh mai a, sut 5 ni lovin sut 4, sut 5 anih thu kha sut 4-ah pawh chuti zawng chuan mipui tunah hian min rawk nasa em em mai a, factory chhuak vek a ni si a khang ho kha. Department hian heng hi a hriain ka ring a, check deuha hrem deuh te pawh an ngai a ni. Rod kan lei a, In kan sa a, kan insak khan a tuar ta a ni. Kan pawisa an ei mai bakah a bante, a beam te, a chhuat te kha anih tur ang a ni pha ta lo reng reng a ni. Chuvangin helaia mi hlemhle te thiltih hi a thalo em em mai a, kan Minister hi a hranpain ka han hriattir ve leh duh a ni.

Fisheries chungchang hi tawi tein han sawi ila. Sangha khawi tih te, leilet tih te hi Mizo nihphung a nilo a ni. Mizo kan nihphung kan eizawn dan pangngaia chu, lo kan nei a, kan vat a, kan hal a, hlo kan thlo a, buh kan seng thin a ni. Amaherawhchu a hlawk lova, a hahthlak bawk si a, eizawna thar kan ti a, leileh te kan han zir a, chutiang bawk chuan sangha khawi pawh hi Mizo Culture a ni vak lo, amaherawh chu kan zir a, kan thiam a, tunah pheii chuan 24,000 hectares hi Mizoram-ah sangha khawi theihna *potential area* niin a lang a, sangha avangin pawn lama kan pawisa luangchhuak tamtak hi tunah chuan kan han hup thei dawn ni te pawhin a lang a. Chutiang bawk chuan ‘Chakai Farm’ han tih te pawh hi kan han sawiri a, thiltha tak pawh a ni a. Amaherawh chu Mizo tan thil thar a ni a, a mipuia hi kan in educate a ngai a, **(Deputy Speaker:** Ngawi lawk aw. Kan chawlh kha a hun a, minute 1 a la nei a, kan zawh tir law law mai dawn em ni ang? Awle, tizawm rawh le)

Tin, Power chungchang hi ka sawi duh bawk a. Hei, kan Minister demand hi kan han en chuan tui kan khuap dawn lo tih a lang a. MNF Party hian an manifesto-ah chuan, “kawlpheha, solar-hydro renewable energy siamchhuah lamah tan a la ang” tih a ni a. SEDP bu-ah chuan, kum 2030-a intodelh mai bakah, “State pawna hralhchhuah tur hydel project natural gas atang tein, hydroelectric atang tein siamchhuah a ni ang” tih a ni. Chu chu MNF party ina mipui hmaa a commitment a ni. Amaherawhchu budget kan en chuan kan khuap dawn rih lo tih kha a lang Chiang em em a ni. MNF hian Hydel Project lian hi siam dawn ta se siamna chance hi a neiin ka hria a ni.

Kum 2000 khan Bramaputra Board atangin Bairabi Hydel Project detail investigation an siam a, Mizoram sorkar (MNF sorkar laiin) a bu an rawn hlan a. Chu chu keipawhin ka hriatpui a, a function-ah khan ka tel ve nghe nghe a ni. Amaherawhchu MNF sorkarin an umzui ta lem lova, chuvangin vawiin ni thleng hian tuikhuah hi kan la siam ta lova ni. Mizoram hian Memorandum of Understanding hi Hydel Project khuap turin 9 a sign tawh a. 7 chu cancel vek a ni tawh a, 2 hi ala dam tek tek a, chungte chu Tuivai Hydel Project leh Bairabi Dam-te hi an ni. Pahnih chiah hi ala nung niin a lang a, hei pawh hi engtin nge a nun dan chiah kan hre lova, member thenkhat han sawi dan atang khan, ‘khuah an tum lo’ tih te pawh a langchiang khawp mai a. Amaherawhchu anmahni sawi pawh kha a inang lova, ka hma chiaha mi sawitu pawh khan ‘Hydel Project khuah tur a ni’ te kha a rawn ti viau a, anmahni pawh an ngaih dan a inang lo deuh em ni te ka ti a. Engpawhnise kan Minister zahawm tak hian, Hydel Project a khuap lo anih pawhin Mizoram-ah landmark (history), a hming a chher thei niin ka hria a.

Central atangin Power & Electric Department chu corporation-a dah turin pressure a nasa em em a, tichuan ASCI, Hyderabad in an zir a, recommendation te report te pawh an rawn siam a. Vawi 2, vawi 3 hi an ennawn a, an siam a. Kan Minister zahawm tak ho ngei pawh hian meeting te pawh an nei a. A tawpah task-force din a ni a, chu chuan objection a la siam lova. Chuvangin he Power & Electricity Department hi central sorkar duh dan anga corporation-a siama, generation wing, transmission wing, distribution wing te siama hma a lak hi ram tan pawh a tha a, amah pawhin ram tan hming a chher thei niin ka hria a. Chu chu ‘a tiha tan pawh ka duhsak em em a ni’ tih kha kan sawi duh a ni. Pu Deputy Speaker, ka lawm e.

DEPUTY SPEAKER : Tihian kan chawlh alo hun a, dar 5:30-ah kan inhmukhawm leh dawn nia.

5:30 PM

DEPUTY SPEAKER : A la sawi lo te ber hi kan la kim lo a ni maw? La sawi lo, phar tawhsa kha kan nei a, Dr. F. Lalnunmawia, Member zahawm tak kha nichin khan i phar ti raw, chawhma lam khan? Kan ril a tam tlang deuh a ni ang e, an lo lut tlai deuh a. Aw le, tan ang aw.

DR. F. LALNUNMAWIA: Pu Dy. Speaker, ka lawm e. Vawiinah kan Minister zahawm tak tak pathum Pu R. Lalzirliana, Pu K. Lalrinliana leh Pu TJ Lalnuntluanga demand-te sawihona hun tha tak mai kan nei hi lawmawm hlein ka hria a. A hmasain a kum seniority te pawh a ni ang a, Pu R. Lalzirliana Demand No. 39 - P&E Department hi ka han sawi ang a.

Hei, budget bua kan hmuh ang hian *major works* leh *minor works* a tan nikum budget estimate ang vel tho kha dah a ni a. Tin, *subsidy* leh *other charges*-ah te lang tam lutuk rih lo mahse, kum a han kal chho ang a, kan mamawh dana zir zela dahbelh a nih ka beisei a ni. Tin, *wages*-ah hian nikum aiin a tam hret a.

P&E-ah hian MR indaihlohna a nasa khawp mai a, heng ho te pawh hi han chhawr belh thei se a duhawm hlein ka hria. Tin, kan bialah te pawh electric hrui hlui thlak tur hi kan nei nual mai a, heng te hi ngaihtuah sak kan duh hle mai a. Tin, 132 kV sub-Station, Kaihlet Melriat atanga Hualngohmun - Muallungthu chawmtu line hi power kan la hmu mumal lo va, tunah hian transformer hi siam mek a ni a. Hman deuha an supply kha a lo chiang kuang lo va, siamthat leh a ni a. Chungte pawh chu siam zawha, sawlaia miten hnianghnar zawka an hmuh hi kan nghakhlel hle a ni tih kha kan sawi duh a ni.

Tin, ka bial Muallungthu-ah sawn hrui hlauhawm tak mai a awm a, 2019 pawh khan In saten an hawlh palh a, electric-in a man a, a tla a, nunna a chan a ni. Khalaia hrui hlauhawm kha sawn (re-alignment) turin kan dil a, a thuphung chuan min pawm sak a, mahse covid hri leng avanga sum harsatna avangin duh angin kan la tipuitling thei lo a. Hei pawh hi remchang hmasa berah min tihsak theih chuan kan lawm hle ang tih kha kan sawi duh a ni.

Tin, Demand No. 33 - Land Resources, Soil & Water Conservation Deptt. hi kuthnathawktute tana department pawimawh a ni a, leilung leh tui humhalhna atana thawktu department a ni bawk a. A department thawhah hian thlai kumhlun leh he lama thlai chin chi hi an uar a, hmunphiah leh kuhva chinah te hma an han la a, a lawmawm hlein ka hria. Tunah hian budget-ah hian sum dah tam vak lovin lang rih mahse SEDP kan han kalpui ang a, sum thahnem tak he department-ah hian dah anih ka beisei a ni.

Tin, Demand No. 27 - District Council & Minority Affairs-ah hian a tlangpuia thlirin District Council-te inenkawl na tur sum chu a taw k fang chu dah a niin ka hria a, a lungawithlak khatin ka hria. Tuna lang bak an mamawhte chu an mamawh dana zirin sawrkarin a la ngaihtuah sak zel ka beisei a ni. Tin, helaia kan sawi tel duh chu, a tlangpuiin kan budget, department tea sum dah hi tam lutuk a ni lova. An mamawh ang taw k kha dah a ni phaw t a, sum tam tak erawh chu Finance-ah dah rih a ni a, hei hi a tha hlein ka hria a. Kum a lo kal ang a department ten an mamawh dana zir zelin pek zel turah ka ngai a. Hei hi sorkar sum renchem nan pawh a thatna riau awmin ka han hria a. Chuti lova a zawng zawng han pek zawh vek mai chuan sum renchem te pawh a har thei a. Chuvang chuan, kan CM zahawm tak hovin he sorkar hian kan leiba te pawh hi tihhniam hret hret a tum a, Chutainga tan te pawh chuan thil tangkai tak anih te pawh ka beisei a ni.

Pu Dy. Speaker, ka sawi duh chu, Mizoram sorkar leiba hi pung ta viau ang leh ba tam ta viau anga sawi te a tam khawp mai a. Amaherawhchu, kan hriat angin India ram pum huapa lakin, State leiba nei tlem ber pathum zingah kan tel ve tlat mai a ni. Hei hi thil lawmawm tak niin kan hria a ni. Tin, Congress sorkar tawp lam 2017-18 khan GSDP atang teha 40% vel kha nakumah chuan 30 % vela tihhniam tum kha a ni a, chuvang chuan kan leiba hi a sang vak lo niin ka hria a, a hniam lampang a pan zel a, a thlamuan thlak hle in kan hria a ni.

Tin, Pu Dy. Speaker, kan Minister zahawm tak Pu K. Lalrinliana chanah hian ka han kal ang a. Demand No. 3 - Food, Civil Supplies & Consumer Affairs Deptt. budget hian nikum BE a pha lo hret nain, *supplies and materials*-ah nikum zat vel dah a ni a, buhfaiah kan harsa lo zui zel turah ka ngai a ni. Tin, kum kal taah khan kudam leh staff quarter sakna tur thahnem tak dah a ni a, kan bialah te pawh min sak sak a, kan lawm hle a ni. La nei ve lo te pawhin an nei zel ang tih kha ka beisei a ni.

Fisheries-ah hian ka han kai leh dawrh ang a, Demand No. 35-ah hian sum dah ngau ngaua hi chu tam vak angin langlo mahse SEDP-a tuikhuah leh sangha dil neia eizawngte tihhmasawn tum a ni a, hengah te hian sum thahnem tak zawk dah anih ka beisei a ni. Tin, Pu Deputy Speaker, 'chakai farm' chungchang a lar khawp mai a, thenkhatin an sawi duh a. Ka bial hi chakaia eizawng tamna a ni a, Sialsuk, Samlukhai te sawn eizawn nan an hmang nasa em em a. Sialsuk kan paltlang chuan sawng an dawrah te sawn an zuar nasa em em mai a ni. Hetianga chakai khawi pilot project neih hi 'kan bial kan lo lawm em em a ni' tih kha kan sawi duh a. Hei hi a hlawhtlina, note te an neiha an inthlahpun pheih chuan chakai nasa takin a pung ang tih ka ring a. Tin, hetiang pilot project neih hi a tha a, South East Asia te hian sea-food an ei nasa a, a khawia khawi chi te pawh an bei nasa em em a, hetiang thilte pawh hi kan tihfuh chuan kan ramah hian tha ve thei tak tur a ni. Kan tihfuh chuan chakai khawitute tan hian

hamthatna nasa tak a thlen ve thei a ni. Amaherawhchu kan beisei ang kan phak loh chuan kan ti zel lo mai turah kan ngai a. Chuvangin pilot project anga a research (enchhinna) kan han kalpui hi sawisel mai chiah ka ngailo a ni. Chuvang chuan, ‘keini bial bik chu chakai khawia eizawng tam tak kan awm avangin kan lawm em em a ni’ tih kha ka sawi duh a ni.

Tin, Demand No. 19 - LAD hi kan sawi leh ang a. Department pawimawh tak, kan VC-te enkawltu department a ni a, tuna sorkar kum kal lai mek liam turah hianin Panchayat House sak thar leh VC House tan sum dah a ni a, hrileng avanga sum harsatna vangin tlemin kan han thawk tlai deuh hlek a, kan thawk thei thuai turah ka ngai a. Tin, hei kan VC-te eng emaw zat computer set tharte min pe a, ‘kan lawm em em a ni’ tih kha ka sawi duh a ni.

Kan Minister zahawm tak Pu TJ Lalnuntluanga department chan, Demand No. 4 - Law & Judicial leh Parliamentary Affairs te hi sawi tam tur kei chuan ka hre lova. Law & Judicial hi dan leh rorelna enkawltu a ni a, an pawimawh hle a, an langsar viau lo pawh a ni maithei a, amaherawhchu kan ram dinhmunah hian a pawimawh em em a ni. District Court leh High Court thleng thawktute pawimawh dan chu kan hre vekin ka ring a. Tin, Parliamentary Affairs hi, Pu Deputy Speaker, Dan siamtu pawl, Legislature-te an pawimawh em em a, heng Dan siamtute leh sorkar leh department-te thlunzawmtu, department pawimawh tak a ni a, langsar lutuk lo mahse a pawimawh em em a ni. Chuvang chuan, hmalam hun kal zel turah te tangkai zawka an thawh zel ka duhsak a ni.

Tin, Demand No. 36 - Environment, Forests & Climate Change Deptt. hi central sorkarin a ngaih pawimawh em em department a ni a, fund pawh hi CSS atang te, foreign funding atang te in enge maw zah hi hmuh a ni thin a. Kan budget bu-ah hian *major works*-ah hian vaibelchhe 47 zet mai dah a ni a, a lawmawm hlein ka hria a, hei lo pawh CSS eng emaw zah hmuh a nih ka beisei a, forest humhalh turte, ramngaw tipung zel tur te leh tuihna te tipung zel tur tein hma nasa taka an lak ka beisei a ni.

Tin, a tawp ber nan Pu Deputy Speaker, Transport hi tawi te han tarlan ve leh zeuh ka duh a. Department pawimawh a ni a, motor registration leh road tax te a buaipui a, thil dang tam tak nen, ‘revenue siamtu pawimawh tak a ni’ tih kha ka sawi duh a. Tin, ka bialah nimin khan ‘Vehicle Inspection and Certification Centre’ dah tura hmalak a ni a, sawlai saw a pawimawh hle dawnin ka hria a. Driving test te an nei thin a, tihchangtluna zawh thuai thuai kan nghakhlel hle a ni tih kha ka sawi duh a. Tin he department hian lirthei, a bik takin two-wheeler taxi-a eizawng tan permit te a pechhuak a, thalai tam takin eizawna an nei ta hi a lawmawm hlein ka hria a ni. Chuvang chuan, vawiinah hian he department hmalaknaah lawmthu ka sawi a ni.

Tichuan, Pu Deputy Speaker, kan Minister zahawm tak tak pathum te chan ho budget hi tha ka ti a, ‘pass pui ngei ang u’, tiin ka han support ve a ni e. Ka lawm e.

DEPUTY SPEAKER : Awle, tunah chuan Member zahawm tak Pu C. Ngunlianchnunga ilo sawm ang u.

PU C. NGUNLIANCHUNGA: Pu Deputy Speaker, pakhatnaah Pu TJ. Lalnuntluanga department enkawl, Demand No. 4 - Law & Judicial-ah hian thil pakhat min react tura ka duh chu, Lawngtlai-ah sawn Addl. District Session Judge hi min dahsak ve thei sela, kan mamawh khawp mai a, chhan chu murder case te, Protection of Children from Sexual Offence (POCSO) tih ang chi reng reng hi Lawngtlai CJM-in a khawih theihloh avangin Lunglei emaw, Siaha emaw-ah kalpui zel a ngai a, Lawngtlai-ah Jail kan nei ve tho bakah, a mihring chenga te saw district khata awm kan ni a, kha kha pakhatna ni sela.

A pahnihnaah - Environment, Forest & Climate Change Deptt-ah hian min react tura ka duh chu, nikum (29.4.2021) khan ka bial Hmunnuam khuaa mite nupa, chawhmeh zawnga an kal kha saiin an nu a chilhlum a, ‘vawiin thleng hian *zangnadawmna* an la hmu lo a ni’ tih an pain hmanni khan ka hnenah lokal in a sawi a. Kha kha engtikah nge pek theih a ni ang, a rang lama pek theih a ni ang em tih kha ka sawi duh baw k a.

Tin, a pathumnaah chuan, Demand No. 42 - Transport Department-ah hian Lawngtlai East bialtuin a sawi ang khan, Lawngtlai-ah sawn Transport Department kan nei ve a, MVI kan nei a, chu chu a ni deuh mai a. DTO hi DC lam atangin min kawp a, Lawngtlai lamah sawn driving license pekchhuah theih dan a awm em, min ngaihtuah sak thei em tih kha ka sawi duh a, min react thei se ka duh khawp mai.

Pu K. Lalrinliana enkawl, Food & Civil Supplies Deptt demand hi chu lawmthu sawi tur deuh vek a ni mai a. A ni hi chu a fel a, biak pawh a nuam a. Chutih rual chuan ama hnenah pawh wawi tam tak ka sawi a, department lam pawhin min hriatsak ka duh chu, kan bial hi thingtlanga awm kan ni a, Aadhar Card leh ration card link loh hi tam tak a awm a, chumite chuan harsatna an taw k nasa khawp mai a. A bik takin Vathuampui supply centre hnuaiah, kha kha khawngaihtakin min hriatsak ka duh a.

Tin, Fisheries-ah chuan, nikum lamah sangha chaw Lawngtlai lamah min pe lova, kuminah chuan tam deuh min pek a ngai. ‘Lawngtlai-ah sawn sangha vulha eizawng tam tak an awm ve a ni’ tih kha ka sawi duh a ni.

Tichuan, Pu R. Lalzirliana enkawlah kan kal chho mai ang a. Power & Electricity chungchangah hian ama hnenah pawh lehkha ka ziaak tawh a, min ziah sak tawh a, E&C-ah te pawh ka kal a. Ka biala Sedai Lui te, Dursura te, Mualbu Lui te leh Bawlsuri-te hi electric line la lut ve lo te an ni a. Ama hnenah pawh ka ziaak a, ka umzui a, ‘kumin chhung hian khang khuaah te khan min pawhluh sak ve theih ram tawh ang em le’ tih kha ka han sawi duh bawh a ni.

Tin, Power & Electricity-ah hian vawiinah MLA ka nihna ang pawhin lawmthu sawi ka duh ve a. Ka bial hi kan chhangchhia a, transformer te a chhe thin a, E&C office ah te kan han phone thin a. Kan ngenna te min ngaih pawimawh sak a, min han siam sak zung zung thin kha vawiinah hian House kaltlangin lawmthu ka sawi bawh a ni.

Tichuan, Demand No. 27 - District Council & Minority Affairs Deptt. hi a pawimawh khawp mai a. Zawhna te pawh nikum September-ah khan ka zawt tawh a. Lawngtlai District Council-a kan awm ve lain ‘by-pass road’ kan ti a, cheng vaibelchhe 11,43,85,000/- sanction central atangin kan hmu a, chu chu thawh a ni a. Amaherawhchu, eng emaw chen contractor teah harsatna a awm a, helaia ka zawh kherna chhan chu, DC & MA hi a inrawlh tlat vang a ni.

Ni 7 October, 2019-ah khan DC&MA Secretary hovin contractor-te leh District Council hotute meeting an nei a. Chu meeting-ah chuan, ‘second running bill hi District Council-in pe sela’ tih a ni a. District Council-in hei hi a pek duhloh chhan chu hna an thawh thatloh leh hna an thawh chakloh vang a ni a, ‘hna thawk phawt rawh u’ an tih avanga hnathawh ngiata pelo kha an ni a. Mahse DC & MA te nena meeting an neihnaah khan contractor te leh DC hotute inremsiamin, rei tak sawiho anih hnuah, “District Council-in second installment bill hi pe sela, tichuan contractor-te pawhin muangchang lovin Ni 31 March, 2020-ah hna hi an zo tur a ni” tih a ni a.

He zawhna hi wawi thum ka zawt tawh a, tun tumah pawh ka zawt a, *Unstarred*-ah a lo chhuak daih a, *Starred*-a kan zawh si kha. Hei hi tun thlenga hmalak a ni ta lova. Helaiah kan hotuten, ‘healthcare, ka baby’ an tih ang deuh khan, Lawngtlai *by-pass road* hi ‘ka baby’ a ni ve a. Ka CEM laia central-a kan va dil chhuah ve a ni a, a pamhmaiin a uiawm ka ti khawp mai a. Hei hi DC & MA Minister zahawm tak hian hma min lak sak thei ang em tih kha ka han zawt duh a.

Tin, PMJVK chungchangah helaiah zawhna pawh an zawt a. Hei hi PMJVK nodal-department chu DC & MA anih avangin, Lawngtlai-ah sawn sports bikah nasa takin hmalak a ni a. Zawhna ka zawt a, a chhuak tlat lo mai a, chutah chuan ‘sports complex’ kan tih ang chi project lian tak a ni a. Saw saw lo zo ta sela, tu kutah nge a awm ang? A ram neitu YLA te nena agreement neiin emaw, a works saw lo complete

ta sela, YLA (a ram neitute) hnenah sawn thuneihna an pe thei mai ang em? Engnge a kal zui dan tur kha khawngaihtakin kan Minister zahawm takin min react bawk sela ka duh khawp mai a.

Tin, District Council sum pung chungchangah 9% laia kuminah a pung anga kan sawi hi a dik a ni, a dik khawp mai. Amaherawhchu, chutih rual chuan nikum lamah khan District Council pawisa kha a punloh avangin kuminah hian cheng nuai 1,800, a bikin Lai District-ah pek a ni a.

Tichuan, helai House-ah pawh information pek ka duh em em chu, District Council-te hian an pawisa hmuh hi hlawha tan an hmang vek a, a bak hi hna dang thawhna tur a awm lo a ni kan ti thin a. Lai Autonomous District Council hian department 32 a enkawl a ni. Chumi atan chuan pawisa kan pek danah pawh hian *salary*, *non-salary* tein kan pe a. Kuminah hian *salary*-ah nuai 19,363.46 pek a ni a, *non-salary* ah hian nuai 1,360 a ni. Heihi nikumah pawh a ni a, nikum hmasa 2020-21 khan nuai 3,256.10 a ni. Tichuan, nikumah pakhatmah a pung lova, kuminah a pung bawk lova. District Council-te tan hmasawna hnathawh ngaihna a awmlo hrim hrim. Department 32 enkawl tana *salary*-ah nuai 19,363.46 ringawt hi chu, vawiinah pawh department hrang hrang kan en a, kan sawiho a ni a. Hetah pawh hian a tlangpui thua *salary* a ni deuh vek a, helaia department pakhat te ringawt pawhin Mizoram sorkar anga a pawisa hmuh hi nuai sing chuang anih laiin, District Council-te dinhmun saw, ‘hnathawhna tur hi sorkar zawk hian kan pe lo a ni’ tih lai hi vawiinah he House-ah pawh hian kan hriatchian leh, Mizoram mipuite pawhin kan hriat ka duh a.

Kan hriat dan hian, “District Council hotute chuan an pawisa hmuh hi hlawhah an hmang vek a” tih thawt hian kan thaw a, *6th Schedule to the Constitution*-ah hian subject neih chin a nei a, entirnan: Education-ah chuan elementary school education - middle school leh primary te a ni a, zirtirtu tam tak, Lai District khaw za chuangah sawn khawtinah school pahnih, pathum te a lo awm a, primary school, chutiang chuan middle school a lo awm bawk a. Chunga zirtirtu zawng zawng hlawhte, department hrang hrang nichina kan sawi ang khan, department 32 an awm a, hlawh an la ngawr ngawr a ni. Hmasawna hnathawhna tur a awm lo hrim hrim.

Tichuan, kuminah pawh hian East bialtu khan lawmthu a sawi a, kan hriat dan a inang lo a ni. Tuna hlawh kan pek hi RE kan pekah hian cheng nuai 1,800/- kan pek belh a, nikumah RE kan pe lova. Tin, District Council-te hi, *General Discussion*-ah khan ka sawi tawh a, (vawiin chu department-wise anih angin) *6th* pay angin hlawh hi kan siamsak tlat a ni. *7th* pay chhuah dawn lai khan Pathian leh hotute duhsaknain Cabinet meeting-a telve ka ni a, khatah khan, ‘District Council-te *7th* Pay an hman ve

theihna tur atan' tia rin luh an ni a, kha 7th Pay hman kumah khan District Council-te kha 7th pay anga budget pawh siam an ni a, hlawh pawh an la a ni.

Tichuan, tun MNF sorkar a lo din chiah khan, he House-ah pawh hian ka sawi tawh a, 6th pay angin hlawh siam sak an nih avangin an kum hmasa pawisa kha nasa fe in an pe lova. Kan House Leader zahawm takin ka zawhnaah min chhannaah pawh 'hlawh chu pek dan kan ngaihtuah ang' tiin hlawh phei chu an pe leh ta hram a. Chutiang chuan tunah hian District Council duhsak viau anga kan han sawi te hi, an hlawh ngawr ngawr Lai Autonomous District Council-ah phei chuan, March thla hlawh tur pawh tuna pawisa pek khan a daihlo a ni.

Pu Dy. Speaker, point pakhat chiah. District Council-te hian CCV Rules an nei ve a, chutah chuan anmahni hlawh insiam theihna Dan an nei a ni. Nikum hmasa lamah khan District Council rorelnaah, 'an hlawh hi pun ve ni se' tih a ni a, tichuan Mizoram sorkar-ah rawn thawn phei a ni a, vawiin ni thlenga nghakhlel taka an thlir hi, che a la awm lo ni hian a lang a. Kan DC & MA Minister chak tak mai hian District Council pathumte an member-te hlawh, an pension hlawh te an lo pass vea kha, 'pass sak theih hram dan te hi a awm thei ang em, hma te hi a laksak theih hram ang em le' tih kha min react tel se ka duh a nih chu.

Pu Dy. Speaker, department pakhat chauh pawh hi sawi ila nilenga sawi tur hi a awm a, tihngaihna a awm lo a ni e. Ka lawm e.

DEPUTY SPEAKER : A lawmawm e. Tunah chuan Member zahawm tak, kan Group Leader Pu Zodintluanga Ralte i lo sawm ang u. A ni hian minute 15 a nei a ni.

PU ZODINTLUANGA RALTE: Pu Dy. Speaker, ka lawm e. Vawiin nia kan business-a inziak chu, '*Discussion and Voting on Demands*' tih a ni a. Kan Demand hi han en ila sorkar hnathawk hlawh leh sorkar inrelbawlna a ni deuh vek mai a. Han sawi em em tur, han phur em emna tur a awm lo khawp mai a. Kan member zahawm tak Prof. Mawitea khan, "an mamawh ang tawh pek a ni" a ti a, kan sorkar hian kan department-te hi an mamawh hi a pe tlem hle a ni. 'A mamawh' an tih hi ram hmasawna tur a awm lo a ni tih hi a chiang a.

Tukin zing *Question Hour*-ah kan Art & Culture Minister zahawm takin a chhannaah khan, "kan budget en hian engmah tihtheihna tur a awm lo" a ti hlawl bawh a. Chung ang chu kan sorkar dinhmun hi a ni a, sawi tur a tam vak lo a ni. Hmasawna tur sawi te, lawmthu, i dinglama mite khan khawi khawiah emaw lawmthu fahrah te te

an han sawi den den a, a tak takah chuan an lawm bik lo. Lawmthu an sawi rual khan ‘amaherawhchu’ an ti tel zel a, thil dil tur tam tak an nei a.

Pu Dy. Speaker, vawiinah hian phurlo deuha sawi a ngai a, Demand No. 39 - Power & Electricity Department hi tawi tea rawn sawi ka duh a.

Congress sorkar hmasaah khan vawiin nia kan Minister tho hi Power Deptt. changtu a ni a, khatih hun lai khan Pu Dy. Speaker, mipuite ngaichangin electric bill-te JERC a ni emaw, NEEPCO a ni emaw, a to changte pawhin sorkar nasa takin a tang a. A punna hi -

- 2015-16 - 2%
- 2016-17 - 4.02%
- 2017-18 - 3.6 %
- 2018-19 - 5.9% (MNF sorkar a lo pian khan)
- 2019-20 - 6.68 %
- 2020-2021 - 26.59%.

Tuna ka rawn sawichhuah hi Assembly kan session kaltlanga *Zawhna & Chhanna* min rawn pek a ni a. Kum 2020-2021-a department atanga rawtna pheih kha chu 41.92% a ni a, JERC khan 20.7 ah a la tithla ta zawk a ni.

Ka rawn sawi duh leh chu Pu Dy. Speaker, kan ram rorelna sang bera financial management a thatloh chuan, mipui, miretheite ten an tuar thin a ni. Sorkar hmasaah kha chuan sorkar atangin subsize emaw, engtin tin emaw mipui khan tuar lovin sorkar khan a tuar thin a ni. Vawiinniah chuan mipui, mi harsa zawk ten theih tawpa an thawhchhuah zawng zawng pawh, sorkar ina a sum neihloh phuhruk nan min sawrfu mek a ni. A theih ang angin chhiah chawi turin ruahmanna an siam a, chungte chu Pu Dy. Speaker, ka rawn sawi duh a. Sorkar thaah chuan mipuite tuarloh turin sorkarin ruahmanna a siam thin a ni. Vawiina sorkar kan hrawnah hi chuan engkim mai, sum phuhrukna tur atan mipuite hi min tawrh tir zel a ni tih kha ka rawn sawi duh a ni.

Tin, Demand No. 42 - Transport hi tawi te rawn sawi ve leh ka duh a. Hmannia ka rawn sawi tawh ang khan, ngaihdan kei chu ka nei a. Printing & Stationery chungchangah te pawh, “sorkar chu sumdawng tur a nilo, sorkar hi facilitator-ah kan tang mai ang a, sumdawn kan tum chuan, sorkar hi a hlawhchham thin” kan ti a. Transport Department pawh kan state-owned revenue atanga chhut khan 2.42% hi an thawkchhuak ve a, 2022-2023-ah hian 2.22% thawk chhuak ve leh turin kan han chhut sak a ni.

Tin, han ngaihtuah la, Pu Dy. Speaker, he department-a sum sen tura kan ruahman chu cheng vaibelchhe 45 chuang a ni a, hei hi a senral tur daih a ni, a phuhruk lo khawp mai. Chutiang chuan sorkar hian he department hi ‘lost-seeking department’ anga a kalpui reng hi chu a fuhlo hi ka ti ve a. Hengte hi chu *privatise* emaw, sorkar sum hek lo zawng, nichina kan han sawi tawh ang khan, sorkar ina sum a lakluhna tur, miretheite hreka chhiah te kan tihpun sak laia, khatieng department a loss zawnga kalpui reng hi “sorkar chak leh sorkar tha kal dan tur a ni dawn em ni” tih kha kan rawn sawi tel duh a.

Tin, Demand No. 29 - LAD hi, Pu Deputy Speaker, tawi tein ka rawn sawi leh ang a. Ka sawi ang khan, han sawi tur vak a awm lova, sum a awm si lova, hnathawhna tur. Mahse, ka ngaihpawimawh zawng te te han sawi hi a ni mai a. BADP ina a cover loh, RD department hi chu border area te tihhmasawanna hi a ni mai a, Local Administrative hi chu a ram puma hmasawanna siamtua kan neih hi a ni mai a, hengte hi sorkar ang hian kan duat a ngai ka ti.

Pu Dy. Speaker, kan LAD Department hi kan duat chuan, thingtlang khua zawng zawng hmasawanna hi a ni hian a keng tel a, “hetah hian pawisa te pawh hi dah tam ila” tih kha ka rawn sawipui duh a ni. A chhan chu tunah pawh, nichina an sawi ang khan ‘pawisa a dil belh theih mai alawm’ an ti a, han dil belh dawn sela, tuna an neihsa pawh hi kum tawpah an hmang tawh ang a, an dil belh tura hi an hmang hman dawn lo a ni. Nak kum election a ni tawh si a, hman tur hi he sorkar hian a neilo vat mai dawn a. Nak kum lamah chuan budget te hi keini hian kan lo khawih ve tawh turah ngai ila.

Tin, Pu Dy. Speaker, kan Minister zahawm takina min lo react atan ka rawn sawi duh chu, ka bial chhung Rolui leh Undermanik sub-village hi kum thum dawn lai mai inthlan tir an ni tawh lova, a rang thei ang bera inthlan hi min buatsaih sak theih ang em? Sub-village te hi hmasawanna rah NREG te, sorkar atanga hmasawanna khawih tute an ni ve si a, hetiang rei lutuk inthlang lova an awm hi thil fel lo tak a ni tih kha ka rawn sawi duh a.

Tin, Lungsen-a khawnvartui dealer hi hun rei tak atang khan a area chhungah khawnvartui a lalut ngai tawh lova, khawnvartui mamawh tak tak thingtlanga miten harsatna an tawh nasa a, hei hi kan Minister zahawm tak hian a rang thei ang bera, a titheitu tur ngei min rawn pe thei ang em tih kha ka rawn sawi duh bawh a ni. (*Speaker-in Chair a la a*)

Demand No. 36 - Environment, Forests & Climate Change Department-ah hian tawi tein ka han rawn sawi leh duh a.

Riverine reserve hi a buaithlak khawp mai a, kan bial chung khu luikam deuh vek kan ni a, Phairuang Lui, Kau Lui, Khawthlang Tuipui te a ni a. Furah tui te a lo lian a, tui lianin leitha te a rawn chhek a, thal a lo nihin chung leitha atang chuan nul te an siam a, Lunglei khawpui hi thlai thar tha tak takin an supply thin a ni. Hemi kawngah hian kum tin mai Forest Department atangin harsatna an tawk thin a, hei hi kan Minister zahawm tak hianin mumal taka thingtlang mi harsa zawk luikama awmte, kum tina an dil belh ngai lovin, a chang phei chuan Forest Department Officer zinga fello deuh te phei chuan pawisa chawi chang te an nei thin a ni. Chutiang a awmlohna turin mumal taka ruahmanna min siamsak thei se ka ti khawp mai. A chhan chu, khung lai kan rawn sawi khu *potential area*, tukin zing lama kan Agriculture Minister zahawm takin hmalak a tumna lai kha a ni a. Amaherawhchu, riverine reserve kan neiha hi ‘lui atanga metre 800’ tih a niin ka hria a, “as the crow flies” an ti leh nghal a, a thui em em mai a. Chutiang anih chuan mipui ten eizawna tur hi an nei thei dawn lova. He riverine reserve chung chang hi department hian High Court-ah te an la khing a ni awm leh nghal a. Hetiangte hi tihtawp dan a awm lawm ni, mipui, miharsa tak tak tena eizawna an neiha tur lo tibuaitu an nih avangin tih kha ka rawn sawi duh a.

Tin, Demand No. 35 - Fisheries Deptt. chungchang hi tawit e ka rawn sawi duh bawka a.

Chhim lamah sawn nichina Lawngtlai bialtu zahawm takin a sawi ang khan sangha dil mi tam takin an nei ve a, eizawna atan an hmang ve a. Amaherawhchu, sangha chi an sem hi hetah hmar lam atangin, a then phei chu State pawn atang tein an rawn beng phei char char a, an beng luhai vek tawh hi a ni hrim a. Ni thum, ni li te an rawn beng a, sangha luhai tak mai, an beng chauha kha han khawi pun kan tum ta a ni a. Chuvang chuan, Ngengpui leh Zobawk-ah te hian department-in hmalakna tha tak a nei a, sawng te saw khawngaih takin hlawhtling taka sangha chi siam nan hmang thei sela, chhimlama sangha dil siama ei zawngte tan a tangkai dawn em em a ni tih kha ka rawn sawi duh a.

Ka sawi tawh ang khan a hming pawh hi hei, kan business-ah khan ‘Fisheries’ tih a ni a, ‘Chakai farm’ tih lamah te kha chuan kal tawh lo zawk sela, ‘fisheries’ a nih ang hian Sangha chi siam tam lamah min kalpui thei sela. A chakai farm lama min risk-pui vak kha chu a fuh vak lo a ni.

Pu Speaker, a tawp lamah, Food, Civil Supplies & Consumers Affairs, Demand No.17 hi tawi tein ka sawi duh bawka a.

Tupawh kan ni a, Congress a sorkar lai pawhin, vawiinah pawh kan minister hi, Lawngtlai West bialtu sawi ang khan *kan minister fakrawn* a ni a, biak a nuam a, engkim

a bula sawi hi a nuam a. Chuti rual chuan, ani pawh hian a tithei bik lo nge, *buhfai buk diklo* hi a buaithlak hle a. Weigh-bridge kan tih te hi hmang ngei ngei tura ruahmanna kan siamloh chuan, retailer atangin buhfai an han la a, retailer-in a kim lovin a han buk ngei a. Retailer-te hi kan dem ngawt thei tlat lo; an buhfai lakchhuah kha a kim miau si lova. Chuvang chuan, a tuartu dik tak chu mirethei, harsa zawkte, BPL, AAP kan tihte khan neihlungkhawnga an hnathawh char char, nitin inhlawhfa chung a an thawhchhuahte kha buhfai buk tlinglo leinan khan an pawisa hman a ngai tlat a ni. He thil hi a serious a, tihfel dan ngaihtuah ni se.

Pu Speaker, a tawp ber atan DCA, Demand No. 27 hi, nichina ka sawi tawh ang khan kan Minister hi power minister anih lai ang bawkin Congress sorkarah khan DCA hi a lo enkawl tawh a. Khati hun lai khan amah kaltlangin sorkar khan District Council-te saw a duhsak em em a, Congress a lo sorkar phat atang khan amahin an budget-ah tam tak tipung nghalin, District Council hmasawna atan sum an dah a, kum tin an tipung chho a. Hei, MNF sorkarah a ngai bawk a han chang leh a, kan Minister ni lovin, a sorkar zawk hian District Council-te a hmangaihloh zia a lang chiang em em mai a ni. A changtu minister a ngai reng lai chuan pawisa pawh an hmu tha, development tur pawh a awm, mahse sorkar a inthlak a, chu sorkar atang chuan hmasawna tur pawisa, hei kum thum chhung chu an budget hi a punglo ti ila kan sawisual lo ang a, tun kum hi arawn punna a ni a, kha pawh kha ‘hlahw lampanga kal tur’ tih kha a ni mai a. Chuvang chuan, kan sorkar hian minority zawk District Council Area-a awmte hi, ‘hmangaihna leh duhsaknain a enkawl lo a ni’ tih hi a chiang em em a ni tih kha Pu Speaker, karawn sawi duh chin chu a ni. I thu ka awi thin a, a hun takah ka zo thin e. Ka lawm e.

SPEAKER : A lawmawm e. Member zahawm tak Pu Lalduhoma ka sawm e.

PU LALDUHOMA : Pu Speaker, ka lawm e, Demand No. 42, Transport atangin ka han tan ang a.

Kolasib-ah khuan, ‘Kolasib Auto-Drivers’ Union’ (KADU) a awm a, kan sorkar, kan department-ah hian, “permit 10 te chu minrawn pek belh mah ula a pawilem lo ang e” an tih laiin permit 118 pek a ni a, tun hnaiah an press release te kan lo chhiar ve a. Tichuan a permit neitute khan Auto- Rickshaw pawh an lei lova, an khalh thiam bawk lova, ‘an hralh chhawng chur chur’ tih a ni a. Kha khanin traffic congestion a siam ta a, khatiang zat zat daih passenger kha an awm si lova, an eizawna pawh a ti khawlo zo ta a ni. Ni e, party workers te pawh hi kan duhsak tur te pawh a ni a, amaherawhchu, tute emaw tana pawilei thei zawnga han induhsak kher hi chu a thalo hlein ka hria a.

Tin, inthlan hma lawk, kum 2018, November Ni 15 khan tuna kan House Leader zahawm tak leh khatih laia Maxi-Cab Owners Association Secretary Pu Sailova te kha an inkawm a, tunlai hian a video a lo lar thar leh ta viau a. Khami an inkawmna thuah khan Maxi-Cab ho hian All-Mizoram permit an nei thin a, chu chu Congress sorkar khan a tihtawp sak tak avangin an mangang ta em em kha a ni a, chu chu a hnenah an thlen a, a, “hei, emergency-ah pawh kan tlanchhuak thei lova, chhياتni thatniah pawh mahni motor a ni chungin kan tlanna tur route-ah lo chuan kan motor kan khalh thiang lova. Chuvang chuan All-Mizoram permit hi min pe leh rawh” tih kha an ngen kha a ni a, a intiam nasa hle a, an hmuh ngei kha a rinawm viau a, a video han en kha chuan. Mahse, hei, term a tawp dawn tep a Pu Speaker, engmah thawm ala awm ta lova. Tin, Taxi chungchangah pawh khan *kum 15* a dam hun chhung tur a ni a, permit renew theihloha awm ten, accident an tawh pawhin a thar an lei thei lova, an permit an renew thei lo a ni a tunah hian. Chungte chu thlen a ni bawk a, tihsak an nih dan tur te kha ngaihnaawm taka hrilh an ni a. Tin, insurance te pawh, “A, hei chu a tih awlsam dan kan zawng ang, keimah ngeiin ka su dawn a ni” tih te kha kan CM tawngkam a ni a. Tun kan lo thleng ta a, engmah tih ala awm lova. Hetianga “kan ram hruaitu lawk ber tena mipui vantlang hmuh theiha thutiam an lo neih te hi chu, a hun ala awm chung hian han tihhlawhtlin sak hram sela” tiin ka han ngenpui a ni.

Tin, Power & Electric lamah han kal ve leh ila. Nikum ah khan JERC hnenah khan power tariff 41.92%-a sanga tihpun kha kan sorkar hian a rawt a, a rapthlak viau a, kha kha tipung tak tak sela a turu hle dawn a ni. An chhuanlamah chuan, ‘deficit hi crore 108.92 kan nei a ni’ tih kha a ni a. Amaherawhchu, JERC khan an han enchiang a, “in deficit awzawng lo, sorkar atanga subsidy in dawn vaibelchhe 283. 57 hi in thukru a ni” an ti ta a ni. An tang zo ta lova, phat ngaihna an hre ta lova, sorkar atanga subsidy vaibelchhe 283 chu sawi lang duh lovin JERC an dawr a, an niin an lo hre kiau si a. Tichuan, “*deficit* nilovin, *surplus* crore 174 in nei zawk a ni” an ti a, chhan ngaihna an hre ta lova. “Chuta tanga hmun thuma thena hmun khat chu mipui tena a fee an chawi turah hian in chhiar tel tur a ni” an ti a, chu chu vaibelchhe 59 a ni a, “hei hi mipui chawi turah in belh tur a ni” tiin 41%-a tihpun an tum kha, 20.70%-a tihpun a ni ta a, a lawmawm hle a, hei hi JERC vang liau liau a kan dinhmun a ni a.

Tichuan, tunah an han chhut leh a, an *net-aggregate* Revenue Receipt hi vaibelchhe 713 a ni a, nikum aiin vaibelchhe 263 in a lo pung ta a. Tichuan, an han chhut zel khan kan deficit chu vaibelchhe 353 a lo ni ta a ni. Chu chu engtinngan kan hnawh khah ang tih kha, pakhat chuan sorkar-in subsidy in a hnawhkhat thei a, pakhat dang chu mipuiin tariff, (kan chhiah chawi) atangin a ni ta a. Tahchuanin, “subsidy-ah Mizoram sorkar-in vaibelchhe 277. 55 min pe sela, mipui a chhit man 21.08% in tihpun nise, tichuan vaibelchhe 353 hi chu kan tum thei dawn a ni” tih kha a ni ta a. Mahse Demand hi kan han en hian vaibelchhe 109 chauh hi dah a ni bawk si a,

vaibelchhe 277 hi kan Finance Department hian hemi *tariff subsidy* atan hian pek a in commit reng em tih te pawh hi hriat a tha hle mai a, an inbe tlang turah chuan kan han ngai ngawt chu a ni a.

Chuvang chuan, nichina kan ngaihthlak tak ang khan, kan CLP Leader in a sawi kha ka thlawp khawp mai a. MNF a sorkar apiang hian *chhiah* hi a sang thin a, hei hi opposition an nih lai, (22nd January, 2015) electric bill pung duh lova MNF party-in kawng an zawh thlalak a ni a, Pu Speaker, hei hi House property ah ka han pe teh ang. Kan principle hi kan kalsan chak lutuk deuh a, opposition kan nih laia kan duhloh, kawng kan zawh khum luai luai te kha ruling-ah kan han awm a, a ti duh hlei hlei ah kan han tang leh a. Chuvang chuan, *tui anga nghetlo* pawh an ni lova, *tui aia nghetlo* an niin ka hria. Khati vel kha a ni a.

Tin, kan Minister zahawm tak ina min hriatpuia tana ka duh chu, kan bialah chauh pawh a ni lova, hmun hrang hrangah transformer a chhiat hian a phurh nan hian an veng VC te hian motor an tum a ngai ziah mai a, hengte hi ‘a tur reng em ni ta tun sorkarah hian’ tih hi. Department hian sum an nei ngang lo nge nia, mahniina a phurh man tum ngai ta zel mai hi a buaithlak lam deuh chu a ni.

LAD-ah ka han pakai ang a. ‘All Mizoram VC Association’ kha a awm thin a, an term a tawp hma hma khan MNF Party-in an duh zawng zawng an ruat ta ringawt mai kha a ni a, hetiang ringawt hi chu a diklo mang e aw. December, 2021-ah khan a dinglaite hriat loh in AMVCA hi din a ni a, hengte hi chu tha takin kalpui sela, inthlang ve mai sela, a tam zawk pawh an ni a, MNF te chuan hnehna pawh an chan zawk a rinawm a. Hetianga a dinglaite palzuta engkima thuneih tuma inrawlh vek mai hi chu a mawi lova, kan hruaitute mitmei te pawh hi an veng lo emaw ni, nge, an fuihpawrh zawk tih tur hianin kan ruling party hi an awm a, hna an thawh reng reng pawh hi a chhe em em vek mai a, a pawi khawp mai. Kan ram siamtha theitu leh entawn tur sulhnu min hnutchhiah theitu tura kan beiseite zawk hian kan beisei an pha lo thin hi a pawi a ni.

Tin, Fifteenth Finance Commission-ah khan, ‘*untied fund* atanga 10% hi *technical* leh *administrative support* atan hman phal a ni’ tih a ni a, a order-ah hian, ‘however, this expenditure are to be incurred only by the concerned RLBs’ tih a ni a, kha 10% kha Rural Local Bodies (VC)-te chauhin an hman tur tih a ni. A chiang lutuk, Pu Speaker, 10% atang khan 5% kha chhuhsak an tum a, “tunah hian DLAO hnenah 5% hi inrawn dah vek tur a ni” tih order kan VC ten an dawng a ni. Hei hi Dan kalh a ni a, VC-te chanpual liau liau tur anih avangin hei hi chu tunah hian an ti tlang ngam chiahlo ni te pawhin kan hria a. A vai hian V/C-te kutah awm hram turin kan Minister hian hma la teh se, an chanpual a tlem teh lul nen, a chanve laksak kha a tul lo a ni. Tin, RLB fund hi a lo thlen atanga a dawngtu turte hnena pek anih hunchhung hi hmannah

khan ka zawt a, huntiam chhunga pek pakhatmah a awm lo. A hnuhung ber *untied fund* 1st instl. pawh hi nikum 27th August-a dawn tawh kha vawiinah pekchhuah a la nilo, khatia pekchhuah a nihloh apiang khan *penal interest* chawi a ni zel a, kumina Supplementary Demand kan en chuan, “LAD hian a huna fund an pekchhuah loh avanga a pung an chawi vaibelchhe 141.13 a awm” tih kan hmu a. Sorkar tan sum a hek a, chubakah VC ten an sum hi an lo hmuh zung zungloh hian development a ti khawtlai a ni. An ta a ni a, central sorkar-in an tana a rawn pek a ni. He kan sorkar hi chu Dak-In ang lek a ni, “ni 10 hnuah pechhuak zel rawh u” tih a ni a, zawm a harloh tehlu nen, henge hi chu chhuhsak, tihsak tawhlo ila a tha hlein ka hria.

Tin, hmannah ka sawi zawk tawh a, Keifang-ah VC-ten pass lem siamin compensation lak teuh an tum a, chutah chuan thubuai a awm a, *ombudsman* Pu H. Laizika'n, ‘an lo diklo ngei a ni’ tih a finfiah a, ‘he VC hi dissolve ni rawh se’ tiin finding a siam a, mahse, vawiin thleng dissolve ala ni lova. Thil tidiklo tute kan mi leh sa an nih avanga kan hum zel dawn anih chuan, engtikahmah kan ram hi kan chingfel lovang a, that lohna zawk hi a pung zel ang tih a hlauhawm khawp mai. Hei hi a nihna tur ang taka action lak ni se ka ti a ni.

Tin, Supply lamah hian ka sawi duh chu, open market atanga buhfai kan lei dawn hian tender te, ‘advertisement’ kan tih ang chi hi kan chhuah ngai em? Kan duhzawng mi kan be ru a, (ti mai ila) kan va sawihmuh a, chung mite chu kan supply tir mai thin niin a lang a, heath hian competition a awm em tih hi kan Minister hian rawn react se ka duh hle a ni. Tin, ‘bukna hi a diklo’ tih hi kan pha tur a niin ka ring lova, kan chartin a dik lova, kan cubic lung a dik lova, engmah hi a dik lova, chumi siamtha thei sorkar chu Mizoram hian a mamawh a ni. Chuvangin, tumruhna nen, *political will* nen tih a ngai a, buhfai atang hian kan tan pawh a dik ka ring a. Chumi ti tur chuan weigh-bridge hi a pawimawh a ni tih vawi tam tak he House-ah hian ka sawi tawh a, weigh-bridge hi (kan privatize hma chuan) an hawlh chhe zel, an eiruk duh avangin. A system hi a pawimawh a ni. Chuvang chuan privatise ila, retailer ten kudam atanga an rawn lak hian a buk dik phawt rawh se, sawta tanga a dikloh chuan helai, a lerah a tidik theih tawhlo tih hi vawi tam ka sawi tawh thin a. Hei hi ngaihpawimawh nise, “hetiang ti duh, ti ngam, ti thei sorkar hi Zoram hian a mamawh a ni” tih ka sawi duh a ni.

Tin, Forests & Environment-ah hian ka han kal leh ang a. Pu Speaker, tunhnaiah Ministry atangin kan sorkar-in lehkha a dawng a, “kan thing *water-marked transit* kan pek thlap te pawh checkgate-ah police ten pawisa an lo chawitir thin” tiin Ministry-in kan sorkar-ah a rawn complaint a, a zahthlak hle a, a mualpho thlak hlein ka hria. Hei hi chu Department-in an lo enfel tawh pawh a ni maithei a, ka ha sawi duh reng reng a ni.

Tin, tunhnaiah Tuirial Hydel Project-a compensate dawng duhtu tena thubuai an kalpui zelnaah khan Guwahati High Court (Single Bench)-in 27th January, 2021 khan District Council hunlai atanga kan riverine forests lui 17 leh Aizawl leh Silchar inkar *road-side reserve* te min cancel sak kha a ni a. Hemi chungchangah hian kan Chief Secretary hovin meeting an nei a, 'hei hi appeal tur a ni' an ti a, a hnu lawkah kan Chief Minister hovin committee an nei ve leh a, 'challenge tur a nilo' tih a ni thung a.

Tichuan, "hemi aiah hian Mizoram Protection of Rivers Act hi siam mai ila, tin, restricted area hi siam bawk ila, Revenue Deptt-in Tuirial-a compensate la turte assessment lo siam rawh se" tih a ni ta a. Kha kha eng thleng nge tunah hian kan thlen tawh, assessment kha siam a ni em?

Tichuan restricted area-a puanna *notification* pawh GAD atang khan pekchhuah a ni a, pass pawh 'renew phal a ni' tih kha a ni ta vek a. Mahse, a hnuah Sakawrtuichhun vela compensate la tur ten an khinna kal zelah khan, Guwahati High Court khan a hnawl leh ta a, District Council hunlaia kan reserve forest chu a ngaia tundin tunah hian a lo ni leh ta a. Chuti a nih leh si chuan, a hmaa min paihsak nia kan hriat laia sorkar-in hmalak a tumna chi hrang hrang eg. compensate pek, restricted area-a puan, Protection of Rivers Act 'promulgate ila' tih zawng zawng kha kalpui zel a la ni nge, a tawp ve nghal ta" tih leh, engtin nge kan kalpui tih ka zawt duh bawk a. Kha kha windup-naah min rawn hrilhfiah thei se ka lawm khawp ang. Ka lawm e.

SPEAKER : Aw le, tunah chuan Minister zahawm tak Pu TJ Lalnuntluanga, kan sawihonate rawn wind up-a sawifiah ngai a tihte rawn sawifiaha, a demand-te House-ah pass rawn dil nghal turin ka sawm e.

PU TJ. LALNUNTLUANGA, MINISTER: Pu Speaker ka lawm e. Vawiinah hun tha tak kan nei tlang leh a, kan MLA zahawm tak tak ten kan demand-te min phurpui niin ka hria a. Department hrang hrang pawh sawitu an tha tlang a, churang chuan kan react kim loh pawh a awm mai thei a, a remchang chin chin react kan tum ang a. Kan lo tih kimloh palh a awm leh uluk takin kan officer-te pawhin an lo chhinchhiah tho a, nakinah la inchhui zui theih dan te pawh a awm turah ngai ila a tha awm e.

A hmasain Law & Judicial Deptt. chungchangah khan lawmthu sawina leh kan hnathawnate han fakna kha a rilian khawp mai a. A pawimawh zual tihlan ka han duh chu Lawngtlai East leh West bialtu zahawm tak tak ten an zawhna, 'Sawlaiah session power hi awm ve thei se' tia an rawn zawhna kha, a thu chu pakhatat 'FTC (Fast Track Court)' an rawn hmang a, pakhatat criminal lian zawkte ngaihtuah thei turin awm thei ve se an tih kha, 'Lawngtlai-ah hian case engzat nge awm, pending engzat nge' tih te kha zirchian a ngai a. Tin khami va vil tur khan a case dinhmun kha High Court nen

pawh sawiho a ngai a. Tun dinhmuna kan hriat chinah hi chuan case hi a la tlem khawp mai a, District Judge cadre chin han thutna tur chuan. Chulai chu ‘zirchian ngai lai a ni e’ tih kha ka chhanna ni se.

Tin, kan MLA zahawm tak Pu Lawmawma Tochwawng zawhna, “Lunglei Court building hi eng tika sak tan theih tur nge, hma engtikah nge min laksak theih ang” tih kha, Member zahawm tak Pu Tanpuia khan a rawn zawt tel bawk a. Lunglei hi kan hriat tlan theuh angin, khawpui hlun, khawpui hmasa a ni a, mi an developed tawh a, in leh lo an inbengbel nasa tawh a, hmun ruak a lo tlem em em mai a. Bul tan lai khan kan zawng nghal a, a hmun kan hmuh turte pawh a to em em mai a, sorkar atanga hmun lei tur te leh a scheme atanga han lei turin kan fund neih dan te nen a inmil tawh lova, a hmun leina te a tel thin loh avangin. Chuvangin kan Chief Minister zahawm tak hnenah te kan thlen a, ama hovin hmun kan han zawng kual a. Kan District Court bul chiahah sawn Trade & Commerce building a awm a, chu building chu min siamrem sak turin Trade & Commerce Minister zahawm tak Pu Thangtea kan dil a. An department-in ngun takin an han ngaihtuah a, “hmun danga kan lo insak ve leh theihna turin sum min pe ula, helai hi chu kan inhlun chhawng mai dawn nia” tiin thu kan inthlah a. Tunah hian Finance lamah leh kan hotute hnenah dilna kan thlen mek a, a hlawhtlin chuan Lunglei District Court saw tun aia changtlung zawkin kan tih theih kan ring a ni.

Pu Vanlaltanpuia zawhna, crypto-currency zirchianna kha chu Finance Deptt. lamte nena kan la tih turah ngai ngai ila, Mizoram-a thil thlang thar tur a ni a. Engpawhnise, ‘a tul angin department kan inring e’ tih kha Law & Judicial Deptt-a ka chhanna ni se. Ka lawm e.

Law & Judicial Deptt-in kumin 2021-2022 chhunga kan hmalaknate han sawi ila. Law & Judicial Deptt. hian hna chi hrang hrangah mawhphurhna a ngah hle a. The Govt. of Mizoram, Allocation of Business Rules, 2019 chuan subject hrang hrang 18 lai Law & Judicial kutah a dah a. Heng a hnathawh zingah hian Mizoram sorkar department hrang hrangin dan lam thil Bill, Rules, Regulation leh a kaihhnawihite an siam reng reng an lo endik vek zel a. Siamthat ngaite an lo siam tha a, legal advice te an lo pe bawk a.

Law & Judicial hian kan Law Court-a case hrang hrang kan neihte para-wise comment te, contract-a *deeds* chungchangah te, application case chungchangah te, Memorandum of Understanding, Memorandum of Agreement an siam tur te department hrang hrangin an siamte uluk takin an enpui a, legal advised, opinion, comment, clarification te an lo pe thin a. Supreme Court, High Court, Tribunal leh Court hrang hrang tea thubuai Mizoram sorkar-in a neihte lo monitor tu a ni a. Mizoram sorkar aiawh a Prosecutor te lo viltu an ni bawk a ni. Law & Judicial-ah hian hriatthiamloh awm thei a ni a, kan budget passed chungchangah *Charge* leh *Voted Account* kan nei a, hei hi

tuna kan inenkawl dan a ni a. Drawing & Disbursing Officer te neiin Secretariat leh Directorate function hna hi kan thawk bawk a ni.

Tin, Mizoram Law Commission te, Marriages Office te, Registrar of Marriages te, Court awmna hmunah Govt. Advocate te, Fast track Office pathum Aizawl leh Champhai-a mite hi direct-in an enkawl a ni. Tin, Law & Judicial Department-ah hian Cadre pahnih Judicial Service leh Legal Service te kan enkawl a. Guwahati High Court Aizawl Bench, District-a Court pathum leh a hnuiaia Court hrang hrangte leh Mizoram State Legal Authority te tan Nodal Department kan nihna angin kan thawk bawk a ni. Tin, Infrastructure Department of District and Subordinate Court te pawh hmalakna hian a kalpui bawk a ni.

Tunah hian Court building sak lai mek a awm bawk a ni. Mizoram Department zawng zawng hnuiaia Procurement Board, Vehicle Purchase Board, Suspension Review, State Level Committee-ah te member niin Purchase Board Meeting-ah an tel thin a. Tin, Dan lam siamna meeting reng rengah Law Department aiawhte sawm tel an ni thin a, heng hna zawng zawng thawk tur hian officers te leh staff-te pawh an indaih tawk lo hle a. Tunah ngei pawh hian Law & Judicial Department-a kan Joint Secretary hmun dangah secretary hna a chelh a ni. Tarlan ka han duh chu - Law & Judicial Department-a kan officer leh staff-te hi an thawk rim em em a ni tih hi mipuiahan puanchhuah ve hrim hrim ka duh a ni. Kan Member zahawm tak takte pawh hian kan thawhna an rawn appreciate tlang niin ka hria a, ka lawm khawp mai. Heti chung hian Law & Judicial te chuan hma kan la chho zel a, kum 2021-2022 chhungin kan hmalakna hengah te hian hmuh a ni a. Mizoram sorkar in Administrative a siam pun chhoh zelnaah Judicial District pawh siam thar a lo ngai ve a, Aizawl Judicial District atangin Champhai Judicial District siam thar a ni a. He Judicial District thar hian Champhai leh Khawzawl Administrative District pahnihte a huam a, Champhai awp tur hian sorkar chuan District and Session Judge post pawh a siam a, tunah hian judge pawh hian a hna a zawm fel tawh a ni.

Tin, State Legal Authority hnuiaia awm thin ‘Alternate Dispute Resolution Center pawh tunah hian building sak zawh tawh a ni a, Dt. 7.1.2022 khan hawn fel a ni tawh a ni. Department-in kan mamawh tak mai Law Officer post pahnih hnawhkha a ni a, Addl. District post pakhat siam belh a ni a, fill-up turin hmalak mek a ni.

Hmeichhiate leh naupang te chungah hleihlenna a hluar zel avangin Supreme Court leh Central sorkar thuin Mizoram-in Fast-track Special Court pathum Champhai-ah pakhat, Aizawl-ah pahnih a hawng thar a. Kum 2021 chhungah khan heng court-ah te hian case 93 registered a ni a, heng zinga 49 hi chin fel tawh a ni. Mizoram mipuite tan leh sorkar-in a hman tangkai theih zelna turin kan sorkar document hrang hrangte

dah khawmna ‘Mizoram Court’ hi a bua siam chhunzawm a ni. Hun reilo teah tuna kan buatsaih chin hi peih fel kan tum a ni. Fund kan dil chawp reng thin “Victim of Crime Compensation Scheme” chu budget head-ah dah thar a ni a. Kumin hian cheng nuai 100/- budget-ah kan lo dah nghal hi lawmawm kan ti a, kan Chief Minister zahawm tak chungah kan lawm hle a ni. The Mizoram Victim of Crime Compensation Scheme, 2011 hman anih atangin misual thiltih avanga kawng hrang hranga tuartu ten *zangna-dawmna* an lo hmu tawh thin a, tunah pawh hian pek mai tura tihfel eng emaw zat a awm tawh a ni. Tin, fund hi central atanga reimburse theih a ni.

Law & Judicial chungchang kharnaa ka sawi duh chu, kan State Judicial Service ngeiin Guwahati High Court-ah Mizo judge kan nei thar leh ta a, Pi Marli Vankung a ni a, ani hi mizo hmeichhia zingah High Court Judge hmasa ber a ni a, a hnam ang pawhin kan lawm hle a ni.

Demand No. 12 - Parliamentary Affairs Department hi mi 6-in an rawn sawi ri a. Parliamentary Affairs Deptt. hian Ex-MDC (MRC) te hnenah pension leh family pension te a sem chhuak thin a. Kum 2021-22 atan cheng nuai 71,38,101 kan hman tawh a ni. Parliamentary Affairs Deptt-in *Guidelines of Constitution Procedure of Consultative Committee* a siam angin, sorkar Deptt-a a thei theiin an thut tlangpui thin a ni. Tin, Assembly Golden Jubilee Pathian kaihhraina hnuaiah kan thleng thei hi kan lawm hle a, rorelna dik leh zahawmtak a awm theihna turin Member zahawm tak tak te leh Assembly Sectt. thawktute leh Parliamentary Affairs Deptt. thawhhona te a tha a, lungrual taka kan thawhhona zarah hetiang hun kan thleng thei hi kan lawm hle ani. Kan Speaker zahawmtak kaihhraina hnuaiah committee peng hrang hrangte hian Golden Jubilee hlawhtling taka hman theihna turin an phur tlang hle a. Special Session te pawh koh a ni dawn a, Member zahawmtak takte pawhin hei hi ngai pawimawh tlang ila a tha awm e.

Pu Speaker, Demand No. 36 - Environment, Forest & Climate Change Deptt. hi mi 21-in an rawn sawi a, react vek dawn chuan hun a duh rei dawn a, a tul zualpui kan han tilang leh ang a.

Member zahawmtak Pu H. Biakzaua zawhna – “Phawngpui National Park hi District Council kutah a enkawl hna hi a awm thei tawh em” a tih kha, State Board for Wildlife hi meeting tawh a ni a. State kutah dah a ni a, “hei hi zir chian leh mek a ni” tih kha ka rawn hriattir a ni e. Kan Member zahawmtak Pu Lawmawma Tochwawng in ‘Lunglei Botanical Garden an siam sak thei em’ tih hi, project atangin siam kan tum a ni tih kha ka chhanna a ni a, *Nagar Van* scheme, khawpui chhunga boruak kan neih theihna turin hmun a awm chuan tih kan tum bawk a ni. Vairengte bialtu zahawmtak Pu Lalrinsanga Ralte zawhna kha, ‘Botanical Garden hi Vairengte-ah pawh siam kan tum

bawk a ni' tih kha ka chhanna ni bawk se. A dangah pawh hian a ri deuh neuh neuh a, Botanical Garden te, Tourism te hi, kan lui tui catchmen area-ah te hian tih kan tum lai mek a ni a. Heng hi a tul ang zelin kan lo enzui zel dawn nia.

Nichin khan Member zahawm tak Pu Lalchhuanthanga khan, 'Mau hi Forest Deptt. chan atangin Horticulture Department in a chhuh daih mai a, hei hi engnge ni a awmzia' a rawn tiin ka hria a. Hei hi thil awmzia chu, central sorkar in a rawn tih zawk a ni a. Mau hi 'grass' tiin an rawn hrilhfiah tawh avangin, keimahni Forests Department atang khan lak chhuah zawk a ni e tih kha ka rawn react theih dan ni se la.

Member zahawm tak Pu Vanlalhlana khan, 'Riverine Forest Reserve' tih leh 'Roadside Forest Reserve' tih te hi min han hrilhfiah se a rawn ti a. 'Riverine Forest Reserve' leh 'Roadside Reserve' te hi a la awm reng a, amaherawh chu, helai kan State kalphungah hian kalphungloh, zawh fuhloh laklawh tawh hi District Council hun lai atangin nge ni ang ka hre lo va, a lo thui tawh khawp mai a, pass lo nei theite an awm zel mai a, hengah hian zirchian ngai tak mai a awm a, 'kan Reserve Forestry kha chu a la ngai reng a ni' tih kha ka rawn react theih dan ni leh mai se a tha awm e.

Tin, Member zahawm tak Pu Ngunlianbunga zawhna - Hmunnuam khuaa Sai chil hlum compensation chungchang hi khulaiah kan MDC zahawm tak 'Pu LD-a' kan ti mai a, min enpui reng a. Hmanniah pawh a rawn zawt a, sawlam bial lo ni bawk nen, a rawn veipui khawp mai a. Hma a rawn la deuh reng a. Hei hi 'State Board for Wildlife'-a la rel leh tur a ni a, a tahtawla chhawpchhuah thin a ni a. Tin, khalaiah khan Sai avanga harsatna an tawh dan te kha, a area leh 'khawilai hmuna chil nge a nih, wildlife sanctuary chhunga chil a ni em' tih te kha zir chian ngai lai te a awm bawk a. Kha kha, 'State Board for Wildlife-a la rel that leh tur a ni' tih kha ka rawn react theih dan ni se la a tha awm e.

Tin, Member zahawm tak Pu Zodintluanga sawi – Riverine Reserve Forest chungchangah harsatna kan tawhte a rawn sawi a, hei hi kan Group Leader pakhat Pu Lalduhoma rawn zawhnaah khan a tel bawk a, a kawpin chhang mai ila. Hei hi High Court a thu kal lai a ni a, sawi chhunzawm a rem lutuk lova. Tin, 'assessment siam a ni em' tih te phei kha chu Forest Deptt. chan ni lovin, khalaia an thil tum nia a sawiah khan amahin a rawn sawi Chiang tawh tho a, GAD lampang chan tur niawm tak a ni a. Chuvang chuan, hei hi subjudice a nih avangin kha kha ka rawn react theih chin chu ni se a tha awm e. (**Pu Lalduhoma:** Principal Bench khan thutawp, (judgement) kha a siam tawh si a, kha mi hnuah khan engtin nge subjudice a nih theih dan kha hriat kan va duh ve. Khing (challenge) leh an awm tihna nge ni, engnge ni kha kha?)

Ni e, khalai kha hriatthiamloh palh te pawh a awm a ni mai thei a. Tuna Riverine Reserve tibotu kha chu High Court (Single Bench) a ni a, Tunah hian Division Bench-ah putlul leh mek a ni e.

Tichuan, Demand No. 36 - Environment, Forests & Climate Change Deptt. chungchanga kan hmalakna han sawi leh ila.

Mizoram hi Pathian-in ramngaw leh nungcha hausaknaah mal min sawm nasa hle a. Mipui ten kan ramngawte humhalha, kan ramngaw atanga tangkaina kan neih theihle leh kan economy te titha thei turin leh ramngaw tichhe si lovin hausakna kan hman tangkai theihna turin tunlai thiamna hmangin Forests Department hian ram kan enkawl mek a. Chu mia tan chuan Central Scheme hrang hrang - National Mission for Green India, National Afforestation Programme, National Plan for Conservation of Aquatic Ecosystem, Integrated Development of Wildlife Habitat, Project Tiger, Forests Fire Prevention & Management Scheme leh a dangte hmangin hnathawh thin a ni a.

Environment, Forests & Climate Change Department hi kan khawvel hun lo kal zel tur tana hnathawktu kan ni tih hriain thawktute, a te ber atanga a lian ber thlengin thahnem an ngai hle a. Department hmalakna hrang hrangah thawktute chungah vawiinah hian lawmthu karawn sawi duh a.

A hmasa berah chuan, ‘National Mission for Green India, Green India Mission’ tia kan hriat lar chungchang hi han sawi ila. He Scheme hnuaiah hian rambua (depleted forests) tihngaw lehna tur te, tlang ram loneih avanga ram chhe tawh siamthat hnathawh te, tin, kum 2021-2022 chung hian thil chhinchhiah tlak tak a awm a. Kum hmasa lama hnathawh zawh theihloh te chu a vaia thawk zo turin APO-ah telh a ni a, hei hi Govt. of India-in min pawmsak tawh a. Kum 2022-2023 APO-ah he mission tihchak leh zual nan 2,500 hectare-a zau ramngaw siamna tur ruahman a ni bawh a. Kan State-a ram ngaw siamthat hna kan thawhna bulpui ber ‘National Afforestation Programme’ leh ‘Green India Mission’ hi tunah hian chhunfin a ni rawh nghe nghe a. Ramngaw pawimawh zia leh ramngaw siambelh a tulzia inzirtirna atan *Green Mizoram Day* chu kumtin June, Ni 11th-ah hman thin a ni a. Kum kal ta-ah khan thingtiak nuaikhat lai kan semchhuak a ni.

Tichuan he Green India Mission hnuaiah hian kan tlangram loneih kan vei avangin department-in hma chi hrang hrangin kan la a. Chutianga hma kan laknaah chuan huan-thlai nghet neih dan kan buaipui a. Chutah chuan IC mode te buaipuiin tunah hian Champhai lamah sapthei chinna ramngaw thiah zel anih lohna turin kan buaipui mek a. Forest Minister meeting kan neihpui tum kum 2019 khan central kan zuk kalin kan sawipui a, chu kan sawihonaah chuan Food Processing Ministry dawr turin min ti a. Anni kan han dawr khan a funding pattern a lo tam deuh avangin NEC

lama kal dan tur leh hmun danga kalpui dan tur kan han buaipui leh a. A bultanna turin ‘Champhai-ah sapthei huan hi kalpui ila’ tiin kan rel a. Horticulture changtu kan Chief Minister zahawm tak hnenah kan thlen a, anni department lamin a chingtu tur ‘pilot project atan’ tiin forest lampang ngaihtuahna te pawh a ni ang, duhsak takin Ngur leh Mualkawi-ah SEDP hnuaiyah bultan turin min lo ngaihtuah sak a. Tichuan, ‘a khawlte pawh ngaihtuah leh ila’ kan ti a, Society kan din a. Society hnuaiyah khan Winery din a ni a, tuna Grape Winery din anih ang hian, Pu Chunga, grape winery enkawltu khi hetiang juice lampang siamna lama experience lo nei tawh a ni a. Tichuan Champhai-a SDO (PWD) Pu Jonathana khan a project leh estimate a siam vek a, Champhai lam atanga buaipui tur anih avangin, ‘Aizawl lamah eng department nge ni ang, Horticulture Department nge’ kan ti a, a awlsam theih dan, ‘GAD lam chan turin, DC kaltlangin ti ila’ kan ti a, DC lamah kan thehltu ta zawk a. Tichuan a sample te kan thehltu a, chung chu NEC lamah kan kalpui leh a, NEC-a kan kalpuinaah chuan kan Chief Minister zahawm tak kan ngen a, Planning lam changtu Pu Rammawia te kan ngen bawk a. NEC-ah priority-a min dahsak turin kan ngen bawk a.

Tichuan NEC meeting-a tel kan in-charge Pu Chunga leh Champhai DC te kha online virtual meeting an neih khan an rawn pass sak a. Forest Department anga bul kan tanna leh hmalakna, mipuite eizawna ngeInghet ni bawk, kan ram thiat zel lova hmalakna chu a takin a lo lang zel dawn ta a, lawmawm kan ti hle a ni.

Tin, Compensatory Afforestation Fund Management & Planning Authority (CAMPA) hnuaiyah hian ramngaw tih hausakna te, venhimna leh enkawl nan te tangkai takin he CAMPA fund hi hman thin a ni a. Kum 2021-2022 ah hian advance work 29.96 hectare a zau ruahman a ni a, Creation of Plantation atan 1,303.78 hectare a zau ruahman a ni bawk a. Mamit District tan 2,000 hectare a zauvah catchment area *treatment plan* ruahman a ni a. Hei hian kan lui tui leh kan vei em em tuihna tipungin awmzia a neih ngei kan beisei a ni. Sorkar kumtharah pheih chuan Mizoram-a luitui kang chat lek lek tawhte hi catchment area *treatment plan* hmang hian hmalak kan tum a. Tuikhuah kamah te a rem dana zirin hmalak kan tum a ni. Kan luituite a hna a that zawk theih nan department chuan hmalak zel kan tum a ni.

Tin, kan State hian ramngaw (protected area) kan nei a, Tiger Reserve – 1; National Park – 2; Wildlife Sanctuary - 8 te kan nei a ni. Ramsa leh sava mang lek lek tawhte, Clouded Leopard (Kelral) te pawh kan la nei a ni. Dampa Tiger Reserve-ah hian sq. km za zelah Kelral 5 awm anga chhut ani a. Tin, he House zahawm taka ka sawi duh chu Dampa Tiger Reserve hi ‘tiger’ tih hming pu si hian hun reitak chung kha sakei hi hmuh a ni tawh lova, fund chungchangah te kan buai lek lek hman a. Vanneihthlak takin May 16, 2021 khan Dampa Tiger Reserve-ah hian sakei hi an hmu a, kan lawm hle a ni. Tichuan, rampum huapa sakei nei state zingah Mizoram chu ziahluh kan ni leh ta a.

Thawktute hlawh, thawk khat laia lo tang deuh pawh kan finance changtu Chief Minister zahawm takin Mizoram sum atang te pawhin min siamrem sak lai te a awm a. Hei hi central lam mawh anih avangin, December thlaa Delhi kan kal khan Tiger Reserve-a thawktute hlawh thla 6 dawn lo pending tawh te kan zuk nawr a, an niin an rawn tih nghal tur thu te min lo hrilh a. Reilo te hnuah khan hlawh te an la thei ta niin kan hria a, kan lawm khawp mai.

Tin, National Park leh Wildlife Sanctuary te enkawl nan hian central sponsored scheme - Integrated Development of Wildlife Habitat hnuaiyah sum hmuh thin a ni a. National Park leh Sanctuary te hi Management Park anga enkawl mek an ni a, nungchate an him theih nana venhim te, mipui mimir zirtir bakah department tha tichak turin theihtawp chhuah a ni a, ramsa leh nungcha hmanga sumdawnna titawp turin nasa takin hna a thawk a, mipuite hnenah zirtirna pek a ni bawk a. International border a awm kan nih avangin Dan khap thil, ramsa leh nungchaa sumdawnna kal thinte titawp turin theihtawp kan chhuah mek zel a ni.

Tin EF & CA Department hian kumtluanin mipui hnenah zirtirna kan pe a, sikul leh college-ah te zirtirna kan pe bawk a. Hmun hrang hrangah ‘Silai-tun’ tih thawm te kan hria a, ka thianpa Champhai-a mi pawhin hmanni ah min rawn hrilh a, ‘ka ramvah silai kha Forest Department changtu i nih avangin ka tung ta’ tih min rawn hrilh a. Ka lawm khawp mai, kan awareness-in rah tha chhuahin awmzia a nei zel turah ka ngai a. Tin, nasa zawka tan kan lak zel pawh a pawimawh awm e.

Tin, Aizawl Zoological Park chungchang hi han sawi leh ila. Mizoram-a *Zoo* kan neih chhun hi ramsa te chenna hmun tha tak a ni a. Tunah hian sa hel ei chite, hnim hring ei chite - zawng, ramar, vahrit, rul leh ramsa chi hrang hrang kan enkawl mek a. Satel (Burmese brown-tortoise) te, vavu te, hauhuk te leh zawng chikhat (macaque) te chu hlawhtling taka *conservation breeding* kalpui a ni a. Heng Conservation Breeding center atang hian ramngaw mang lek lek tawh ramsate inthlah pun tirin ramsate a tul ang zela chhuah leh thin a ni. Aizawl Zoological Park-ah hian thil chhinchhiah tlak tak mai, Zofate kan hnam chanchina bet tlat Sapui kan neih, a hming pawha kan lam ngam thinloh, Upaten kan zah em em, ‘Sakei’ chu Pathian zarah kan nei ta a, kan lawm takzet a ni.

Aizawl Zoological Park hi tihchangtlun zelna turin hma kan la a, tunah hian Botanical Garden te siam kan tum a, tlawhtute tana hmanraw changtlung zawk siamthat mek a ni bawk a. Kan Chief Minister zahawm tak hova ‘State Board for Wildlife’, Ni 11.11.2021-a thukhawmin, Aizawl Zoological Park hi a area tizau turin a thuphungin an lo pawmpui tawh a. Tunah hian hma kan la mek a, hei hi kan tihzauh theih chuan

ramsa, Mizo ina kan hriat dangte leh sa thar deuhthe pawh la dah theih turin leh entute mit la thei turin, mit titlai thei turin la dah belhzel te pawh kan tum dawn a ni.

Tin, wawiina ka han sawilan leh duh a chu, Pu Speaker, helaiah hian Zoo Policy hnuaiah hian Sahuan te hi sorkar tana revenue thawkchhuak ve tura tihna a awm lem lova, chuvangin sahan te hi revenue target siamsak an ni ngai lem lova. Zoo hian a tum ber chu ramsa mang mai tur humhalh leh inthlah punna, ramsa inthlahchhawn dan leh an ei leh in turte uluk taka zirchianna, Ramsa humhalh pawimawh zia mipuite hnena zirtirna peka hi kan thil tum lian tak a ni a tih kha wawiinah kan sawilang leh hrim hrim duh a.

Tin, a dawt lehah chuan, nungcha humhalhna kawngah hian kan dil, kan wetland te hian pawimawhna nasa tak an nei a, mihring leh nungchate mamawh phuhurutu pawimawh tak an ni a. A pawimawhna hriain Mizoram-a dil lian pahnih - Pala Tipo, Siaha District-a awm leh Tam Dil chu 'National Plan for Conservation of Aquatic Eco-system' hnuaiah enkawl mek a ni a. Pala-wetland hi tun dinhmun aia changtlung leh lian zawk ramsa *site*-a puang turin tunah hian hma kan la mek a ni. A hlawhtling anih chuan Pala-wetland hmangin kan state hian bung thar kan kai dawn a ni. Tin, Forest chungchangah hian kan sawi thina chu, a *man* leh *humhalh* pawl ringawt nilova, 'eizawna tur atan he department hian hma engtin nge a lak ang' tih hi ngaihtuahna lian pakhat a ni bawka. Chuvang chuan, *conservation-base livelihood* kan eco-system te venhim anih rual hian National Plan for Conservation of Aquatic Eco-system hnuaiah Tam Dil- wetland khua te leh a chheh vel khuate eizawna ngialnghet an neih theih nan *sustainable resource development and livelihood improvement* an neih theih nan Environment, Forest & Climate Change Department, Mizoram chuan tanpuina pe turin ruahmanna hetiang hian an siam a.

Contour head-row Farming with Banana and Pineapple hnuaiah balhla leh lakhuihthei chhungkaw 106 tana eizawna bul tan theihna turin cheng 50,000/- theuh an tan hian dah a ni a, a vaiin nuai 50 dah a ni. Tin, Farm-base and Skill-base Micro-enterprise, kuthnathawka eizawng ten an thiam thila an eizawna tur bul tanna turin an hmanrua, entirnan: mistiri an nih chuan an mistiri bungrua te, tin, dawr-te siam tur an nih chuan peti-shop dawra an thil mamawh ang chi te khangtiang ang bultanna tur atan cheng 50,000/- hu theuh, a vaiin nuai 103 tunah hian kan dah bawka. Hei hi chhungkaw 100 tana buatsaih a ni a, kan session zawhah hi chuan programme te buatsaih theih mai kan inbeisei a ni. Chutiang bawka chuan Siaha district-a Pala-wetland chhehvel khuate eizawna ngialnghet an neih theihna turin Environment, Forest & Climate Change Deptt, Mizoram chuan tanpuina pe turin ruahmanna hetiang hian an siam a ni. Micro-enterprise chhungkaw 17 tan cheng 50,000/- hu theuh a ni a, a vaiin 8.5 lakhs dah a ni a, a dawng tur hian hmeithaite duhsak bik an ni ang. Horticulture chhungkaw 50 tan

ram hectare 100-a zau huan enkawl saka, lo-vah atanga tanin an hmalak hu ang zela beneficiaries-te sum pek tum zel a ni. Tin, Leilet chungchangah Phura-ah kan va kal a, leilet phai ruam tha tak mai kan va hmu a, hei a bialtu Pu Rokhaw hi kan han sawm a, a remchan loh lai tak kha a ni a. Han kalho kha kan chak khawp mai a. Sawlai Phura phairuam saw Zoram tana kan intodelhna tur pawimawh tak mai a ni a. Chuvang chuan hei hi kan phur hle a, sawlaia irrigation siamsakna tura tan tui lakna leh tui kawngte siam turin tunah hian kan inbuatsaih a, tin, water distribution tank te pawh kan buatsaih mek a ni tih kha kan sawilang ve leh duh bawk a ni.

Tin, Pu Speaker, khawpuia chengte tana chenna tlak, *khawpui hrisel leh boruak tha* siam hi kan sorkarin a ngaipawimawh em em a. Khawpui chhunga boruak tha kan hip theihna turin, khawpui chhunga ngaw siamna, Nagar Van Yojna scheme hi municipality hnuaiyah phal a ni a, nikum hmasa lamah khan kan Forest Training Centre leh PUC te tangkawpin, khulai area khu *Aizawl-Chuap* ni thei turin kan inbuatsaih a, chumi project thenkhat chu kan kalpui a, hei hi central pawhin min rawn pawmpui tawh a, hma lak chhoh mek a ni. Hei hi Mizoram tan, kan khawpui lian tan pawha la tha zel tur anih avangin, ‘hmun awm dana zirin hmalak chhoh zel a tha dawn e’ tiin central minister-te hnenah kan thlen leh a. Hei hi municipal area-ah chauh kan tih hi, ‘a dangah pawh kan duh ve a nia, a tangkai a ni’ tiin leh, ‘tunah phei chuan kan notified-town area-ah te hian reserved area hi kan neih vek a, forest hi kan ngaipawimawh a ni’ tih thu te kan sawi a.

Hetih lai hian Lunglei Municipal kan la nei thei lova, kan la pass hmanloh lai a ni a. Chuvang chuan notified town-ah te hian he Nagar Van scheme hi a tih theihna turin finance lama min rawn pui turin kan dil a, December 2021, Delhi kan zuk kal khan minister te kan zu hmu a. He Nagar Van scheme hi notified town-ah chuan finance an rawn remtih thu an rawn sawi a, chawpchilh takin a pioneer project atan Champhai-ah bul tan ila kan ti a, hei hi min rawn phalsak nghal bawk a. Hetiang anih chuan kan rama notified town teah hian, a hmun kan nei anih chuan project siamin he fund hi kan zuk lachhuak thei dawn a ni. Tichuan, he project hi alo hlawhtlin chuan khawpui chhunga chen tinuamin hriselna kawngah pawh mipuiten kan tangkaipui ngei kan beisei a ni.

Tin, zirlaite, sikul naupangten thing leh mau tangkaina an lo hriat zual zel theih nan school eng emaw zata din turin thing chi hrang hrang kuitiahna hmun *nursery project* kan ruahman mek a, hei hi central-ah kan dil mek a, min pawmpui turin beiseina sang tak kan nei a, thu tha takin kan inthlah a ni.

Screening Committee, Ministry of Finance, Govt. of India chuan Mizoram-ah a vawikhatnaa tan Environment, Forest & Climate Change Deptt. project siam - Biodiversity Conservation & Forest Enrichment Project chu JICA rolling plan hnuaiyah min

pawmsak a. He project hnuaiiah hian geographical information system hmanga ramngaw siampun te, *bamboo-setum* buatsaih te, tuihna humhalha, tuihna thar siam leha luikam vela catchment area treatment plants siam te, Aizawl Geological Park tihchangtlunna atan botanical garden siam te, eco-tourism hmun hrang hranga siamna atan te, thing leh mau hmanga hmanraw siam, zawrh leh hralh dan turte he project hnuaiiah hian a awm a ni. He project hian mi tam tak eizawna leh inhlawhna tur thar a siam theih dawn niin kan hria a, kan phur hle a ni.

Thing leh mau atanga siamchhuah thil, kan state atanga kan tharchhuahte hlu lehzuala siam anih theihnan tunah hian hmalak mek a ni a, heta tan hian forest-based economy tihchangtlunna turin kan ram thing dinhmuna zirin saw mill license 19 pekchhuah tawh a ni a, heng zinga 7-te chuan hna an thawk tan tawh a ni.

Kan ram hi Indo-Myanmar *bio-diversity hotspot* chhunga awm a ni a, kangmei laka kan him theihnan central sponsored scheme, Forest Fire Prevention & Management Scheme atangin hna thawh thin a ni a, kum 2021-22 chhunga tan cheng nuai 121 central ministry-in tunah hian min rawn pawmsak a. He scheme hnuaiiah hian meilam sialte enkawl chhonzawmna tura tan Fire-watcher rawihna tur sum dah a ni a, *Fire-Prevention Week* pawh state pumah kumtin kan hmang thin a, *thununloh kangmei* laka kan fimkhurna turin inzirtirna kan nei thar thin a ni. NGO hrang hrang YMA, MUP, Green Mizoram Network, NSS, Self-Environment Association, STAM, Centre for Environment Protection-te bakah pawl hrang hrangte nen lungrual takin department te kan thawk tlang a ni. Kan hriat theuh angin nikum lamah khan Mizoram-ah thununloh kangmei a chhuak nasa em em a, a bik takin Lunglei lamah pheih chuan a kang nasa zual a, thelh a harsat deuh avangin kan CM zahawm takin ngaipawimawhin sum tam tak senna tur mah ni se ruahmanna siam nghalin helicopter te kang thelh turin min tirhsak nghal a kan lawm hle a, hei hian thununloh kangmei chung changah ‘sum tam tak sen ralna a ni’ tih awareness mipuia pawh pe zau zual zawk turin kan ngai a ni. Kan ram hlu tak thing leh mau kan neih leh a chhunga ramsa chengte vawnhimna atan hian sorkarin thehtawp chhuah zel a tum a ni.

Khawvel pum huap sik leh sa danglam zel hi mitin ngaihven a ni a, kan ram pawhin United Nation Framework Convention on Climate Change hnuaiiah sik leh sa inthlak danglam zel tur venna ruahmanna atan ‘nationally-determined contributions’ chu a ruahman fel a, hemi tihlawhtling ve tur hian kan State pawh a inbuatsaih mek a, hemi atan hian kan inbuatsaihna kal zelah pressure cooker litre 3 leh litre 5, cheng 4,500/- man ve ve te kan National Park leh Sanctuary chhehvel mipuia sem turin tunah hian kan ruahman a ni.

Pu Speaker, boruak hrisel tha kan neih theihna turin Environment, Forest & Climate Change Deptt. hmalakna pawimawh tak pakhat, State chhunga boruak hrisel dan te lo tehna atan Pollution Control Board-in hmun 19 laiah *air-monitoring station* tunah hian a bun mek a, hei bakah hian kan luituite a hrisel that leh thatloh endikna hmun 76 lai State chhung hmun hrang hrangah bun a ni bawk. Aizawl khawpuih boruak a hrisel dan te tehna khawl Sikulpuikawn-ah sawn Continuous Ambiance Air Monitoring System tunah hian bun a ni a, staff indaihlo tak chungin tunah hian theihtawp chhuahin kan pollution lampang te pawh hna an thawk mek a ni.

Tin, Pu Speaker, department hrang hrangin kan ram hmasawna turin theihtawp kan chhuah vek a, tunah hian ka han sawilan duh chu - hmasawna a awm dawn hian, thingte maute leh kan nungchate pawhin a tuar fo thin a, chuvang chuan *forest clearance* hi a ngai thin a. Forest clearance ti tur hian dan angin Forest Department kaltlang a ngai a, hei hi department hrang hrangte pawh hian min hriatpuiin, a hnu lama buaina awmlahna turin department kaltlang hian thil buaipui ila, chumi tur atan chuan he Forest Department hi kan inhawng hle a ni tih hi vawiinah ka sawinawn ve leh duh hrim hrim bawk a ni.

Tin, Forest Department kaihnaviha ka thu hnunung atan chuan, Forest Research Centre for Bamboo and Ratan Centre hi Aizawl-ah kan nei a, Bethlehem Veng-ah khuan, hei hi Dehradun hnuai centre 5 zinga 1 a ni a, hemi hi tangkai taka hmang chho turin tunah hian hma kan la a. Bamboo Ratan (cane lampang) te kan rama tangkai zawka kan hman theihna turin scientist-te thiamna hmangin tunah hian kan inbuatsaih a, tunah hian scientist ten an thut chilh mek a. Hei pawh hi tun aia kan la hman tangkai lehzualna turin 'Centre' atang hian 'Institution'-a hlankai a nih theihna turin tunah hian kan inbuatsaih mek a ni. Research Institute-a hlankai anih chuan Zoram mipuite tan economy thar rawn siamchhuak thei turin he FRCPR atang hian beiseina sang tak kan nei a ni.

Pu Speaker, Transport-ah kal leh dawn ila., Transport Department - Demand No. 42 hi member zahawm tak tak 24 tein an rawn sawi a, ka department te an ngaih pawimawhnaah lawmthu ka sawi a.

Member zahawm tak Pu KT Rokhaw rawn sawia hi han react hmasa ila. "Siaha District Transport hmun saw hman tangkai dan te a awm em" a tiha kha, hei hi nikum lama DTO office kan hawn khan kan hotute nen kan tlawh nghal a, 'commercial vehicle terminal atan hei hi buatsaih ila tiin NEC lamah hma kan la mek a ni' tih kha ka react theih dan ni sela. Tin, 'Lomasu-ah lawngchawlina siam ni se' a ti a, hei hi kan kalpui mek lai a ni bawk a. Tunah hian techno-feasibility survey kha kan kalpui mek a, hei hi tender pawh chhuah tawh a ni. Chutiang chuan hmalak kan tum lai mek a ni.

Member zahawm tak Pu H. Biakzaua zawhna - “Aizawl to Lawngtlai MST bus service min tihsak leh theih em” tih kha bus service hi tunlaiin sumo service-te a tam avangin a mamawhtu lampang hi kan han kian deuh a. Amaherawhchu, mimala bus service lo nei duh te an awm anih chuan, permit lo pek kha kan inring reng a ni tih kha ka chhanna ni ta sela. Tin, “Lawngtlai two-wheeler taxi service tih theih ve tawh a ni em” tih zawhna kha, MLA zahawm tak Pu Zira, Mamit bialtu khan a zawt bawk a. “District tinah leh Thenzawl-ah two-wheeler taxi hi kaltir turin tunah hian STA-in phalna an pe tawh a ni” tih kha ka chhanna ni sela.

Tin, kan MLA zahawm tak Pu BD Chakma khan - “Chawngte auto-rickshaw taxi permit min pe thei em” a ti a, nikum lamah khan permit eng emaw zat chu kan pe tawhin ka hria a. STA-in a mamawhte dilna kha a lo ngaihtuah thin a, kha kha lo inbengvar se a tha awm e. Tin, “Lawngtlai-ah sawn district dang (Aizawl te emaw) a motor registration lo nei tawh te Lawngtlai District-a motor registration ti leh turin an ti a, kha kha ngai lovin min sawi sak thei ang em” tih a niin ka hria a, nichina zawhna kha. Kha kha thil hriatsual palh a ni mai awm mang e aw ka ti a. February thla tir khan kan DTO ho (Zoram pum) meeting kan nei a, chuta kan thil sawi - kan motor ho hi road-off ni chuang silo, tax pe mumal tawh silo te khawlaiah hian an awm hlawm a, chuvang chuan Zoram pum, DTO area tinah hian kan motor neih dan te, helai khuaa awmhote hretlang ila” tiin kan inhrilh a. Chumi hriattirna an chhuah vel chu sawlaia registration ti tur anga lo hriat fuhloh palh niin a lang a. Registration hmunkhat a tiha hmundanga va tih leh kha thil remlo zawk a ni a. Chuvang chuan ‘khalaiah kha harsatna a awmlo a ni’ tih kha ka react dan ni sela.

Tin, Member zahawm tak Pu VL Zaithanzama zawhna - “learner license kha hei aia awlsam zawkin a tihtheih ang em” tih kha, tunah hian online-a kalpui turin kan inbuatsaih a, hei hi peihfel tep a ni tawh a. Sarathi-4 ah hei hi rinluh a ni a, awlsam zawka kalpui turin tunah hian kan buaipui a, reilo-teah hei hi kalpui theih kan inring a ni.

Member zahawm tak Pu Lalrintluanga Sailo rawtna - Aizawl DTO hmun hniha then chungchang kha ngun takin kan ngaihtuah fo tawh a. District danga DTO-te chan nen hian a inthlau lutuk kan ti a, helaiah hian kan han zir a, ‘09’ awmlai te a ni bawk a. ‘01’ leh ‘09’ ringawtah pawh khan, a veng sir lampang deuhin ‘09’ chan te an lo hreh a. A chang chuan Aizawl hi area phel te kan ti a, amaherawhchu hei hi a technical thilah a rem takloh avangin, ‘Registering Authority leh Licensing Authority tein then mai ila, tun dinhmunah chuan eng emaw chen kan harsatna chu min sutkian sak thei ang” tiin nagihdan kan siam ta zawk a. Hun rei tak hei hi kan ngaihtuah tawh a ni a, heti bak hi chu tihngaihna a awm rih lova, zirchiang zel tur thil a ni.

Tin, MLA zahawm tak Pu Lalchhuanthanga khan - “MST Wing inenkawlna a hautak a, an chawibelh zel mai, an thawhchhuah nen hian inphu deuh se” tih chungchang kha a rawn sawi a. Kha pawh kha ngun taka kan ngaihtuah leh, ‘hei hi enge a chhan’ tia session apiangin zawhna, he ministry kher lovah pawh lo awm tawh thin a ni a. Amaherawhchu, kan officer-te thahnemngaihnaa zarah a chhan lian tak pakhat tunah hian hmuchhuakin kan in hria a, chu chu kan kalpui ta a. State Transport Department-ah hian motor vehicle-wing leh MST wing-te a awm a. He vehicle wing-a thawktu tam takte khan MST wing ah hlawh an lo la teuh mai a lo ni a, MST wing-a thawk ni silo kha. Tunah hian MST-wing atang khan Vehicle-wing lamah mi 100 vel lai mai tunah hian thawktute kan han siamrem a. Tun kan budget tharah erawh hi chuan kha kha kha a inphu deuh tawh turah kan ngai a ni. Tun kum hnih chhung chho hian kan transport bus-te hi an service thei lova, Covid avangin ram tan hek zawkin hna an thawk a ni tih te kha vawiinah ka sawi lang ve hrim hrim duh bawk a ni.

Taxi replacement chungchang hi, taxi hi vawi khat replacement a tihtheih a, chu chu tunah hian kan kalpui mek a. Hei hi Member zahawm tak tak Pu Vanlalhlana-teho zawhna kha a ni a, kan kalpui dan chu kha kha a ni e. Member zahawm tak Pu Vanlalhlana zawhna - ‘ISBT lama hmalak ni se’ tih kha, hei hi kan Chief Minister zahawm tak hovin tunah hian kan buaipui a. “ISBT ang chi hi kan transport hmunah te khian building lian a floor-a saka, kan office te nen pawha hman tangkai theih turin tunah hian kan Chief Minister hova hmalak mek a ni” tih kha ka han sawi lang leh ni sela.

‘Zofate Inpumkhatna Bus’ kan han tih, kan thenawm state-te nena inkalpawhna turin bus service turin Tripura leh Manipur lamte kha kan inbia a. Hripui avang te, hnam chungchang avang te leh Manipur inthlan avang tein duh angin hma kan la chak thei lova. Amaherawhchu, Tripura bik erawh hi chu tunah agreement kan sign fel tawh a, hripuite han reh se, hei hi chu service tan tir theih nghal a ni. Tunah hian Behliangchhip-ah kar 1-ah vawi 2 kal thei turin kan inbuatsaih a ni. Tin, kan member zahawm tak Pu Ngunlianchunga zawhna - “DTO Office Lawngtlai hian license te hi a pechhuak thei em” tih a ni a, ‘helaiah hian license-te pek theih a ni’ tih kha vawiinah ka han sawilang leh duh bawk a ni.

Zawhna leh chhanna tam tak awm thei tur kha a awm lutuk lova, a then chu rawnate, department rawn faknate kha a ni hlawm a, kha kha kan react theih chin ni mai sela. Transport Department hmalakna thenkhat han sawi lang leh dawn ila.

Pu Speaker, Transport Department hian ramin hmaa sawn theihna turin theihtawpin hma kan la chho ve zel a. Covid-19 hripui leng avangin kan duh leh beisei angin hmalak zung zung theihloh mahse, kumin chhung khan Transport Department

chuan hmasawna hrang hrang kan hmu a. Nikum Budget Speech-a ka tarlan tawh angin, Transport Department hian hmel thar nei turin nasa takin hma kan la a, kan hmalakna ten rah tha a chhuah ve zel a. December ni 20, 2021-a Chief Secretary hoa state sorkar hotute thukhawm chuan *ease of doing business*-ah ‘Best-perform Department’-ah min puang a, 100% achievement record min pe a, a lawmawm kan ti hle a. Kan department-in hetiang performance a neih theihna chhan hi thawktu lian ber atanga a te ber thlenga ‘rim taka an thawhna leh an inpekna avang a ni’ tih ka hria a, chuvang chuan, kan thawktute hnenah vawiinah hian lawmthu ka sawi a ni.

Kumin Financial Year chhunga Transport Department hmalakna langsar zual deuh deuhthe han tarlang leh ila.

Transport Department hi Mizoram sorkar hnuai revenue chhunglut hnem berte zinga mi a ni a. Financial Year kal ta 2020-21 ah khan sorkar-in target atan nuai 2,500 min bituk lain, nuai 3421.01 lai kan chhunglut thei a, kumin sorkar kum kal laiah hian December, 2021 thleng khan nuai 2352.95 kan chhunglut tawh a, kan target amount khum ngei turin tan kan la chho mek a ni.

Ni 24 August, 2021-ah khan Siaha leh Lawngtlai hmuna District Transport Office building thar tha tak mai chu hawn a ni a, department tana district office building mawi leh tha tak mai kan neih theihna tur atana hma lo latu zawng zawngte chungah lawmthu ka sawi a ni.

Transport Department-a kan district office zingah Champhai DTO office hi sak that a ngai hle tawh a, chu chu kan Chief Minister zahawm tak hnenah kan thlen a, Chief Minister zahawm takin a duhsaknain Champhai-a kan DTO office building sa thaa, a hungna siamtha turin tunah hian hma kan la mek a, a sakna tur sum pawh tunah hian peih fel tawh a ni a, PWD kutah hlan fel tawh niin, tun atanga reilo teah hian a hna tan mai kan beisei a ni.

Covid hripui leng avanga lirthei neituten harsatna an tawhte chhawka atan central sorkar kaihruaina zulzuiin Transport Department chuan lirthei document, February Ni 1, 2020 hnulama thite ngaihnathiamna hun a kalpui a. Covid-19 hrileng a hluar chhoh zel avangin October Ni 31, 2021 thleng khan late fee tel lova fee leh tax-te pek tir an ni a. Lirthei neituten Covid-19 avanga harsatna an tawhte eng emaw chen a chhawkin kan hria a, a lawmawm kan ti hle.

Tin, SEDP hnuaiiah Tlabung, Vairengte leh Serchhip-ah te, commercial vehicle terminal sak turah kalpui mek a ni a, tunah hian a sak hna hi 80% zawh tawh a ni. Kumin

2022 chhung ngei hian sak zawha, anihna anga hman kan tum a, lirthei neituten an hman tangkai ngei kan ring a ni.

Tin, Govt. Mizo High School hmunah tunah hian Multi-Level Car Parking and Multipurpose Hall sak mek a ni a, a sakna tur senso hi tunah hian dah fel a ni tawh a. vawikhatah LMV 42 leh two-wheeler 49 dah theih tura duan a ni a. Parking hmun chungah hian Multipurpose Hall sak a ni a, tunah hian 70% zawh tawh a niin kumin 2022 chhung ngeia zawh fel tum a ni. Helai chheh vela kal tur tan helai building hi chhenfakawm tak turah kan ngai a ni.

Tin, Pu Speaker, kan hmalakna dang lehah chuan, Tripura leh Assam atanga motor eng emaw zat nitin rawn kal thin hian Kanhmun khu a rawn paltlang thin a, he kawng pahnihte khar tur hian Kanhmun-ah enforcement checkgate building thar tunah hian sak mek a ni a, hei hi zawh fel thuai tum a ni. He checkgate siam zawh anih hnuah chuan tun aia revenue tam zawk chhun luh theih kan inbeisei a ni.

Pu Speaker, Transport hnuai peng pawimawh tak 'Inland Water Transport' hi han sawi lang leh ila. Hei hi June Ni 19, 2019 khan PWD atangin Transport Department hnenah allocate a ni a, IWD Project hi 100% central sector scheme funding a ni a, phur takin hmalak chhoh nghal a ni a. Chutih rualin covid 19 hrileng avangin kan duh ang leh beisei angin hma kan la chak thei lova, IWD lama Transport Department hmalakna tlem han tarlang ila.

A hmasaah chuan 'Introduction of Passenger Ferry Act River Tlawng' tih a ni a. Tlawng Lui hi Mizoram-ah Ministry of Shipping Govt. of India-in 'waterway' tia an puan, a number pawh an pek 102 an puan awm chhun a ni a. He lui hi M/S Ride Precession Survey, Kolkatta ten hydrological survey leh techno-economic visibility study tunah hian an rawn nei zo tawh a. He study-survey behchhan hian Inland Waterways authority hnenah Project report min siam sak turin tunah hian kan dil mek a. Chutih rual chuan Director, Inland Water Authority of India, North Eastern Region chu inspection min neih sak turin tunah hian kan ngen a, kan ngenna angin inspection an rawn nei tawh a. An thurawn angin Khamrang, Hortoki leh Bairabi-ah te, floating Getty Mechanized Board pahnih theuh dah turin tunah hma kan la mek a ni. Development of Inland Water Transport Project-in Khawthlang Tuipui chu Tuichawng chhuah thlenga lawng kal thei turin min phal sak tawh a, tunah hian a project hi km 23-a thui a ni phawt dawn a, a total project cost chu nuai 2,292.94 a ni. Tunah hian 1st Phase hnathawhna tur sanction fel a ni tawh a, a thawktu tur M/S Ride Survey, Kolkatta te nen agreement sign turin tunah hian kan inring tawh a ni. Development of Inland Water Transport Project Chhimtuipui hi Ministry of Shipping, Govt. of India-a kan dil angin Chhimtuipui Lui atan hydrological survey and techno-feasibility studies, Tuipui D

atanga Lawngmasu thleng neih turin minrawn phalsak tawh a. Tin, tender chhuah a ni a, /S Ride Survey, Kolkatta te chu tunah hian hnathawk turin thlan fel an ni tawh a, central sorkar-in sum anrawn release veleh hna hi tan nghal tum a ni.

Tin, Extension of National Waterways, No. 6 hi Barak Lui, Lakhipur leh Bagha inkara luang a ni a. Barak Lui hian Tuivai Lui hi arawn zawh chhova, Tipaimukh thleng lawng kal nana hman theih rin a ni a. National Waterways No. 6 hi Lakhipur atangarawn extent-in Tipaimukh thleng extent turin central sorkar-ah kan thlen a, central sorkar lam chuan feasibility study te lo nein, a report a zirin hmalak dan ngaihtuah anih dan tur thu ziakin minrawn pe a, tunah hian department lamin feasibility study nei turin hma kan la tan mek a ni.

Tin, Pu Speaker, kan hmalakna dang leh, Online Payment chungchang, hun eng emaw chena tanga hma kan lo lak tawhna Motor Registration, Driving License leh Conductor License, a fee leh tax chi hrang hrangte online-a pek theih turin August Ni 31, 2021 khan kan hawng fel a, hei hian hrileng karah DTO Office kal kher lova, mamawhtu te tan remchanna nasa tak a siam sak kan ring a, hemi tihhlawhtling tur hian SBI leh NIC te nen nasa takin hma kan la a, kan tihlawhtling thei hi kan lawm hle a ni. ‘Setting up of Monitoring Centre’ hi, Pu Speaker, passenger phur lirtheiah te hian hmeichhia awm nem zawkte leh naupang chungah hleilenna te a thleng ve fo thin a, chumi avang chuan central sorkar, *Nirbaya* fund hnuaiyah monitoring centre kan dil a, chu kan dilna chu tunah hian minrawn phalsak a, a funding pattern hi 90:10 a ni a, chu chu kan Chief Minister zahawm tak hnenah kan thlen leh a, ani min duhsaknain 10% hi kan tum thei dawn a, tunah hian National Informatic Centre nen tangkawpin monitoring centre hi bun tura hmalak a ni a, kumin hian zawh hman kan inbeisei a, kan thawh tluan chuan hei hi tangkai tak turah kan ngai a. Tin, hmeichhia leh naupang zawkte commercial vehicle-a an him theihna turin *panic button* fit turin hma kan la chho ang a, hei hi kan tih chuan monitoring centre nen inthlunzawmin rangtakin hetiang sulhnu chhuina hi kan ti thei turah kan ngai a ni

Tin, Transport Department hnuaiyah peng pawimawh tak mai, State Transport Authority chungchang hi tawi te han sawi lang leh ila.

STA hian khaw 5 - Saipum, Saiphai, Phaisen, Zokhawthar leh Rawpuichhip-ah te Auto-rickshaw tlan phalna tunkum kal ta khan min pe a. Mizoram chhunga district headquarters zawng zawng leh Thenzawl-ah te two-wheeler taxi domain-ah heng khuate hi a siam bawk a. Tin, STA hmalaknain mipuite tan passenger phur lirthei chuan man te hi sorkar bituk anga a kal theihna turin auto-rickshaw ah te *fare metre* vuah turin hma lak mek a ni a. Tin, two-wheeler taxi leh four-wheeler taxi-ah te pawh IT thiamna hmanga *fare metre* siam turin Mizoram e-government society nen tangkawpin tunah

hian hma kan la mek a ni. Covid 19 hripui lenga vangin MST bus-te kum 2020 tan tira tang khan MST route-ah an service mumal thei tawh lova. Hetihlai hian MST bus te an chawl chuang lova, covid-19 duty-in a chhun leh zan zawmin an tir thin a. Kan driver leh conductor-te hripui leng karah mipuite tan MST bus tangkai taka hman an ni hi a lawmawm hle a, hun khirh laia MST lama thawktu operation lam te, driver leh conductor chungah lawmthu ka sawi a. Hri len la zo lo mah sela, a khirh zual lai phei chuan kan driver leh conductor ten hri hi an kai a, kan buai em em thin a ni.

Pu Speaker, thil chhinchhiah tlak deuh mai pakhat chu, Covid hrileng karah MST bus thar 13 tunah hian mamawh zuala hman tur kan nei thar leh a, hetiang bus thar kan neih theihnaa phalna min pe tur kan Chief Minister zahawm tak Finance changtu zahawm tak chungah lawmthu kan sawi a ni. Session hmasa lama kan lo sawi tawh angin Tripura leh Manipur lama Zofate nena kan impumkhat lehzual theihna tura tan MST Bus service tir turin hma lak chhoh zel a ni a, Covid hrileng avang tein hmasawn chak a har hle a. Heng state 2 tea kal tur hian MST Bus te hi a takin kan nei tawh a. December Ni 20, 2021 khan Tripura sorkar nen reciprocal agreement kan sign fel tawh a. Aizawl atanga Behliangchhip hi kar khatah vawi 2 service phawt turin ruahmanna kan siam a ni. Service tan tum anih laiin hrileng a hluar leh tak avangin thulh leh rih a ni a, Pathian-in rem a tih chuan hun remchang hmasa berah tlantir kan tum a ni. Tin, Aizawl - Churachanpur MST bus service turin Manipur sorkar nen pawh kan indawr zel a, hun rei tak Covid avangin kan indawr thei lova, an inthlan a lo hun zel bawk nen, churang chuan kan hmalak a chak thei lova, reciprocal agreement Manipur Sorkar-ah kan va thehlut a, an remtihna kan nghak mek a ni.

Kan sawi tawh angin Myanmar MST Bus Service, Tahan lama kan unaute nena kan inkalpawhna chungchang kha kan duh hmanhmawh viau rualin, Ministry of External Affairs lamah kan thlen kha phalna kan la hmu thei lova, Myanmar ram a buai leh bawk si a. Engpawhnisela Pathian-in hun remchang tha min la buatsaihsak ngei kan ring a ni.

Transport chunchanga ka thu tawpna atan chuan, Mizoram e-Government Society nen tangkawpin demonstration of transport e-Service, e-Bharat hnuaiah MST bus ticket online booking theih turin tunah hma kan la a, software te peih fel thawkhat a ni tawh a, hripui te han reh se, MST bus-te a pangaia a service theih hunah chuan online in kan ticket te pawh hi laktheih turin kan inbuatsaih a. Online ticket system hi hman vat theih kan inring a ni. Kha kha Transport Department-a ka sawi theihthe a ni a, hun kan la rei ta deuh hlek a. Pu Speaker, ti khan pass ka han dil nghal mai dawn em ni ang? (**Speaker:** A tha e.)

Awle, Pu Speaker, heng ka Demand-te: -

Demand No.	Department	Amount (in ₹)
4	Law & Judicial	28,03,000.00
12	Parliamentary Affairs	87,80,000.00
36	Environment, Forests & Climate Change	2,60,84,16,000.00
42	Transport	45,69,33,000.00
TOTAL		3,35,44,42,000.00

kum 2022 - 2023 chhunga hman atan ka rawn dil hi he House zahawm tak hian min pawmpui turin ka rawn ngen e.

SPEAKER : Awle, tunah chuan Minister zahawm tak Pu TJ Lalnuntluanga Demand-te: -

Demand No.	Department	Amount (in ₹)
4	Law & Judicial	28,03,000.00
12	Parliamentary Affairs	87,80,000.00
36	Environment, Forests & Climate Change	2,60,84,16,000.00
42	Transport	45,69,33,000.00
TOTAL		3,35,44,42,000.00

House-ah pass a rawn dil a. Remti apiangin, ‘remti’ ti rawh ule; remti lo kan awm em? Kan awm chuan, ‘remti lo’ ti ula.... (Remtilo an awm lo)

Awle, tunah chuan Minister zahawm tak Pu TJ Lalnuntluanga department-te hman tur Demand Nos. 4, 12, 36, leh 42, a vaia belhkhawm cheng vaibelchhe **33,54,44,200.00** chu House-in lungrual takin a pass ta a ni. (**Pu TJ. Lalnuntluanga, Minister:** Pu Speaker, ka lawm e.)

SPEAKER : Awle, tunah chuan Minister zahawm tak Pu K. Lalrinliana, kan sawihona te rawn windup-a, atul ang angte rawn sawifiaha, a Demand-te House-a pass rawn dil turin ka sawm e.

PU K. LALRINLIANA, MINISTER: Pu Speaker, ka lawm e. Vawiinah Demand No. 17, 19 leh 35-te member zahawm tak tak ten thahnem ngai takin min sawipui a, ka lawm takzet a. Demand No. 35, Fisheries Department-ah hian member zahawm tak tak 15 laiin min sawipui a, Fisheries Department sangha chia intodelh a pawimawh zia an sawi tlangpui a. Tin, PMMSY atanga tanpuina kan hmuh kal zel te ‘engtingge’ tih te,

Serlui 'B' atanga cage culture kal lai meka Pu Lalrinsanga Ralte zawhna te, Pu Lawmawma Tochwawng-in, "intodelh turin tan lak zual a tul khawp mai" a tih te leh, sangha chi State pawna tangin kan la' tih te a rawn sawi a. Tin, Pu BD Chakma'n prawn culture te, crab farming te pawh a bial potential area-a tih ve a duh thu a sawi te a ni a, a lawmawm hlein ka hria a.

Tin, Pu L. Thangmawia'n "sangha hralhna lampang te pawh ngaihtuah tel zel a tul a ni" a tih te, tin, Pu Ramthanmawia'n PMMSY hnuiaia Sangha dil - new pond leh rearing pond hmalakna kal zelte a rawn sawi bawk a. Tin, Pu Nihar Kanti Chakma'n, "sangha intodelhna turin tan lak a ngai; phai atangin sangha a la lut hnem; keini pawh potential area kan ni, kan bialah tan han la ve teh u; prawn culture hi tih ve a ngai a ni" a rawn ti bawk a. Tin, Pu Lalchhuanthanga'n, "pilot project *chakai farm* hi tih vak chi pawh a ni em maw ni le, awmzia a nei em maw ni le" arawn tibawk a. Tin, Pu Zothantluanga'n, "phai atangin challan hmanga sangha kan lakluh hmuh tur ala tam; intodelh theihna tura tan hengte hi titem tur hian tan kan lak a ngai" tia thahnem ngai taka a rawn sawi te, Pu Lalrindika Ralte in, "State dang atanga sangha lakluh a la tam; chakai farm hi kan risk deuh a ni lo maw" a rawn tih te, Dr. K. Pachhunga'n, "pilot project *chakai farm* hi intodelh nghal rum rumna tur a nilo, enchhinna anga kalpui rih a tha; nghahrah, lengphar, nghaphusen te pawh kha engnge a" a tih te, tin, Pu Vanlaltanpuia'n, "kan intodelhna tur atan ngaihtuah chian tul tak a ni" a rawn tih te a ni bawk a.

Tin, Dr. Vanlalhlana'n, "hmalakna zelah fimkhur taka kan kal a ngai" a tih te, thahnemngaihna hliir kan ngaithla a. Pu Vanlalhlana'n, "pawh lama tanga kan lakluh tlem a ngai, tan kan lak a ngai" a tih te, Prof. F. Lalnunmawia'n, "Chakai farm, ka bialah pawh chakai-a eizawng an tam, chuvangin helam hi kan phurpui a ni" tih te a rawn sawi lang bawk a. Pu Zodintluanga'n, "sangha chi beng zawisa sem tawh lo ila, beng zawi vak, a chauh tawh lamah ka bialah an rawn sem, a harh tha sem nan Ngengpui leh Zobawk Fish Farm-te tha taka kalpui a theih tawh lawm ni" a rawn ti bawk a. Khagho kha Fisheries bikah chuan a sawitu tlangpuite anni a, thahnemngaihna hliirin kan sawitlang a, a lawmawm ka ti a.

Tin, PMMSY-a hmalakna hi han sawi ka duh a, ka rawn chhang chho pah nghal zel ang a. SEDP-a kan hmalaknaah hian kan flagship programme a nihna angin kan Chief Minister-in sangha chi semah pawh hma min lakpui nasa a, sum leh pai pawh SEDP atangin 2020-2021-ah te min pe a, 2021-2022 kal lai mekah pawh hian min pe a. SEDP sum atangin sangha chi kan lei a, 50% subsidy tein kan hralh chhawng leh a, 30% a hralh chhuahte kan nei a. Tin, len chi hrang hrang leh sangha chaw te district hrang hrangah kan stock a. Pu C. Ngunlianchunga'n, "Kan bialah pawh nikum lamah min pe lova, tun kum hi chu min pe tha tawh tur a ni" a tih pawh kha ka han enchiang a, hei,

ziakin a dil a, a sawi hi a lo dik chiah mai a, kan lo pe lo tak tak a. Lawngtlai district-a sangha chi kan lo pekloh chhan pawh kan inzawt tawh a. Engpawhnise, tih leh dawnah chuan kan lo hre tawh ang tih ka sawi duh a ni.

Chutiang chuan SEDP atanga sum kan hmuh te pawh hi tlema zawng lalut lehin, heng subsidy-a kan pek chhan pawh hi thenkhat chuan tunhma khan sangha chi a thlawn a sem thin kha mi thenkhat chuan an lo kang vel mai mai thin a, an lo ei ral mai mai thin a. Farmers te sangha chi a duh tak tak ten 50% emaw, 30% emaw tal an rawn thawh khan a tak takin sangha dilah an dah ang a, a tharchhuah pawh a tam phah ang a, ‘tih tak taka vulh duh tute anni tihlan nan pawh hian i ti ang u’ kan han ti a. Farmer ho te leh society hrang hrang pawh hian a tha an ti a ni. Chu chu tuna kan kalpui lai mek a ni.

Tin, SEDP-ah mi thahnemngaiten DPR-an rawn siam a, chakai farm hi cheng nuai 57 bawr vel laiin an rawn siam a, cheng nuai 57 an rawn siamah chuan departmental work-a thawk turin Finance Department ten min ti a. Chutah chuan contractor profit cheng nuai 4,03,000/- min cut sak a, cheng nuai 52,97,000/-a thawk turin min ti a. Hna kan han tan a, hmanna *Zawhna & Chhanna* awmah khan ponds 3 chakai khawina tur kan siam tir a, a chhuat concrete, a bang brick-in, a hungna te leh a shed khuhna tur atan te, dil pindanna, chakai tawmna tur te leh tui an mamawh ang tawk dahna te, godown-te pawh kan sa a, khatah khan nuai 32 kan seng tawh a, nuai 20,9,07,000/- tunah hian kan la nei a.

Hei hi kan department lama mithiamte mai bakah ICR lama kan mithiamte, University lam atanga kan mithiamte pawhin hei hi min zirpui a, engnge kan an dawn, chakai leh sangha-ah hian kan ti a. Pu Speaker, ka sawifiah leh duh chu, hmanni lawkah kan Amendment Bill, “The Mizoram Fisheries (Second Amendment) Bill” kan passed a, chutah chuan, ‘fish’ definition kha, *‘fin fish, shell fish, nungcha kawr nei chi leh luidunga awm chite’* khang kha a huam vek a, chuvang chuan ‘chakai’ pawh hi a huam a. Tin, kan ei duh chi tak a ni a, chakai leh sanghate hi kan ei duh em em anih avangin kan tihpun a tul a, lui dunga a chhia zawng zawng ringawt ei lo deuha chaw tha han peka, chakai tuihna tak kan neih theihna tur atan ngaihtuahna sengin kan kalpui a. Min tuipuitu tam tak an awm laiin min tuipui vak lotu pawh tam tak an awm a. Nuihza siam nan tam tak chuan min hmansak a, mahse kan hlawhtlin phawt chuan, nakinah chuan, ‘a lova tha em’ kan ti dawn a ni. Prof. F. Lalnunmawia’n ‘ka bialah eizawngtu tam tak lui dunga chakaite an humhalh avangin’ a rawn tih pawh kha kan department-in kan va en tawh a, thil tih chi tak niin kan hria a ni. Tuna mi pawh hi Pathian-in rem a tih chuan kan la hlawhtlinpui kan ring a ni.

Fisheries hian khatieng SEDP atanga sum kan hmuh hrang hrang atang subsidy-a kan peka, sum kan hmuh let leh atang khan revenue pawh hi eng emaw zat kan chung

a ni. 2020-2021 ah cheng nuai 137 leh 2021-2022 ah nuai 73.86 lai sorkar sumbawmah kan chhunglut a ni. Tin, ice plant te, cold storage te, vur hralhna, sangha hralhna leh sangha zawrhna hmunte buatsaihin hma kan la a ni.

Tin, 'Fish info-Mizoram web portal and mobile apps' tih kan hawng tawh a, chu chu Fisheries Deptt-in tunlai thiamna hmanga information technology hmang tangkaia fish farmer-te, fisherman te, riverine fisheries farmer ten mobile apps hmanga Deptt-ah an in register theihna tura tih a ni a, chu chu 22nd Feb., 2022 khan kan hawng a, registration pawh an rawn ti nual a, ti phe chu an la tamlo nain mi 455 an rawn in register tawh a ni.

Tin, Fisheries Deptt. hian chakai chang nilo keimahni luidunga sangha kan la khawi ngai loh Nghahrah, Lengphar, Nghaphusen te, 'a note manin khawi lian chhin teh ang' kan ti a, Lengpui-a kan fish farm-ah khuan kan dah a, kutphah chen vel kan dah kha nikum kan en hnuhnun ber khan kiu chen dawn te pawh a lo ni tawh a, tunah chuan, 'an tui ve thei tawh ang em aw' tih te kan rilruah a awm a. Tin, Zobawk Fish Farm-ah Nghahrah dah a ni a, chu chu department lamin uluk takin an enkawl a, kan kal hnuhnun ber khan an tikeu ve tawh a, chungte chu alo puitlin chhoh theih chuan hlawhtlinna nasa tak, khawi chi la awm ngailo kan neih belh dawn a ni kan ti a, Nghaphusen phe chu Tlawng dungah a tam a, kg 15, kg 10 vel te pawh awm thei anih avangin, hengte hi kan tui tir theiha, a note te a lo thanlen chhoh theih chuan hlawhtling tak turah kan inngai baw a ni.

Pu Speaker, Mizoram Fisheries Act, 2002 rules-te kan nei tawh a, kum 2019-ah luidung humhalhna, tui atan *Dan leh Dun* felfai takin kan nei a. Hemi chungchangah hian, Fisheries Deptt. staff-te kan tlem a, Mizoram pumpuiah mi 80 leh tih vel chauh staff kan nei a, 'kan thawk zo dawn lo' tiin Central YMA-te nen thawhhona thuthlung 9th September, 2021 khan kan zia a, Central YMA-te pawh an phur hle a. Tin, hun reitak atang khan Branch YMA leh Group YMA-ten humhalhna an lo kalpui nasa tawh a, kei pawhin ka zin velnaah ka enpui thin a, phur tak te hian an phur niin a lang. Chutiang atan chuan Cental YMA-te nena thawhhona thuthlung kan han ziah ho takah chuan, Branch-te pawh an phur a, 'luidung humhalh tha lawman te siam ila' kan ti a, chutiang tur chuan sum leh paite pawh pek kan ni a. Tin, a kaihhraina tura ruahmanna te pawh hi Central YMA-te nena duan ho a la ngai dawn a ni.

Tin, fish cage culture hi Serlui 'B'-ah, a bialtu zahawm tak Pu Lalrinsanga Ralte-in a rawn sawi ang khan, kan kalpui a. Tin, *Panga-fish* (Sutchi) sangha puhlip neilo kha khawi hmasak a ni a, hei hi puhlip neilo anih vang nge, a thau chu a thau tha a, Fisheries Deptt. hian kan hun hma tawh khan an khawi a, beisei aiin a hralh a tla lova, a khawi len chungchangah phe chuan a hlawhtling viau a. Engpawhnise, 'kan ei duh

chi a chidang i khawi chhin teh ang' kan ti a, *Common Carb* leh adang eng eng emaw nikum khan kan dah a, duhai chuan Pu Speaker, a lian tha thei vak lova, tun kum lokal turah hian engtinngte kan kalpui ang tih Deptt-in sawihona kan la nei chiah lova. Tin, Serlui 'B' hi an bomb nasa lutuk a, duh zawng zawnga man a tam a, a chi thlah zel tur ang dim dawina a awmlo bawk nen mahalder-te pawh hi nei thar leh ila (a hma in an lo nei tawh a) hengte hian an veng pah ang a, keini department nen chutiang chuan thahnemngaihna kan *mahal* tir a, tender kan tichhuak a an chhang a, tunah hian mahal kan kalpui mek lai a ni. An term pawh a tawp leh tep tawh a, tender neih hma atan an term thla hnih khat an rawn dil angin extend a ni.

Tin, PMMSY-a kan hmalakna, central sorkar atanga kan sum hmuhna ber leh kan intodelh theihna tur atana kan hmalakna berah hian Pradhan Mantri Matsia Sampadhyo Yojana 2020-2021 kan approved amount kan neih chu nuai 3,381.14 a ni a, Govt. of India share hi lakh 1,973.54 a ni a, State share hi 240.23 lakh a ni. Tin, beneficiaries a awm ve leh a, cheng 1167.365 lakh niin, a vaiin Govt. of India in nuai 986.77 first installment atan an rawn released a ni. Kum 2021-22-ah pawh hian DPR 4548.53 lakh siam a ni a, central sorkar-in approval min la pe lo a ni.

Tin, sangha hmanga eizawngte Covid avanga an eizawna a theih tak loh avangin tanpuina cheng nuai 150.79 central sorkar-ah kan dil angin min rawn pe tawh a, la pekchhuah loh a ni. PMMSY hnuaiah hian sangha chia kan intodelh theih nan hatchery thar dinna tur mi paruk hnenah tanpuina pek tawh a ni. Tin, sangha note chi hralh chhuah theih tura khawi lenna kan tih ang chi hectare 46 siamna tur mi 150 hnenah pekchhuah tawh a ni a, a vaia siam tawh zat hi hectare 32.03 a zau niin, a dang pawh siam belh leh tura ruahman mek a ni.

Tin, sangha dil thar hectare 144-a zau sem belh tura hmalak mek a ni. Sangha chi te, sangha chaw te hectare 144 chawm zo thei tur nei tura hmalak mek a ni. Tin, Ngaizel-ah hian sangha tharchhuah vawn thatna tur vur khawl din tum a ni a, mi 12 hnenah aquarium sangha khawi chi mi 12 hnenah pek tur a ni bawk a ni.

Tin, vur siamna Aizawl leh Kolasib-ah pakhat ve ve siambelh tum a ni bawk a, thianghlim zawka sangha kan zawrh theihna tur atan hian Bawngkawn-ah te pawh kan nei a, tunah hian Ngaizel leh Bawngkawn-ah siam leh tum a ni. 'Sangha-pui lian hi department-in kan neih a tul a ni' kan ti a, a chi thlahtu vulh lenna turin Thenzawl-ah siam kan tum a, a project hi 410 lakh lai niin sorkar laipui atangin administrative approval pawh kan hmu tawh bawk a ni. Tin, aquarium-a sangha khawi chi pawh lei tum a ni a, tunah hian mi 12 hnenah, 'backyard ornamental fish rearing unit' din theihna tur leh tlema lian tham deuh, medium size pakhat tanpuina pein din tura hmalak mek a ni bawk a ni. Chutiang chuan RKVY atang te, Agriculture leh Horticulture kal tlang

tein sum leh pai hmuh tur hmabak kan nei a ni. Tuirial kamah sangha mansa zawrhna tur siam tum a ni bawk a, tin, sangha deliver-na tur ke pahnih nei (ice box pali keng tel) lei tur a ni bawk a ni.

Tin, Article 275 atang pawhin Social Welfare kal tlangin sangha khawina tur Aizawl leh Champhai tan cheng nuai 175 lai mai kan hmu thar a ni. Mi 96 dil thar siamna turte leh thil dang danga hmana tan a ni dawn bawk a ni. Khati khan member zahawm tak tak te zawhna kha ka react nghal niin ka hria a, fisheries-ah chuan.

Tin, PMMSY hnuaiah hian State Level Approval & Monitoring Committee din tawh a ni a, member pawh pasarih lai an ni a, district tinah PMMSY District Level Committee kan din tawh bawk a ni. Khang Committee-ah khan, Agriculture te, Horticulture te leh department dangte pawh hman tangkai theih tura beisei an ni a, Committee ah pawh telh an ni. District hmalakna lo enpui turin State Level Committee pawh din a ni. Finance Deptt. te pawhin pawisa tang awm te min release mek zel a, distict level farmers thlante account-ah lut turin buatsaih chho mek a ni. Kha kha fisheries-a ka han han sawi theih chu ni se, Pu Speaker.

Demand No. 19 - Local Administration Department hi Member zahawm tak tak 15 laiin an rawn sawi a, “VC House thar sakna turah hmalak a ni tawh em, VC House sakna tur sum engtikah nge a lo chhuah dawn” tih kha, Pu Lawmawma Tochwawng, Pu Lalrinsanga Ralte, Pu L. Thangmawia te, Pu Ramthanmawia te, Pu NK Chakma, Dr. ZR Thiamsanga leh Pu K. Laldawngliana ten an rawn sawi a. Pu Lalrintluanga Sailo khan village council boundary a rawn zawt a, ‘Pukzing, Hnahva leh Hruiduk VC area tihfel ni se’ a rawn ti bawk a. VC area boundary hi DC te chair-na hnuaiah ‘Inter-village Council Dispute Boundary Committee’ hi district tinah din a ni tawh a, Local Administration Officer te chu member Secretary an ni. DC chairman-na hnuaiah he commitee hian ramri fellote an tifel tur a ni a, hei hi chak zawkin hma kan lo la ang tih ka lo sawi hmasa duh a.

Pu Zothantluanga khan “LAD Directorate MINECO-a sak hi vertical extendtion te a tih theih chuan Ramhlun-a tuna DLAO Office kan neih mek saw shift phei, sawlai hmun saw sorkarin thil dangah kan hmang tangkai thei ang a” a ti a, hei hi a dik a, department ang pawhin kan sawiho thin a. Tunah hian directorate building hi ka sa mek a, kan la zo lova, engpawhnise hei chu sorkarin ngaihtuahna a la hman tur a ni a. Dr. K. Pachhunga, Dr. Vanlaltanpuia leh Dr. F. Lalnunmawia ten an rawn sawi bawk a, VC house chungchang kha han sawifiah hmasak ka duh a. VC house thar sak tur 136 kan nei a, kan hre nual tawhin ka ring a, repair tur tur 95 kan nei bawk a, hei hi Treasury-ah ala tang mek a, a chhuak mek bawk a. VC account-ah lut turin tunah ruahman mek a ni e.

Tin, VC House thar 15 sakna tur minrawn pek belh leh a, a hlui repair tur 50 repair kan nei belh bawk a, hei hi la ngaihtuah loh a ni. VC house-ah hian Common Service Centre 5 kan dah tawh a, 10 dah belh kan tum bawk a, hei hi kan hmang tangkai hle mai a, mimal ang pawhin, VC-te hnenah computer set pekrawn sawi 2 an awm a, an hmingsawilang lo mai ila. Tunah hian computer set 199 hi VC hnenah kan pe tawh a, 2021-2022 chhungah hian set 500 sem leh tur a ni a, tunah fund kan dawn chin computer set 50 lei tum mek niin kan inbuatsaih mek bawk a ni. Chu chu VC house thar sak leh repair leh computer set chungchanga ka sawi theih a ni a.

Pu Zodintluanga zawhna, “LAD hi duat an ngai a, thawktu an tlem a thingtlangah hian tihmasawn an ngai” a tih kha a dik khawp mai. Thingtlang khua a work te te - step rem te, leilawn dawh chi te dilna hi a tam em em a, hei hi kan mamawh tak zet a. Tin, ‘Runlui leh Undermanik sub-village te an la inthlang lo’ a tih kha, hei hi ka lo hre ve chiah a, kan lo inthlan tir vat turin a rang lamin hma kan lo la ang tih ka sawi duh a.

Tin, Pu Lalduhoma, Opposition Leader zahawm takin, “All Mizoram Village Councils Association’ chungchang a rawn sawi kha, ‘dinglaite din reng lain an inthlang thut mai; MNF tamna a ni a, dan ang pawhin inthlang se...’ a tih kha a dikna lai chen pawh a awm mai thei a. Lehlamah chuan Covid hri len lai a ni a, kan VC hrang hrangte inbe rawna rawt a ni awm e. Hei hi pawmpuina an rawn dil a, kan han ti dawn thuak thuak a, amaherawh chu approval kha kan cancelled sak leh a. Anmahni association thil anih avangin tha an tih anga an kalpui mai leh Mizoram tana tangkai zawka an kalna tura tan a ni (association kan duhsakna chu thu hran ni se) tih laiah khan ka duhtawk mai ang a.

PU LALDUHOMA : Sorkar approve pawh ngai tur a ni lova, sorkar din pawh a ni lova, anmahni indin chawp ve mai a ni a. Inthlang ve se la a tha a, ruat khan an inruat deuh mai chu anih kha maw. Kha kha chu a mawi lo deuhhleka. Tin, a reng rengin khatah khan sorkar zuk inrawlhna tur pawh a awm lem lo, anmahniin an din ve kha a ni mai a. Chu chu dinglaite la awm reng lai a, district level-ah te pawh an awm thliah ta a, ‘khatia han intihnan kha chu a fel lo deuh mang e’ an ti a, an phun neuh neuh bawk si a, ka rawn sawi ri a ni e.

PU K. LALRINLIANA, MINISTER: Pu Speaker, anmahni thahnemngaihnaa inthlang an ni a, ‘inthlang rawh u’ pawh kan va tih miah lova. An inthlan zawh hnuah approval an rawn dil a, ‘a ngai lo e’ kan ti zawk a. Chutiang chuan tunah hian an kal a, anmahniin tul an tih chuan an la inthlang tha leh mai turah pawh ngai ila. All Mizoram Village Council a ni a, an pawimawh khawpin ka hria a, thahnem pawh ngaihpuitlang ila a tha awm e.

Tin 15th Finance Commission *untied-fund* atanga 10% Admin cost chungchang kha, a Dan-ah chuan VC ten an stationery man tur leh eng eng emaw an Panchayat kohkhawmnaa tul an tih anga hmanna tur 5% te, tin, a dang 5% chu Social Audit ten an hlawh an lo pekna tur atan te tih a ni a. Khang Admin cost chungchang hi kan department ten an han zir a, tunah hian Panchayati Raj tluantlinga kan la kalloh avang hian, State dang Panchayati Raj system tluantlinga kal, 2 tier, 3 tier system-a an kal ang hi kan la nih ve loh avangin, VC ngau ngau chauh hi kan nei a, a bak zawng kha LAD-in engkim kan kenkawh a ni lawi si a. Engineer in an hnathawh han enpui, han vil leh computer hmanga hmalakna zawng zawngah pawh kan DLAO Office an hah em em mai a ni. Chuvang chuan, he mi kawngah hian department-in a ngaihtuah a, a tak takah chuan 5% hi VC ten chang se, 5% hi DLAO te hian hmang zawk ta se, DLAO bial pakhat chhung a zau si a, an hna endik tur hian JE te an hah si a, ‘hei hi a tha lawm ni’ tih rawtna an rawn siam a. ‘A tha mai ang a’ tih ngaihtuahna te pawh kan han hmang rum rum nachungin ‘i la ngaichang rih teh ang’ tiin, finance department aiawhte pawh lo telin ngaihtuahna kan han hmang a. “PRI Ministry-ah dil ila, i zuk thlen teh ang” tiin, tunah hian dilna finance department in an siam a, kan nghak mek a ni. Kha kha *Admin-cost* chungchang ka chhanna ni se. He mi a hranpaa social media-a lo lang ang, ‘rethei zawkte eisak tum’ tih ang chi kha chu, ‘a ni lo e’ tih kha ka rawn sawi duh a.

Tin, ‘Penal Interest’ chungchanga 141 lakh finance atanga kan dawn tawh chungchang leh, ‘hei hi tlai tawh lovin a hun takah pe thei se’ tih chungchang kha chu duhthusam a ni a. Amaherawh chu central lam atanga an rawn pek danah pawh a tlai ve hrim hrim thin a. Tin, helam finance-ah harsatna kawng hrang hrangte a lo awm a, *Ni 10* chhunga inpe tur hi chuan an hman thei tak tak bik lova. A department ang chuan, ‘tlema a lo tlai deuh chuan, tlem kan hmuhbelh dawn a, a tha’ ti tein kan fiamthu mai mai thin a. Engpawh ni se, ‘kan hmuh theih chin tawkah kan la hmu tluang zel a ni’ tih kha ka rawn sawi duh a.

Tin, Keifang Venglai VC chungchanga zawhna rawn react tura min tih kha – Nilaitawhtan zana (3/3/22) kan haw khan a file hi ka hnen a rawn thleng chiah a. Hetah hian sawilan kha a ni a, Revenue Department Demand kan sawi khan Opposition Group Leader Pu Lalduhoma’n a sawi tawh a. A file lo thleng ve chiah chu ka han en a, *Ombudsmen*-in a duh dan a rawn ziah te pawh ka chhiar a. Engpawh ni se la, hei hi chu a hmian *Ombudsmen* tena ruahmanna an siam ang zawm lem lova VC han dissolve palh te pawh a lo awm tawh thin a. Court lamah an kal a, department-in thiamloh chan changte pawh a lo nei tawh thin a, kan hunah te pawh hian kan nei a ni. Chuvang chuan, “chutiang a awm tawhlohna tur atan chuan anmahni pawh an thiamthu sawi hun hawn sak ve ila” tih te pawh ngaihtuahnaah a awm mek a. Tunah hian file kal lai mek a ni a, ‘rang takin, a tul anga hmalak tum a ni’ tih ka rawn sawi tel duh a.

LAD hian VC-te tha tihchakna tur atan hian ‘Dan thar duang ila’ kan ti a, drafting committee pawh kan din a. Chu drafting committee chuan hma a han la a, covid avangin inkohkhawm a harsa viau chungin an inpeih thawkhat tawh a. Chief Minister hnenah pawh kan thlen a, ‘kan zirchianna tur atan engnge tha ang,’ kan ti a, power-point presentation pek kan duh laiin, covid avangin kan harsa si a, ‘sawifiahna atan draft copy siam ila, MLA tin lo inzir tlang ila,’ tiin thu minrawn a. Chu chu tunah hian kanrawn sem ang a, VC tam zawkin an chhawr tur anih dawn avangin, member ten taima taka min lo enpuia min lo zirchian saka, rawtna dang tha zawkte pawhrawn nei turin kan han ngen nghal ni se.

Tin, VC-te tualchhungah ei leh bara kan intodelhna tur atan *local economic project* kan department lamin an han siam a, central sorkarin fund pawh min pe a. Bilkhawthlir-ah khuan project te-tham deuh kal lai mek nuai 49 man kan kalpui mek a, kuhva kawra thil siamchhuahna project kan kalpui mek a ni. Tin, *Rural Home-stay* Tuipui ‘D’, Darzokai-a project kan neih mek hi nuai 84-a sak kan tum a, ‘Handloom Design Training-cum-Production’ project Thenzawl-ah kalpui kan bawktum a, nuai 141 lai handloom lama tuimite tan kalpui kan tum a, an ni saw handloom lama tui mi an tam avangin.

Tin, SIRD & PR nena kan thawhhona kaltlangin VC-te leh line department official-te hnenah training pek thin a ni a, Covid-19 hrileng karah pawh a theih ang angin online hman gin training pek thin an ni. Tun financial year 2021-2022 chung pawh hian training batch 48 lai kan lo conduct hman a ni. Training inpek hi a ngai khawp a, corruption pawh hi a tlem zawkna tur atan leh sum leh pai lokal pawh a nihna tur takah a thlen theihna tur atan tiin, Dan leh Dun pawh tam tak arawn duang a, chungte chu zawm har leh kan la tih ngailoh tamtak tihngai a awm thin avangin, training kan inpek hi a ngai tak zet zet a ni.

Pu Speaker, member zahawm tak ten in zawhna ka la chhan kimloh chu ‘Park’ chungchang kha a ni a, ‘park hi *outsource* tumna a awm em’ tih zawhna a ni a. Kan tuma, tunah hian kan tender mek a, tender hi anrawn chhang a, a thenin an chhang lova, covid lai anih avangin rin ai takin a chhangtu kan hmu tha lova. ‘Savunga Park leh Muthi Park bakah district hrang hranga district park kan neihte pawh outsource a tha ang e, staff kan indaih lo bawknen’ kan ti a. Chutiang chuan tunah hian kan kalpui mek a, chumirawn chhangte tihfel erawh chu kan la peih hman chiah lo a ni.

Tin, Finance Commission Grant, 2020-2021 kha Pu Mathlana khan, ‘budget-ah a in reflect lo’ tih kha a sawi a, kha kha hriatsual palh a ni mai thei a, ‘93 crore’ kha a in reflect a. Kha kha eng emaw palh awmthei thil anih avangin ka han sawichiang duh a.

DR. VANLALTHLANA : Pu Speaker, ‘kha kha, khawilaiah nge a in reflect’ tih kha min kawh hmuh thei em aw? Annual Financial Statement-ah khan ‘45 crore’ tih kha a ni a, phok thumnaah khan. Tin, Receipt Budget (page 42)-ah khan 45 ‘crore’ tih kha a ni leh a, kha kha Urban Local Body-a kan dawn a ni a, ‘Rural Local Body’ tih kha khawiah nge a inziiah aw kan budget document-ah khan, actual 2021-2021 a ni a?

PU K. LALRINLIANA, MINISTER: Pu Speaker, ‘Assistance to Rural Local Bodies’ tih khan a inziak a, *non-salary* leh ‘grants for creations of capital assets’ tih, Demand for Grant, 2020-2021-ah khan a inziak a, hei a copy pawh ka kawh a. Khalai kha eng emaw hmuhsual palh pawh a awm thei awm e. Kha kha ka han sawifiah ni se, khang kha LAD atanga kan han inhrilhfiiah theihthe chu ni mai se, a sei lutuk dawn a. LAD atan chuan duhtawk dawn mai ila.

Pu Speaker, FCS & CA Department, Demand No. 17 hi member zahawm tak tak 24 laiin min sawipui a, heti taka min tuipui hi ka lawm hle a. 99% hian Supply Department hmalaknaah lawmthu an sawi a ni. Pu Speaker, a lawmawm ka ti takzet a ni. Supply Department hi staff kan indaihlo chung pawh hian a te bera tanga a lian ber thleng hian thahnem an ngaihna hi ka sawi fo thin a. Chawh te hi kan thlahlel hleitheilo a ni, Inrinni te, Good Friday tea committee a ngaih chang te a awm thin a, Covid-19 hluar lai phei kha chuan a tam leh zual a. Tin, zan khaw thim pawh sawi thei lovin tan kan la a, Pathian malsawmna te hi kan dawng leh zual a ni. Mipui ten min support a, kan department kaihhnawih driver-te, motor neitut, heng zawng zawngte pawh hian thahnem an ngai a ni. Covid-19 hrileng karah kawngpui danchah a ni a, lungawi lo deuh pawh ni se, ‘kan tanrual a ngai anih hi’ tiin, an thahnemngaihna avangin, ‘a ni taka lawm’ an ti thei zel a. Khang zawng zawng rilru hmunkhata min siamtu hi ‘kan Pathian a ni’ tih hi vawinah hian ka sawilo thei lova, kan inlungualna tura min tanpuitu hi kan Pathian a ni. Buhfai leh gas sem chungchangah te, diesel leh petrol te, heng zawng zawngah hian lawmthu sawina kan dawng hi a ropui ka ti a, lawmawm ka ti takzet zet a ni. Company lam ho thleng pawhin a ni a, kawngpui danchah anih hmasak pawh khan Manipur lama kan la tur te kha kan Chief Minister zahawm takin Manipur lama a biak theih theihthe min biak sak a, Chief Secretary-in a Chief Secretary puite a be bawh a, Police lamin chutiang bawkin. Mizoram leh Manipur inkarah helte an awm bawh a, ‘engtingge ni ang’ tia lungngai deuha kan awm lai te khan, ‘an thingpui inna tur te in pai ang a’ te kan ti a, chutih laiin an niin thingpui an lo lum sak zawk a. Khilaila kan Mizo-pui awm ten, ‘in nghei ai chuan’ tiin an lo tanpui a, bottling plant-ah te, oil depot-ah te an lo va hruai a. Chutiang chuan kan driver te leh handyman te an lo thlamuan a, tluang takin kan inphur thei a nih kha.

Nikuma kan buai leh dawn pawh khan thil mak deuh chu, Manipur atanga phurh dawn chuan a kawng a thui si a, Tripura lam a hnai a. Kan buai hmasak khan kan Chief

Minister zahawm takin, ‘Bairabi to Zamuang road siamthat a ngai a, Langkaih leilawn siamthat a ngai bawk’ a ti a. Chief Engineer te khan a hmuna riahchilhin hna an thawk a ni. Tuna kan E-in-C thar, Pu Bowman pawh hi a hmunah a zuk riak tlah tlah a ni. SE te, EE te pawhin thahnemngai takin an thawk a ni. Langkaih leilawn an chei tha a, Teirei leilawn an tichak a, sum awm ang angin black top hna an thawk a. Kan buai leh pawh khan Tripura lam atangin awlsam takin oil leh gas te kan phurh theih phah a ni. Kan department hotute nen Hachhek tlangdungah te kan zuk kal a, DC te leh SP te nen pawh meeting te kan nei a, khatiang buaina kha a lo thleng dawn tih kan hre lawk lova. ‘Eng emaw palh pawh thleng dawn se, Tripura nena kan inkar boruak te kan tihthat a ngai a ni’ tiin kan zuk kal a, buaina alo thlen pawh khan awlsam takin oil leh gas te kan phur lut thei a ni.

Hemi piah lamah hian National Food Security lama kan quota te pawh hi kan rel kawng an tihchhiat avangin ‘Dharmanagar Railhead-ah FCI godown a awm a, heta lak hi min phalsak rawh u’ kan ti a. Min rawn phal sak a, mahse kan phur hman em ta lova. Central lam atangte pawhin phurh phalna min pe hman a, FCI-in an remti a, allotment tepawh min pe hman vek a ni. Chutiang chuan Mizoram mipuite hi Pathian-in ei leh in tur kan tlakchham lohna tur hian min hmangaihna a rawn lantir a ni. Heng zawng zawng hi lawmawm ka ti em em a ni.

Awle, member-te thusawi rawn react tur tam tak a awm a, Pu Lalrinsanga Ralte, MLA zahawm takin a biala staff quarters repair ngai a sawi kha, tunah hian hmalak tura kalpui mek a ni a. Tin, Pu KT Rokhaw, member zahawmtakin ‘Siata leh Chakhei-ah te kudam sak a ngai, monsoon stock a ngai a ni’ a ti a. Tin, Legal Metrology staff indaihlohna te a rawn sawi a, hengte pawh hi tunah hian buaipui mek a ni. Pu Zira, Mamit bialtu zahawm tak khan, ‘Grade-IV pahnih chauh kan nei’ a ti a, a nei chhe ber an ni a, khangte nen a dang dangah pawh kan indaih lo a ni. Lawngtlai-ah pawh kan han hawng tak nain indaihlo tak kan la ni a. Pu Biakzaua khan lawmthu kha a rawn sawi a, lehlamah a nawr namen lovin min nawr a, kan hawng a ni mai a. A tul pawh a tul a, mipuiten kan mamawh consumers affairs chungchang hi central sorkar pawhin a ngaipawimawh a, Mizote mizia pawh a ni. Dik taka kan chanvo tur kan chan theihna tura tana hmalatu tur staff-te hi kan neih belh a ngai khawp mai a, ‘theihtawpin tan kan lo la zel ang’ tih kha kan han sawi duh a.

Tin, Lawngtlai District-a Sangau RD Block hnuai mi kha Lunglei DCSO-in a lo bial reng a lo ni a, heng te pawh hi bialtu MLA, Pu Biakzaua pawhin, “E, helai hi tih ngei ngei a ngai a ni, anihloh chuan ration card siam chungchangah harsatna kan tawk nasa a, hei hi chu kan tih a ngai a ni,” tia wawi 2 wawi 3 kan buaipui hnuah tunah chuan DCSO ramri kan han siamtha a, Pu Speaker, chutiang chuan tunah hian Lawngtlai DCSO hnuai enkawl turin ruahmanna kan han siam a.

Tin, gas bottling plant chungchang zawhna a awm bawk a. Gas bottling plant hi tihlen tum a ni a, kan Chief Minister zahawm takin hmannah zawhna hrang hrangte chhanna a rawn sawiah khan a, “NHIDCL ten four-lane road kaltlang tir an tum a, kan gas bottling plant khu a tichhe dawn a, amaherawhchu a chhiat dawn vang te pawh a ni ang a, a hrim hrimah sawlai Tlawng kama four-lane road kaltir saw kan zo lo a ni; a ram leilung pawh nikum hmasa lawkah a mualin a tawlh a, chuvangin hei hi ngaihtuahin tih chi a ni lova, kawng thar ruahmanna siamah kan kal dawn e” a tih kha keini department lam chu kan lawm khawp mai a. Revenue Department lamin land lease-te min tihfel sak a, tikhan kan han hlan a, relo teah hei hi kan kalpuiin ka ring a. A company lam pawh, ‘four-lane road a kal dawn e’ tia an inhrilhriatna te a awm a, amaherawhchu tunah chuan rilru hahdam takin kan mamawh em em gas bottling plant te kan nei chho thei dawn a, tunah hian chak taka kalpui tum mek a ni a.

Tin, oil depot chungchang kha kan sawi a, Pathian zarah sorkarna kan han neih khan, oil depot hi IOCL lamin ‘Sihmui Railhead-ah khuan nei thei ila’ an ti a, a hmun te an rawn kawhhmuh a, earth-work a ngai hnem si a, an duh a kha km khata thui emaw, ‘a tlem berah meter 800 tala thui, a zau zawng pawh zim thei ang berah meter 60’ tih kha a ni a, an beidawng a, ‘hmun dangah enchhin ang u hmiang’ an ti a, kan en a, Bairabi-ah kan en ta a, Bairabi-a ‘rail-crossing’ an tih lai motor ina rail kawng a cross-na lai atanga police station inkar lai khu enfel niin kan Chief Minister pawhin vawi thum lai min enpui a.

Tin, central-ah te pawh kan zuk thlen a, central minister pawh kan zuk hmu a, anni pawhin tha min tihpui a, State ve ina oil depot neihloh ngawt kha chu mak pawh an ti lehling zawk a. Chutiang chuan phur pawh min phurpui viau a, kan DC te a hmun leh hma lo tifel tura tih niin ruahmanna te an siam fel vek a, Revenue Deptt-ah tunah hian a tang mekin ka hria a, chutih lai mek chuan IOC te ram rawn zawrh an awm leh a, Sihmui-ah “meter 800-a thui, meter 60-a zau rama awm thei, chu chu min endik pui rawh u an ti a” kan endik leh tawh a. Kan Secretary te, kan Director te, a search committee chairman kan Joint Director te pawh an hah hle a, an kal an kal a, chutiang chuan tunah hian a hmun kan han en te pawh “engnge an duhtusam a ni dawn em, anmahni nena enho leh a ngai a ni” tiin thudah kan nei mek bawk a. Chihnih in thang kan kam anih chu. A rang lama kan neih theihna tur atan theihtawpin tan kan han la zel a ni tih laia kha kan mamawh em em anih avangin kan sawi kai leh a.

Tin, kudam hi nichin khan sawi a awm nual a. Central Sector Scheme atangin GIA 10 sakna kan hmu a, kan luah fel tawh a, kan lawm khawp mai a. Tunah hian kudam 21 kan Chief Minister zahawm takin NABARD loan lak min phalsak a, 21 kan sa mek a, 90% vel kan zo tawh a, 2 chu hmanni khan kan hawng a. A thente pheih chu a courtyard leh side-drain te pawh siam hmam monsoon stock kan duh tawh avangin a

chhung peih tawh chuan tiin kan invawmlut nawk nawk a, tunah hian eng emaw chen chu buhfai kan dah a ni. Chutiang chuan rawng hnawih leh internal electricfication tur electric wiring hna tichep tur khawp te pawhin buhfai kan stock lo thei lova. Hma kan la mek zel a, reilote-ah kan sak zawh theih kan inring a.

Tin, tunah hian kan kudam sak that ngai sawi kha kan tam mai a, Dungtlang leh Farkawn kha Pu Ramthanmawia khan a sawi a, Lungpher leh Vawmbuk Pu Biakzaua khan a sawi bawk a, Siata leh Chakhei kha Pu KT Rokhaw khan a sawi bawk a. Kudam sak ngai hi kan la ngah khawp mai a, Tualcheng, Rabung tih te, a tam mai a. Tin, staff quarter leh building pawh chutiangan. Nichina Er. Pu Zira sawi Mamit DCSO office, 2019 thlipuiin a tihchhiat khan a rem remah DD-in a vawm bei tir a, chungte chu a thar kan la sa thei lova. Tunah hian ‘kudam atanga savings kan neih atangin pakhat sa tawp mai ang’ kan ti a, kan inruahman mek a. Kolasib pawh chutiang chiah chuan, DCSO office kan sa tawh a, Mamit hi sak leh kan tum a ni.

Chutiang chuan staff quarter leh office tam tak sak ngai kan nei a, a sak theihna tur atan planning-ah te kan thehluat a, tin, NABARD loan te pawh kan han dil a, ‘a khawi nge lokal ang a, engnge kan hmuh dawn’ tih hi tunah tak hi chuan kan la sawi chiang thei lova. Khang kudam te kha a lo far hlek chuan buhfai tihchhiat hi a tam thei si a, churang chuan, buhfai chhia a awm tawh lohna turin kudam 31 te hi chu han sa leh ila chuan Mizoram pumpuiah kan zia awm sawt dawn a, office building leh staff quarter a bulhnaia awm thei tur nen kan sak chuan a zia sawt dawn a ni.

A hma khan Pu Speaker, dik tak chuan a lo chhe hlawm lutuk a ni. Minister zahawm tak Pu Chhantea bial Ratu kudam phei chu a bulah kan ding a, kudam a ni tih ka hre lova, silpaulin in an lo khuh luk a. ‘Hei hi a ni a’ an ti a, a chhungah ka han lut a, kudam chu a lo ni ngei a. Khatiang te kha tunah chuan kan sa zo thawkhat tawh a ni. Chutiang chu kan dinhmun a ni a, a dangte pawh hi sak ngai tak tak a ni. Reiloteah hengte hi Pu Speaker, a fund hi kan neih theih chuan Mizoram pumah kudam tha kan nei chho thei ang a, staff te pawhin chenna tha te pawh an nei chho thei tawh ang a. Kan kudam te pawh hi diktak chuan khua atanga fal deuha awm te a lo ni thin a, staff te han awmchilh ngai te pawh hi a nih thin avangin kan mamawh em em mai a ni.

‘OMP kan lei thin hian tender chhuah a ni thin em’ tih kha, hei hi zawhnaawm tak pawh a ni a, sorkar hmasa pawh khan OMP hi a lo lei tawh thin a. Kan supply manual, 2008 (chapter 2.3)-ah chuan, ‘food stuff leh essential commodities-te chu government agencies atanga lei tur’ tih a ni a, a leinaah harsatna a awm a nih chuan, *competitive tender* kaltlangin agency dang hnenah a lei theih ang’ tih a ni. Chu chu kan supply manual-ah a inziah dan a ni a. Sorkar hmasa hunlai khan an lo tender tawh a, a chhangtute khan an chhanna a hniam avangin an han supply chhin a, an ti zo hleithei

lova. Chuvang chuan ruahmanna felfai takin an siam a, Mizofed hnenah an pe ta a, an supply chho ta a. Mizofed ten an supply chho ngar ngar a, kan hun hnuah pawh an supply zel a. Hun eng emaw ti chho atang khan ZIDCO hnenah kan han pe chhawng ve leh a. Chutiang chuan tunah hian kan kal chho mek a, ‘kan tender chhin tawh dawn em maw ni le’ tih hi chu kan sawi chho uk uk tawh a ni. Covid avang hian thiltih te a lo harsa a, chuvang chuan tun hun hi kan thleng a ni.

Tin, Pu Rindika Ralte, Pu Vanlahlana leh Pu Duhoma, kan opposition leader te pawhin bukna dik lo chungchang kha kan ngai pawimawh tlang a, midangte pawhin kan sawi a. Bukna diklo hi a ngaimawh awm khawp mai a, hetah pawh Pu Speaker, ka sawi tawhin ka hria a. Thil mak deuh mai ka tawn ka han sawi nawn leh ang a.

Zan curfew tih lai khan driver atangin complain ka dawng teuh a, ‘kan chawibelh ziah mai a’ an ti a. Tanhril atanga Muanna Veng, Zuangtui kudama an buhfai phurhah khan quintal hnih/thum tein an short thin a ni. A mak hi ka ti hle a, “department te nen i endik teh ang, Tanhril-ah an buk lai en ila, an load lai en vek ila, load lai leh an buk lai kan endik vek ang a, kan zui chho ang a; truck hnungah chiah kei ka kal ang a, department kha ka hnungah kal se” ka ti a, Zuangtui thlengin kan zui a. Tichuan weight bridge-ah kan lut chiah a, an han teh a. An teh hmasak ber kha a laiah an han tiding a, quintal 2 chuangan an chawi belh ta a ni; bo thlau a awm reng reng lo, ka hmuhpui thlap a ni, department lam te nen. ‘Han ti tha leh teh u’ ka ti a, an han back leh a, a lai taka ding lo khan a sir veilam deuhah kan han din tir leh a, a la chawi belh tho a, tlem a chawi belh tur kha a tlem deuh a. A chawibelh zat chiah a figure kha ka sawi thei mai lova, Pu Speaker. ‘Han ti tha leh teh u’ ka han ti a, dinglam sirah kan din tir leh a, a aia tam kha chawibelh turin a bukna kha a lo awm leh a ni. Legal Metrology lam hruaitute nen kan kalkhawm a, kan kal ho vek a, ‘hei hi chu cancel nghal rawh u, hman tlak a nilo anih hi, driver sawi hi a dik a ni’ kan ti a, kan cancel ta nghal a.

Chutah chuan ka han han ngaihtuah a, a thlakna turte department lam nen. Kan Chief Minister hnenah pawisa te kan dil a, rang takin min pe a hman phalna pawh. Tichuan, ‘FCI company hman ngei Bukna hi i hmang ve ang u’ tiin a lei theih dan tur kan ngaihtuah ta a. Sum pawh an dan angin, ‘chumi zat percent chu min pe hmasa rawh u’ an ti a, kan pe a. Chumi hma pawh chuan digital weighing machine leina kan dil a, pasarih lai kan lei a. Kha weight-bridge kan cancel chhung pawha kan lo buk lailawkna tura tan khan digital weighing machine kan lei a, chu chu Zuangtui-ah sawn kan la hman ngar ngar a ni, qtl 20 chiah a buk thei a. Chungte chu hmundangah pawh dahin kan hmang nual a ni.

Tichuan, weight-bridge kan chah chu tunah hian a lo thleng a, pahnih kan chah kha pakhat Zuangtui-ah, pakhat Lunglei-ah bun ila kan ti a, a foundation kan laih tir a,

Leo Service Company te an in prepare chhung a rei khawp a, kum a daih a ni. Delhi-a kan RC te pawh, ‘va kal teh u, a hmunah’ kan ti a. A company headquarters kha Delhi atanga km 80 vel a ni a, an va kal a. khatiang khan kan tur fe hnuah kar hmasa, hmasa leh khan a lo thleng a. Chung chu a ni a, kan duh company kha, ‘FCI hman company hmang ila, harsatna kan tawk tawh lovang’ tih kan ngaihtuahna avanga chu chu ti kan ni a. Kan han enchhin dawn a ni a, member zahawm tak tak ten in sawi, ‘bukna hi a dik mawh riau mai lai hi chu hriatthiam a harsa’ in tih ang khan, keipawh mak ka ti a.

Ni e, e-post machine kan hmang a, kan hman hnuah te chuan a thlunzawmin electronic weighing machine hman ngei tur te pawh hi kan ti a. Chutichung pawh chuan, dik thei lo te hi a lo la awm ni tur a ni a. Engpawh ni se, heng a dik theihna tur a tan hi chuan ration latu mipuite nena kan tanrual a ngai a ni. A dik lo chu ‘dik lo’, a dik chu ‘dik’ ti a kan kalpui hi a tul tawh ka ti a. Nichina kan sawi Keifang Venglai VC-ah pawh khan, kei ka ti a, “a dik chu ‘dik’, a dik lo chu ‘diklo’ a ni tur a ni” tih hi ka ngaihdan a ni tawp mai a ni. Tichuan, tunah pawh hian buk lung buk diklo pawh hi inmanchhuah a awm phawt chuan inhrilh a, a theih ang anga a dik lohna lai hmuhchhuah tum hi kan tih tur ber te pawh a ni a, kan tan tlan a ngai a ni.

Tin, Aadhar card link thalo chungchang Pu Nihar, Pu Ngunlianchnunga leh midang dang pawhin an rawn sawi a. Card revision kan kalpui mekah hian VC zawng zawngah, VC pakhatat retailer pahnih/pathumte pawh an lo awm thei a, khatah khan selection committee kan din a. Kan card hmanlai hi dik tak chuan, 2011 census base-in National Food Security Act-a beneficiaries te hi thlan an ni a, khang a beneficiaries te khan a quota hi kan la ei pha lo zawk mah mah thin a ni. Tin, mihring dinhmun hi a inchen lo va, entirnan: khang an thlan hmasak hunlaia mi AAY dawng thei an thlan te kha a then chu sorkar hnathawkte, sumdawng hausate pawh an lo ni tawh a. ‘PHH’ kan tih te leh APL ngei, khatih laia mite pawh kha an lo tlachhe ve leh thei tawh bawk a. Chuvang chuan, ‘revision kan tih a hun tawh a ni’ kan ti a. Kan han ti a, hei kum hnih dawn kan bei tawh a, tunah hian ‘99% te chu kan zo tawh lo em ni’ te chu kan han ti tak nain, nichin khan member zahawm tak takte hnena tangin link tha hleitheite lote pawh kha kan han ngaitla a. Heng te hi, ni e, aadhar leh ration card in link theihna tura tana hmalatu, aadhar card siamtu te kha an pawimawh ve leh a, SAD lampangah. Kan han innawr a, DC lam te pawh, chu chu tunah hian kan la kalpui mek a, ‘engtin nge heng te hi a kim biaia kan tih theih ang’ tih erawh hi chu thil harsa tak a ni a. Ration card dinhmun hi, ‘waviin niah chuti zat chu a ni’ kan tih hi nikhat chhung hian pem leh ration card thlak leh hi a tam em em mai a, chuvangin, harsatna tam tak kan tawh a. Central sorkar pawh hi a mangang a ni ang, ‘one nation, one ration card’ tih te pawh a rawn tichhuak anih hi. ‘One Nation, One Ration Card’ tih te pawh hi tunah hian kan ram, Mizoram State-a hian enjoy mek mi 74 vel kan nei a, ram dang atanga lo kal AAY leh PHH ration card holder-te pawh, State dang atanga lo kal pawh nise hetah an la thei tlat

a ni. Keini pawh kan State hmun dangah va kal ta ila, AAY leh PHH te pawh hi Fair-price Shop-ah va kala la mai thei tura central sorkar-in ruahmanna a siam a ni a. Hei hi a tha khawp mai a, chung ang chiah chuan heng harsate pawh ina chhum lo chat lova ration an dawn theihna tur hian ‘One Nation, One Ration Card’ te pawh hi an kalpui a.... (*interruption*)

PU C. NGUNLIANCHUNGA: Aadhar card-a linked lo ho kha ration pek hram dan a awm em le? Chutilo chuan kan bial ang te khu chu a kilkhawr a, adhaar card thla la turin an kal thei lova, an va kal pawh khan alo buaithlak khawp mai a. Tunah khian kg 70 dawng thinte khan kg 50 te an dawng a, kg 50 dawng thin te khan kg 20 te. Hmanni bial ka va kal pawhin an thla te kan laksak ve ringawt a, “tuna adhaar card a linked loh ho kha pek hram dan min ngaihtuah sak theih ang em le” tih kha.

PU K. LALRINLIANA, MINISTER: Pu Speaker, aadhar card linked lote tan buhfai an lak theih nan buatsaih hi kan nei reng a, hei hi kan DCSO te hian an hrilh chianglo nge mipuiah hian, an tan hian special allotment pawh kan siamsak reng a ni a, ration card-a awm tawh thin, a in linked loh vanga ration an lak theihloh ringawt kha chuan a fel lova, an nghei thiang lo kan ti a. Chuvang chuanin DCSO hnenah pawh, ‘chutiang khatiing chuan i pe ang a, an la ngei tur a ni’ tiin directorate lamah pawh thuchhuah siam a ni.

PU C. NGUNLIANCHUNGA: Khangah pawh khan, “Ka Pu, keini chu covid avanga thih kan hlau lo, ei lova thih kan hlau zawk a ni” an ti hial a. A bikin Vathuampui centre kha khawngaih takin kan Minister in min umzui sak se ka duh khawp mai.

PU LALDUHOMA : Aadhaar card nei duhlo hrim hrim ho hi kan bialah pawh kan nei a, engtia tih chi nge ni?

PU K. LALRINLIANA, MINISTER: Pu Speaker, a dik khawp mai. Adhaar card nei duh lo an tam a, Vathuampui kha kan lo hria ang. A bik takin. Pu Ngunlianchunga hian a sawi zing a, ‘ration an la theilo a nia’ a rawn ti a, min rawn phone reng a, kan lo hre dawn nia.

Tin, Adhaar card nei duhlo hrim hrim tan pawh hian *special allotment* hi kan siam a, kan pe ve deuh reng tho a ni. Tin, Burma refugee-te pawh hi kan Chief Minister-in, ‘a tul ang angin lo thawm zel rawh u’ a ti a, DCSO te leh hetiang atanga report kan dawn ang angte pawh kan han thawm ve mawlh mawlh zel a, kan lungawi tlang turah pawh kan ngai a, chutiang chuan kan kalpui mek a NI.

Tin, thil pakhat han highlight deuh duh ka nei a. Non-National Food Security hnuaiah “APL’ kan tih leh ‘ex-godown price’ kan tih kg-ah ₹15/-a la ho zinga khawsa thei deuh te hi a margin hi tihsan deuh te a tha tawh lawm ni” tih te kan ngaihtuahna deuh a, sum leh pai harsatna vang te pawh hian. Hengte hi rawtna nei duh chuan ngaihtuahna hmang tlang ila, a hun ve tawh bawk a ni, alo rei tawh a. Hengte pawh hi mipuite pawhin kan lo hriat tlan atan pawh hian ka han sawi tel mai mai a, a tak erawh chu kan la thleng chiah lova. Chu chu thil kal lai kan ngaihtuahna kan lo hman mek te pawh a ni tel a ni.

Pu Speaker, thil pakhat han sawi tel leh ka duh a, chu chu ka tawpna tur ni ta se. Consumers Protection Act, 2019 hi mipuite pawhin awlsam zawka kan dikna, kan chanvo kan humhalh theihna tur atan tiin Consumers Union leh kan department tangrualin Mizo tawngin an letling a. Ka rilru chuan, vawiin hian member tinin kan chan theihna turin leh kan bial mite pawhin an chan theih turin sem ila ka ti a, ka lo theihngihl daih a. A remchan theih chuan kan department lamin tun Session chung hian rawn sem kan tum dawn nia. Hei hi consumers kan nihna anga kan dikna chanvo kan chan theihna atan leh kan hman tangkai theih turin ka han sawi tel duh a.

Tin, he Dan ina a ken telah hian “State Commission te, District Commission te din tur” tih a ni a, chu chu district tinah pawh kan din fel tawh a, district thar pathumte erawh hi chu ala muang deuh hlek ang a. He Act-in a ken telah hian sumdawngte an ni emaw, tute pawh nise, mipuite chanvo ti bahlahtu leh dan lo taka thil ti leh zawrh ang chi reng rengah hian, chawitir theihna dan pawh hi a rawn sang tawh khawp a. National Commission-ah hian crore 10 thleng pawha chawitir theihna a awm a. Tin, State Commission-ah hian crore 1 - 10 thleng chawitir theihna dan te a awm a ni. Tin, District Commission-ah hian crore 1 crore chin hnuailam chawitir theihna dan te pawh a awm bawk a ni.

Chuvang chuan, hei hi mipuite kan him zawk theih nan central sawrkar pawh hian *consumer forum* pawh hi a ngai pawimawh em em mai a. Keini Mizote rilrem zawng tak pawh a ni ang hian dik taka heng sumdawna kan kalpuinaah te mipuiten kan thiltihna kawng hrang hrangah diktaka kan kaltheihna tura tan keini, vawiina Legislator-te pawhin mahni bial theuhah pawh mipuite kan zirtir hi a pawimawhin ka hria.

Tin, Mizoram Consumers Protection, State Council leh District Council chungchang Rules, 2021 kan han nei te pawh hi tunah hian notify theih thuai kan inbeisei a. Law & Judicial Department-ah *vet* fel tir tawh a ni a, Council of Ministers ngaihtuah turin vawiinah hian ngaihtuah fel a ni tep tawh a ni. Consumers Affairs chungchang hi kan ngaih pawimawh a tul a, chu chu ka han sawilang leh lawk ni ta se.

Pu Speaker, sawi tur tam tak a awm a, kan inchhang sengin ka ring lova. Ka sawi nawn leh duh chu, a sawitu 99% velin supply hmalaknaah lawmthu sawina kan han dawng kha a lawmawm ka ti a. Sawi tawh ang khan Pathian-in Mizote min hmangaihna, kan ram te kan mangan lohna tura theihtawp chhuahtu, a thawktute malsawmnain min vur a, ti hi kan thleng a. Kan lawm tak zet a ni.

Pu Speaker, ka duh tawk dawn tawh mai ang a. Thanhnemngai taka min sawipuitu zawng zawng chungah lawmthu ka sawi nawn leh e.

Tichuan heng ka Demand-te House zahawm tak hian min pass pui turin ka rawn ngen e.

Demand No.	Department	Amount (in ₹)
17	Food, Civil Supplies & Consumer Affairs	2,60,99,44,000.00
19	Local Administration	1,20,64,20,000.00
35	Fisheries	9,29,03,000.00
TOTAL		3,90,92,67,000.00

SPEAKER : Awle, kan Minister zahawm tak Pu K. Lalrinliana'n Demand-te: -

Demand No.	Department	Amount (in ₹)
17	Food, Civil Supplies & Consumer Affairs	2,60,99,44,000.00
19	Local Administration	1,20,64,20,000.00
35	Fisheries	9,29,03,000.00
TOTAL		3,90,92,67,000.00

A vaia belhkhawm cheng ₹390,92,67,000.00 hi House-ah pass a rawn dil a, remti apiangin, 'remti' ti rawh u le. Remti lo kan awm chuan 'remtilo' ti ula. (*Memberte'n an remti a*)

Awle, tunah chuan Minister zahawm tak Pu K. Lalrinliana department-te hman tur Demand No. 17, Demand No. 19 leh Demand No. 35, a vaia belhkhawm ₹3,90,92,67,000.00 hi House-in lungual takin a pass ta a ni. (**Pu K. Lalrinliana, Minister:** Pu Speaker, ka lawm e.)

SPEAKER : Aw, le tunah chuan Minister zahawm tak Pu R. Lalzirliana, kan sawihona te wind up turin kan sawm ang a, sawifiah ngai a tih te rawn sawifiah nghal sela, a demand-te House-ah pass rawn dil nghal turin ka sawm e.

PU R. LALZIRLIANA, MINISTER: Pu Speaker, ka lawm e. (**Speaker:** A ti tawi thiam thiam hi thusawi thiam an tih kha) Ka han ti tawp nghal mai dawn em maw ni chu le. Zan dar 9:15 a ni a, reilo thei ang bera tih ka han tum ang a, mahse, kan MLA zahawm tak ten thahnem ngai takin min sawipui a, mi 25 zetin in sawi a, a lawmawm ka ti a. A tawi lutuk erawh chu a theih loh ang a, kum lama kan naute pawhin darkar khat leh a chanve chuang ve ve an hmang a ni a, darkar 2 te chu a hminga upa deuhna na na chuan han hmang pawh ni ila ‘a awm lo’ an tih pawhin, kan Speaker pawhin pawh a tih vak pawh ka ring lova. Engpawh nise ka han sawi zung zung ang e.

Land Resources, Soil & Water Conservation hi han sawi hmasak ka duh chu, in zawhnate kha han react nual ilangin Pu Lalrinsanga Ralte khan, leilung luang ral tur venna te kha uar takin, “he department hnathawh hi a ni a”, tiin a rawn sawi a. Hemi ti tur hian Soil & Water Conservation hian NABARD atangin tunah hian cheng vaibelchhe 10 deuhthaw, chutiang chu kan nei dawn a, thil chi hrang hrangah hetiang hi kan thawk dawn a ni.

Tin, Pu Lawmawma khan thahnem ngai tak bawkin leilung luang ral zel tur dan a pawimawh zia te a rawn sawi a, a sawi ang khan Mizopa chang kham te, Gabion structure te. kan theih ang tawkin Pu Speaker, kan buaipui ve mek a, hengte hi RKVY te, NABARD te leh Dampa fund atang tea thawh mek a ni.

Pu Nihar Kanti Chakma khan chutiang tho, soil erosion lam a ngaih pawimawh zia thu te a rawn sawi a, khatiang ang kha keini pawhin kan ngaihpawimawh zawng tak a ni a. Tichuan, tuna kan sawi ang khan NABARD sum atangin cheng vaibelchhe 9.90 sengin thawh tum a ni tih kha ka han sawifiahna ni sela.

Member zahawm tak Champhai North bialtu, Dr. ZR Thiamsanga’n, Soil District RO hmun hi SDO (Soil District Officer) hmunah upgrade theih nise a duh thu kha a rawn sawi a, hei hi keini pawhin kan duh khawp a. Amaherawhchu, pawisa awm ang zela ngaihtuah tur leh keini thutlukna mai a ni lova, DP & AR nena ngaihtuah tlan a ngai a ni. Member zahawm tak Pu Lalrintluanga Sailo, Dy. Chief Whip khan ‘rubber approach road hi siam a ngai a ni, heti hi chuan a buaithlak deuh a ni’ tih a rawn sawi a, thahnemngai takin. Heihi keini kan department pawhin kan vei ve tak a ni a, chuangin hetiang ti tur hian ngaihtuahna kan hotute’n an seng mek a. Tunah hian survey-te neiin DPR pawh siam a ni a, ‘khawi atangin nge pawisa kan hmuh ang’ tih kan ngaihtuah mek a ni.

Pu Zothantluanga, member zahawm tak Aizawl West- I constituency bialtu khan kuhva leh rubber chin belh zel a tul zia leh kan rama a that duh dante a rawn sawi a. Amah kha farmer, lo neitupa a ni a, huan zau tak nei a ni a, chuvangin a sawitu nen pawh khan a inhmeh hlein ka hria a. Tunah hian kuhva ching tur SEDP atangin family 1500 kan thlang mek a, hmunphiah hi 4000 kan thlang mek bawk a. Chutiang chuan Rubber Board of India atangin hectare 1300 hmunah kuminah hian chin chhoh tur a ni a, chutiang chuan theihtawp kan lo chhuah ve a. Rubber hi hectare 1-ah cheng 40,000/- in tanpuina (subsidy) an pe thei bawk a ni.

Prof. F. Lalnunmawia khan thahnem ngai taka lawmthu sawi chungin, “kuhva leh thil dangte pawh hi tun budget-ah lang tam lo mahse SEDP-ah a lo chhuak ang” a ti a, tuna ka sawite pawh kha a ni a, kuhva 1,500 chhungkua leh hmunphiah 4,000 chhungkuate hnenah kan pe dawn a ni. Pu K. Pachhunga, Lunglei ‘S’ constituency bialtu khan thahnemngai takin, “hydel project leh catchment area treatment-te pawh hi siam a ngai a ni; Soil Conservation hna a ni a, heng hi tih makmawh a ni” a rawn ti a. Heihi kan ngaipawimawh khawp mai a, keini pawhin kan hna lian berte zinga pakhat a ni a. Chutiang piah lamah a hminga ka department chan ve, Power & Electricity tan hian hei hi a pawimawh lehzual a. Tunah Tuirial-te, Serlui ‘B’te pawh catchment area kan neih tawk loh avangin catchment area-ah khanmi thenkhat ten lo an nei a, thenkhatin an duh ang angin an vat chereu a, hei hi a pawi kan ti khawp mai a. Thuneitu department hrang hrangte nena meeting neih te pawh kan Commissioner pawhin a rawn rawt a, heng hi hun remchang hmasaah kan neih a pawimawh a ni. Chutilo chuan hemi leilung luangral mai tur piah lamah, kan project P&E lama small hydel project Tuirial leh Serlui ‘B’-a kan neihte pawh khu siltation avangin nakin lawkah chuan a pekchhuah ang tur a pechhuak thei dawn lo a ni tih kha keimah pawhin mawl taka kan hmuh ve dan a ni a.

Tichuan, Soil Department-ah hian kumina kan hmuh leh nikum lama kan hmuh - nikum lam kha cheng nuai 160,81,000-in kan phak lova, chuvangin, hnathawh tur tam tak kan lo inrilruk ve angte hi chu, ‘thawh a har dawn awm mang e’ kan tih rualin, RKVY-te, NABARD-te, SEDP-te leh FOCUS atangte pawh hian eng eng emaw tlema zawng te hemi kan budget aia tam te hi chu hmuhloh pawhin, hetiang zat te hi chu kan inbeisei a, tiang chuan kuminah hian hna eng emaw zat te kan thawk ve tawh a, Tuirial camp atangin cheng engemaw zat kan hmu a ni.

Tin Rubber chin nan family 220 Rengdil leh Kanhmun atangin kan thawhtir mek bawk a. Ka sawi tawh ang khan kuhva a pilot project-ah nikum lamah khan chhungkua 300 kan chintir a, chung hote chu hman niah a hmunah te ka zuk kal a, a lo tha hlawm khawp mai a, Kuhva hi kan tih mi tak ni awm a a ni. Ram dang atang pawhin kan ramah

phurh sen loh khawp a lo lut ta emaw tih mai turin a awm a. Hetiang hi kan ram atanga kan thawnchhuah ve ngei tura tan kan lak a pawimawh hlein ka hria a ni.

Nikum ah khan rubber processing unit 100 kan sem a, khang - pipe, Tuthlawh, Bawngthlawh, Suahdur leh thildang te nen. Tin, kuminah hian Smoke-house 50 lai rubber huan neitute kan sak sak dawn nghe nghe a ni. Kumina NABARD leh RKVY-a kan sum hmuh tur hi tun kan budget-ah hian thun hmanloh a ni a, hengte hi BE-ah te, supplementary demand-ah te a lo lang leh ang a. Supplementary Demand-ah khan tam tak lo lang sela kan duh a, a chhan chu central atanga tun kan budget a la lut hmanlo nen, nakina kan thun lehna tur niin kan hria a ni.

Chu chu tawk mai sela, minute 10 dawn ka hmang a Pu Speaker. A dawtah chuan a tam berina in ngaih pawimawh, kan MLA zahawm tak tena an ngaih pawimawh bera kha ka han react zung zung ang a. A kim tawklo mai thei a.

Prof. F. Lalnunmawia'n, 'electric line hlui lutuk thlak tur tam tak' a tih hi a dik a, kan hotu hmasa ten an lo zamna kha a rei tawh a, hei hi pawisa awmdan zelin zawi zawiin kan thlak chho zel a. Tin, 'Hualngohmun lamah transformer hi a tha tawk tawh lo e' a tih kha, 100 kVA kha 250 kVA in February ni 3 khan allotment kan lo pe a, hei hi tih mai tur a ni.

Tichuan Pu Ramthanmawia, East Tuipui Constituency bialtu pawhin, 'ka bial chhunga insulator disc leh polymar te thlak a ngai a ni' a tih kha kan hria a, kan thlak mek a, pawisa awmdan a zirin tunah hian thlak hmabak pawh thlak zel tum a ni a. Tin, '33 kV-line te tower-a thlak ni se' tih kha a pawimawh khawp mai a, ramngawah te phei chuan tower sang deuh a pawimawh a. East Lungdar leh Khawbung inkarah hian 33 kV double-circuit line 10% GBS hnuaiyah funding turin dil a ni a, Electricity Authority-in min pawmpui tawh a, fund hi tunah hian buaipui mek a ni a. Tichuan LT line extension hi hmun tinah ti ila, Aizawl khwpui chhungah te hlei hlei hian kan mamawh a. mihring kan lo tam a, khua a lo zau zel a, khatah khan ban phun belha LT line te siam belh a ngai a, hengte pawh hi pawisa awm dana zirin kan hmabak zel a ni tih kha kan han sawi duh a. Tin, 'Khuangleng, Khawbung leh Farkawn 33 kV sub-Station control room chung phuilo' a tih kha, pawisa awm dana zirin heng hi kan en zel a, tihthat tum a ni. Tin, Tlawva Hydrel Project hi pondage awmlo, run-off ringawt a ni a, khilai khi unit 2 a awm a, (khawl 2) pakhat zawk hi hlawhtling taka test a ni tawh a, pakhat erawh hi chu khami tuikhuah, fur tui tam tak a lo kal zawh veleha a khawl zu khawh vir thei tur khan ruahmanna siamtute khan an lo siam loh avangin a pawi khawp a, chuvangin a hna harsa zawng zawng kan ti zo tawh a, tunah hian commission theih mai dinhmunah a ding a, pakhat la tha lo ang deuha kan ngaih pawh kha an thlak tawhin ka ring a. Tui chu awm se commission theih reng tawh a ni a, chu chu kan hmabakah ka ngai a. Kan hotute

hnenah hian kan la sawi ang a, tuikhuah kha metre 2, metre 3 vel leka tihsanin, tumah compensation pek ngai chuanglo a ni a, hun rei tak khilai khua ten an rin theihna turin furah chauh nilo pawha hman theih kha kan duh dan a ni a, chu chu tunah hian kan hotute ka hrilh hriatna ni nghal baw k sela a tha awm e.

Dr. Vanlalhlana (tunah amah a awm lova) Aizawl North-II Constituency bialtu khan, ‘State chhung power leina hi cheng 18/- nia a sawi kha a hriat sual palh anih ka ring a, thil hi hriat sual awm ve thei a ni a. State chhungah hian mimal roof-top solar leh Tuirial HEP atang bakin state chhungah power lei a ni lova. Roof-top solar leina man hi cheng 2.9/unit a ni a, tin, Tuirial Hydel Project atanga kan lei na hi cheng 6.15/unit zawk a ni e tih kha ka sawi duh a.

Tin, Mizoram-ah hianin hydel project 24 siam tawh niin heng zinga 7 hi hluihlawn tawh a, hengte hi kan hluihlawnna chhan chu a khuahna te kha a lo khah tawh thin avang te a ni tlangpui a ni. Mizoram-a power mamawh hi a sang ve telh telh zel a phai lam atanga power kan leina hi CERC approval ang zela generating company hian an bill thin a ni a, power leina atana budget ruahman hi kum kal taa power leina a tak taka senso zat atanga chhut a ni zel a ni. Kha zawng kha, amah a awm lo baw k a, i duhtaw k mai ang.

Member zahawm tak Pu Ngunlianchunga, Lawngtlai West Constituency bialtu khan, “Sedai Lui te, Duasora te, Mualbuk Lui leh Mualsuri-ah te hian kumin chhung hian electric a luh ve theih nan hma min lak sak thei ang em” a tih kh, hei hi pawisa awmdana zirin hma lak tur a ni a, helaiah hian tu zawhnaah emaw khan electric neilo khua hi kan la tam khawp a, 29 lai niin ka hria a, chutiang vel chu kan dinhmun a la ni a. Heng hi a scheme lo kal tawhte atanga tih-en deuh fur tawhte a ni a. Amaherawhchu, an khaah mite an tlem a, tin, ngawpui teina a hrut tlang te anih avang leh, leimin leh thli ten a tihchhiat avanga enkawl zui hleihtheih lohte pawh a ni nual a ni.

Tichuan, Pu Lalduhoma, Serchhip Constituency bialtu zahawm tak (tuna awm lo baw k) khan tariff chungchang kha arawn sawi a. A sawia ka rinloh deuh pakhat chu, ‘crore 270 a ti nge, 277 zawk’, aw, amah a lo lut chiah a. Hei hi “Power Department hian JERC te nena an sawi dawn khan an lo zep ru a” a tih kha chu a tawngkam a mawi hlel deuh e, helaia pa chan chang tak thu han sawiah chuan. Khatiang zat zat kha ... (**Pu Lalduhoma:** Pu Speaker, JERC hian ‘hide’ tih tawngkam hi an hmang tlat mai a, chu chu Mizo tawng chuanin ‘zep ru’ tihnaah ka ngai deuh a, JERC tih kha ka sawi ve mai a ni, kei chuan). Ani khanrawn sawi kher lo sela a tha a, JERC pawhin, tupawhin ti sela kan engineer-te hi khati em em a koham, hlep ru duh, hlepruk tum emaw, lo thukru emaw an nih theih hi ka ring lo hrim hrim. Chuvang chuan thil mawi lo tak, thil tihsual palh heng figure te chu chhut sual palh awm thei a ni a, eng emaw *mistake*, mihring kan

ni a, tisual thei, kan tidik vek thei lo a ni. Chuvang chuan, theih ang tawka an tihah khan mi phurlohna rawih khawpa tawngkam kan neih thin hi a pawh hlein ka hria a ni. Chuvangin, tunah hian khatiang anga September Ni 30 hma, JERC-ah kan tariff turte hi thehluh vek a ngai a, chu chu JERC-in an lo thlifim thin a. Kumin chhoah pawh khan aggregate revenue requirement hi vaibelchhe 751.42 a ni a, sum indaihlohna hi vabelchhia 277.55, tuna kan sawi nen khan a ni. Sorkar sum indaihlohna hi -

Revenue Subsidy	-	<i>vaibelchhe</i> 109.22;
Grant	-	<i>vaibelchhe</i> 168.33;
Employee cost	-	<i>vaibelchhe</i> 152.95;
R&M expense	-	<i>vaibelchhe</i> 10.18;
Administration & General Expenses	-	<i>vaibelchhe</i> 5.16
Avaiin	-	<i>vaibelchhe</i> 168.33 a ni.

Hemi hmanh hian hnawhkhah tur a ni a, chutiang tur chuan sorkar pawhin commitment min pe tawh a, min siamsak diam tawh a ni.

Tin, thil dang pakhat an sawi leh, “transformer te a lo chhiata va report-na, va lakna emaw, va dahna emaw kha VC-te hian tunah hian an tum ta zel mai a” a ti a. A dik thoin ka ring a, mahse kha kha dan a ni chuang lova, VC-te leh a neitu tur khuate khan kan duh hmanhmawh thin avangin, a dan pangngai anga department-in an rawn dah kha kan nghak zo lova, an mahni hian an la thin a ni a, ‘anmahni kha la tura kan phut a ni lo e’ tih ka sawi duh a ni.

Lunglei khawpui chhungah hian transformer thar an mamawh thu kha Pu Lawmawma Tochwawng khan a sawi a. Tunah hian transformer thar 12 awmsa an nei a, a aia liana thlak tur 26, Revamp Distribution Sector Scheme atang hian ruahman a ni bawh a ni. A hlawhtling berte zinga mi a ni awm e.

Tin, Khawiva approach road estimate chu nuai 404 a ni a. Nikum nge, nikum hmasa lam zawkah nge nuai 120 kan lo pe tawh a, nuai 284 tunah hian ‘special assistant to capital expenditure’ atangin kan hmu a, kan tifel mek a, kawng hi siamthat tur a ni e.

Pu L. Thangmawia, MLA, Lengteng constituency-in a rawn ngaimawh, “heng multi-purpose atan hian inland waterway, horticulture-ina an hman theih tur hydel project-te pawh awm thei se” a tiha kha a tha khawp mai a, tunah hi chuan kan la nei chiah lova. Tuna kan hluihlawn tak deuh, amaherawhchu ‘tihthar leh ni se’ kan tih, kan Chief Minister-te Delhi-a an awm kan thawn thlak leh, ‘Tuirini multi-purpose atan hei hi ni se la’ tiin kan Chief Secretary kalchhuak kha ka room-ah a lo lenin kan sawi dun a. A chhan chu tui lak kan duh a khilaiah pawh, “a hrana khuah ai chuan Tuirini- a kan

khuah tlinza kha pump ve mai ni se a awlsam ang, khilai khaw tam tak tan khian” tih kan sawi tawh a. Chutiang deuh chu kan rilruah pawh a lo ni ve nghe nghe a ni.

Pu KT Rokhaw hian Siaha lampang hi a vei ve a, a bial lam a ni a a vei tur pawh a ni a. 133 kV (single circuit on double circuit tower), Lawngtlai - Siaha hi Ministry of Power-in min pawmsak tawh a. funding source remchang hmasate zawn mek a ni a, nakin lawkah chuan vaibelchhe 46.61 hi kan hmuh mai kan beisei a ni. Tin, “Siaha - Chakhang 33 kV line hi a thara siam theih a ni ang em” a tih kha, 2X2.5 mVA 33.11 kV Sub-Station Chakhang-ah hian siam kan tum mek a, he sub-Station hi Bualpui (NG) nen 33 kV line-a thlunzawm tum a ni a, DPR pawh thehluh tawh a ni nghe nghe a ni.

Er. H. Lalzirliana, MLA Mamit bialtu zahawm tak khan, “Bairabi - W. Phaileng (via Mamit) 133 kV line siam mek hi chak lehzuala tih a duh thu thahnemngai takin a rawn sawi a, 133 kV line hi rang taka tih kan tum mek laiin *write of way*-ah buaina kan nei a, mi pahnih/khatin an rama ban laih/phun leh line kal tir phal lovin, compensation an beisei a. Tunah hian tihfel dan ngaihtuah mek a ni a, a fel har tawhlo turah kan beisei a ni.

Kan hna hi a pung zel a, Mizoram hmun tinah staff indaihlohna a nasa zel a, henge te hi kan sorkar hnathawkte *efficiency* tehna tha takah kan ngai, (kan labelh theilo ta rau rau baw k a). Hmana tam deuh an nih lai ai mah mah khan Electric Deptt-ah chuan eng te hi kan nei tha ta mah mah a, ‘thil pawl lemlo a ni’ ti ila a, sual tampui lo ang a. Pu Speaker, han sawimawi chi vak pheih zawng a nilo ang a. Staff-te kan lak tam theihna turin DP&AR te nen meeting neih a ni a.

Saitlaw Mini Hydrel Project siamna hmun tha tak a awm thu te an rawn sawi a, hei hi a pawimawh khawp mai a. Kan Chief Minister zahawm tak te nen hian lo vah lai khan kan zu kal a, Ex-MLA ho lo intunnun chhoh vena tur leh kan flagship programme ni baw k, bamboo chinna tur hmun kan zuk thlir a, tunah khuan tawi leih luih, tha deuh mai tam tak a awm a. Hmanniah a hmunah ka zuk kal a, chumi mawng lui chu kan zawh a, km 2 dawn lai kha, Mini Hydrel Project siam nan khulai aia tha khu a foundation-ah chuan Mizoram-ah hian pakhatmah a awm ka ring lova, kawngpui atangin km chanve pawh a tling lova. MNF sorkar hmasaa *bamboo link road* an laih bulah khan a ni a, Pathian siamsa pialtlep ft 3 bial vel lung kua a awm a, ka ban pil aia thuk pialtlepin a khuah li sei tak a awm a, kha kha sangha an manna ber a ni a, kha kha Mizoram Pathian-in a siamtirha lo awm tawh a ni chaw k ang a, siltation khata tang khan a la awm miah lova. Hmanni lawka kan siam kum 10 emaw, 20 emaw kal taa siam small hydrel project kha siltation avangin kan chhi thei lova, ‘a khawl a khawhviri zo lo’ kan ti a, tuna mi khu chu a ni miahlo a ni. Chu chu kan hotute hian mut-mawh hnar-mawha min neih sak a, kuminah hian kan tan chuan nakumah chuan thui tak kan thleng thei ang a, Tut Lui

pawhna hi phase 1, 2, 3 thleng a siam theih ang, chutianga kan tih chuan, ‘5 megawatt te chu a pechhuak thei awm mang e’ kan ti a, kan Engineer hruaite pawh an hlim hle a. Tunah hian, ‘DPR han siam rawh u’ kan ti ve ngawt mai a ni.

Dr. ZR Thiamsanga, Khawzawl bialtuin “Khawzawl 132 kV-line pahnihna tur hi North-Eastern Power Committee hian inter-State Transmission Scheme-ah ah min remtih sak theih se” a ti a, hei hian OPGW a keng tel dawn a, remtih tawh sa a ni e. Serlui “B” Hydel project Power pekchhuah tlem em emna chhan chu, kan renovate a, kan renovate dawn khan a tui tam deuh hleka kha a tih theih lova, sah then anih hnu khan khawfurin min kiam san leh ta si a, chuvang chu a ni e. Tin, ‘Tuirini hi engtia hlamzuih nge’ tih kha, hei hi ‘hlamzuih’ a ni chiah lova, loan kan lakna tur ten rem an tih takah khan kan hlim hle a, mahse kan hlim rual rual khan covid a lo leng nghal tlat mai a, kan hri khan nasa takin kan sorkar a hrek a, keini mai nilo, khawvel ram zawng zawng a hrek cher a, ‘hetih chhung hi chuan i ti lo ang’ kan ti a, he hun hi kan thleng ta rih a ni e.

Pu Lalrinsanga Ralte khan, “Serlui ‘B’ Hydel Project hi cheithat ni se” a tiha kha, chumi atan chuan cheng nuai 430 ruahhman a ni a, tichuan cheng nuai 325 SEDP hnuai hmuah tawh niin, nuai 185 tunah hian tihfel mek zel a ni.

Tin, Residential Quarter-te hi a chhe hlawm khawp mai a, ka bula thu pawh hian hmun danga a kal pawh hian a staff-te quarter hi a fang ngam bikin ka ring lova. Chutiang ang chu a ni hlawm a, kan quarter a chhiat hlawm dan chu. Hengte pawh hi pawisa awm dana zirin kan ngaihtuah chho zel a ni. Dr. BD Chakma sawi Indo-Border 11 kV line kha, tunah chak zawka hmalak zel a ni a, BSF-te nen pawh committee an nei fo a, theih tawp kan chhuah zel a ni. Tin, Mizoram chhungah hian LT line hlui tawh tam tak, a biala mi a ngaihpawimawh ang bawh khan Mizoram hmundangah pawh hian a awm a, hengte pawh hi a tul anga thlak chhoh zel a ni. Tin, eng thlen lohna khua pawh hi a tam mai a, *Zawhna* a la chhuak lo nge ni, a lo chhuah hunah chuan kan hre tho ang a. Ka sawi tawh ang khan 29 lai a awm a, hengte hi electric an neih theihna turin funding source zawn mek a ni.

Pu C. Lalmuanpuia’n transformer chungchang a sawi kha, “an biala mi tur kan dah dawn nia” kan tiha kha, keini lam veng pawh min chawmtu tur a ni a, mahse kan dahna tur kha Pu Speaker, a hmun kha a lo buai tak avangin Durtlang lamah kan sawn rih a ni. Hei hi a tul ang zela a hmun te an tihfel hunah chuan kan ti thei ang chu.

Khang kha a tul zual deuh chu a ni a, a kimlo a awm chuan office lamah kan inhmu ang a, kan la sawiho zel ang chu. Duh tawh mai ila, kha kha Power Deptt-a ka sawi theih chu ni sela.

DC & MA-ah hian zawhna a awm meuh lova, helaiah hian tawitein ka han wind up ve ang a.

DC&MA-ah hian, Pu Ngunlianchunga khan vui deuh reuh khan a sawi a, a bial lam a ni a, a vote zawn nan thei tawp chhuaha a han vupui te pawh kha a awm a. Helaiah chuan kan khelh ber te te pawh a ni a. (Dawt a ni hlei nem, tiraw, Pu Speaker?) Kuminah hian vuina tur a awmin ka hre lova, District Council zingah hi chuan, ka department-ah chuan a pung awmchhun a ni, a dangah hi chuan a kiam lam vek an ni a, a kiamna lam kha kan sawi tam duh lova. LADC hi a mal ang pawhin an punna hi nuai 1,968.45 a ni a, a percent chuan 10.49% in a pung a, MADC hi nuai 1,375.24 a ni a, a percent zawng chuan 8.65% a ni. Tin, CADC punna hi nuai 752.96 a ni a, 7.68% a ni. Vuina tur kan zawn chuan, contract te pawh hi han pe ila, tute emaw hian pek leh an rawn beisei a, midang la peklohte kan han pek khan, a vui na na, Pu Speaker, anni duh khawp mai. Chutiang deuh chuan tunah pawh heti zat hian anni chu an pung bik a, mahse a vui awm chhuna kha a ni ta a ni. (...*interruption*...)

PU C. NGUNLIANCHUNGA: Pu Speaker, *Demand for Grant*-a mi kha a ni a, hetah hian nikum atanga Supplementary Demand-ah pawh khan kan hmu ang a, cheng nuai 1,800 pung a ni a, nikumah khan nuai 1,73,695 a ni a, kuminah hian nuai 1,9,36,346 a ni a, kha kha *salary* a ni a. Tichuan, Pu Speaker, nikumah khan *non-salary* ah cheng khatmah a pung lo a ni. *Salary* kha chu thawktute hlawh a ni a, ka vui em em pawh ni lovin, *salary* kha chu hnathawktute hlawh, *khawngaihna* a ni lova, hlawh chu, an thawh hlawha kha a ni mai a, *non-salary* zawk kha.. (**Speaker:** Nikum lam i sawi a, kuminah a pung tawh a, tihlai mek ..)

PU R. LALZIRLIANA, MINISTER : Thil duh bik awmlohna lai chauh kan sawi chuan, a awmna lai kha kan rawn sawi ve ang. Nichina ka sawi ang deuh khan, ani pawh hi..., ka sawi mai dawn em maw ni chu aw, ka sawi leh lo mai ang e.

Ni e, ADC Budget pek dan, salary-ah chuan lo pung pawh ni se, “sawlai saw chu industry chikhatah, sorkar hnathawh hi kan hmang zual deuh bik em ni aw” tih theih a ni a. Kan la char char zel mai a, a buaithlakna lai kha a awm ve thin a. Sum kan hmuhna hi, ‘helaiah a pung lo e’ kan tih pawhin NEC-ah te, NLECPR-ah te leh Ministry dang central-ah hian sum hmuhna tam tak kan nei thin a ni. Chuvangin, chungachte pawh chuan thei tawp kan chhuah tlang zel turah ngai ila. Tunah phei chuan Ministry of Minority Affairs atangin PMJVK sum thahnem tak kan hmu a. DC & MA-ah phei chuan, “khawvel awm chhung tana State kan nih lai leh, kan nih hma pawhin kan PMJVK sum hmuh hnem ber a la ni awm mang e” kan ti a saw lai bialah chuan. Tunah pawh hian vaibelchhe 202 bawr vel kan hmu a, hei hi la hmuh belh zel tur a ni. Tunah hian central hian min pek belh zel an duh a, amaherawh chu, vanduaithlak takin covid

avangin 30% pawh hi kan la thawk lo tlat mai a, tun hunah hian an la rawn release thei ta lo rih a ni. **(Pu C. Ngunlianchunga:** PMJVK-ah khan DC & MA kha *nodal* anih angin a hmu a. Nimahse, District Council-ah pakhatmah pek an ni ve si lova, District Council-ah te pe ve se la, District Council ten thawk ve se la, an kutah awm ve se la.)

District Council pawhin an duh chuan consultant kan ruai a, chung mite kaltlang chuan an rawn ti ang a, anmahni pawhin an thawh ve ngei turin kan ngaihtuah zel dawn a ni. Chuvangin, buana hmaa, nikumah kan hmu tan chauh a, ‘hmuh ve a la awm reng reng lova’ han tih kha chu, a la hma deuh a ni.

Tin, chutiang a nih lai chuan, nichinah khan Lawngtlai by-pass road kha kan han sawi a. Lawngtlai by-pass road hi a buaithlak khawp a, Pu C. Ngunlianchunga CEM anih hun lai niin ka ring a. Tin, Contractor-te pawh hi a thua thlante pawh an ni mai thei a, chutiang chuan helai pawh hi tithei se chu a tha khawp a. **(Pu C. Ngunlianchunga:** Ka hun laia central scheme a ni a. Kha mi thlan chungchangah khan inrawlhna pakhatmah ka nei lo. Official-te nen inhmuin MoU an signed a ni. Khatah khan inrawlhna ka nei lova, kha pawisa kha ka hun laiin chhuak mahsela, keiin pakhatmah ka khawih lo, ka hnua mi ten an khawih a ni). Tichuan, keini pawhin helaiiah Secretariat hian pawisa chungchangah inrawlhna kan nei lova, saw laiah LADC te kutah a awm ang ang te pek a ni thin a. Tender an ko a, tender amount hi 993... chianguangin ka hre chiah lova, ka sawi dik lo mai thei e.

Tichuan, contractor-ah ‘ACSL’ emaw ni kha an ruai a, chutahchuan pawisa tam tham tak contractor hnenah hian LADC ten an release a, chu contractor chuan sub-contractor a lo ruai leh ni tur a ni. Pu Rokima hnenah pawisa an pek ang kha release kim duh lovin eng emaw zat a released a, ani khan kawng tih tham, tunah hian 30% pawh an la lai lova, pawisa chu an hmang zo ti tih vek tawh si a, tlem azawng chauh bang la awm ni awm a ni a. Pu Speaker, helaiia keini hriat danah chuan ACB-ah report a awm a. ACB chuan 152,35,000/- sub-contractor hnenah hian pe niin an sawi a. Amaherawh chu, LADC-in supplementary note an siamah chuan nuai 335.82 released niin an sawi a. Tichuan, tunah hian 30% pawh an la lai lova, a rei tawh si a, kha scheme kha a tawp ti tih tawh si a. Chuvangin, Chief Secretary nen helaiiah hian an thukhawm a, thuneitu ten he scheme hi close turin an ti tawh a ni. Chuvangin, keini tan sawi leh chuan tur a awm lo a ni.

Pu Speaker, Art & Culture-ah hian kum 2021-2022 BE-ah khan nuai 1291.93 kan hmu a, 2022-2023-ah nuai 1159.75 niin, nuai 132.15-in kan tlahniam hret a ni. Kan budget pawisa hmuh atanga 80% vel hi hlawh atana kal a ni a.

Chutiang chuan Art & Culture te hian enkawl kan ngah ve khawp mai a. Pipute sulhnu, an hmunhluai chei leh thil dang dang, kan NGO-te atanga an mamawh han pek ve te leh kan hnam thuam, incheina subsidy-a NGO pek te bakah lehkhahu tha takte a awm a, chungte chu kan leisak thin a. Chumi atan pawh chuan cheng nuai 31,50,000/- tunah hian kan hmu a. Tunhma ai khan lehkhahu zia khiam, thangthar mithiam tam tak, awm awl si, rilru hmang peih kha an tam tawh a, chutiang chuan thu ngaihnaawm tak tak, kan pipute sulhnu leh tun maia Mizoram independent sual chungchang te, vawiin thleng hian thu ngaihnaawm tak tak zia khiam an tam tawh a. Heng lehkhahu leisakna tur pawh hi kan duh belh nasa hle mai a.

Chumi piah lamah pipute hmunhma/sulhnu hlui kan cheisa enkawl piah lamah tunah hian kan martyr-te thlan Luangual-a awm khu Art & Culture kutah dah a ni tawh bawh a. Chuvangin, heng kan ram zalenna sualtute an ruhro kan dahkhawmna te khu zahpuiaawm taka siam lo hian, khu aia nalh leh tha zawk, khualzin lokal te, kan ram mi hmun dang atanga lokal te pawhin ‘hetiang tih awm tak a ni’ tia, an rawn hmuhtheihna turin kan chei hi a pawimawh a. Chuvangin hengte hi kan pawisa duh belhna a ni hlawmin ka ring a.

A tawpna bera ka sawi duh chu – hei, zawi zawiin kan hnam nunzia hi kan kalsan zel niin ka hria a. Pipute ngaihsanna te, aia upa zahna te, rinawmna te, tlawmngaihna kawngah te pawh hian Mizo thangtharte hi kan tlahniam zel niin ka hria a. Kan Mizonun, kan hnam thil reng reng hi hriat tum aia theihngihl hi changkanna emaw ti kan tam ta niin ka hria. Chungte ka ngaihtuah chuan *Chapchar Kut*, theihtawpa sorkar-in kan hman thin, NGO/YMA te kaihhruaina leh mipui tena kan ngaihsan te pawh hi, kan *kutni vang thla* hi han en ila, kan incheinaah chuan kan *Mizo* khawp, kan rilru erawh a *Mizo* chuan siloh chuan kha incheina kha thil tlaktlailo tak, hnawmhne mai a niin ka hria a. Kan *Kut*-ah te pawh hian reilo deuh chu *Kut Pa* te leh Kut thlengtuten kan Zonun mawi tak mai kha an han sawi a, *Chapchar Kut* lo chhuah dan te an sawi thin a. Chumi hnu lamah chuan eng zai zai emaw, sap hla thleng pawha rawn sa hi an awm nual tawhin ka hria. Hetiang ringawt tur hi niin ka hre lova. Chuvangin ka ngaihtuahnaah chuan, Zofate hian rilru thar, ngaihtuahna thar kan neih a pawimawh a, kan thinlunga kan tuh thar leh hi a pawimawh a ni. Chumi atan chuan kan *Chapchar Kut* pawh hi her danglam hret ni sela, tuna an tih dan hi a tunlai a, a modern a, a tha em em. Hmanlai chuan *Zu* nen an ti a, tunah chuan *Zu* a awm tawh lova, *Pathian-thu* nen, tawngtaina nen kan ti a, a tha reng, Pathian hla sak pawh a tha reng. Amaherawhchu a hun leh a hmun, ‘a hunah pawh, a hun loah pawh thu chu hril zel rawh’ tih chhuanlama, Pathian hla sak vak vak ringawt te, sakhaw lam hla sak vak vak te he hunah hi chuan a hun lovin ka hria. Chuvangin kan pi pu ten hla an lo phuah mawi tak tak, ram ngaih hlate, keimahni infuihna hlate, chona hlate, Pu Rokunga hla-ah te hian tam tak a awm a ni. Kan hnam hlapui –

*“Aw nang, kan Lal, kan Pathian, I hming ropui ber se,
I hmaa kan lo kun hian, kan dil ngaithla ang che.
Kan awmdan tur ngaihtuaha mipui kan inkhawmin,
Finna ropui min pe la, ro min rel sak ang che,”*

he hla te hi a hawnna hlaah kan zavai, mi sang tel khan han sa hup hup mai ila, YMA, nula leh tlangvalte min fuih tang turin, kan zavaia keimahni min fuih tang thei turin. Chutiang chuan thusawi zawhah, ‘concert type’ kan tih ang deuhah te pawh hian kan rilru kan ngaihtuahna -

*“Hnam lungmawl tual kan lenna
Vangkhua hmun hi zau mahseng;
Lung kan mawl e, rairah riang;
Lenrual duh te u, tho ru,
Raltiang i kai ve ang ..”*

tia, raltiang kai a hun tawh zia te vawiin nia kan thalai awm awl mai mai, zing thawhna chang hrelo, mutna chang hrelo hetiang hote pawh hian taihmak an zir leh theihna tur atana infuihna hla tha lutuk a ni. Chutiang lo pawh Pu Rokunga hla-ah chauh nilo, hla dangte pawh tamtak a awm a ni. entirnan:

*“Vawiin chuan ram tuan kan rel e, vangkhaw zauvah;
Lawm lungrual kan ngir e, chhuahtlang mual mawiin,
Kallai relin lamtluang kan zawh, vangkhaw daiah,
Tin, kal zelin chawlhna hmun tlang kan thleng thin..”*

Huanlo ram kan han neih Pi leh Pu tena an lo hlimpui zia, an hnathawh hah hle mahse, kha khan hriselna a pe a, kha khan hlimna a rawn pe thin. Chutiang zawng zawng te chu kan hnam hian kan hriatchhuah leh theihna tur leh, khang kha chu a ve chauh a ni.

Chutiang tur chuan he kan rilruah hian, “thangtharte rilruah hian engtin nge kan tuh leh theih ang” tih ngaihtuahna, Art & Culture lam atang chuan kan lo nei a. Chutah chuanin tunah hian Chapchar Kut-a tlem te kan hman banga kha kan nei a, chu chu Aizawl leh a chhehvela mitea thleng phak a tam lo ang a, a tlem em mai a. Hemi intihsiak, kan rual ute hlapuah, Mizo culture zu phawkchhuak thei tur tam tak a awm a, chungte chu zir sela, kan YMA te nena tang hovin an zir ang a, an zir thawm chu an chhehvela rual u deuh leh naupangten an lo hria ang a, chutah tak chuanin khalam pang ngaihtuahna te pawh kha alo chhuak leh ang.

Chutiang chuan, Chapchar Kut lo awm leh turah chuan solo tura kan sawm te pawhin hla thlan bik neih hi tha ka ti tawh a. Khatiang lam hla, kan Mizo hla tha tak tak kha thlang ila, chutiang chuan ti ta ila, tunkum lo awm leh tur (Pathian khawngaihna zarah kan thleng leh turah ngai ila), chutiang anga kan inbuaitsaihna tur atan chuan

Aizawl mai nilo, Zoram pumah kan tih a ngai a, chutiang tur chuan Finance Department-ah pawh hian kan Chief Minister zahawm tak hian Art & Culture hi min ngaihsak hle a, ‘hnam tobul, hnam rohlu vawnthatna’ a ni tih a hrechiang em em a. Nikum hmasaah phei kha chuan pawisa kan budget-a awm lo chungin cheng nuai 100 kha kan budget bakah minrawn pe leh a ni. Chutiang ang chuan kuminah pawh hian kan budget-ah chuan tunah lang tlem hle mahsela, ‘a aia tam min pek belh leh ang’ tih hi kan ring a, kan beisei tlat a ni.

Aw le, Pu Speaker, dawhthei taka MLA zahawm tak tak ten ka thusawi min ngaihlak sak avang leh min phurpui avangin ka lawm em em a ni. (*..interruption..*)

PU LALDUHOMA : Pu Speaker, nichina Lawngtlai kawnglaih chungchang kha thil serious tak mai a ni a, a hriat pawh a hrehawm a, hetiang hi. Ka hriatsual loh chuan, “CBI-in kan lo chhui ang e an ti a, Mizoram sorkar hian a phal lo” tih hi ka hriatdan a ni a. Heng thil hi anih ang hian mipui hian hria ila, a tuar tuarin tuar sela. Chutianga kan kal ngam hi a hun tawh ka ti a. Kan sawi vak a, mahse sorkar ngeiin CBI chhui a phal leh si lo lai kha a buaithlak lai chu a ni.

PU R. LALZIRLIANA, MINISTER: A tha khawp mai kha kha. Kei pawh ka duhdan chiah a ni. CBI a thlen hi ka hre reng reng lova, ACB report kha kan hmuh ve chhun a ni mai a. A deptt. neitu ber thleng lova CBI an lo thleng anih chuan, in hre thei bik riau a ni ang e. Pu Speaker, ka department (**Pu C. Ngunlianchunga** : he document hi ka pe a. A chhan chu khami chungchang kha a pawimawh viau a ni, renga na. Hei hi State sorkar, DC & MA inrawlh avanga pawisa, hnathawk thalo an pek duhloh avang khan meeting an nei a. Hei, meeting minute a awm vek a. DC & MA Pu Speaker, an thawh thatloh avangin pawisa an pe lova, chu an pawisa pekloh chu DC & MA in chhuah turin a tih ve) Secretariat lam ni lovin, LADC leh a contractor-te thawhho that theihloh avanga saw hna saw tunah sawn thawk thei lo anni. Chuvangin, he sorkar mawhpurna tur pakhatmah a awm lo khatah khan. “Khalai pawisa beisei ve te khan helai pawisa hi an beisei ve zawk avangin helai hian interest an nei em ni” tih te pawh, khatianga an tang anih chuan, tih ngaihtuahnaah a lo awm bawka ni. Chuvangin, helai hian Pu Speaker, ministry hi rinhlelh tur pakhatmah a awm lo. (*interruption*)

PU C. NGUNLIANCHUNGA: A chhan chu, DC & MA hova Dist. Council ten hna a thatloh avanga pawisa an pek duhloha kha, DC & MA-ah an zuk zualko a, meeting DC & MA Secretary ho in an nei a. Chutah chuan, pawisa hi pe turin an ti a, an tih luihna vangin an pe a. Dist. Council-in a hlau a, a pelo ngam lo a ni. Chu zawk chu a ni e.

PU R. LALZIRLAINA, MINISTER : Tichuan, Pu Speaker, ka Demand-te: -

Demand No.	Department	Amount (in ₹)
23	Art & Culture	11,59,75,000.00
27	District Council & Minority Affairs	4,92,03,14,000.00
33	Land Resources, Soil & Water Cons.	19,80,57,000.00
39	Power & Electricity	6,44,88,03,000.00
TOTAL		11,68,31,49,000.00

House-in min pass pui turin ka rawn ngen e.

SPEAKER : Awle, tunah chuan kan Minister zahawmtak Pu R. Lalzirliana'n a hna chanpualte –

Demand No.	Department	Amount (in ₹)
23	Art & Culture	11,59,75,000.00
27	District Council & Minority Affairs	4,92,03,14,000.00
33	Land Resources, Soil & Water Cons.	19,80,57,000.00
39	Power & Electricity	6,44,88,03,000.00
TOTAL		11,68,31,49,000.00

House ah pass a rawn dil a. Remtiin, 'Remti' ti rawh ule. Remtilo kan awm chuan, 'Remtilo' ti ula. (*Remti lo an awm lo*)

Awle tunah chuan Minister zahawm tak Pu R Lalzirliana department-te hman tur Demand No. 23, 27, 33 leh 39, a vaia belhkhawm ₹11,68,31,49,000/- hi House-in lungrual takin a pass ta a ni. (**Pu R. Lalzirliana, Minister:** Pu Speaker, ka lawm e).

SPEAKER : Awle, vawiina tana kan tihtur chu kan zo leh ta a, kan chawl leh ang a, naktuk Ni 8 March, 2022 (thawhlehi) 10:30 AM-ah kan thukhawm leh dawn nia.

Sitting is adjourned. (10:40 PM)